

PA

8520

F7

1782



Fracastoro, Girolamo

HIERONYMI
FRACASTORII,
ET
MARCI ANTONII
FLAMINII
CARMINA,

QUIBUS IN HAC EDITIONE

*Accessere alia quamplurima ex illustribus
aliquot Poetis desumpta, nempe*

*COTTA, BONFADIO, FUMANO, ARCHI COMITE,
BEMBO, NAUGERIO, CASTILIONIO,*

Et aliis pluribus.



BASSANI, MDCCLXXXII.

SED PROSTANT
VENETIIS APUD REMONDINI.

Superiorum Permissu, ac Privilegio.





TYPOGRAPHUS
BENEVOLO LECTORI.

EX quo nobis præclaras aliquot editiones iterum demandare luci feliciter obtigit, illud semper fixum animo, ac statutum voluimus; ut si quid præ manibus esset, quod ad studiosorum hominum excitandos animos conducere videretur, id sedulo nostris excudi prælis toto animo, diligentiaque incumberemus. Libentius itaque aliquid identidem adgredimur, quia superioribus annis, quæ ob insignium virorum oculos opera posuimus, ea ipsis nostro incredibili gaudio accepta, jucundaque fuisse semper animadvertimus. Idque plane fuit, ut nullus omnino dubitandi locus relinqueretur, quin huic etiam perutili admodum volumini nostram operam daremus: quod quidem potiori juré, quam cetera,

non nostro solum, sed communi omnium
 iudicio, universam sibi conciliaturum exi-
 stimationem est, tum propter Fracasto-
 rii, & Flaminii Carmina, quæ in ipso
 præcipuum locum obtinent, tum etiam,
 quod huic nonnulla selectiorum aliquot
 virorum addenda opuscula curavimus.
 Ea tibi, Humanissime Lector, commen-
 dari per nos non oportet; nam hi qui-
 dem magnam sibi apud omnes auctorita-
 tem per se satis vindicant. Illud unum
 itaque optandum nobis est, ut studium
 in te nostrum hisce in proferendis editio-
 nibus cognitum tibi, acceptumque sit:
 ut benevolentia, qua hunc, qualiscum-
 que est, laborem exceperis, maiorem
 nobis injiciat animum, præstantiores post-
 hac semper in re litteraria comparandi
 tibi utilitates. Vale.

Quæ hoc Volumine continentur.

P istola ad Lectorem.	pag. 3
H ieronymi Fracastorii Syphilidis, sive de morbo Gallico, libri tres.	7
J oseph libri duo.	36
C arminum Liber.	63
C armina Illustrium Poetarum ad Fracasto- rium, vel de Fracastorio; nempe Anto- nii Marii, Joannis Baptiste Amaltbei, Adami Fumani, Ludovici Nogarolæ Co- mitis, Julii Cesaris Scaligeri, & Jo. Matthæi Toscani.	106
C arminum Propbanorum Marci Antonii Flaminii libri septem.	111
E jusdem Sacrorum Carminum liber, qui & octavus.	291
S electa Illustrium Poetarum Carmina ad Flaminium, vel de Flaminio, nempe Joannis Antonii Flaminii, auctoris pa- tris, Joannis Antonii Vulpii Comensis, Basilii Zanchi, Achillis Phil. Boccbii, Joannis Plazonii, Bernardini Parthenii, Salmonii Macrini, Francisci Vinthe, Francisci Arfilli Senogalliensis, Joannis Casse, Joannis Baptiste Pignæ Ferrari- ensis, Adriani Cribelli Mediolanensis, A. Calemeri Plantinidæ, Joannis Matthæi Toscani, Gabrielis Flaminii Forocorne- liensis, auctoris Nepotis, Francisci Bz- nalii, & Joannis Cargæ.	309

<i>Joannis Cotta Carmina .</i>	320
<i>Aetii Synceri , & Jo. Matthæi Toscani Carmina de eodem .</i>	327
<i>Jacobi Bonfadii Carmina .</i>	328
<i>Paulli Manutii , & Joannis Matthæi Toscani Carmina de eodem .</i>	332. 333
<i>Adami Fumani Carmina .</i>	334
<i>Nicolai Archii Comitis Carmina .</i>	339
<i>Julii Cæsaris Scaligeri , & Joannis Matthæi Toscani Epigrammata duo .</i>	341
<i>Petri Bembi Carmina .</i>	342
<i>Andræ Naugerii Patritii Veneti Lusus Pastorales .</i>	353
<i>Balthassaris Castilionii Carminum liber .</i>	377
<i>Illustrium aliquot Poetarum Carmina ad Castilionum , vel de Castilione , nempe Benedicti Lampridii , Joannis Antonii Flaminii Forocorneliensis , Marci Antonii Flaminii , Livii Gregorii Gyraldi , Francisci Arfilli Senogalliensis , Joannis Plazonii , Basilii Zanchi , Julii Capilupi , Antonii Ceruti , Joannis Matthæi Toscani , & Marci Sticbini .</i>	398





HIERONYMI
FRACASTORII
SYPHILIDIS,
SIVE
DE MORBO GALLICO
AD PETRUM BEMBUM,
LIBER I.

QUI casus rerum varii, quæ semina morbum
Insuctum, nec longa ulli per sæcula visum
Attulerint: nostra qui tempestate per omnem
Europam, partimque Asiæ, Libyæque per urbes
Sæviit: in Latium vero per tristia bella
Gallorum irrupit, nomenque a gente recepit:
Necnon & quæ cura, & opis quid comperit usus,
Magnaque in angustiis hominum solertia rebus,
Et monstrata Deum auxilia, & data munera Cæli
Hinc canere, & longe secretas quærere causas
Aera per liquidum, & vasti per sidera Olympi
Incipiam: dulci quando novitatis amore
Correptum, placidi Naturæ suavis horti
Floribus invitant, & amantes mira Camœnæ.
BEMBE, decus clarum Ausoniæ, si forte vacare.
Consultis LEO te a magnis paullisper, & alta
Rerum mole finit, totum qua sustinet orbem:
Et juvat ad dulces paullum secedere Musas:
Ne nostros contemne orsus, medicumque laborem,
Quidquid id est. Deus hæc quondam dignatus Apollo est:
Et parvis quoque rebus inest sua sæpe voluptas.
Scilicet hac tenui rerum sub imagine multum

Naturæ, fatigue subest, & grandis origo.

Tu mihi, quæ rerum causas, quæ sidera noscis,
Et cæli effectus varios, atque aeris oras,
Uranie, (sic dum puro spatiaris Olympo,
Metirisque vagi lucentes ætheris ignes,
Concenta tibi divino cithæ sidera plaudant)
Ipsa ades, & mecum placidas, Dea, lude per umbras,
Dum tennes auræ, dum myrtea silva canenti
Aspirat, resonatque cavis Benacus ab antris.
Dic, Dea, quæ causæ nobis post secula tanta
Insolitam peperere luem? num tempore ab illo
Vestæ mari occiduo nostrum pervenit in orbem,
Ex quo læta manus solvens de litore Ibero
Ausæ fretum tentare, vagique incognita ponti est
Æquora, & orbe alio positas perquirere terras?
Illic namque ferunt æterna labe per omnes
Id morbi regnare urbes, passimque vagari
Perpetuo cæli vitio, atque ignoscere paucis.
Commercine igitur causa accessisse putandum est
Delatam contagem ad nos, quæ parva sub ipsis
Principiis, mox & vires & pabula sensim
Suscipiens, se se in terras diffuderit omnes?
Ut sæpe in stipulas cecidit quum forte favilla
De face, neglectam pastor quam liquit in arvo,
Illa quidem tenuis primum, similisque moranti
Incedit: mox, ut paulatim increvit eundo,
Tollitur, & viridæ messes populatur & agros,
Vicinumque nemo, flammæque sub æthera jactat:
Dat sonitum longe crepitans Jovis avia silva,
Et cælum late circum, campique relucet.

At vero, si rite fidem observata merentur,
Non ita censendum: nec certe credere par est
Esse peregrinam nobis, transque æquora vestam
Contagem: quoniam in primis ostendere multos
Possumus, attractu qui nullius hanc tamen ipsam
Sponte sua sensere luem, primique tulere.
Præterea & tantum terrarum tempore parvo
Contages non una simul potuisset obire.
Aspice per Latii populos, quique herbida Sagræ
Pascua, & Ausonios saltus, & Iapygis oræ
Arva colunt: spectæ, Tyberis qua labitur, & qua
Eridanus centum fluvii comitatus in æquor,
Centum urbes rigat, & placidis interfluit undis:
Uno nonne vides ut tempore pestis in omnes
Sævit? ut sortem pariter, translegimus unam?
Quinetiam externos eadem per tempora primum
Excepisse ferunt: nec eam cognovit Ibera
Gens prius, ignotum quæ scindere puppibus æquor

Ausæ

Ausa fuit, quam quos differrinat alta Pyrene,
 Atque freta, atque Alpes cingunt, Rheusque bicornis:
 Quam reliqui, quos lata tenet gelida ora sub Arcto.
 Tempore non alio, Poeni, sensitis, & omnes
 Qui lætam Ægyptum metitis, sæcundaque Nilo
 Arva, & palmiferæ silvas tondetis Idumes.
 Quæ quum sic habeant se se, nempe altius isti
 Principium labi, rerumque latentior ordo,
 (Ni fallor) graviorque subest, & major origo.

Principio quæque in terris, quæque æthere in alto,
 Atque mari in magno Natura educit in auras,
 Cuncta quidem nec sorte una, nec legibus iisdem
 Proveniunt, sed enim, quorum primordia constant
 E paucis, crebro ac passim pars magna creantur:
 Rarius ast alia apparent, & non nisi certis
 Temporibusve, locisve, quibus violentior ortus,
 Et longe sita principia: ac nonnulla prius, quam
 Erumpant tenebris & opaco carcere noctis,
 Mille trahunt annos, spatiosaque secula poscunt,
 Tanta vi coeunt genitalia semina in unum.
 Ergo & morborum quoniam non omnibus una
 Nascendi est ratio, facilis pars maxima visu est,
 Et faciles ortus habet, & primordia præsto.
 Rarius emergunt alii, & post tempore longo
 Difficiles causas, & inextricabile fatum,
 Et sero potuere altas superare tenebras.
 Sic elephas sacer Ausoniis incognitus oris,
 Sic lichen latuere diu, quibus incola Nili
 Gens tantum, regioque omnis vicina laborat.

De genere hoc est dira lues, quæ nuper in auras
 Exiit, & tandem se se caligine ab atra
 Exemit, duosque ortus, & vincula rupit.
 Quam tamen (æternum quoniam dilabitur ævum)
 Non semel in terris visam, sed sæpe fuisse
 Ducendum est, quamquam nobis nec nomine nota
 Hactenus illa fuit: quoniam longæva vetustas
 Cuncta situ involvens, & res, & nomina delet:
 Nec monumenta patrum feri videre nepotes.

Oceano tamen in magno sub Sole cadente,
 Qua misera inventum nuper gens accolit Orbem,
 Passim oritur, nullisque locis non cognita vulgo est.
 Usque adeo rerum causæ, atque exordia prima
 Et cælo variare, & longo tempore possunt.
 Quodque illic fert sponte aer, & idonea tellus,
 Huc tandem annorum nobis longa attulit ætas.
 Cujus forte suo si cunctas ordine causas
 Nosse cupis, magni primum circumspecte mandi
 Quantum hoc infecit vitium, quot adiverit urbes.

Quumque animadvertas tam vastæ femina labis
 Esse nec in terræ gremio, nec in æquore posse,
 Haud dubie tecum statuas reputesque, necesse est,
 Principium, sedemque mali consistere in ipso
 Aere, qui terras circum diffunditur omnes,
 Qui nobis se se insinuat per corpora ubique,
 Suetus & has generi viventum immittere pestes.
 Aer quippe pater rerum est, & originis auctor.
 Idem sæpe graves morbos mortalibus affert,
 Multimode natus tabescere corpore molli,
 Et facile affectus capere, atque inferre receptos.
 Nunc vero, quonam ille modo contagia traxit,
 Accipe: quid mutare queant labentia sæcla.

In primis tum Sol rutilus, tum sidera cuncta
 Tellurem, liquidasque auras, atque æquora ponti
 Inmutant, agitantque; utque ipso sidera cælo
 Mutavere vicem, & sedes liquere priores,
 Sic elementa modis variis se grandia vertunt.
 Aspice, ut hibernus rapidos ubi flexit in Austrum
 Phœbus equos, nostrumque videt depressior orbem,
 Brumma riget, duratque gelu, spargitque pruina
 Tellurem, & gelida glacie vaga flumina sistit.
 Idem, ubi nos Cancro propior spectavit ab alto,
 Urit agros, arent nemora, & sitientia prata,
 Siccaque pulvereis æstas squallescit in arvis.
 Nec dubium, quin & noctis nitor, aurea Luna,
 Cui maria alta, omnis cui rerum obtemperat humor:
 Quin & Saturni grave fidus, & æquior orbi
 Stella Jovis: quin pulchra Venusque, & Martius ignis,
 Ac reliqua astra etiam mutant elementa, trahantque
 Perpetuum, & late magnos dent undique motus;
 Præcipue sedem si quando plurima in unam
 Convenere, suo vel multum devia cursu
 Longe alias tenuere vias: hæc scilicet annis
 Pluribus, & rapidi post multa volumina cæli
 Eveniunt, Diis fata modis volventibus istis.
 Ut vero evenisse datum est, numerumque diesque
 Exegere suos, præfixaque tempora fatis,
 Proh quanta acrios tractus, falsa æquora quanta,
 Telluremque manent! alibi quippe omnia late
 Cogentur spatia in nubes, cælum imbribus omne
 Solvetur, summisque voluti montibus amnes
 Præcipientes secum silvas, secum aspera saxa,
 Secum armenta trahent: medius pater impete magno
 Aut Padus, aut Ganges super & nemora alta, domosque
 Turbidus, æquabit pelago freta lata sonante.
 Æstates alibi magnæ condentur, & ipsæ
 Flumina speluncis fiebunt arentia Nymphæ.

Aut

Ant venti cuncta invertent, aut obice clausi
 Excutient tellurem imam, & cum turribus urbes,
 Forſitan & tempus veniet, poſcentibus olim
 Natura, fatiſque Deum, quum non modo tellus
 Nunc culta, aut obduſta mari, aut deſerta jacebit.
 Verum etiam Sol ipſe novum (quis credere poſſit?)
 Curret iter, ſua nec per tempora diſſuet annus,
 Aſt inſueti æſtus, inſuetaque frigora mundo
 Inſurgent, & certa dies animalia terris
 Monſtrabit nova, naſcentur pecudeſque feræque
 Sponte ſua, primaque animas ab origine ſument,
 Forſitan & majora audens producere tellus
 Cœumque, Enceladumque feret, magnumque Typhœa,
 Aufuros patrio Superos detrudere Cælo,
 Convulſumque Oſſan nemoroſo imponere Olympo:
 Quæ quum perſpicias, nihil eſt, cur tempore certo
 Admirere novis magnum marceſcere morbiſ
 Aera, contagæſque novas viventibus ægris
 Sidere ſub certo fieri, & per ſecula longa.

Bis centum fluxere anni, quum flammea Mæte
 Lumina Saturno triſti immiſcente, per omnes
 Auroræ populos, per quæ rigat æquora Ganges,
 Inſolita exarſit febris, quæ peſtore anhelò
 Sanguineum ſputum exagitans (miſerabile viſu)
 Quarta luce frequens fato perdebat acerbo.
 Illa eadem Aſſyriæ gentes, & Perſidos, & quæ
 Euphratem, Tigrinque bibunt, poſt tempore parvo
 Corripuit, diteſque Arabas, mollemque Canopum:
 Inde Phrygæſ, inde & miſerum trans æquora veſta
 Inſecit Latium, atque Europa ſæviit omni.

Ergo age jam mecum, ſemper ſe ſe æthera circum
 Volventem, Superumque domos, ardentiaque aſtra
 Contemplare, animumque agitans per cuncta require,
 Quis ſtatus illorum fuerit, quæ ſigna dedere
 Sidera, quid noſtris cælum portenderit anniſ:
 Hinc etenim tibi forte novæ contagis origo
 Omnis, & eventus tanti via prima pateſcet,
 Aſpice, candentes magni qua Cancer Olympi
 Excubat ante fores, & brachia pandit aperta,
 Hinc diræ facies, hinc ſe diverſa malorum
 Oſtendent portenta: una hac ſub parte videbiſ
 Magna coiſſe ſimul radiis ardentibus aſtra,
 Et conjuratas ſparſiſſe per aeræ flammas:
 Flammas, quas longe tumulo Sireniſ ab alto
 Proſpiciens ſenior Vates, quem dia per omnes
 Cælicolæque domos duxit, docuitque futura
 Uranie: miſeras, inquit, defendite terras,
 O Superi; inſolitam video per inania ferri

Illuviam, & magnos cali tabescere tractus.
 Bella etiam Europæ miseræ, bella impia, & agros
 Ausoniæ passim currentes sanguine cerno.
 Dixit, & illa etiam scriptis ventura notavit.

Mos Superum est, ubi secla vagus Sol certa peregit
 Ab Jove decerni fata, & cuncta ordine pandi,
 Quæcumque eventura manent terrasque, polumque.
 Quod tempus quum jam nostris venientibus annis
 Instaret, rerum summus fator, & Superum Rex
 Juppiter acciri socios in rebus agendis
 Saturnum, Martemque jubet: bipotentia Cancer
 Limina portarum referat, Diisque atria pandit.
 Conveniunt, quibus est fatorum cura gerenda.
 Impiger ante alios flammis ferroque cornescans
 Bellipotens Mavors, animis cui prælia & arma,
 Vindictæque manent, & ovantes sanguine cædes.
 Post placidus curru invehit rex Juppiter aureo
 Insequitur (ni fata obsent) pater omnibus æquus
 Postremus, longaue via tardatus & annis
 Falcifer accedit Senior, qui haud inimemor iræ
 In natum veteris, Nato & parere recusans,
 Sæpe etiam cessit retro, & vestigia torfit,
 Multa minans, multumque animo indignatus iniquo.
 Juppiter at folio ex alto, quo se solet uno
 Tollere, percenset fata, & ventura resolvit,
 Multum infelicis miserans incommoda terræ,
 Bellaque, fortunaque virum, casuraque rerum
 Imperia, & prædas, adaperitaque limina morti:
 In primis ignota novi contagia morbi:
 Morbi, qui humanæ nulla mansuescat opis vi.
 Assensere Dei reliqui: concussus Olympus
 Intremuit, taesusque novis defluxibus æther.
 Paullatim aerii tractus, & inania lata
 Accepere lumen, vacuasque insuetus in auras
 Marcor iit, cælumque tulit contagia in omne.
 Sive quod ardenti tot concurrentibus astris
 Cum Sole, e pelago multos terraque vapores
 Traxerit ignea vis, qui missi tenuibus auris,
 Correptique novo vitio, contagia visu
 Terrara attulerint: aliud sive æthere ab alto
 Demissum late aerias corruerit oras.

Quamquam animi haud fallor, quid agat, quoque
 ordine cælum,

Dicere; & in cunctis certas perquirere causas
 Difficile esse: adeo interdum per tempora longa
 Effectus trahit, interdum (quod fallere possit)
 Miscentur fors, & varii per singula casus.

Nunc age non id te lateat, super omnia miram
 Na-

Naturam, & longe variam contagibus esse.
 Solis nam sæpe arboribus fit noxius aer,
 Et tenerum germen, florumque infecit honorem:
 Interdum segetem, & sata læta, annique labores
 Corripuit, scabraque ulsit rubigine culmos,
 Et vitiata parens produxit semina tellus.
 Interdum pœnas animalia sola dedere,
 Aut multa, aut certa ex ipsis, memini ipse malignam
 Luxuriam vidisse anni, multoque madentem
 Autumnum perflatum Austro, quo protinus omne
 Caprigenum pecus e cunctis animantibus unum
 Corruit, a stabulis lætas ad pabula pastor
 Ducebat: tum forte, alta securus in umbra
 Dum caneret, tenuique gregem mulceret avena,
 Ecce aliquam tussis subito irrequieta tenebat,
 Nec longe via mortis erat: namque acta repente
 Circùm præcipiti lapsu, removensque supremam
 Ore animam, socias inter moribunda cadebat.
 Vere autem (dictū mirum) atque æstate sequenti
 Infirmas pecudes, balantumque horrida vulgus
 Pestis febre mala miserum pene abstulit omne.
 Usque adeo varia affecti sunt semina cæli,
 Et variæ rerum species, numerusque vicissim
 Inter mota subest, interque moventia certus.
 Nonne vides, quamvis oculi sint pectore anhelò
 Expositi mollesque magis, non attamen ipsos
 Carpere tabem oculos, sed se se immergere in imum
 Pulmonem? & pomis quamquam sit mollior uva,
 Non tamen iis vitiatur, ut ipsa livet ab uva.
 Nempe alibi vires, alibi sua pabula defunt:
 Ast alibi mora certa, nec ipsa foramina multum
 Non faciunt, hinc densa nimis, nimis inde soluta.
 Ergo contagium quoniam natura genusque
 Tam varium est, & multa modis sunt semina miris,
 Contemplator & hanc, cujus cælestis origo est:
 Quæ, sicut desueta, ita mira erupit in auras.
 Illa quidem non muta maris, turbamque natantum,
 Non volucres, non bruta altis errantia silvis,
 Non armenta bouum, pecudesve, armentave equorum
 Infecit, sed mente vicens ex omnibus unum
 Humanum genus: & nostros est pasta sub artus.
 Porro homine e toto, quod in ipso sanguine crassum
 Et sordens lentore foret, sædissima primum
 Corripuit, se se pascens uligine pingui.
 Tali se morbus ratione & sanguis habebant.
 Nunc ego te affectus omnes, & signa docebo
 Contagis miseræ: atque utinam concedere tantum
 Musa queat, tantumque velit defendere Apollo,
 Tem-

Tempora qui longa evoluit , cui carmina curæ ,
 Hæc multas monumenta dies ut nostra superfiat ,
 Forte etenim nostros olim legisse nepotes ,
 Et signa , & faciem pestis novisse juvabit .
 Namque iterum , quum fata dabunt , labentibus annis
 Tempus erit , quum nocte atra sopita jacebit
 Interitu data : mox iterum post secula longa
 Illa eadem exsurgat , cælumque aurasque reviset ,
 Atque iterum ventura illam mirabitur ætas .

In primis mirum illud erat , quod labe recepta ,
 Sæpe tamen quater ipsa suum compleverat orbem
 Luna prius , quam signa satis manifesta darentur .
 Scilicet extemplo non se se prodit aperte ,
 Ut semel est excepta intus , sed tempore certo
 Delitet , & sensim vires per pabula captat .
 Interea tamen insolito torpore gravati ,
 Sponteque languentes animis & munera obibant
 Ægrius , & toto segnes se corpore agebant .
 Ille etiam suus ex oculis vigor , & suus ore
 Dejectus color haud læta de fronte cadebat .
 Paullatim caries sordis enata pudendis
 Hinc atque hinc invicta locos , aut inguen edebat ,
 Tum manifesta magis vitii se prodere signa .
 Nam , simulac puræ fugiens lux alma diei
 Cesserat , & noctis tristes induxerat umbras ,
 Innatusque calor noctu petere intima suctus
 Liquerat extremum corpus , nec membra fovebat
 Obsita mole pigra humorum , tum vellier artus ,
 Brachiaque , scapulæque gravi , suræque dolore .
 Quippe , ubi per cunctas ierant contagia venas ,
 Humoresque ipsos , & nutrimenta futura
 Polluerant , Natura malum discernere sueta
 Insectam partem pellebat corpore ab omni
 Exterius : verum crasso quia corpore tarda
 Hæc erat , & lentore tenax , multa inter eundem
 Hærebat membris , exsanguibus atque lacertis .
 Inde graves dabat articulis extenta dolores .
 Parte tamen leviori , magisque erumpere nata ,
 Summa cutis pulsa , & membrorum extrema petebat .
 Protinus informes totum per corpus acores
 Rumpebant , faciemque horrendam , & pectora sœde
 Turpabant : species morbi nova : pustula summæ
 Glandis ad effigiem , & pituita marcida pingui :
 Tempore quæ multo non post adaperta dehiscens ,
 Mucosa multum sanie , taboque fluebat .
 Quinetiam erodens alte , & se funditus abdens
 Corpora pascebat misere : nam sæpius ipsi
 Carne sua exutos artus , squalentiaque ossa

Vidi.

Vidimus , & foedo rofa ora dehiscere hiatu ,
 Ora , atque exiles reddentia guttura voces .
 Ut sæpe aut cerasis , aut Phyllidis arbore tristi
 Vidisti pinguem ex udīs manare liquorem
 Corticibus , mox in lentum durescere gummi .
 Haud secus hac sua labe solet per corpora mucor
 Diffuere : hinc demum in turpem concreescere callum .
 Unde aliquis ver ætatis , pulchramque juventam
 Suspirans , & membra oculis deformia torvis
 Prospiciens , fœdosque artus , turgentiaque ora ,
 Sæpe Deos , sæpe astra miser crudelia dixit .
 Interea dulces somnos , noctisque soporem
 Omnia per terras animalia fessa trahebant :
 Illis nulla quies aderat , sopor omnis in auras
 Fugerat : iis oriens ingrata Aurora rubebat :
 Iis inimica dies , inimicaque noctis imago .
 Nulla Ceres illos , Bacchi non ulla juvabant
 Munera : non dulces epulæ , non copia rerum ,
 Non urbis , non ruris opes , non ulla voluptas ,
 Quamvis sæpe amnes nitidos , jucundaque Tempe ,
 Et placidas summis quæssissent montibus auras .
 Diis etiam sparsæque preces , incensæque templis
 Thura , & divitibus decorata altaria donis :
 Dii nullas audire preces , donisve moveri .

Ipse ego Cænomanum mentini qua pingua dives
 Pascua Sebina præterfuit Ollius unda ,
 Vidisse insignem JUVENEM , quo clarior alter
 Non fuit , Ausonia nec fortunatior omni :
 Vix pubescentis florebat vere juventæ ,
 Divitiis , proavisque potens , & corpore pulchro :
 Cui studia aut perniciis equi compescere cursum ,
 Aut galeam induere , & pictis splendere in armis ,
 Aut juvenile gravi corpus durare palæstra ,
 Venatuque feras agere , & prævertere cervos ;
 Illum omnes Ollice Dæ , Eridanique puellæ
 Optarunt , nemorumque Dæ , rurisque puellæ :
 Omnes optatos suspiravere hymenæos .
 Forfan & ultores Superos neglecta vocavit
 Non nequidquam aliqua , & votis pia Numina movit :
 Nam nimium fidentem animis , nec tanta timentem
 Invasit miserum labes , qua sævior usquam
 Nulla fuit , nulla umquam aliis spectabitur annis .
 Paullatim ver id nitidum , flos ille juventæ
 Disperit , vis illa animi : tum squallida tabes
 Artus (horrendum) miseros obduxit : & alte
 Grandia turgebant fœdis abscessibus ossa .
 Ulcera (proh Divum pietatem) informia pulchros
 Pascebant oculos , & diæ lucis amorem ,

Pasce-

Pascebantque aeri corrosas vulnere nares .
 Quo tandem infelix fato , post tempore parvo
 Ætheris invisas auras , lucemque reliquit .
 Illum Alpes vicinæ , illum vaga flumina sterunt :
 Illum omnes Ollique Deæ , Eridanique puellæ
 Fleverunt , nemorumque Deæ , rurisque puellæ :
 Sebinusque alto gemitum lacus edidit amne .

Ergo hanc per miseras terras Saturnus agebat
 Pestem atrox , nec sæva minus crudelis & ipse
 Miscebat Mavors , conjunctaque fata ferebat .
 Quippe lue hac nascente , putem simul omnia diras
 Eumenidas cecinisse fera & crudelia nobis .
 Tartareos etiam barathro dira omnia ab imo
 Excivisse lacus , Stygiaque ab sede laborem ,
 Pestemque , horribilemque famem , bellumque , nec-
 cemque .

Dii patrii , quorum Ausonia est sub numine , tuque
 Tu Latii , Saturne , pater , quid gens tua tantum
 Est merita ? an quidquam superest dirique gravisque ,
 Quod sit inhexaustum nobis ? ecquod genus usquam
 Aversum usque adeo cælum tulit ! ipsa labores ,
 Parthenope , dic præna tuos , dic funera regum ,
 Et spolia , & prædas , captivæque colla tuorum .
 An stragem infandam memorem , sparsumque cruorem
 Gallorumque , Italumque pari discrimine , quum jam
 Sanguineum , & defuncta virum , defunctaque equorum
 Corpora volventem , cristasque atque arma trahentem
 Eridanus pater acciperet rapido agmine Tarrum ?
 Te quoque spumantem , & nostrorum cæde tumentem ,
 Abdua , non multo post tempore , te pater idem
 Eridanus gremio infelix suscepit , & altum
 Indoluit tecum , & fluvio solatus amico est .

Ausonia infelix , en quo discordia priscam
 Virtutem , & mundi imperium perduxit avitum .
 Angulus anne tui est aliquis , qui barbara non sit
 Servitia , & prædas , & tristia funera passus ?
 Dicite vos , nullos soliti sentire tumultus ,
 Vitiferi colles , qua flumine pulcher amœno
 Eretheneus fuit , & plenis lapsurus in æquor
 Cornibus , Euganeis properat se jungere lymphis .

O patria , o longum felix , longumque quæta
 Ante alias , patria o Divum sanctissima tellus ,
 Dives opum , fecunda viris , lætissima campis
 Uberibus , rapidoque Athesi , & Benacide lymphæ ,
 Ærumnas memorare tuas , summamque malorum
 Quis queat ? & dictis nostros æquare dolores ,
 Et turpes ignominias , & barbara iussa ?
 Abde caput , Benace , tuo & te conde sub amne .

DE MORBO GALLICO LIBER I.

Vistrices nec jam Deus interlabere lauros.

En etiam, ceu nos agerent crudelia nulla,
Nec lacrimæ planctusve forent, en dura tot inter,
Spes Latii, spes & studiorum, & Palladis illa
Occidit: ereptum Musarum e dulcibus ulnis
Te miserum ante diem crudeli funere, MARCE
ANTONI, ætatis primo sub flore cadentem
Vidimus extrema positum Benacide ripa,
Quam media inter saxa sonans Sarca abluvit unda.
Te ripæ flere Atheſis, te voce vocare
Audire per noſtem umbræ manesque Catulli,
Et patrios mulcere nova dulcedine lucos.

Tempeſtate illa Auſoniam Rex Gallus opimam
Vertebat bello, & Ligurem ditione premebat.
Parte alia, Cæſar ferro ſuperabat & igni
Euganeos, placidumque Silim, Carnumque rebellem;
Et totum luſus Latium, mœrorque tenebat.

DE MORBO GALLICO.

L I B E R I I.

Nunc age, quæ vitæ ratio, quæ cura adhibenda
Perniciem adverſus tantam, quid tempore quoque,
Conveniat (noſtri quæ pars eſt altera cœpti)
Expeditam, & miranda hominum comperta docebo.
Quippe nova quum re attoniti, multa irrita primum
Tentaſſent, tamen anguſtis ſolertia major
In rebus, creſcensque uſu experientia longo
Evicere: datûmque hominî protendere longe
Auxilia, & certis peſtem compellere vinculis,
Viſtorem & ſe ſe claras attollere in auras.
Credo equidem & quædam nobis divinitus eſſe
Inventa, ignaros fatiſ ducentibus ipſiſ.
Nam, quamquam fera tempeſtas, & iniqua fuerunt
Sidera, non tamen omnino præſentia Divûm
Abſuit a nobiſ, placidi & clementia cæli.
Si morbum inſolitum, ſi dura & triſtia bella
Vidimus, & ſparſos dominorum cæde penates,
Oppidaque, incenſaſque urbes, ſubverſaque regna,
Et templa, & raptiſ temerata altaria ſacriſ:
Flumina deſectas ſi perrumpentia ripas
Evertere ſata, & mediis nemora eruta in undiſ,
Et pecora, & domini, correptaque rura natarunt:
Obſediriſque inimica ipſas penuria terras:
Hæc eadem tamen, hæc ætas (quod ſata negarunt
Antiquiſ) totum potuit ſulcare cariniſ
Id pelagi, immenſum quod circuit Amphiſtrite.

Nec

Nec visum satis extremo ex Atlante repositos
 Hesperidum penetrare sinus, Præsumque sub Arcto
 Inspectare alia, præruptaque litora Rhapti,
 Atque Arabo advehere, & Carmano ex æquore merces:
 Auroræ, sed itum in populos Titanidis usque est
 Supra Indum, Gangemque super, qua terminus olim
 Catygare noti Orbis erat: superata Cyambe,
 Et dites ebena, & felices macere silvæ.
 Denique & a nostro diversum gentibus Orbem,
 Diversum cælo, & clarum majoribus astris.
 Remigio audaci attigimus, ducentibus & Diis.
 Vidimus & Vatem egregium, cui pulchra canenti
 Parthenope, placidusque cavo Sebethus ab antro
 Plauserunt, umbræque sacri manesque Maronis;
 Qui magnos stellarum orbes cantavit, & hortos
 Hesperidum, cælique omnes variabilis oras.
 Te vero ut taceam, atque alios, quos fama futura
 Post mutos cineres, quos & venientia secla
 Antiquis conferre volent, at, BEMBE, tacendus
 Inter dona Deum nobis data non erit umquam
 Magnanimus LEO, quo Latium, quo maxima Roma
 Attollit caput alta, paterque ex aggere Tybris
 Assurgit, Romæque fremens gratatur ovanti.
 Cujus ab auspiciis jam nunc mala sidera mundo
 Cessere, & læto regnat jam Juppiter orbe,
 Puraque pacatum diffundit lumina cælum.
 Unus, qui ærumnas post tot, longosque labores
 Dulcia jam profugas revocavit ad otia Musas,
 Et leges Latio antiquas, restumque piæque
 Restituit: qui iusta animo jam concipit arma
 Pro re Romana, pro religione Deorum.
 Unde etiam Euphrates, etiam late ostia Nili,
 Et tantum Euxini nomen tremit unda refusi,
 Atque Ægæa suos confugit Doris in Isthmos.
 Ergo, alii dum tanta canent, dumque illius acta
 Inclyta component, dum forte accingeris & tu
 Condere, & æternis victurum intexere chartis,
 Nos, quos fata vocant haud tanta ad munera, iussus
 Inceptos, quantum tenuis fert Musa, sequamur.
 Principio, quoniam affecti non sanguinis una
 Est ratio, tibi sit morbo spes major in illo,
 Sanguine qui insedit puro: verum, quibus atra
 Bile tument, spissoque resultant sanguine venæ,
 Major in iis labor est, pestisque tenacius hæret.
 Quare opere pretium est validis atque acribus uti
 Omnibus hos contra, miseris nec parcere membris;
 Quinetiam meliora sibi promittere cuncta
 Ille potest, qui principiis novisse sub ipsis

Serpentem tacite valuit per viscera labem .
 Namque , ubi passa diu , vires per pabula longa
 Auxerit , & jam se vitium firmaverit intra ,
 Heu quanto tibi libertas speranda labore est !
 Ergo omnem impendes operam te opponere parvis
 Principiis , memorique animo hæc præcepta reconde .

In primis ego non omni te assuescere cælo
 Exhorter fuge , perpetuo quod statur ab Austro ,
 Quod cæno , immundæque grave est sudore paludis .
 Protenti potius campi mihi , liber & agri
 Tractus , & apricis placeant in collibus auræ ,
 Et molles Zephyri , pulsusque Aquilonibus aer :
 Hic (jubeo) tibi nulla quies , nulla otia sunt .
 Rumpe moras , agita assiduis venatibus apros
 Impiger , assiduis agita venatibus urfos .
 Nec tibi sit labor aerii cursu ardua montis
 Vincenti , rapidum in valles deffectere cervum ,
 Et longa lustrare altos indagine saltus .
 Vidi ego sæpe , malum qui jam sudoribus omne
 Finisset , silvisque luem liquisset in altis .
 Sed nec turpe puta dextram summittere aratro ,
 Et longum trahere incurvo sub vomere sulcum :
 Neve bidente solum , & duras proscindere glebas ,
 Et valida aeriam quercum exturbare bipenni ,
 Atque imis altam eruere ab radicibus ornum .
 Quinetiam , exercere domi quo te quoque possis ,
 Parvam mane pilam versa mihi , vespere versa .
 Et saltu , & dura potes exsudare palæstra .
 Vince malum : nec te fallat , quod desidis otii
 Assidue desiderium , lætique sequetur .
 Tu lecto ne crede , gravi ne crede sopori :
 His alitur vitium , & placidæ sub imagine pacis
 Decipit , e dulcique trahit fomenta quiete .
 Necnon interea effugito , quæ tristitia mentem
 Sollicitant : procul esse jube curasque , metumque
 Pallentem , ultricesque iras , omnemque Minervæ
 Addictum studiis animum : sed carmina , sed te
 Delectent juvenumque chori , mixtæque puellæ .
 Parce tamen Veneri , mollesque ante omnia vita
 Concubitus ; nihil est nocuum magis : odit & ipsa
 Pulchra Venus , teneræ contagem odere puellæ .

Quod sequitur , victus ratio tibi maxima habenda est ;
 Nec sit cura tibi , neve observantia major .
 Principio , quoscumque amnes , quoscumque paludes ,
 Quosque lacus liquidi pascunt , quosque æquora , pisces ,
 Omne genus procul amoveo ; sunt , quos tamen usus
 Liberius , quam res cogit , concedere possit .
 Omnibus his est alba caro , non dura , tenaxque ,
 Quos

Quos petraë , & fluviorum adversa marisque fatigant :
 Tales nant pelago phycides , rutilæque per undas
 Auratæ , gobique , & amantes saxea percæ .
 Talis dulcissimum fluviorum scarus ad ora
 Solus saxa inter depastus ruminat herbas .
 Sed neque , quæ stagnis volucres , quæque amnis altis
 Degere amant , liquidisque cibum perquirere in undis ,
 Laudarim : tibi pinguis anas , tibi crudior anser
 Vitetur , potiusque vigil Capitolia servet :
 Viteturque gravi coturnix tarda sagina .
 Tu teneros lactes , tu pandæ abdomina porcæ ,
 Porcæ heu terga fuge , & lumbis ne vescere aprinis ,
 Venatu quamvis toties confeceris apros .
 Quin neque te crudas cucumis , non tubera captent ,
 Neve famem cinara , bulbisve salacibus exple ,
 Non placeat mihi lactis amor , non usus aceti ,
 Non fumosa mero spumantia pocula Baccho ,
 Qualia Cynzæ colles , campique Falerni ,
 Et Pucinus ager mittunt : aut qualia nostris
 Rhetica dat parvo de collibus uva racemo .
 Nempe Sabina magis placeant , dilutaque tellus
 Quæ tulit , & multo domuerunt Naiades amne .
 At , tibi , si ex horto victus , mensæque Deorum
 Sunt animo , atque olerum simplex & incerta voluptas ,
 Non mentæ virides , non læta sisymbria desunt ,
 Intibaque , & toto florentes frigore sonchi ,
 Et siæ fontanis semper gaudentia rivis ,
 Et thymbraë suaves , & odorifera calaminthæ :
 Lætæ meliphylla , & riguo buglossus ab horto
 Carpentur , plenisque feras erucula palmis .
 Atque olus , atque rumex , & falsi gramina chrichmi .
 Ipsa lupum dumeta ferent ; hinc collige primos
 Asparagos , albæ asparagos hinc collige vitis ,
 Quam nondum explicuit ramos , umbracula nondum
 Texuit , & virides iussit pendere corymbos .
 Singula sed longum est , nec percensere necesse ,
 Jamque aliud vocor ad munus ; juvat in nova Musas
 Naturæ nemora Aoniis deducere ab umbris :
 Unde mihi si non e lauro intexere fronti
 Serta volent , tantaque caput cinxisse corona ,
 At saltem observata hominum tot millia , dignum
 Censuerint querna redimiri tempora fronde .
 Vere novo , si quem morbus tenet , aut & in ipso
 Autumno , si firma ætas , si sanguis abundat ,
 Regalem , medianve lacerti incidere venam
 Proderit , atque extra fodatum haurire cruorem :
 Præterea , quocumque habeat te tempore pestis ,
 Corruptum humorem , & contagem educere turpem .
 Ne

Ne pigeat, facillique suum deponere ab alvo.
Ante tamen ducenda para, concreta resolvè,
Et crassa attenua, & lentore tenacia frange.

Ergo Coryciumque thymum sit cura, thymumque
Pamphylium, thymbrae similis qui durior exit,
Prima tibi coxisse, lupique volubile gramen,
Foeniculumque, aptumque, & amari germina capni.
His polyporum hirtos imitata filicula cirros
Additur, & lymphis tangi renuens adiantus:
His sterile asplenium, his pistam phyllirida junge.
Quorum ubi decoctum permultis ante diebus
Fibiberis, crudumque intus incoxis omnem,
Tum scilla medicare acri, & colocythide amara,
Helleboroque gravi, necnon quæ in litore surgens,
Qua ludit maris unda, ter evariata colorem,
Ter flores mutata die, rem nomine signat,
Herba potens radice, suum cui zinziber adde:
Adde etiam anguineum cucumin, Nabathæaque tura,
Myrramque, bdellamque, hammoniacique liquorem,
Et lacrimam panaceam, & dulci Colchica bulbo.

His actis, si forte tibi frigentia corda,
Et molles animi fuerint, nec acerba placebit,
In primis tentare, brevique extinguere pestem,
Sed placidis agere, & per tempora lenibus uti,
Tum superest tibi cura animum ad fomenta relin-
quere, contagisque ad tenuia semina cæcæ,
Illa quidem consueta modis interspere miris.
Profuerint igitur, quæque exsiccantia, quæque
Mârcori resinosa solent obfistere putri.
Tales sunt myrrhæ lacrimæ, sunt talia tura,
Cedrusque, aspalathusque, immortalisque cypressus,
Et bene cum calamo spirans redolente cyperus.
Ergo nec desint casia, nec desit animum,
Macerve, agallochumve tibi, nec cinnama odora.
Est etiam in pratis illud, juxtaque paludes
Scordion, omnigenis quod tantum obfata venenis,
Contagisque solet, parvo quærenda labore
Herba tibi: viret ipsa comis imitata chamædrym,
Flore rubens, referensque alli cum voce saporem.
Aurora nascente hujus frondemque coniantem
Radicesque coque, atque haustu te prole largi.
Sed neque carminibus neglecta silebere nostris,
Hesperidum decus, & Medarum gloria, citre,
Silvarum: si forte sacris cantata Poetis
Parte quoque hac medicam non dedignabere Musam.
Sic tibi sit semper viridis coma, semper opaca,
Semper flore novo redolens: sis semper onusta
Per viridem pomis silvam pendentibus aureis.

Ergo,

Ergo, ubi nitendum est cæcis te opponere morbi
Seminibus, vi mira arbor Cithereia præstat,
Quippe illam Citherea, suum dum plorat Adonim,
Munere donavit multo, & virtutibus auxit.

Quorundam inventum est, vitrei intra concava vasis,
Cui collum oblongum est, venter turgescit in orbem;
Aut hedere folia, aut Ida mittente maniplos
Distamni, Illyricanive irim, rhamnive nigram
Radicem, aut inulas coquere: in sublime solutus
Effertur vapor, & tenuis vacua omnia complet.
Ast, ubi frigenti occursum ab aere vitro,
Cogitur, & rorem liquidus densatur in udum,
Decurritque vagis per aperta canalina rivis.
Destillantis aquæ Cyathum sub lumina prima
Luciferi potare jubent, stratisque parare
Sudorem, nec certe ab re: vis utilis olli est,
Reliquias morbi tenues dispergere in auras.

Interea, si membra dolor convulsa malignus
Torqueat, cæsypo propera lenire dolorem,
Mastichinoque oleo: lentum quibus anseris unguen,
Emulsumque potes lini de semine mucum,
Narcissumque, inulamque, liquentiaque addere mella,
Coryciumque crocum, & vilem componere amurcam.
At, fauces atque ora malus si eroserit harpes,
Tange nitro, & viridi medicata ærugine lymphæ
Semina inure mala, & serpentem interfice pestem.

Verum ipsos ope non alia consumere achores,
Urentum quam vi, poteris, quibus addere debes
Pingue aliquid, quod secum intus siccantia portet.
Hæc eadem, & miseros artus si qua ulcera pascunt
Tollere, concretosque valebunt solvere callos.

Si vero aut hæc nequidquam tentasse videbis,
Aut vires animique valent ad sortia quæque,
Nec differre cupis, qui te committere acerbis
Festines, diramque brevi consumere pestem,
Hinc alia inventa expediam, quæ tristitia quanto
Sunt magis, hoc tanto citius finire labores
Ærumnasque mali poterunt: quippe effera labe
Inter prima tenax, & multos fomite vivax
Nedum se haud vinci placidis & mitibus, at nec
Trastrari sinit, & mansuescere dura repugnat.
Sunt igitur styracem in primis qui, cinnabarimque,
Et minium & stymmi agglomerant, & tura minuta,
Quorum suffitu pertingunt corpus acerbis,
Absumuntque luem miseram, & contagia dira.
At vero & partim durum est medicamen & acre,
Partim etiam fallax, quo faucibus angit in ipsis
Spiritus, elustansque animam vis continet ægram.
Quo.

Quocirca totum ad corpus nemo audeat uti
Iudice me: certis fortasse erit utile membris,
Quæ papulæ informes, Chironiaque ulcera pascunt.
Argento melius persolvunt omnia vivo
Pars major: miranda etenim vis insita in illo est.
Sive quod id natum est subito frigusque caloremque
Excipere, unde in se nostrum cito contrahit ignem,
Quodque est condensum, humores dissolvit, agitque
Fortius, ut candens ferrum flamma acrius urit:
Sive acres, unde id constat compagine mira,
Particulæ nexuque sua vinclisque solutæ
Introrsum, ut potuere seorsum in corpora ferri,
Colliquant concreta, & semina pestis inurant:
Sive aliam vim fata illi, & Natura dedere.
Cujus & inventum medicamen munere Divum
Digressus referam, quis enim admiranda Deorum
Munera prætereat? Syriæ nam forte sub altis
Vallibus, umbrosi nemora inter glauca salisti,
Callirhoe qua fonte sonans decurrit amœno,
Fama est cultorem Diis sacri agrestibus horti,
Cultorem nemorum, sectatoremque ferarum,
Ilcea labe gravem tanta, dum molle cyperum,
Et cassiam, & silvam late fragrantis amomi
Irrigat, hæc orasse Deos, & talia satum:

Dii, quos ipse diu colui, tuque optima tristes,
Callirhoe, quæ sancta soles depellere morbos,
Cui nuper ramosa ferens ego cornua cervi
Aeria victor fixi capita horrida quercu:
Dii, qui crudelem misero si tollere pestem
Hanc dabitis, quæ me afficiat noctesque diesque,
Ipse ego purpureas, ipse albas veris & horti
Primitias, vobis violas, ego lilia vobis
Alba legam, primasque rosas, primosque hyacinthos,
Vestraque odoratis onerabo altaria fertis.
Gramen erat juxta viridans. Sic fatus, ut æstu
Fessus erat, viridi desedit graminis herba.
Hic Dea, vicino quæ se se fonte lavabat,
Callirhoe liquido ex antro per lubrica musca
Saxa fluens, juveni dulci blandita susurro,
Lethæum immisit somnum, sparsitque sopore
Graminea in ripa, & salicum nemus inter opacum.
Atque illi visa est sacro se flumine tollens
In somnis coram esse, pia & sic voce locuta:
Ilceu, in extremo Diis tandem audite labere,
Cura mei, tibi nulla salus, quacumque videt Sol,
Speranda est terram magnam super, hoc tibi poenæ
Dat Trivia, & precibus Triviæ exoratus Apollo,
Ob sacrum jaculo percussum ad flumina cervum.

Et

Et nostris affixa tibi capita horrida truncis.
 Nam, postquam illa feram exanimem per gramina vidit
 Abscisso capite, & sacro sparsa arva cruore,
 Omnibus ingemuit silvis, dirumque precata est
 Auctori; oranti Latous tanta Sorori
 Affuit, & pestem misero immisere nefandam
 Durus uterque tibi: quin & quacumque videt Sol,
 Interdixit opem: quare tellure sub ima,
 Si qua salus superest, cæca sub nocte petenda est.
 Est specus arboribus testum, atque horrore verendum
 Vicina sub rupe, Jovis qua plurima silva
 Accubat, & raucum reddit coma cedria murmur.
 Huc, ubi se primis Aurora emittet ab undis,
 Ire para, & nigrantem ipsis in faucibus agnam
 Mactato supplex, atque, Ops tibi maxima, dic, hanc,
 Dic, serio; nigram tum Noctem, umbrasque silentes,
 Umbrarumque Deos, ignotaque numina Nymphas
 Et thya venerare, atræ & nidore cupressi.
 Hic tibi narranti causam, auxiliumque vocanti
 Haud aberit Dea, quæ cæcæ in penetralia terræ
 Deducat te sancta, & opem tibi sedula præstet.
 Surge age, nec vani speciem tibi concipe somni.
 Illa ego sum, quæ culta vago per pingua fonte
 Dilabor, Dea vicinis tibi cognita ab undis,
 Sic ait, & se cæruleo cita condidit amne.

Ille autem, ut placidus cessit sopor, omnia lætus
 Accipit, & Nympham precibus veneratur amicam.
 O sequor, o quocumque vocas, pulcherrima fontis
 Vicini Dea, Callirhoe. Tum postera primum
 Exsurgens Aurora, suos ubi protulit ortus,
 Monstratum Jovis in silva sub rupibus altis
 Antrum ingens petit, & nigrantem tergora primo
 Vestibulo sistit pecudem, magnæque trementem
 Mactat Opi, tibi que, inquit, ego hanc, Ops maxima, macto.
 Tum Noctem, Noctisque Deas, ignota precatur
 Numina, jamque simul thyan, atramque cupressum
 Urebat, quum vos terræ revoluta cavernis
 Longe audita sacras Nympharum perculit aures:
 Nympharum, quibus æra solo sunt condita curæ.
 Extemplo commotæ omnes, ac cœpta reponunt,
 Sulphureos forte ut latices, & flumina vivi
 Argenti, mox unde nitens concreveret aurum,
 Trahebant, gelidoque prementes fonte coquebant.
 Centum ignis spissi radios, centum ætheris usti,
 Bis centum concretorum terræque marisque
 Miscuerant, nostros fugientia semina visus.

At Lipare, Lipare, argenti cui semina, & auri
 Tura data, & sacrum flammis adolere bitumen:

Con-

ontinuo obscuræ latebrosa per avia terræ
 cea adit, firmanſque animum ſic incipit ipſa :
 Ilceu (namque tuum nec nomen, nec mihi labes
 nota eſt, nec, quid venias) jam corde timorem
 xue, nequidquam non te huc caſſima mittit
 allirhoe, tibi parte ſalus tellure ſub ima eſt.
 tolle animos, & me per opaca ſilentia terræ
 ſequere : ipſa adero, & præſenti numine ducam,
 ic ait, & ſe antro gradiens præmittit opaco.
 Ile ſubit, magnos terræ miratus hiatus,
 quallentesque ſitu æterno, & ſine lumine vaſtas
 peluncas, terramque neantia flumina ſubter. (eſt
 um Lipare hoc quodcumque patet quam maxima terra
 tunc totum ſine luce globum, loca ſubdita nocti
 ſii habitant : imas retinet Proſerpina ſedes.
 flumina ſupremas, quæ ſacris concita ab antris
 n mare per latas abeunt reſonantia terras.
 n medio dites Nymphæ, genera unde metalli.
 Eriſque, argentiſque, auriſque nitentis origo :
 Quorum ego nunc ad te miſerans ipſa una Sororum]
 Advenio, illa ego, quæ venas per montis hiantes,
 Callirrhœ haud ignota tuæ, ſumantia mitto
 Sulphura : ſic ibant terra & caligine teſſi,
 ſamque exauditi crepitantes ſulphure flammæ,
 Concluſique ignes, ſtridentiaque æra caminis.
 Hæc regio eſt late, variis nbi ſœta metallis.
 Virgo ait, eſt tellus : quorum vos tanta cupido
 Exercet, ſuperas cœli qui cernitis auras.
 Hæc loca mille Deæ cæcis habitamus in antris.
 Noſte Deæ & Tellure ſatræ, queis munera mille.
 Millie artes, ſtudio eſt aliis deducere rivos.
 Scintillas aliis rimati, & ſparſa per omnem
 Semina tellurem flammæ, igniſque coruſci.
 Materiam miſcent aliæ, maſſamque coercent
 Obſcibus, multa & gelidarum inſpergine aquarum.
 Non procul eruptis ſumantia teſta caminis
 Ætnæi Cyclopes habent, verſantque, coquuntque
 Vulcano ſtridente, atque æra ſonantia cindunt.
 Læva hæc abſtruſam per iter via ducit ad illos.
 Dextera ſed ſacri fluvii te ſiſet ad undam.
 Argento ſuitantem undam, vivoque metallo,
 Unde ſalus ſperanda, & jam aurea teſta ſubibant.
 Rorantesque domos ſpodiis, fuligineque atra
 Speluncas varie obduſtas, & ſulphure glauco.
 Jamque lacus late undantes, liquidoque fluentes
 Argento juxta aſſabant, ripasque tenebant.
 Hic tibi tantorum requies inventa laborum.
 Subſequitur Lipare, poſtquam ter flumine vivo

Fracæſt. Carm.

B

Per-

Perfusus, sacra vitium omne reliqueris unda.
 Sic fatur; simul argenti ter fonte salubri
 Perfundit; ter virgineis dat flumina palmis
 Membra super, juvenem toto ter corpore lustrat
 Mirantem exuvias turpes, & labe maligna
 Exutos artus, pestemque sub amne relictam.

Ergo age, quum primum cæli te purior aer
 Accipiet, nitidamque diem, Solemque videbis,
 Sacra para, & castam supplex venerare Dianam,
 Indigenasque Deos, & Numina fontis amici.

Sic Virgo, & juvenem tanto pro munere grates
 Solventem e nocte ætherias educit in oras,
 Dimittitque alacrem, atque optata in lumina reddit.

Accepit nova fama fidem, populosque per omnes
 Prodiit haud fallax medicamen: cœptaque primum
 Misceri argento fluitanti axungia porcæ.
 Mox etiam Oriciæ simul adjuncta est terebinthi,
 Et laticis resina aeris; sunt, qui unguen equinum,
 Ursinumve adhibent, bdellæ, cedrique liquorem.
 Nonnulli & myrrhæ guttas, & mascula tura
 Adjiciunt, miniumque rubens, & sulphura viva.
 Haud vero mihi displiceat, componere si quem
 Trita melampodia, atque arentem juverit irim,
 Galbanaque, & lasser grave olens, oleumque salubre
 Lentisci, atque oleum haud experti sulphuris ignem.

His igitur totum oblinere, atque obducere corpus
 Ne obscœnum, ne turpe puta: per talia morbus
 Tollitur, & nihil esse potest obscœnius ipso.
 Parce tamen capiti, & præcordia mollia vita.
 Tum super, & vittas astringe, & stuppea nocte
 Vellera: dein stratis tegmento imponere multo,
 Dum fudes, fœdæque suant per corpora guttæ.
 Hæc tibi bis quinis satis est iterasse diebus.

Durum erit: at quidquid tulerit res ipsa, ferendum est.
 Aude animis, tibi certa salus stans limine in ipso
 Signa dabit: liquefacta mali excrementa videbis

Affidue sputo immundo fluitare per ora,
 Et largum ante pedes tibi mirabere flumen.

Ora tamen fœda erodent ulcuscula: sed tu
 Lacte fove, & costis cytini, viridisque ligustri.

Tempore non alio generosi pocula Bacchi
 Annuerim sumenda tibi, parumque Falernum,

Et Chia, & pateris spumantia Rhetica largis.

Sed jam age vicinæ visor gratare salutis:

Ultima adest tibi cura, eadem & placidissima, corpus
 Abluere, & lustrare artus, ac membra piare

Stoechade, amaracinisque comis, & rore marino,
 Verbenaque sacra, & bene olentibus heracleis.

DE MORBO GALLICO

LIBER III.

Sed jam me nemora alterius felicia Mundi,
 Externique vocant saltus: longe assonat æquor
 Herculeas ultra metas, & littora longe
 Applaudunt semota: mihi nunc magna Deorum
 Munera, & ignoto deveſta ex Orbe canenda
 Sancta arbor, quæ ſola modum requiemque dolori,
 Et finem dedit ærumnis; age, Diva, beatum,
 Uranie, venerare nemus, crinesque revinctam
 Fronde nova, juvet in medica procedere palla
 Per Latium, & ſanctos populis offendere ramos:
 Et juvet haud umquam noſtrorum ætate parentum
 Viſa prius, nullive umquam memorata referre,
 Unde aliquis forſan novitatis imagine mira
 Captus, & heroas, & grandia dicere facta
 Aſſuetus, canat auspiciis majoribus auſas
 Oceani intaſti tentare pericula puppes.
 Necnon & terras varias, & flumina, & urbes,
 Et varias memoret gentes, & monſtra reperta:
 Dimenſasque plagas, altoque orientia cælo
 Sidera, & inſignem ſtellis majoribus Arcton.
 Nec taceat nova bella, omnemque illata per Orbem
 Signa novum, & poſitas leges, & nomina noſtra.
 Et canat (auditum quod vix venientia credant
 Secula) quodcumque Oceani compleſſitur æquor
 Ingens, omne una obitum menſumque carina.
 Felix, cui tantum dederit Deus; at mihi vires
 Arboris unius ſatis eſt, uſumque referre:
 Et quo inventa modo fuerit, noſtrasque ſub auras
 Advena per tantum pelagi pervenerit æquor.
 Oceano in magno, ardenti ſub ſidere Cancri,
 Sol ubi ſe nobis media jam nocte recondit,
 Hac ignota tenus, tractu jacet inſula longo.
 Hiſpanam gens inventrix cognomine dixit:
 Auri terra ſerax: ſed longe ditior una
 Arbore: voce vocant patrii ſermonis Hyæum.
 Ipſa teres, ingensque, ingentem vertice ab alto
 Diffundit ſemper viridem, ſemperque comantem
 Arbuteis ſilvam foliis: nux parva, ſed acris
 Dependet ramis, & plurima frondibus hæret.
 Materia indomita eſt, duro & pene æmula ferro
 Robora, quæ reſinam ſudant incenſa tenacem.
 Diſſeſta color haud ſimplex, in cortice lauri
 Exteriore viret levor; pars altera pallet
 Buxea: at interior nigro ſuffuſca colore eſt.

Juglandemque, ebumque inter, quod si inde ruberet;
 Jam poterat variis æquare coloribus Irim.
 Hanc gens illa colit, studioque educere multo
 Nititur: hac late colles campique patentes,
 Hac omnis vestitur ager: nec sanctius illis
 Est quidquam, aut potiore usa: quippe omnis in illa
 Spes jacet hanc contra pestem, quæ cælitus illic
 Perpetua est: validos abjecto cortice ramos
 Multa vi tundunt, aut in segmenta minuta.
 Elimant, puroque scobes in fonte reponunt,
 Dum bibulas noctemque diemque emaceret humor.
 Inde coquunt: nec non illos ea cura fatigat,
 Vulcano ne forte furens erumpat aquæ vis,
 Et superundantem spumam proijcet in ignes.
 Spuma quippe linunt, si quidquam e corpore toto
 Abscedit, si quidquam ægros depascitur artus.
 Dimidia absumta, superest quodcumque, reponunt,
 Divini laticis: quin & segmenta reliqua
 Rursus, ut ante, coquunt, addentes suaveliquens mel.
 Scilicet hunc unum mensis accedere potum
 Et lex ipsa jubet gentis, mandatque sacerdos.
 Servatum at laticem, & decocti pocula primi
 Bina die quaque assumunt, quum surgit ab ortu
 Lucifer, & sero egreditur quum Vesper Olympo.
 Nec prius abstant potu, quam menstrua cursum
 Luna suum, & totum peragrans perfecerit orbem,
 Fraternalque iterum convenerit æmula bigas.
 Interea cæcis se se penetralibus abdunt,
 Quo neque vis venti, non halitus aeris ullus
 Insinuet se se, & gelidis afflatibus obsit.
 Quid mirandum æque memorem, super omnia visum
 Quam tenuem, quam magna sibi jejunia poscant?
 Quippe solet satis esse, ipsum dum corpus alatur:
 Dum superest vita, & tantum ne membra fatiscant.
 Ne tamen ah ne tanta time, sacer illicet haustus
 Ille modo ambrosiæ, vires rescitque fovetque,
 Inque occulta gerit jejunis pabula membris.
 Nectare ab epoto binas, non amplius, horas
 Imponunt se se stratis, medicamen ut intro
 Large eat, & calido sudorem e corpore ducat.
 Interea vacuas pestis vanescit in auras;
 Et (dictu mirum) apparet jam pustula nulla:
 Jamque nomæ cessere omnes, jam fortia liquit
 Membra dolor, primoque redit cum flore juvena:
 Et jam Luna suum remeans nova circuit orbem.
 Quis Deus hos illis populis monstraverit usus:
 Qui demum & nobis casus, aut fata tulere
 Hos ipsos: unde & sacræ data copia silvæ,
Nunc

Nunc referam. Miffæ quæfitum abscondita Nerci
 Æquora, in occafum, Solisque cubilia, pinus
 Littoribus longe patriis, Calpeque reliâis.
 Ibant Oceano in magno, pontumque fecabant.
 Ignaræque viæ, & longis erroribus aâæ.
 Quas circum innumeræ properantes gurgite ab omni
 Ignoti nova monftra maris Nereides udæ
 Adnabant: celfas miratæ currere puppes,
 Salfa fuper piâis volitantes æquora velis.

Nox erat, & puro fulgebat ab æthere Luna,
 Lumina diffundens tremuli per marmora ponti,
 Magnanimus quum tanta heros ad munera fatis
 Delectus, dux errantis per cæcula classis,
 Luna, ait, o, pelagi cui regna hæc umida parent,
 Quæ bis ab aurata curvaffi cornua fronte,
 Curva bis expleffi, nobis errantibus ex quo
 Non ulla apparer tellus, da littora tandem
 Afpicere, & dudum speratos tangere portus,
 Noâis honos, cælique decus, Latonia Virgo.
 Audiit orantem Phœbe, delapfaque ab alto
 Æthere, fe in faciem mutat, Nereia qualis
 Cymothoe, Clothoque natant, juxtaque carinam
 Aftitit, & fummo pariter naus æquore fatur:
 Ne noâæ dubitate rates: lux craffina terras
 Oftendet, fidoque dabit succedere porto.
 Sed vos littoribus primis ne infiftite: dudum
 Ultra fata vocant: medio magna infula ponto
 Eft Ophyre: huc iter eft vobis; hic debita fedes
 Imperiique caput; fimul hæc effata, carinam
 Impulit: illa levi cita diffeccat æquora curfu.
 Aspirant faciles auræ, & jam clarus ab undis
 Surgebat Titan, humiles quum furgere colles
 Umbrofi procul, & propior jam terra videri
 Incipit: acclamant nautæ, terramque falutant,
 Terram exoptatam, tum portu & littore amice
 Excepti, Diis vota piis in littore folvunt.
 Quaffatafque rates, defeffaque corpora curant.
 Inde, ubi quarta dies pelago, crepitanfque vocavit
 Vela Notus, remis infurgitur, altaque rurfum
 Corripiunt maria, & læti freta cæcula fulcant.
 Linq'itur incerto fluitans Anthyllia ponto,
 Atque Hagia, atque alta Ammerie, exfecrataque tellus
 Cannibalum, & ripa Gyane nemorofa virenti.
 Protinus innumeræ panduntur turribus altis
 Infulæ Oceano in vaffo, quas inter opacis
 Undantem filvis unam, curfuque fonantem
 Fluminis afpiciunt, magno qui fumeus alveo
 In mare fulgentes auro fubveftat arcuas.

Hujus in ora placet pronas appellere puppes .
 Invitant nemora , & dulces e flumine lymphæ .
 Jamque solo viridante alacres , ripaque potiti
 In primis Terram ignotam , Nymphasque salutant
 Indigenas , Geniumque loci , teque , aurifer Amnis ,
 Quisquis in ora maris nitida perlaberis unda .
 Tum duram Cererem , & patrii carchesia Bacchi
 Aggere in herbofo expediunt : dein quærere , si qui
 Mortales habitent : pars fulvam fluminis undam
 Mirari , mixtamque auro disquirere arenam .
 Forte per umbrosos silvarum plurima ramos
 Assidue volitabat avis , quæ picta nitentes
 Cæruleo pennas , rostro variata rubenti
 Ibat nativo secura per avia luo .
 Has juvenum manus ut silvas videre per altas ,
 Continuo cava terrificis horrentia bombis
 Aera , & flammiferum tormenta imitantia fulmen
 Corripiunt , Vulcane , tuum , dum Theutonas armas ,
 Inventum , dum tela Jovis mortalibus affers .
 Nec mora , signantes certam sibi quisque volucrem ,
 Inclusam , salicum cineres , sulphurque . nitrumque
 Materiam accendunt servata in reffe favilla .
 Fomite correpto diffusa repente furit vis
 Ignea circumsepta , simulque cita obice rupto
 Intrusam impellit glandem : volat illa per auras
 Stridula : & exanimes passim per prata jacebant
 Dejectæ volucres : magno micat ignibus aer
 Cum tonitru , quo silva omnis , ripæque recurvæ ,
 Et percussa imo sonuerunt æquora fundo .
 Pars avium nemus in densum contrerrita , & altos
 Se recipit scopulos : quorum de vertice summo
 Horrendum una canit (dictu mirabile) & aures
 Terrificis implet dictis , ac talibus infit :
 Qui Solis violatis aves , sacrasque volantes ,
 Hesperiiis , nunc vos , quæ magnus cantat Apollo ,
 Accipite , & nostro vobis quæ nuntiat ore .
 Vos , quamquam ignari , longum quæsitæ , secundis
 Tandem parta Ophyraë terigistis littora ventis .
 Sed non ante novæ dabitur summittere terras ,
 Et longa populos in libertate quietos ,
 Molirique urbes , ritusque ac sacra novare ,
 Quam vos infandos pelagi terræque labores
 Perpeffi , diversa hominum post prælia , multi
 Mortua in externa tumuletis corpora terra .
 Navibus amissis pauci patria arva peteris ,
 Frustra alii socios quæretis magna remensi
 Æquora : nec nostro decerunt Cyclopes in Orbe .
 Ipsa inter se se vestras Discordia puppes

In rabiem ferrumque trahet : nec sera manet vos .
 Illa dies , foedi ignoto quum corpora morbo
 Auxilium silva miseri poscetis ab ista ,
 Donec poeniteat scelerum : nec plura loquuta
 Horrendum stridens densis se se abdidit umbris .
 Ollis ossa rigor subitus percurrit , & omnis
 Palluit , ac gelida fugit formidine sanguis .
 Tum vero sacras volucres , Divosque precati ,
 In primis Solem , & sanctum servantia lucum
 Numina supplicibus venerantur agrestia votis :
 Pacem orant , rursusque Ophyren , fluviumque salutant .
 Interea e silvis nigrum genus ora comasque ,
 Ad naves nova turba virum concurrat inermis ,
 Pectora nudi omnes , evincti frondibus omnes
 Paciferis ; tanta qui celsas mole carinas
 Mirati , vestesque virum , fulgentiaque arma ,
 Vix satis expleri possunt : & ab æthere missi
 Sive homines , sive heroes sint , sive Deorum
 Numina , adorantum ritu , precibusque salutant .
 Ante alios ipsum regem ; cui munera læta ,
 E ripis collectum aurum , & cerealia dona ,
 Et patrios fructus , & mella liquentia portant .
 Vestibus ipsi etiam nostris , & munere multo
 Donati , exceptique nero nova gaudia miscent .
 Non aliter , quam si mensis dapibusque Deorum
 Mortalis quisquam adscitus , felixque futurus ,
 Hauriat æternum , cælestia pocula , nectar .

Ergo , ubi amicitiae securos foedere utrimque
 Firmavere animos , habita & commercia gentis .
 Ipsi inter se se reges in littore læti
 Complexu jungunt dextras , & foedera firmant .
 Alter gossipio tenui pectusque femurque
 Præcinctus , viridi limbum pingente smaragdo ,
 Ora niger : jaculo armatur cui dextera acuto ,
 Squamosi spoliū sustentat læva draconis .
 Alter at intexto lænam circumdatus auro ,
 Quam subter rutila arma micant , capiri ærea cassis
 Insidet , & pictæ volitant in vertice cristæ :
 Fulgenti ex auro torques cui candida colla
 Cingunt , atque ensis lateri dependet Iberus .
 Et jam commixti populi , hospitioque recepti ,
 Hi testis domibusque , altis in navibus illi ,
 Læticia ludisque dies per pocula ducunt .

Fortē loco lux festā aderat , Solique parabant
 Ulteri facere umbroso sacra annua luco ,
 Hesperiaeque , Ophyraeque manus convenerat omnis .
 Hic convalle cava , ripae viridantis in herba ,
 Selectorum ingens numerus , matresque virique

Et mala jam vulgo cunctas diffusa per urbes
 Pests erat, regi nec sava pepercerat ipsi.
 Itur ad Ammericen silva in Cartheside Nympham,
 Cultricem nemorum Ammericen, quæ maxima luo
 Interpres Divum responsa canebat ab alto.
 Scitantur, quæ causa mali, quæ cura superfit.
 Illa refert: spreti vos, o vos numina Solis
 Exercent, nulli fas est se æquare Deorum
 Mortalem; date tura Deo, & sua ducite sacra,
 Et Numen placate; iras non proferet ultra.
 Quam tulit, æterna est, nec jam revocabilis umquam
 Pests erit: quicumque solo nascetur in isto
 Sentiet: ille lacus Stygios, fatumque severum
 Juravit: sed enim, si jam medicamina certa
 Expetitis, niveam magnæ mastate juvencam
 Junoni, magnæ nigrantem occidite vaccam
 Telluri: illa dabit felicia semina ab alto:
 Hæc viridem educet felici e semine silvam:
 Unde salus: simul obtulit: specus intus, & omne
 Excussum nemus, & circum stetit horror ubique.
 Illi obeunt mandata: sua ipsi altaria Soli
 Instituant: niveam, Juno, tibi, magna, juvencam,
 Nigrantem, Tellus, mastant tibi, maxima, vaccam,
 Mira edam: (at Divos iuro, & monumenta parentum)
 Hæc sacra, quam nemore hoc toto vos cernitis, arbor,
 Ante solo numquam fuerat quæ cognita in isto,
 Protinus e terra virides emittere frondes
 Incipit, & magna campis pubescere silva.
 Annua confestim Soli facienda sacerdos
 Ultori nova sacra canit: deducitur ipse
 Sorte data, qui pro cunctis cadat unus ad aram,
 Syphilus: & jam farre sacro, vittisque paratis
 Purpureo stabat tincturus sanguine cultros:
 Tutatrix vetuit Inno, & jam mitis Apollo,
 Qui meliorem animam miseri pro morte, juvencum
 Supposuere, feroque solum lavere cruore.
 Ergo ejus facti æternum ut monumenta manerent,
 Hunc morem antiqui primum statuere quotannis
 Sacrorum: ille tum testatur, Syphile, crimen,
 Victimæ vana, sacras deductus pastor ad aras.
 Illa omnis, quam cernis, inops miserandaque turba
 Tacta Deo est, veterumque luit commissæ parentum
 Cui votis precibusque piis numerisque sacerdos
 Confiliat vates Divos, & Apollinis iras.
 Lestrati ingentes ramos, & robora sanctæ
 Arboris advestant testis: libamine cujus
 Vi mira infandæ labis contagia pellunt.
 Talibus, atque aliis tempus per multa trahebant.
 Diver-

Diversis populi commixti e partibus orbis .
 Interea , Europæ fuerant quæ ad carâ remissæ
 Littora , jam rursus puppes freta lata remensæ
 Mira ferunt : late (proh fata occulta Deorum !)
 Contagem Europæ cælo crebrescere eandem ,
 Attonitasque urbes nullis agitare medelis ,
 Quinætiâ gravior naves ut rumor in omnes ,
 Illo eodem classẽ morbo , juvenumque teneri
 Haud numerum exiguum , & totis tabescere membris .
 Ergo haud immemores , diras cecinisse volucres ,
 Affore , quum silva auxilium poscatur ab illa ,
 Continuo faciles Nymphas , solemque precati ,
 Infracti nemoris ramos , & robora ab alto
 Convestare parant luco , medicataque fumunt-
 Pocula , pro ritu gentis quo munere tandem
 Contagem pepulere feram , quin dona Deorum ,
 Haud patriæ obliti , & felicem ad littora silvam
 Nostra jubent ferri , cælo si forsitan isto
 Assimilem pellant labem : nec fata secundos
 Ipsa negant Zephyrds , facilisque aspirat Apollo .
 Munera vos Divum primû accepistis , Iberi ,
 Præfens mirati auxilium : nunc cognita Gallis ,
 Germanisque , Scythisque , orbe & gavisâ Latino
 Jam nunc Europam vesta est Huyacus in omnem .
 Salve , magna Deum manibus fata semine sacro ,
 Pulchra comis , spectata novis virtutibus arbor :
 Spes hominum , externi decus , & nova gloria mundi .
 Fortunata nimis , natam si Numina tantum
 Orbe sub hoc , homines inter gentemque Deorum
 Perpetua sacram voluissent crescere silva .
 Ipsa tamen , si qua nostro te carmine Musæ
 Ferre per ora virum poterunt , hac tu quoque parte
 Nosceris , cæloque etiam cantabere nostro .
 Si non te Bastrâ , & tellus extrema sub Arcto ,
 Non Meroe , Libycisque Ammon combustus arenis ,]
 At Latium , at viridis Benaci ad flumina ripa
 Audiet , & molles Athesi labentẽ recessus .
 Et sat erit , si te Tiberini ad fluminis undam
 Interdum leget , & referet tuâ nomina BEMBUS ,

F I N I S .



H I E R O N Y M I
E R A C A S T O R I I
J O S E P H ,
A D A L E X A N D R U M F A R N E S I U M
L I B E R I .

Q UÆ veterum Heroum , divæ , facta inclita ,
Musæ ,

Et monumenta ævi longis obscura tenebris
Illustrare novis numeris , & carmine sacro
Ferre per ætates omnes , perque ora nepotum
Gaudetis , famamque virum proferre sub auras ,
Nunc , o , nunc populi illius , quem maximus unum
Delegit Deus , & generis longo ordine ducti
Principe ab Abramo , veteres evolvite fastos :
Et Juvenem cantate pium , quem magnus Jacob
Isacides genuit : dederat cui nosse futura
Per somnos monstrata Deus : vos dicite , quanta
Ille tulit , Phariis tandem dum victor in oris
Imperium gereret magnum , populumque beatum
Conderet : unde salus hominum , spes unde futura
Vitæ erat , & clausi referandum limen Olympi .

Nec minus , Italiæ Juvenis decus (omnia quando ,
Quæ canimus , tua , FARNESI , sunt maxima iussa)
Ipse ades , & , plenum scopulis dum currimus æquor ,
Da faciles in vela auras , da numine dextro
(Namque Deus mihi semper eris) tua grandia vota
Posse sequi , pelagique omnes superare labores .
En , primas fulcantem undas me littora Joppes ,
Me juga Samariæ , nemorosæque pascua Sichen ,
Jordanisque vocat : curvis en vallibus Hebron
Applaudit , cæloque simul tua nomina tollit ,
Responsatque Tabor voces , & sidera pulsat .

Noverat infernus Pluton , cui multa futuri est
Scire datum , in fatis Abrami e sanguine sacram
Progeniem terris promitti , Tartara per quam
Evertenda forent : metuenti talia Pastor
Rexque idem Sichenus erat suspectus Jacob ,

Iuvi-

Invisusque nimis : tum quod nec sanctius alter
 Justitiam legemque Dei servaret , & aris
 Tura daret : tum quod bisseña prole beatus
 Natorum , populum in sanctum concrescere solus
 Posse videbatur : quare hanc intentus in unam
 Progeniem , dabat omnem operam , quo perdere posset
 Præsertim egregium puerum , cui sidera fausta
 Nascenti , & late felix arriserat æther .
 Qui patre longævo Rachele e conjuge cara
 Natus , erat patri ante alios dilectus Joseph .
 Hunc forma insignem Charites studia inter alebant
 Ingenua , & mores , & avitæ legis amorem .
 Cui mens alta inerat quædam divina futuri ,
 Atque animus semper summi admirator Olympi ,
 Et pia religio , & puero prudentia major .

Ex his invidiam Dæmon taciturnique ferebat
 Fratribus in reliquis odium , & mortale venenum .
 Nec tantis non ipsa malis Fortuna fovendis
 Affuit , augendisque odiis : nam forte per æstum
 Quum fraterna cohors pecudes ad pabula nota
 Lanigeras una silvas duxisset in altas ,
 Illicæque umbra residerent , primus Joseph
 In fratres conversus ait : mea somnia , fratres ,
 Audite , illa quidem mira , & , nisi me mea fallunt
 Auguria , haud vani speciem referentia somni .
 Namque , sub Auroram quum se se sidera condunt
 Casura jam nocte , & solus nuntiat ortum
 Lucifer , ipse meas spicas offerre videbar
 Sacras ante aras , pariter vos ponere vestras .
 Sed nostri cælum fasces se tollere in altum ,
 Et rutilam insignes late diffundere lucem :
 Vestri autem obscuri , atque humile summitteres se se ,
 Urpote adorantes nostros . Cui grandior annis ,
 Atque odio in puerum non parvo accensus Judas ,
 Vane puer , quid mira vocas tua somnia ? numquid
 Forte , inquit , Deus illa aliquis , tibi mittit ab alto ?
 Credo equidem , nam vina Deum dicuntur habere .
 Augurium quodnam somno tibi fingis ab isto ?
 An forsan Rex noster eris ? tibi pone coronam
 E lauro , noceant regi né vina futuro .

Talia dicenti fratrum quoque cetera turba
 Adclamant , regemque novum , dominumque salutant ,
 Et puero illudunt , tum patri hæc somnia narrant .

At senior , cui non aberat Deus , omnia mente
 Evolvit tacita , atque in nato grande futurum
 Nescio quid spectans , aliis tamen omnia vultu
 Dissimulat , puerumque monet nos ludere somnos .

Ille autem , cui fata Deus majora parabat ,

Post

Post paullo in somnis aliud quid pondere majus
 Conspexit: nempe in celsa sibi sede locato
 Sub pedibus Solem ac Lunam stellasque minores
 Undique adorantes divinos reddere honores.
 Quorum ille interpres, (talem nam Numina mentem
 Indiderant) rursus fraternas omnia ad aures
 Detulit: illi autem non celavere parenti
 Somnia, non offensum animum, non pectora amara.

Obstupuit primum genitor, puerumque vocatum
 His, velut interpres somni, duro increpat ore:
 Te ne igitur pater ac mater fratresque, ait, & plebs
 Omnis adorabit? tu sede locabere in alta,
 Nos infra viles humilesque precabimur? ah te
 Si malus hic error tenet, & spes impia nutrit,
 Pone animum hunc, levibusque istis & inanibus umbris
 Tolle fidem, teque his fallacibus eripe monstris:
 Quæ Dii, si mala sunt & iniqua, immittere nobis
 Non fuisse boni, ac potius mala Numina, Manes
 Inferni exitium in nostrum ludibria fingunt.
 Sic falsa ex adytis referunt oracula, sic &
 Auguria ex avibus, dissectis omina ab extis.
 An tibi non Belus, non est tibi notus Anubis,
 Atque Ops, atque Hecate, non cetera turba Deorum,
 Quos miseræ Gentes aris, templisque dicatis
 Ob responsa colunt, lex autem nostra prophanat?
 Vade age, & hæc nobis posthac ne somnia perfer.
 Sic ait, & natos alios per dulcia mulcens
 Dicta pater, jubet in Sichen, saltusque virentes
 Ducere molle pecus, puerum consistere Joseph
 Se penes: expediunt juvenes mandata paterna,
 Felicesque Hebron valles, & amæna vireta
 Invisunt: sed non virides in vallibus herbæ,
 Non umbræ nemorum, placidæve e collibus auræ,
 Non volucrum cantus inimica insomnia possunt
 Ex animis delere: eadem per singula versant,
 Exacuuntque odia, atque iræ laxantur habenæ,
 Injunguntque minas: diræ serpentibus atris
 Eumenides instant: atque hæc per talia jam Sol
 Condiderat geminos ortus, quum luce sequente
 Castra movere parant, Dothainque in pascua læta
 Ducere oves, quo plus patriis ab ovilibus absint,
 Producantque magis reditum, quæ invisa gerebant.

Ergo aliam atque aliam solito plus sorte morati
 Quum traherent cum nocte diem, miratus abesse
 Hos tantum genitor, confestim accersit Joseph:
 Ique, ait, o mihi care puer, fratresque require
 In Sichen, patrique refer, quæ causa morandi.
 Nam timeo, ne quid male factum evenerit illis,

Aut

Aut pecori . Ille viam, nulla est mora, corripit, & jam
Advolat in Sichen : sed fratribus & grege nusquam
Compertis , quid agat , dubius huc spectat & illuc ,
Omnia collustrans oculis : modo nomine fratres
Magna voce vocat : tantum nemora alta vocanti
Respondent , vallesque cavæ . Forte ilicis altæ
Fron dator ramorum aderat , qui , ut vidit anhelum
Ancipitemque sui puerum , noto obvius illi ,
Quid quæris , puer ? inquit : oves si forte paternas ,
Si fratres , ne quære istis in vallibus illos ,
Quandoquidem audivi dicentes , saltibus ex his
In Dothain cedamus : ibi fratresque pecusque
Invenies : dein monstrat iter , qua tramite recto
Ocyus inveniat lætissima pabula , namque
Plurima pars exusta arct , nec gramina nutrit .
Ille datum festinat iter : jamque ultima Sichen
Emensus , Dothain latus propiora tenebat ,
Quum specula longe venientem vidit ab alta
Plena odii fraterna cohors , ac protinus , en Rex
Noster , ait , quem Sol , quem Luna , & sidera adorant .
Nos famuli viles ad pastoralia nati ,
Per desertâ die rabido sub Sole vagamur :
Nocte in speluncis , patulave sub arbore somnos
Captamus , testi rude lana & pellibus hirtis ,
Despecti , vilique polenta , & flumine passi .
Ille patris mensa virgata in veste recumbens
Lactibus hædorum , & lumbo pinguescit ovili ,
Repleturque mero : tum stertens impia nobis
Somniat : huncne igitur , fratres , atque ista serenus
Opprobriâ ? anne adeo cæci expectabimus , ut jam
Grandior , atque animis fidens & patris amore
Nos premat , & ditionem omnem & fausta omnia patris
Surripiat , sic vera nimis sua somnia reddens ?
Heu fratrum ignaræ mentes , & pectora cæca !
Cur potius , dum testis abest , dumque omnia nobis
Dant animos , non hunc capimus ? cur protinus istis
Consoffum gladiis , puteo non condimus illo ,
Qui prope contegitur dumis & sentibus atris ?
Dicemusque fame rabidorum ursive lupive ,
Qui multi desertâ habitant hæc , dente peremptum .
Talia jactabant inter se se cætera fratres
Consilia : at , cunctis aderat qui major & annis ,
Et major pietate Ruben , Dii talia nobis
Avertant , ait : ah vestras ne sanguine , fratres ,
Fraterno maculate manus , neve ira Deorum
Hoc velit , ut scelus ob tantum nos , & domus , & grex
Una omnes pereamus : abest si testis , at ipse
Est testis Deus : ipse Deus , quem nulla latere

Facta

Facta queunt, quique hic & nos nunc spectat, & audit.
 Si tamen est animus vobis secludere prorsus
 Hunc puerum, sine cæde ejus, sine sanguine in illum.
 Trudite vicinum puteum, & dimittite satis.
 Hæc vero suadebat, uti jam cæde remota
 Mox ipse ad puteum sera jam nocte rediret,
 Extraheretque illum, & misero sua pignora patri
 Redderet, ac fratrum tandem componeret iras.
 Verba omnes movere: placet sine cæde prehensum
 Projicere in puteum, & miserum dimittere sorti.
 Tum Ruben, a vobis fuerint quæcumque peracta,
 Horum me infontem videat Deus: ac procul inde
 Discessit, silvisque latens se condidit altis,
 Visurus rerum eventum: & jam lætus Joseph
 Festinans aderat: contra fratrum impia turba
 Circumsufa ruit minitans, manibusque revinctis
 Nunc, inquit, tua vana tibi quid somnia profint,
 Aspicias: numquid regi parebimus omnes?
 Ille pavens, stupidusque rei novitate precari,
 Talia ne infonti facerent, Superosque vocare
 Nequidquam: quando impatiens magis & magis urget
 Crescens corde furor, facibus furialis Erynnis
 Instat atrox, Dæmonque malus, qui oblistere satis
 Posse putans, cunctorum aciem vertebat in unum.
 At puer, ut nullis precibus, nullisve moveri
 Fratrum corda videt lacrimis, sed jam impete multo
 Compelli in foveam, quod restat, lumina tollens
 In cælum, tales fundebat ad æthera questus:
 Dii Abrahæ, Dii magni Isac, Dii patris Jacob,
 Vos ego si sancte colui, si iussa paterna
 Semper obii, semperque pie & sine crimine vixi,
 Aspiciate: & si fata mihi nunc ultima dant, ut
 Jam moriar, miserum saltem servate parentem.
 At vos o, tenere, fratres, quos semper amavi,
 Majoresque habui, curate, hæc tristia ad aures
 Ne patris adveniant, sed me rapuisse latrones
 Dicite, quo saltem spe se soletur inani
 Viventis nati, Stygias nec tendat ad umbras,
 Ante diem: deserta ipse cumulat arena
 Emoriar: lacrimæ dicenti talia fuscæ
 Ex oculis cecidere, simul voxque ipsa repressa est.
 Et jam etiam fratrum sedari pectus & ira
 Cœperat, Isachar quum, ne desistite, fratres
 Dixit, ab incepto, quin vindictum & fure ligatum
 In foveam mittamus: ibi suspensus in imo
 Sistatur fundo, donec meliora parent Dii
 Consilia, atque cibum interea capiamus in herba,
 Quandoquidem jam Sol invitat, & altior hora.

Assen-

Assensere omnes dictis, puerumque revinctum
Ad puteum flentem dicunt: hic fane ligata
Arboris ad truncum pendens desuper altæ
Demittunt pavitantem intro, fundoque relinquunt
Suspensum: aut ipsi circum per gramina fusi
Implentur vili cerere, & carioride pingui.

At Deus, ætherio terras qui spectat ab axe,
Infantem aspiciens, illo & miseratus amore,
Quo mare, quo terras, quo cælum condidit altum,
Unum ex aligeris, qui circum mille, Ministris,
Exspectant mandata, vocat: fidissime, & inquit,
Vade age, Samaritamque tibi notissima dudum
Arva pete, &, quem seīs satis ad magna vocari
Isaciæ puerum, qui cæco poscit ab antro
Auxilium, & fraterna odia & sacra impia plorat,
Hunc inopem solare: nec est mandare necesse,
Quæ referas, cui nota mea est & aperta voluntas.
Sic ait, & nutu placido, quo fidera cursu
Perpetuo ducit, Juvenem dimittis: at ille
Ætherias humeris accingit tenuibus alas,
Queis cælum illasum penetrat, queis nubila tranat,
Prævertitque fuga Zephyros: jamque æthera scindens,
Ætios tractus, & inania lata secabat.
Qualis, ubi in liquidis stagnis, aut ardea longe est,
Aut albus conspectus olor, sacer accipitrum rex
Post varios gyros sublimis ab æthere lapsus
Immotis fecat alta ruens oculo ocypus alis.
Inpete non alio Volueer cælestis adibat
Samaritæ terras: Primus quem vertice summo
Excepit Tabor, insuctum frondescere silvas,
Miratus, terramque nova vestirier herba,
Et varios præter solitum summittere flores.
Excepere illum prognatæ monte Napæ,
Et divina Deo cecinerunt: omnia rupes
Responsant, ipsa antra Deum, silvæque salutant.
At sacer Interpres Divorum, ut vertice ab alto
Lumina deflexit terris, ac gramine fufos
Vescentesque videt fratres, aut inde camelos
Mercatorum Arabum spectat, Jovis omnia sacra
Imperio, hinc animum ad miserum convertit Joseph,
Descenditque celer: puteique in margine summo
Ut scitit, extemplo nova lux effulsit in antro,
Miratum & subitus puerum circumstetis horror.
Quem pius Interpres placida sub imagine, & ipso
Ore puer puerum dictis solatur amicis.
Pone metum, Diis care, patrum Deus ille tuorum,
Qui cælum regit, huc alto me ex æthere mittit,
Qui referam mandata tuos solantia luctus.

Nunc

Hinc primum mittere foras, sed venditus auro,
 Nomine mancipii: tum Nili in regna fereris,
 Atque iterum vendere illic, multosque per annos
 Servus eris: tunc ne vetita atque injusta libido
 Te alliciat, neu Dii alieni, & falsa, caveto,
 Numina decipiant: vestrum si semper habebis
 Corde Deum, ipse aderit semper tibi, te bona semper,
 Quidquid ages, quocumque ieris, fortuna sequetur.
 Quin, magis ut fidas animis, tibi magna parantur
 Imperia, & tempus veniet, quum vera videbis
 Somnia visa tibi, quum te fratresque paterque
 Supplice adorabunt fletu: misereberis illis,
 Nec miseros pati fames ut perdat iniqua:
 Quin ipsos, natosque eorum, ipsosque nepotes
 In partem imperii, atque in tua regna vocabis:
 Ingens ut tandem populus concrescat, arenæ
 Infrat: quem Deus Ægypti de parte superba
 Deducet tandem, & pedibus super æquora siccis
 Pertransisse dabit; mox hæc in regna reducet,
 Lacte novo quæ regna fluent, & melle perenni.
 Mox (anni properate) diem felicia secla
 Aspicient, secla illa diem, quam tanta futuram
 Vatum oracula canunt, quum demittatur ab alto
 Magna Dei Soboles, vestro de sanguine creta,
 Quæ scelus antiquum tollat, quæ limina Cali
 Clausa diu, magnique fores præpandat Olympi:
 Nec plura effatus Cælum se tollit in altum.

At juvenis, quamquam stupefactus Numine tanto;
 Resistit, & rerum confusus imagine multa,
 Lætatur tamen, atque animum per singula versat,
 Speque futurorum præsentem corde dolorem
 Discutit, atque oculos in cælum & sidera tollens
 Sic fatur: Rex terrarum, Rex ætheris alti
 Omnipotens, patrum Deus & tutela meorum,
 Respice nos, & nostra tuo sub Numine si spes
 Est omnis, super his primum misere parentis.
 De me autem quidquid statuer tua recta voluntas,
 Seu lætum, seu triste pares, nihil ipse recuso.
 Unum oro, si Parca mihi vidiſſe negabit
 His oculis felicem illam, semperque beatam,
 Optatamque diem, qua tandem ex æthere summo
 Descendet tua Progenies, da cernere saltem
 In speculo, atque umbra nostra mihi, speque fideque
 Noscere da, puroque ejus de fonte lavari:
 Dixit, & ex imo traxit suspiria corde.

Interea c Madian, stacten, bdclamque ferentes,
 Cinnamæque, & liquidam styracen, & pingua tura
 Transibant Arabes, qua stabant gramine lato

Vescentes juvenes simul & diversa loquentes ,
Qui ut primum videre viros , Deus , inquit Judas ,
O fratres , meliora parat , quam nostra ferebant
Consilia : his etenim si mercatoribus ipsum
Vendamus puerum , cum lucro , auroque piati
Fraterna a morte immunes reddemur , & ad nos
Posthac nec fama adveniet , nec nomen Joseph ;
Sive Arabes isti Ægyptum , seu barbara regna ,
Marmaricam , Libyanive petant : ergo unus ad illos
Mittatur , qui mancipii sub nomine , merce
Proposita pretium statuatur , responsa reportet .
Dicta placent , qui pacta ineat , jam mittitur : ipsi
Interea speluncam adeunt , funemque ligatum
Arboris ad truncum solvunt , & in æthera sursum
Suspendunt educunt puerum : qui talis in auras ,
Qualis mane rosa , aut riguo narcissus in horto ,
Prodiit , & formæ servato vera decore
Signa dedit , certumque Dei præsentis amorem .
Jamque aderat mercator Arabs , & nuntius una
Vile satis pacti pretium : proh Juppiter , ille ,
Quem tanta in fatis promissa , & tanta manebant
Imperia , argenti bis deno venditur asse ,
Mancipium infelix : jam curvo terga camelo
Excipitur ; Nili ighotas jam fertur in oras .

At quadrupes , ceu divino sub pondere , vector
Insolitos dedit hinnitus , & signa recentis
Lætitiæ : jamque & grato facilisque , levisque
Sessori tergum , sellamque accommodat aptam ,
Agglomeransque pedes , retro socia agmina linoquit .

At fratres , puer ut cessit , mala nuntia patri
Quis ferat , & quo infanda tegant facta impia pacto ,
Ambigui , tandem statuunt præmittere vestem
A puero creptam , caprino sanguine tinctam
Qui ferat , inventamque inter nemora avia dicat :
Danque placet mandata dari : qui instructus abunde
Omnia , longævum non hæc miseranda parentem
Expectantem adit , & monstrato sanguine & ipsa
Veste , ait : hanc nostræ nemora inter devia primæ
Invenere canes : cujus sit vestis , & unde
Hic cruor , ignari , patrem primum esse monendum
Duximus , ut te (siquid agendum est) consule agatur .

At pater , ut notam , maculisque & sanguine vestem
Consperfam vidit : quis te , carissime Joseph :
Quis Divum , ut tecum morerer , spes una senectæ ,
Nate , meæ , quis casus , ait , tam durus ademit ?
Heu mala te silvæ fera sustulit : ite per alta
Vos nemora , & , siquid misero de corpore restat ,
Omne afferte mihi , saltem ut suprema sepulcri

Dona

HIERONYMI FRACASTORII

Dona feram: vel & ipse, feris laniandus, in altis
 Propriar silvas: dabitur natoque patrique
 Mors eadem: hæc dicens, scedatos pulvere canos
 Vellebat, lacerosque sinu exscindebat amictus:
 Et famuli tandem collapsum in testâ reportant.

Parte alia Ruben, ut serum se vesper in orbem
 Intulit, ad causas pecudes pecundumque magistri
 Quum redeunt, saltusque vacant pastoribus omnes.
 Desertum ad puteum solus redit, atque ibi Joseph
 Terque quaterque vocat: non respondente vocanti
 Ullo, sollicitus, puerum ne forte necassent,
 Rem spectare parat, casaque ex ilice conto
 Scalâ aptat, solersque inum se mittit in antrum.
 Omnia collustrans: verum, postquam omnia dudum
 Rimatus, puerum quæsitum haud reperit usquam.
 Ambiguus tandem reliquos perquirere fratres
 Destinat: ac pecoris vestigia nota secutus
 Per noctem, demum inventos, de fratre quid actum est.
 Inter multa rogat: rem totam ex ordine pandunt.
 At Ruben, ut puerum audivit superesse, nec ullis
 Affectum damnis, hinc, fratres, inquit, eamus
 Ad miserum genitorem, & spe viventis & auras
 Spirantis gnati saltem (quod nunc datur unum)
 Solemur, rapuisse Arabes de more, relicta
 Veste, levi pueri fugientis vulnere tincta:
 Pastores ita ferre: aliquemque adducere testem
 Expediet, neque enim deerunt, qui dicere possint
 Se vidisse Arabes, his ergo rite paratis
 Patrem adeunt, & quæ possunt, solatia jungunt.
 Ille autem, quamvis aliqua spe sorte levatur,
 Non tamen æternas lacrimas planctusque perennes
 Comprimere, aut tristi meditari gaudia mente
 Ulla potest, sed vitam ægram noctesque diesque
 In tenebris, hominum fugiens consortia, ducit.
 Interea puerum lætus deportat Joseph
 Mercator, plenis miratus cedere votis
 Omnia: non illis terræ exarsere diebus:
 Non ventis agitatæ ullæ tolluntur arenæ
 Ex solito: puerum Charites comitantur euntem,
 Et cæli favor, & sanctis Spes dextera pennis.
 Jamque pererratis Judææ finibus, altæ
 Incipiunt turres & mœnia Osyridis urbis
 Apparere procul, campis ubi fusa juvenus
 Munera militiæ exercent: hi vincere cursu
 Contendunt pedibus, hi fulvo in pulvere sudant
 Instantes, alii duro sub pondere cæstus.
 Pars volucres exercet equos, cursuque fatigat,
 Aut inferre hosti versas post terga sagittas

Discit equo currente, aut hastam tollere campo.
Ergo Arabes postquam accessere, & pulcher Joseph,
Mirati pugnas, placidi, & præludia Martis,
Consistunt, oculisque intenti & pectore toto
Vix satis expleri possunt; quos forte magister
Militiæ, Eunuchus Regis, cui summa potestas
Et duri data erant Mavortia munera belli,
Ut vidit, confestim ad se se accedere iussos
Compellat, geritisne ullas, quas vendere, merces,
Opretis? quædam, dixere, & aromata, & istum
Gestamus puerum, domino qui si placet, ultro
Munus habe: aut entum si mavis, pro indole tanta
Da quodvis; pretium est magnum tua gratia nobis.
Ille autem, haud unquam ingratum, mercator, habebis
Fetiferum: accipiam puerum, at tu munere largo,
Speque tua majore, mihi donabere multo.
His dictis recipit puerum, quem veste decora
Induit, & sagulum donat, quo purpura limbo
Fulva nitet, tum donat equum: lætissimus ille
Altior it juvenes inter pulcherrimus omnes.
Quem custode dato lætus præmittit ad urbem
Fetifar; & caræ uxori commendat habendum.
Interea seras invexerat Hesperus horas,
Et juvenum campis cedens manus omnis apertis
Ibat ovans comitata ducem, ac jam pulcher Joseph
Ut dominam iavisit, thalami & cognovit herilis
Officia, ipso humilis servorum se agmine miscens
Obvius in domino, media se qualis arena
Monstrat gemma nitens, radiisve micantibus aurum,
Talis & ipso puer multis in millibus ibat.
Quem matres, populusque omnis mirantur, ut ipso
Incessu, gravis ore, pedes non dimovet usquam
A duce, non oculos, sed semper totus in illo est.
Nec minus, intra ædes ut ventum, epulæque paratæ,
Ipse ulli deest officio, seu corpore opus sit,
Seu celeri ingenio: sed enim super omnia mira est
Grataque sedulitas, apta & prudentia cana.
Quo factum est parvo post tempore, Fetifar illum
Non thalamo ut tantum ipse suo præfecerit unum,
Sed domui, & rerum ei summam commiserit omnem.
Scilicet auspiciis & Diis cuncta ire secundis
Fetifaro sunt visa, agri producere fruges
Uberius, sobolem armentum, sibi crescere honores.
Omnia quæ, ostento quodam permotus, Joseph
Attribuit puero, vatumque oracula suadent.
Arbor erat Persæa, Deo sacrata Camefi,
Ædibus in mediis, quam vestam e Perside fertur
Orbe pererrato monumentum insigne saturum

Ipsa

Ipsa suis manibus plantasse nepotibus Isis.
 Hanc apīs externis veniens insedit ab oris,
 Insignis fulgore & versicoloribus alis
 Pulcher apīs: quem mox examen grande secutum
 Pendentem ramo longum traxere racemum.
 Protinus ostentam ad vates defertur; at ipsi
 Venturum externis aliquem portendere ab oris
 Declarant, ingens populus quem deinde sequatur,
 Ipsum qui fortunæ opibus super æthera tollat
 Fetifarum, largosque simul promittat honores.
 Ergo his auguriis tantis censetur Joseph
 Monstrare, hinc majore illum dignatur honore
 Fetifer, hinc omnes adamant: sed maxime Jempsar
 Pulchra ducis conjux præ cunctis diligit unum,
 Nescia adhuc, quanto jam sit devota furori,
 Quis Deus infideat miseram; suspiria nondum
 Emittit, nondum lacrimas: sunt omnia læta
 Dulciaque, & nondum quidquam perferit amari.
 Quæ malus, infernas sedes, Cocytia regna,
 Qui regit, humani generis turbator & hostis
 Ut vidit Pluton, semenque accrescere felix
 Isacidum, invisam sobolem, vocat ocyus unum
 Servorum, quibus insidiæ fraudeque dolique
 Sunt animo, queis mille artesque, viæque nocendi,
 Ique, ait, & pulchram circum insinnatus Jempsar
 Falle dolo, & primas escas, quas sensit amoris,
 Tu flabris accende, imis illum ossibus ignem,
 Illam immitte facem, quam nec vis ulla Deorum
 Non hominum extinguat: mox ipsum accendere Joseph,
 Si possis, omni arte stude; quod vincere si qua
 Non dabitur, tu perge tamen, pete rursus Jempsar.
 Acrius ure, furorem adde, inspiraue venenum:
 Queis monstris agitata domum permisceat omnem,
 Inque odium, furiasque omnem convertat amorem.
 I celer, & nihil inde doli scelerisque relinque.
 Ille hilaris, promptusque malis sumtam e Styge
 Lympham

Miscet Acidalio latici, tum ex anguibus unum
 Tisiphones capit, atque sinu mala semina condit.
 Fetisari dein testa petens, nutricis Jempsar
 Induit Iphieles formam, dominamque salutans
 Audi, ait, o mihi cara, miser quis casus Joseph
 Torquet ad extremum vitæ: vidi ipsa gementem
 Nuper, & optantem supremæ munera vitæ.
 Querenti mihi quæ tanti sit causa doloris,
 O mater, ne quære, inquit, nam, sive tacebo,
 Sive edam, omnino moriar: præstatque tacendo
 Et vitam, & nostri causam finire doloris.

Cui

Cui ego : non sic o fili , nam vulnera sæpe
Auxilium patefacta & opem invenerere salubrem .
Dic audacter , amasne ? hæc si tibi causa doloris ,
Spera , & fide , puer , namque ipsum vel tibi amorem
Eripiam magicis , vel tu potiere cupito .
Erubuit : tum dixit , amo . Dii sunt mihi testes ,
Hunc quantum eluctans cepi , quam invitus amorem ,
Infidum in dominum qui me facit ; at mihi sit mors
Exoptanda magis ; fidum periisse juvabit .
Sic ait , & fufis lacrimis pulchra ora rigabat .
Ut video , puer hic dominam te deperit : at ni
Opportune adfis , nimio moriturus amore est .

Cui virgo , o nutrix , quam dura & tristitia narras !
Namque & amo hunc puerum , & vellem succurrere
posse :

Sed me jura Deum , sed vincla jugalia primum
Obsistunt : tum me tanto male sana periclo :
Objiciam , & duri haud formidem conjugis arma ?
Et nutrix , o nata , ipsorum crimina amantum
Dii ridere solent : solvendi jura mariti
Causa potens & iusta tibi est depellere mortem
A puero , qui nec culpam commiserit umquam ,
Culpa nisi est vel amare nimis , vel amore perire .
Audendum est in amore , pericla nec ulla timenda
Prudenti , Dii deinde ipsos tutantur amantes ,
Queis amor , & pietas est prima & maxima cura .
Est mihi aqua , in dubiis rebus quæ assumpta videre
Vera facit , dubique omnis pars utra legenda est .
Hanc dabo , si hac in re ancipiti stat cernere verum .
Ac Stygiam demonstrat aquam , medicataque fonte
Pocula Acidalio ; placet , o carissima nutrix ,
Virgo , inquit , totumque manu capit ipsa venenum
Intrepida , atque uno craterem exhauriit haustu .
His actis puerum Iphicle se vertit ad ipsum ,
Et gressu ad thalamum illius contendit anili :
Qui laudes Superum Regi & divina legebat .
Ut vero in thalami mentitus limine Dæmon
Constitit , & puero cælestem assistere Joseph
Custodem vidit minitantem , ensisque coruscum
Vibrantem , extemplo subita formidine captus
Horruit , & retro gressusque animumque reduxit ,
Aufugitque celer : nocturnæque alitis Ori
Effugiem capit , & tecto se sistit in alto ,



J O S E P H

L I B E R II.

AT misera, ut Stygios latices desumpsit Jemphar,
Solaque permanfit, totis ardere medullis
Visa sibi est, tota in subitum convertier ignem:
Suspiransque gemenfque, unum deposcit Joseph.
Et modo se imponit stratis, paulumque morata
Assurgit, modo mutat & hunc, modo mutat & illum,
Fastiditque locum infelix, nec se capit usquam.
Non secus ac solet ille, acris præcordia casus
Cui torret, vel quem diptus calcata momordit.
Tandem ait, heu quidnam est, quod me tam sæviter urit?
Est ne amor, an sumti latices? nempe est amor iste,
Quo moriar, nisi formosus succurrat Joseph.
Tu mihi nunc succurre, puer, succurrere namque
Ipsa etiam tibi constituo; moriemur amando
Infantes ambo. Dii tanti criminis haud me
Auctorem videant, non hæc Ægyptia tellus:
Dum licuit, potuique, tori concordia jura
Servavi, nunc major agit me visque, Deusque;
Imperioque premit; sic sit mihi Numen amicum,
Ut nosco experiorque Deum, quem semina non est
Contra stare potens; Deus hic custodiet ambos:
Quin &, suetus amare, reget solatia nostra.
Dixerat, impatiensque moræ vocat ocyus Esren,
Unam ex ancillis, dominæ quæ fida solebat
Ferre vigil mandata, vigil responsa referre.
Vade, ait, & puero dic, huc accedat, Joseph,
Si vacat, & domini si nulla negotia nostri
Impediunt; abit illa cita, & mandata facessit.
Nec longe post jussus adest formosus Joseph.
Quem solum admissum virgo mutata colore
Juxta astare facit: tum corde & voce tremente
Care, inquit, puer, atque oculis mihi gratior ipsis.
Verane tu dominæ dices, quæcumque rogabit?
Vera equidem (an fallam dominos?) ait ille fatebor.
Tu quodvis pete: & illa: Puer, te perditte amare
Audio: si verum est, debent me nulla latere,
Nec si ego sim, quam perditte amas, nam (vera fatebor)
Ipsa etiam te perditte amo; tu nec mihi amanti,
Nec tibi ego crudelis ero: da jungere dextram:
Qualis eris, quantoque a me donaberis auro!
sic ait, & summis puero dedit oscula labris.

Ille

Ille pudore rubens, & secum mente revolvens,
 Quæ Divum Interpres puero mandaverat olim,
 Dii alieni illum, aut prava, aut injusta libido
 Alliceret, taciteque Deum sibi adesse precatus
 Hæc tandem responsa dedit: Quod perditæ amare
 Audis me, domina, illicitum si forsan amorem
 Audis, non ullam fateor me perditæ amare:
 Nec sic ipse etiam a quoquam peramarier opto,
 Præcipue a domina: scis rebus me omnibus unum
 Præfecisse ducem, seclusa conjuge tantum.
 Anne igitur legisque meæ, dominique mei sim
 Proditor? ah Stygias potius detrudar ad umbras,
 Esca vel alitibus, media intumulatus arena,
 Mittar: & hæc dicens dominam, thalamumque reliquit.
 Illa autem, ut se se illulam, & spe funditus omni
 Dejectam vidit, tamquam qui fulminis ictu
 Percutitur, primum stupefacta immotaque paulum
 Constitit, inde imo ducens suspiria corde,
 Astringensque manus, se se resupina cubili
 Stravit inops animi, desertaque sanguine pallens.

At malus hæc summo tecti de culmine Dæmon
 Afficiens, ave deposita, se rursus anilem
 Vertit in Iphiclem, miseramque revisit Jempfar,
 Arque ait, o, quinam casus te, nata, malignus
 Insequitur? quid cor cecidit? quid pallor in ore est?
 Ah ne animum assuetum, ne te ipsam desere, nata.
 En adsum auxilio nutrix tua, pone timorem,
 Respice me; audito nutricis nomine paulum
 Erexit se se in cubitum, tum lumina torquens,
 O nutrix, quondam nutrix, nunc dira noverca,
 Occidisti, inquit, miseram me, nec puer ille
 Perditæ amat, nec se (quod longe est pejus) amari
 Sustinet, aut ullis precibus donisve movetur.
 Projeci memet, genus, & decus omne pudore
 Fœdavi amisso, fractæ spes, fœdera rupi
 Conjugii: tu causa mali, tu criminis hujus
 Principium; quid restat ad hæc, nisi cetera ferro
 Conficere, & meritam hanc animam demittere ad orcum?
 Cui dictis falsa Iphicle respondet amaris:
 Heu, mulier rerum ignara, & male conscia amorum,
 Quid mirum, puer insuetus plenusque pudore,
 Ceu virgo intacta, ad primos si expavit amoris
 Aggressus, de te dubius, metuensque pericli?
 Non ita res tractanda fuit, nec tu tantum omnem
 Spem deponere, rudem puerum nam rursus adibo,
 Arguam, & ignarum, quæ sint facienda, docebo.
 Tu tantum triduo exspecta, lux quarta benignum
 Sidus habet, miseros sidus quod spectat amantes

Fractæ. Carm.

C

Con-

Conjungitque ; sub hoc Hymenæus fidere primum
 Natus , & ipse puer Venere enitente Cupido .
 His dictis se se paulum solatur Iempsar ,
 Exeritque cadentem animum . Meliora ferant Dii ,
 Vade , ait , intérea sacras venerabimur aras ,
 Fundemusque preces , & amica vocabimus astra .
 Ergo , ubi luce nova rutilum Sol aureus orbem
 Implevit , visura Deos se se ornat Iempsar ,
 Pulchra auro , spectanda ostro , spectanda pyropo ,
 Sed forma spectanda magis , proprioque decore ;
 Quam matrum numerosa cohors comitatur euntem ,
 Nec non & famulis præses formosus Joseph
 Lumina deiectus , dominæque sui que misertus
 It comes ; ipse tamen sanctas procedere ad aras
 Patronam putat , ut commissi crinibus oret
 Exposcatque Deos veniam , & deponat amorem .
 Contra autem illa rogat Divosque & sidera cuncta ,
 Ut saveant votis , & sint in amore secundi .
 Hæc eadem celebrat demens & luce sequenti ,
 Atque alia , donisque etiam majoribus aras
 Accumulat , pecudumque fibras rimatur & exta .
 Verum , ubi quarta dies rediit , Solque igneus orbi
 Illuxit , lux sancta , inquit , lux optima , salve ,
 Sidera vos , salvete , quibus conjungere amantes
 Est amor , & sobolem mundo servare perennem .
 Tum puerum acciri carum jubet ; ocyus ille
 Nulla timens , & jam dominæ securus amorum .
 Advenit : illa itidem sperans fore prospera cuncta ,
 Nutricis decepta dolis , ut vidit amatum
 In manibus puerum , meus es , meus , inquit , & ipse
 Sum tua : quid prohibet , ne nos jungamur amantes ?
 Iste torus communis erit : ne gaudia differ ,
 Neu sortem contemne tuam ; tum pallia captat ,
 Et trahit ad se se puerum ; stupet ille pudorem
 In domina amissum , tandemque his vocibus inquit :
 Quis furor , aut quænam mala mens , olim inclyta
 conjux

Fetisari , nunc hæc suadet te talia posse
 Moliri ? certe Eumenidum nunc te una sororum
 Exagitat , nam (quam reris) non est tua nutrix
 Iphicle , sed de Stygiis emissa tenebris
 Dirarum una , dolis quæ te decepit & astu .
 Illa eadem me aggressa malis conatibus ausa est ,
 Sed vetuit tentare Deus ; vidi ipse retrorsum
 Cedentem , & formam mentitam , & fumida novi
 Sulphura , nidoremque atrum post terga relictum .
 Talia distabat puer ; at post ostia Dæmon
 Qui stabat , clausos magno conamine postes

Impu-

Impulit, intravitque ferox, & lumine torvus
 Tartaream effudit vocem, qua terruit omnes.
 En ego mentita Iphicle, en sum una sororum
 Eumenidum, una e Stygiis emissa tenebris?
 Nunc faxo, experiare; sinuque citâ eripit anguem
 Pestiferum, qui secreta sub veste latebat,
 In puerumque jacet. Custos cælestis at illum
 Reppulit, atque omnes conatus fecit inanes.
 At coluber, sibi ut in puerum sublata potestas,
 In miseram insidias omnes molitur Iemphar:
 Perque solum tacite irrepens, ventremque retorquens
 Lubricus, in vestem insinuans se illabitur: inde
 Interiora petens, & viscera cuncta pererrans,
 Tartareum virus jaculatur ad intima cordis.
 His monstris puer interea pavescens, amictus
 Immemor aufugit, seque in sua testa recepit.
 Quem virgo ut fugisse videt, utque acre venenum
 Sensit, in insanum subito conversa furorem,
 Clamorem immensum tollit, quo ipsa atria, & omnis
 Intremuit domus, & timuit vicinia tota.
 Non secus, ac si Vulcanus penetralia cuncta
 Involvat, cæloque furens incendia jactet.
 Currite io, matrès, scelus atque audite nefandum
 Mancipis Hebræi, qui nunc, proh Juppiter, ausus
 Fetisari est magni sacrum violare cubile,
 Vimque inferre mihi, nisi nutrix tempore in ipso
 Prompta tulisset opem, & sceleratum veste relista.
 Ejecisset; io fugitivum apprehendite, servi,
 Ite citi, properate, viarum claudite cuncta
 Effugia, & domini scelus hoc afferte sub aures.
 Talia vociferans misera effundebat Iemphar.
 Omnia quæ falsa Iphicle confirmat, & auget,
 Dignum morte fore, hoc sceleris qui admittere tantum
 Audeat; exacuitque animos; clam deinde recedit
 Nulli visa, & avi similis se immiscuit atris
 Nubibus, & Stygias sedes atque impia Ditis
 Regna petit, lætoque refert crudelia facta.
 Interea miser a servis comprehensus Joseph
 Ducitur, & nemo est, qui dicere multa volentem
 Auscultare velit miserum, non Fetisar ipse,
 Quem jam res audita acri compleverat ira:
 Non tamen ut morti damnet, sed turre sub ima,
 Carceris esse locus miseris ubi sueverat, illum
 Intrudi jubet, & vigili custode teneri,
 Tantum olyra vili, limoso & flumine pasci.

At juveni cælestis erat custodia major
 Aliger ætherius, summo qui missus ab axe
 Carceris intrarat portas, ubi proxima terras

Nox omnes cæcis tenebris obduxit & umbra :
 Ergo alias puero notus , solatur amico
 Ore illum , firmatque animum , tollitque timorem
 Luce nova , excussa noctisque & carceris umbra .
 Omnia quæ postquam custos Ægyptius alta
 Prospexit de turre , Deus , Deus , inquit , in illa
 Luce viget ; nosco splendorem , & verba notavi .
 Nec Deus est illic , nisi & hujus criminis insons
 Est puer ; infontem servabit Juppiter æquus .
 Ex illo custos juvenem veneratur Joseph ,
 Et pascit meliore cibo , quam dura juebant
 Fetisari mandata , & duri carceris omne
 Tollit onus , ferrumque pedum , visitque frequenter ,
 Solaturque , & sæpe in cælum educit apertum .
 Jamque quater binos Phœbe compleverat orbes ,
 Quum duo , quorum alter pincerna Pharaonis , alter
 Pistor erat Regis , præ suspitione veneni
 In cæcere inventi , conclusi carcere eodem
 Cum puero Isacide fuerant ; hi tempore parvo
 Post , utrique una viderunt somnia nocte ,
 Somnia , quæ mox mane novo dum mutua versant ,
 Ignari , quid portendant monstrarentve futurum ,
 Sollicitis stabant animis ; quod pulcher Joseph
 Conspiciens , Quidnam , juvenes , tam peccore tristes
 Vos hoc Sole novo video ? Nos somnia facta
 Nocte hac sollicitos reddunt , quæ exponere , nemo est .
 Qui sciat hic , dixere : quibus sic pulcher Joseph :
 Somnia vox narrate , Deus dignoscere forsan
 Illa dabit . Dicemus , ait pincerna , priorque
 Ipse edam ; nam vitis erat pulcherrima ternis
 Lata propaginibus , gemmas turgescere primum
 Palmitibus , mox & fores exire videbam ,
 Post flores gravidis uvas pendere racemis :
 Quos ego maturos manibus premere ipse videbar ,
 Vinaque diffundens pateris spumantia plenis
 Regi larga dabam , solito Rex more bibeat .
 Cui puer interpret : Quidnam tua somnia monstrant ,
 Expediam ; vitam illa tuam pulcherrima vitis
 Ostendit : gemmæ , flores , uvæque secutæ
 Sunt fructus , quos tu peperisti temporis hujus
 Curriculo : dabitur merces , & honoribus ipse
 Restituere tuis , & pristina pocula Regi
 Consuetudo de more dabis : terna illa propago
 Tres lucas , quibus hæc veniant tibi prospera , monstrat .
 Tu vero , quum te carum gratumque Pharaon
 Accipiet , nostri (si qua hujus gratia facti est)
 Sis memor , immeritumque isto dic carcere claudi .
 Tum pistor simulac vidit dicta omnia recte

Congruere, Ipse etiam, dixit, mea somnia pandam.
 Nam capiti imposita ipse meo tria plena canistra
 Spectabam, duo farinæ inferiora, supremum
 Omni opere plenum, omni illo pistoria quod scit
 Ars facere, & nostrum ingenium, sed cuncta volucres
 Exesse, & secum latas deferre per auras.
 Cui bonus interpret: Divum est novisse futura,
 Falli hominum est; dicam, quidnam tamen augurer ipse
 His super: illa, quibus vidisti plena canistra,
 Sunt opera & vitæ fructus: duo prima, ubi simplex
 Farina est, vitæ monstrant duo tempora prima,
 In quibus & simplex vita & sincera peracta est:
 Summum opere infido plenum est, & fraude, dolisque
 Omnibus, ingenium quæ, aut ars pistoris iniqui
 Extudisse valet, quæ sunt jam cognita Regi.
 At merces horum meritorum & præmia, foedæ
 Sunt volucres, corvi immundi, milvique rapaces,
 Vulturique, caput qui effossaque lumina pascent
 In cruce suspensio: tribus hæc ventura diebus
 Terna canistra notant: tamen hæc me fallere possunt,
 Si tu animo possis mutari, nam & Deus ipse
 Sæpe solet mutare mala & convertere fata.
 Talia tractabant juvenes, & tertia jam lux
 Orbi investita aderat, quum custos carcere aperto
 Pincernam insontem, noxa poenæque solutum
 Declarat, miserum Regis decreta severi
 Pistorem damnare cruci: de carcere uterque
 Ducitur haud æqua sorte, & longe impare fato,
 Hic ad tigna, ille ad Regem stipatus ovantum
 Et lætus clamore virum, & clangore tubarum.

Vertitur interea ter Solis cursus in alta
 Solstitia, atque novum mundo portaverat annum:
 Forteque Rex dulcem prona janî nocte quietem
 Ducebat, Deus ex alto quum somnia in illum
 Immisit miranda adeo, ut cedente sopore
 Attonitus Rex magnum aliquid portendere visa
 Crederet; ergo omnes jubet e regione vocari
 Chaldæa, Ægyptoque, quibus cognoscere cursus,
 Metirique vias cæli, & momenta minuta
 Astrorum, casusque hominum, & prænosse futura est
 Cura audax, nec non magicis qui incumbere sacris
 Consuevere, & qui ex adytis oracula Divum
 Consulere, & cæsarum oviumque boumque per exta
 Rimari secreta solent, qui noscere flammæ;
 Qui fluitantis aquæ motus, qui jungere arenæ
 Fatalem numerum, & cognoscere fulminis iras,
 Quique vias servare avium, & dignoscere cantus,
 Denique divini rerum quicumque vocantur.

Quorum ingens numerus magni plena atria Regis
 Intrarant, alii longis capita alta tiaris
 Induti, aut alii spectandi cornibus hirtis,
 Auratis alii strophis: longissima mento
 Cunctis pendet barba, ipso stat pallor in ore.
 Quos simulac ad se Rex alta a sede vocavit,
 Somnia visa docet primum, dein munera larga
 Promittit, largosque illis proponit honores,
 Somni qui interpretes fuerit: noctemque diemque
 Responso tempus statuit; sed noxque diesque
 Venerat, & nemo apparet, qui somnia Regi
 Enodare queat, nulli sua sidera, nulli
 Ars magica, aut quaesita aris oracula profunt:
 Non artes aliae, non barbae, altaeque tiaræ.
 Ergo hinc irasci, & tristes moerere Pharaon,
 Nec quemquam audire, ac solo in conclave latere.
 Hic Regis pincerna, memor, quæ in carcere Joseph
 Fecit, & ipsorum quam verus somnia vates
 Exposuit, subito Regem petit, atque ita satur:
 Peccavi, Rex magne, tibi, quæ in carcere vidi,
 Non referens; nam scis, ut mecum pistor iniquus
 Carcere damnatus fuerit sub turri magistri
 Militiæ, eunuchi; forte illo carcere eodem
 Fetisari puer Hebraeus, puto crimine falso
 Missus erat; duo nos (ita suasi) somnia quædam
 Nocte habita a nobis, juveni narramus; at ille
 Divino quodam afflatu visa omnia nobis
 Exponens, mihi, te, dixit, lux tertia ab isto
 Carcere deducet, multis & honoribus auctum
 Restituet primo officio; te, pistor inique,
 Lux eadem in cruce constituet, te immunda volucrum
 Agmina depascent, corvi, milvique rapaces,
 Vulturisque, nisi ipse animum convertere possis
 In melius, sic namque Deus mutatur & ipse.
 Omnia quæ evenisse vides; tua somnia certe
 Hic puer exponet, magnum nam Numen in illo est.
 Auditis Rex lætus ait, vade ocyus ergo,
 Duc puerum, & nostro jussu de carcere solve.
 Ille celer mandata facit, puerumque parumper
 Ornat, detondetque comas, vestemque ministrat;
 Tum Regi adducit timidum. Rex omnia lustrat
 In puero, sibi cuncta placent, sic denique satur:
 Te, puer, hi dicunt exponere somnia, numquid
 Vera ferunt? aut ille: Deus, Rex optime, solus
 Somnia nosse potest, & si cui maximus ille
 Hoc dederit, potero ipse meo pro Rege precari,
 Atque orare Deum: forsitan dabit, omnia quando,
 Quæ Regum sunt, ipse solet curare Deum Rex
 Atque

Atque hominum; dein paulum animoque, & mente moratus,

Nunc inquit, Rex magne, mihi tua somnia pande.

Fluminis ad ripas Nili stare ipse videbar,

Rex ait, & septem ecce boves e flumine pulchræ

Exire, & late errantes per littora pasci

Florentes herbas, loton, medamque virentem,

Et suavem mynianta, quibus pinguescere, quantum

Plena solet, sacras quæ ducitur hostia ad aras.

Vix oculos verti, ecce aliæ per littora septem

Deformes, ægræque, quibus vix pellis adhæret

Offibus, apparere boves, quæ carice summa

Vix passæ & dura paliuro & sentibus hirtis

Corpora macra, suis nervis vix ducta, trahebant.

Obstupui; nam dira fames atque ardor edendi

Improbis exegit tantum has, ut pingua septem

Corpora prima bouum congressæ tota vorarent.

Mox iterum dulcis me habuit sopor alter, & ecce

Rursus septem uno spicæ consurgere culmo,

Pulchræque gravidæque & onustæ pondere multo.

Mox septem prodire aliæ tenuesque & inanes

Exili e stipula, scabraque urigine tostæ,

Quæ succum & decus omne aliarum absumere visæ

Sunt mihi; miratus, postquam sopor ille recessit,

Somnia proposui multis, sed dicere nemo

Scit sensum & portenta horum: te si manet ista

Gloria, si te unum e tantis hæc somnia poscunt,

Toto animo lætare, puer: te fama sequetur

Perpetua, & tantis a me ditabere donis,

Ut te non videat majorem Ægyptia tellus.

Cui juvenis: Rex magne, Deus te diligit, ipse est,

Somnia qui iunxit, nec quæ illa intelligat, esse ars

Ulla potest, quæ auctore Deo non utitur: unde

Nec vates potuere tui, quibus omnibus est ars

Absque Deo. Primum septem felicibus annis

Largius undantem solito, majoreque Nilum

Flumine rumpentem ripas, secumque trahentem

Felicem limum, fecundæque æquora arenæ

Fortunara nimis tellus Ægyptia cernet.

His annis tantum messis, tantum uberis illa

Colliget, ut non sufficiant solita horrea messi.

Ubertatem istam pingues nimiumque nitentes

Monstravere boves septem, quæ e flumine Nili

Exivere, herbas pingues per littora passæ.

Hanc etiam & spicæ septem, quas pondere onustas

Lætæque plenæque uno consurgere culmo

Vidisti, pariter monstrant: nam somnia visa

Non duo re, sed idem ostendunt; nunc porrigite mentem,

Optime Rex : nam septem annos , qui deinde sequentur
 Infelix steriles durosq; Ægyptus habebit .
 Ipse intra ripas demisso flumine Nilus
 Curret iners , supraque caput limumque feracem
 Non tollet : sicca arebunt arva omnia , sicca
 Solstitia , & nulli descendant montibus amnes
 Consueti pluviarum amnes sub sidere Cancri :
 Æthiopum populis nec hiems æstiva redibit .
 Agricola infelix nullo versabit aratro
 Arva , nec arenti mandabit semina terræ ;
 Sed miseros edet annona cogente juvencos .
 Hæc septem docuere boves per littora sicca ,
 Deformes , macræque , quibus vix ossibus hærens
 Pellis erat ; hæc septem illæ rubigine tostæ ,
 Squallentesque situ spicæ , & sine pondere turpes
 Ostendunt : duplici exemplo te commonet ipse ,
 Qui novit ventura , Deus , quo tu quoque solers
 Commovere magis , damnoque occurrere possis .
 Quod facere ut valeas , si me fortasse requiris ,
 Sic habeas ; Majora para primum horrea , & omne ,
 Quod superat segetum his septem felicibus annis ,
 Coge illic , servaque vigil : dein multa talenta
 Aurique , argentique in fruges undique emendas
 Impende , annorum quantum penuria septem
 Exposcet ventura fami , campisque serendis .
 Talia narrabat juvenis , quæ singula mente
 Rex volvit tacita ; tandem & sic voce profatur :
 Hoc certe Deus in puero , nec talia dici
 Absque Deo potuere , nec illi Ægyptia tellus ,
 Aut Chaldæa videt similem ; tum amplectitur illum
 Lætitia illacrimans ; post me tota ista secundum
 Te aspiciet regio , Servatoremque vocabit .
 Sic ait , & chlanymdem gemmis ostroque nitentem
 Ferre dat , atque auri torquem circumdare collo .
 Mos erat , ut gemma cælata , insignis & auro
 Annulus , antiquo regum de more vocatus
 Regius , a nullo , nisi Rege Pharaone , posset
 Gestari , aut si quis foret ipso ab Rege secundus :
 Hunc sibi Rex digito detractum imponit Joseph ,
 Quo populus post regem illum sciat esse secundum .
 Præterea , qua se solennibus ipse diebus
 Inestum mula populis urbiq; solebat
 Ceu quendam monstrare Deum ; sic mandat & ipsam
 Urbe vehi , mulaque eadem procedere Joseph ,
 Præclamante tuba : Regi inclinate secundo
 Quisque caput , sanctoque novos conspergite flores
 Servatori hominum , solus qui somnia Regis
 Exposuit , qui plena Deo præcordia gestat .

Tali-

Talibus ornatus donis, & honoribus auctus
 Isacides juvenis, cuncto acclamante senatu,
 Præficitur toti Ægypto. Qui sedulus omni
 Ingenio curaque in primis horrea ubique
 Magna parat, mox frugum ingentibus undique acervis
 Collectis, partim terra Memphitide natis,
 Partim emtis aliunde implet, stipatque, nec ullum
 Dat rebus spatium: regionem lustrat, egnorum
 Imminuit numerum, atque hominum. Dii cuncta
 secundant.

Urbs erat Helipolis, Solis de nomine dicta,
 Cujus Rex, idem & templi Phœbique sacerdos
 Supremus natam formæ & virtutis habebat
 Insignis, quam sæpe Deus consultus Apollo
 Dixerat haud ulli indigenæ thalamo esse locandam:
 Conjugium externum fato majore parari,
 Quo genus, & clari tollantur in astra nepotes.
 Ergo istæc juvenem monstrare oracula Joseph
 Censet & antistes templi, & Rex ipse Pharæon.
 Quo circa, quum jam septem felicibus annis
 Ægypto in tota ubertas, atque omnia ubique
 Læta forent, placuit Regi dignis hymenæis
 Et thalamo Isacidem juvenem sociare jugali:
 Lætitiâque augere, diesque inducere festos.

Ergo hæc per ludos & per convivia læta
 Dum fiunt septem sæcundi messibus anni
 Jam finem, ubertasque omnis, jam copia habebat:
 Jamque pererratis Geminis per sidera Cancri
 Sol altos agitabat aquos, Ægyptia quum gens
 Miratur Nili nulla incrementa videri,
 Sed purum & nulla permixtum flumen arena
 Ipsum inter ripas tristi procedere cursu.
 Jam tellus sæcunda prius, nunc aret, hiatque
 Ulla firi, nec spes Cereris promittitur ulla.
 Semina quin etiam si qua immittuntur in arvis,
 Aut nullos edunt foetus, aut protinus omne
 Enatum sædæ vicio rubiginis aret,
 Aut abit in lolium infelix, fluidumve papaver.
 Vivitur ex annis lapsis, retroque coacto
 Pœnore, quod primo sterili vix sufficit anno.
 Verum, ubi dira fames homines se vertere ad herbas,
 Et pecus immeritum, atque immunda animalia adegit,
 Regem urbes & rura adeunt, subsidia poscunt.
 Rex ad Præfektum cunctos dimittit Joseph,
 Servatorem hominum; populis hinc horrea aperta,
 Et justum indictum pretium: gaza undique & omnes
 Coactæ portantur opes: æraria Regis
 Complentur: nec adhuc quartus se verterat annus

Quid facerent miseræ gentes ? sola arva supersunt ,
 Quæ vendant , si emtorem habeant ; nam solus Joseph
 Esse potest pro Rege emtor : ergo ille rogatur ,
 Arva emat , & miseris det opem , nec pacta recuset .
 Reddituum cuiusque agri quintam dare Regi
 Promittunt , sic pacta ineunt , sic foedera firmant .

Interea , externas quoniam penuria terras
 Hæc eadem affligit , populos it fama per omnes ,
 Ægyptum sat frumenti , quod vendat , habere .

Ergo & Sichenus natos affatur Jacob :

Cur non Ægyptum , nati , cur regna beata
 Non petitis , cur non nobis alimenta paratis ?
 Num perimat nos ista fames ? mandata capeffunt
 Natorum deni : fratrum natu ultimus astat .

Ut vero Ægyptum petiere , & Osyrida terram ,
 Frumentis præfectum adeunt , & supplice cultu
 Ære dato frumenta rogant ; cognovit Joseph
 Germanos , statuente Deo , non cognitus illis .
 Præteritique memor , quamvis injuria multum
 Facta potest , tamen & patris , fratrisque misertus
 Benjamin , his etiam parcit , tum fatur ad illos :
 Unde & quinquam hominum ad nostras acceditis oras ?
 Illi autem : e terra Canaan , de sanguine Jacob
 Venimus huc cogente fame , quæ plurima perdit
 Samariam ; domus est nobis plenissima , primus
 Est pater , undeni nati , parvique nepotes ,
 Pastorumque tranus , vernerum est plurima turma .
 Venimus ergo ad te , nobis alimenta rogantes ,
 Ne percat gens tanta : tibi iusta æra dabuntur .
 Nec nos immemores erimus , pater optimus urbem
 Ipse regit Sichen , pastor , cui nullia multa
 Sunt pecudum : quovis pretio da vivere tantum .
 His verbis quamquam frater commotus , & ægre
 Abstinent lacrimis , fisto tamen omnia vultu
 Dissimulans , Quid verba mihi datis , inquit ? an ipse
 Eludar ? nisi me os fallit vultusque loquentum ,
 Exploratores puto ; cur mandata paterna
 Non geritis ? cur nec frater huc venit & alter ?
 Ass illi : Minime ; tales ne rere , precamur .
 Per patrem patrisque Deum juramus , adire
 Nos iussit , nos dira fames ; natu ultimus unus
 Cum patre Benjamin adolescens restitit , & spes
 Solamenque senis : nos , qui sufferre laborem
 Possumus , atque moras longarum auferre viarum ,
 Venimus orantes vitam , mandata putantes
 Nulla opus esse istuc ferri ; miserere precantum ,
 Et miserere patris , pueri miserere relictæ ,
 Parvorumque (potest pietas si in te ulla) nepotum .

Hic

Hic lacrimas vix continuit, convertit & ora,
 Toto animo & vultu multum commotus Joseph:
 Inde ait: Est mihi firma, viri, sententia menti
 Frater ut huc alius veniat: vestrum hic erit unus
 Obses, vos alii ad patrem frumenta feretis
 Interea; haud aliter (per Regem & Numina juro.)
 Ulla potest vobis cedendi hinc esse potestas,
 Neu faciem spectare meam, aut audire loquentem:
 Consulite, & ternis dentur responsa diebus.
 Sic ait, & custode dato vultuque remittit.

Illi, inter se se postquam diversa locuti
 Viderunt Præfeti animum, præstare putarunt
 Ferri multa domum frumenta, loco obſidis unum
 Dimitti, properare alios iterumque reverti
 Euntum alias fruges, alium & conducere fratrem.
 Ergo nominibus scriptis fors ducitur, obses
 Extrahitur Simeon; & jam lux tertia mundo
 Clara aderat, responsa petit Præfetus, at ipsi
 Enarrant decreta, igitur frumenta parari
 Imperat accepto pretio: clam deinde ministros
 Admonet, ut summis saccis æra omnia ponant,
 Quod fuerit cujusque datum: custodibus obses
 Traditur: at fratres oneratis tergora aſellis
 Ægyptum, & multo fratrem moerore relinquunt,
 Samariamque petunt: quo postquam denique ventum est,
 Et genitor numero natorum unum abſore vidit,
 Clamat, Ubi Simeon meus est? cur cernere natum
 Non datur? est ne æger? Minime, pater, inquit Judas,
 Sed valet, Ægypti est obses tellure relictus,
 Dum rursus redeamus, & hinc ducamus & istum
 Benjamin; nam qui frumentum vendidit, ut nos
 Vidit vir magnus, & ab ipso Rege secundus,
 Quæſivit multa a nobis, numquid pater eſſet,
 An frater nobis alius: quæ quum omnia recte
 Dixemus, Vos has certe venistis ad oras
 Exploratores, inquit, mandata paterna
 Cur non huc geritis: cur non alium quoque fratrem
 Huc duxistis? ad hæc respondimus omnia; tandem
 Summa fuit frumenta dari, nos deinde reverti,
 Adduci puerum, interea obses detur, & unus
 E nobis maneat: Per Regem & numina Cæli
 Juro, inquit, nec vos aliter frumenta feretis
 Posthac, nec me audire umquam aut spectare licebit.

At pater, hæc postquam audivit, Proh summe
 Deum Rex,

Estne adeo infelix alius pater? occidit unus
 Natorum, est obses alius, subducitur alter
 Cum reliquis, simul ut cuncti moriantur, & ipse

Expectem, ferat hæc nostras crudelis ad aures
 Nuntius: o prius hanc miseram, Dii, demite vitam.
 Talia fundebat lacrimans; circum undique nati
 Solantur, tam adversa bonos non Numina habere.
 Mox, ubi depositis solverunt vincula faccis,
 In summis æs omne datum pretiumque repositum
 Inveniunt: stupere omnes, sed tristis Jacob
 Hoc deerat, nati, hoc, inquit, quod funditus omnem
 Spem raperet; nam si vobis Ægyptia ad arva
 Sit reditus, qui vos primum vir maximus ille
 Exploratores dixit, nunc nomina surum
 Imponet, causam inquirens, qua perdere possit.
 Nempe ego Beniamin puerum, spem patris, & unum
 Solamen, non huic tradam fidamque periclo.
 Vos alii, si fata urgent, Divumque voluntas,
 Itē, rei fidei promissæ: ego, quidquid apud me est
 Aurique argentique dabo, quo vos redimatis,
 Et fratrem, &, si fors aderit, frumenta feratis:
 Quem contra illacrimans juvenis sic fatur Judas:
 Care pater, nos primum audi, dein consule nobis,
 Atque tibi; nam quo pacto continget adire
 Illum hominem, qui juravit, per regia sceptrā,
 Per Superos, nisi Benjamin duxerimus ipsum,
 Ille quidem nec nos, nec, qui est in carcere, fratrem
 Dimittet, faciemve ejus spectare licebit?
 Verum, ut de nobis sint dura & tristia quæque,
 Vos miseri quonam pacto vivetis, & unde
 Tanta domus? capiti, quæso, pater optime, tandem
 Fide meo, puer iste omnes servabit, & ipsum
 Te patrem; mihi præterea duo pignora cara
 Sunt, nati, tu illos (concedo) interfice, siquid
 Adversus puero eveniat: deponere timorem,
 Atque omnem defende domum; quod pondera faccis
 Sint æris posita in nostris, jussisse ministris
 Id-dominum certum est, incertum, fraude dolove
 An pietate magis; nos certe audivimus illum
 Insignem virtute omni, nos vidimus illum
 Nobiscum flevisse famem atque incommoda nostra,
 Dum teque, & parvum fratrem, parvosque nepotes
 Commemoramus; age, o genitor, ne tempora differ,
 Neu plures inneſſe moras, & talia dicens.
 Adjecit lacrimas; victus pater, Ibitis ergo,
 Tandem ait, & puerum, & regionis dona feretis,
 Stactenque, & lacrimas terebinthi, & roscida mella,
 Et gummi, & liquidam styracen, & amygdala amara.
 Insuper & duplex pretium portabitis, & quod
 Inventum fuit in faccis, & quod data poscent
 Frumenta; interea faciemus sacra parentum

• Nostro •

Noſtrorum noſtrique Deo , quo cuncta ſecundus
Dirigat , & ſervos cælo proſpectet ab alto .

Poſtera Phœbeos curruſ Aurora vehebat ,
Quum pater & nati ſacris de more peraſtis
Cuncta viæ opportuna parant , & munera & ipſum
Beniamin : quem jam genitor complexus euntem ,
Et lacrimans , I , care puer , felicibus , inquit ,
Auspiciis : ſi te rediturum fata reſervant ,
Vltam oro ; lacrimæ vetuerunt dicere plura .
Tum ſimul & reliquos natos complectitur omnes ,
Commendatque Deo ; aſt illi bona verba precati
Dbruſum iter & longum capiunt , camposque relinquunt
Samarizæ , Solymenque ſacram : jam conſita Idumes
Prætereunt palmeta , Gerar , & Tartara vaſta
Syrbotis , tandemque vident Ægyptia regna ,
Optatamque petunt Memphin ; quos lætus Joſeph
Suſcipit : atque una fratrem de carcere ſolvit .
Ut vero admiſſis coram data copia ſandi ,
Sic Ruben : Hinc poſtquam diſceſſimus , optime Princeps ,
Venimus ad genitorem ; illi tua maxima juſſa
Narramus , fratrem duci te velle minorem
Beniamin huc iſtum ; tum ſaccis ordine apertis ,
Res mira , in ſummis pretium atque æs omne , quod ante
Exhibitum fuerat , ſe offert : quis miſerit , & cur ,
Ignotum eſt , Deus eſt teſtis ; verum , ut pater iſtæc
Audivit , viditque , imo ſuſpiria corde
Traxit , & Heu , nati , dixit , male Numen amicam
Nos aliquod nunc inſequitur , Fortuna reſceſſit .
Illa bona ; e bis ſex natis amiſimus unum .
In vinclis alius longinquis exulat oris :
Nunc ſpēs & miſeræ ſolamen dulce ſenectæ ,
Beniamin abduci petitur : vos ruſus abitis ,
Neſcio quo , & vereor , furum ne nomine eatis ,
Omnes ut tandem fato pereatis ab uno .

Nos contra miſerum ſolari ; fide parentum
Noſtrum & fide Deo , genitor : juſtiſſimus ille ,
Ille vir eſt ; regio quem tota Ægyptia dicit
Servatorem hominum , ſanctumque piūque ſatetur ,
Et colit : hinc nihil adverſum durumque timendum eſt .
His viſtus ceſſit tandem . Vos ibitis ergo ,
Et ducetis , ait , puerum , atque hæc parva feretis
Munera , quæ regio fert hæc , ſtaſten , & terebinthi
Reſinam , & liquidam ſtyracen , & amygdala amara .
Mellaque , dein duplex pretium portabitis , & quod
Impoſitum fuerat ſaccis , & quod data poſcent
Frumenta : & demum juſto natumque patremque
Commendate illi , pueri miſereſcat & hujus ,
Atque ſenis natos nimium miſereſcat amantiſ .

Talia

Talia distabat juvenis, quum lumina princeps
 Vix lacrimis cohibens tali est sic ore locutus:
 Este bonis animis, juvenes: ego munera grata
 Accipio regionis, & hunc, qui adductus ab omni
 Suspicionem puer vos, omni a fraude piabit.
 Ite, & fessa via, foeda & sudore lavate
 Membra, viri; mox luce bona discumbite mecum.

Hæc Princeps; famulorum alii in conclave lavacrum,
 Vasa alii mensasque parant; hæc inter Joseph
 Multa super regno & populis disponit alendis.
 Dein redit ad fratres, magnamque educit in aulam,
 Regales ubi monstrat opes, vasa aurea signis
 Calata, argentumque abacis, stratosque tapetas,
 Nec non parietibus, circum pendentia longis
 Aulæ, intextis auro & bombyce figuris,
 Quas dicas spirare; illic divina secutus
 Jussa Abraham, puerum in silvas ducebat Isaac
 Mastandum: puer ilignis onerabat asellum
 Fascibus, ipse pyram genitor vittasque parabat.
 Ille idem dextram vicina in parte levabat,
 Crudelemque enssem; demissus lumina Isaac
 Et flexis genibus ferituro colla parenti
 Præbebat, cæli demissus ab axe vetabat
 Nuntius, & dextram sublatam enssemque tenebat.

Parte alia fratrem fugiens tendebat Jacob
 In patris antiquas sedes, cognataque regna,
 Euphratem Tygrimque inter: patruelibus inde
 Virginibus hauribat aquas: tum pastor ad undas
 Euphratis dum pascit oves per littora Laban,
 Rachelem vocat, & dulces decantat amores.

Talia dum læti spectant Israele nati,
 Spemque aliquam sibi promittunt, tum magnus Joseph
 Jam genio libemus, ait: date flumina palmis,
 Vos famuli: tum sede altus discumbit eburna.

*Morte præventus, hoc item, quod sero incepérat,
 absolvere non potuit.*



HIERONYMI
FRACASTORII
CARMINUM LIBER.

I.

ALCON,

SIVE DE CURA CANUM VENATICORUM.

ASSIDUIS nuper fessus venatibus Alcon,
Falleret æstivi ut fastidia longa diei,
Corvini qua se nemora excelsissima cælo
Extollunt, viridi dum caprat frigus in umbra,
Dicitur ad juvenem senior sic fatus Acastum:
Me segnes artus, defætaque viribus ætas,
Et superare iuga, & latis discurrere campis,
Et torquere leves hastas, & ferre pharétram,
Nate, vetant, densasque indagine cingere silvas:
Sed te pulverem cursu transmittere campum,
Ferre ærum frigusque, leves agitare Molossos,
Et pinguem silvis ad testa avertere prædam
Nunc decet, ac validam pro me exercere juventam.
En arcum, pharetramque tibi, jaculumque relinquo:
Ne tamen usque adeo plenæ confide pharétræ,
Ut postrema canum interea tibi cura putetur:
Quorum ope veloces poteris prævertere cervos,
Aut aprum ingentem, aut fulvum superare leonem.
Ergo age, & hæc tecum semper mandata reserva.
Principio ut generosa canum tibi copia numquam
Desit, quæ certam valeat promittere prædam,
Elige degeneri nequaquam semine natos,
Sed quos assidue silvis exercuit altis
Et labor indomitus, sævarum & præda ferarum.
Nec vero parvi formamque genusque putaris:
Nam neque sunt animi, neque mores omnibus iidem;
Et variae diversa canum dant semina gentes.
Nam rabidas si forte seras te cura tenebit
Venari, & variis caput objectare periclis,
Spartana de stirpe tibi, de stirpe Molossa
Quære canes, Libycos illis, acresque Britannos,
Panno-

Pannoniosque truces, & amantes prælia Celtas
 Adde, nec Hircanos, nec Seras sperne feroces.
 Si vero parvos lepores, capreasque fugaces,
 Malueris, timidusque sequi per devia cervos,
 Delige Pæonios agiles, volucresque Sicambros.
 Quod tibi si latebras, abstrusaque lustra ferarum
 Rimari certa catulorum indagine cordi est,
 Hunc usum implebit Perfes, & Saxogelonus.
 At genere ex omni præsertim delige quæ nec
 Corpore sit gracili, nec densis aspera villis;
 Sed sublime caput, vivacia lumina, & amplam
 Ostendet frontem, atque ingentes oris hiatus:
 Cui rectæ surgant aures, cui pingua terga
 Dividat in caudam descendens spina reflexam:
 Sint armi lati, sint æque pectora lata:
 Lata alvus, quæ sic costis adjungitur imis.
 Ut tamen in spatium sensim se colligat artum:
 Ut cava diductis succedant ilia costis,
 Excipiant ficcis quas fortia crura lacertis:
 Inia pedum parva signent vestigia planta.
 Huic similem conjunge marem, quum vere tepenti
 Tangit amor genus omne avium, genus omne ferarum
 Bis quinos tamen ante dies accensus uterque
 In venerem, venere abstineant: sic plena libido
 Acrius exstimulat, viresque ad semina præbet.
 Hinc major soboles, atque inde valentior exit.
 Quæ simulac se se numerofo protulit ortu,
 Selige de multis quos jam præstare videbis
 Pondere: vel stipulæ flammis include sonoris
 Ingentem turbam: prolis nam nota periculo
 Egregiam sobolem, melioraque pignora mater
 Ocyus eripiet flammis, & inertia linquet.
 Illi igitur plenius ubi nondum viribus ætas
 Accessit, parvum cursu conscendere collem,
 Et molli assuescant se se demittere clivo.
 Hinc tenerum leporem, vel crura infirma trahentem
 Sectari capream, & facilem percurrere campum
 Incipiat, verbisque viri parere vocantis.
 Nulla mora est, ipsis crescant cum viribus anni.
 Jam potes hos tuto densis committere silvis:
 Perque altos montes, per lustra agitare ferarum:
 Nec minus aut apro, aut fulvo objectare leoni;
 Si modo vel capreas, vel dedignabere cervos.
 Immodicis tum parce cibis, tum cursibus illos
 Exerce assiduus: ac mox ad testa reverti,
 Vincla pati discant: ita demum libera colla,
 Quum res ipsa, ususque vocat, majore feruntur
 Impete, nec cursum remoratur pigra sagina.

Hæstenus in silvis catulos eduximus altis :
Nunc quæ morboſis ſit cura adhibenda , docebo .
Inſomnes quum forte canes occulta fatigat ,
Vimque adimit febris , putrem tunc ore cruorem
Ferro emitte levi : dein Bacchica dona roſarum
Miſce oleo , & rapidis ſimul omnia concoque flammis ,
Terque die inſerto demitte in guttura cornu .
Si verò nimio venandi langueat æſtu ,
Butyro lapathi ſuccos , Siculique Lyæi
Pocula , contuſumque piper ſimul omnia miſcens
Proſubige : ut certi ſimul ac commixta liquoris
Prætulerint ſpeciem , cupido canis hauriat ore .
Immodicam ſed forte ſitim dum ſublevat atro
Fonte canis , lymphæ mala ſi ſucceſſit hirudo ,
Cimiceo ſuffire canem nidore licebit :
Aut oleo ptifanam & ſpumanti melle ſubactam
Incoquere , offenſoque cani præbere vorandam .
Aut quum tetra lues (clavos dixere) palatum
Afficiet miſere , ſilveſtria ſeſama , nec non
Bacchi acidos latices & chartam ſume peruſſam ,
Atque Ammoniæ fruſtum : dein ſingula in unum
Confundens , tetra cauſam ſuperilline peſtis .
Tum verò , ardentes oculos inimica perurit
Quum rabes , crebraque fluunt a lumine guttæ ,
Jam frondes ſacræ myrti , ſilveſtris & uvæ ,
Arentesque roſas diluto concoque Baccho ,
Hiſque affecta levi citus abhuc lumina dextra .
Inde oleum , atque ovi niveos inmitte liquores .
Quod ſi nativo ſtimulatur coxa dolore ,
Lemulium lapidem (Meditem nomine dicunt)
Urina ſemel atque iterum demerge recenti :
Cui Bacchi dulces , acidosque adjuuge liquores ,
Quaque latet peſtis ſumta circumline penna .
Aſt ubi rupta novo manabit ſanguine vena ,
Tam murem geminum , ac telam pendentis Arachnes
Ure foco , cineremque undanti impone cruori :
Proderit & ferro candenti tangere vulnus .
Obſtruſto verò lotii quum forte meatu
Vexari aſpicias catulum , Cerealia dona
Objice laſte prius ſimæ perſuſa capellæ .
At contra venis ſi quando ſanguis apertis ,
Pro facili urina , terram madefecerit atram ,
Conveniet lente ſerventi laſtis ahenò
Mollire , & tenues coriandri immittere ſuccos ,
Infracumque piper , laticemque undantis olivi ,
Inſerotoque cani paulatim infundere cornu .
Quid ? taceam nimio quum decidit ungula curſu ?
Frangere namque juvat pallentis grana cumini .

Deu.

Dentibus, admotaque pedem lenire saliva:
 Incipientque novi subcrescere protinus ungues.
 Fit quoque ut immundo catulus juguletur ab oestro:
 At tu silvestrem crepitantibus urere rutam
 Ignibus, & fumo pariter mulcere salubri
 Disce: dehinc acri perfundere vulnus aceto.
 Quin aures etiam muscarum turba molesta
 Impetit usque adeo, mutilatum appareat alte
 Ut caput: ipse autem venienti occurre periclo,
 Et prius has nucibus, viridique putamine tinge.
 Quid quum dura canes inter se praelia miscent,
 Alter ut alterius percussus dente laboret?
 Tunc etenim cervi flammæ subiecta voraci
 Offa teres, oleo subigens frondentis olivæ
 Unguinis in morem, ac vulnus letale perungens:
 Quamquam etiam possis ramenta inducere ferri.
 Namque venenifero serpentis faucibus istu
 Quo valeat, scit sponte sua reperire salubre
 Gramen, & ipse sibi nullo auxiliante mederi.
 Senserit at rabidos ubi morsus, protinus ipse
 Idem rutæ foliis, acrique Lyæo
 Junge picem, læsæque adhibe hæc medicamina parti.
 At mala quum scabies miseros depascitur artus
 Latrantum, & scæde miserabile corpus adurit,
 Cerussam, abdomenque bovis, resinamque tenacem,
 Butyrumque recens viridantibus incoque sensim
 Lentisci foliis, infestaque membra perunge.
 Sed tunc præcipue solerti mente cavendum est,
 Quum rabie accensus nunc hos, nunc impetit illos,
 Ipsi insensus hero, datque insanabile vulnus.
 Ergo illum primo valida compesce catena:
 Inde rosæ agrestis radicem pondere saxi
 Contusam vivi fontis consperge liquore,
 Ut potus speciem lino colata nigranti
 Præferat: hac sumpta, revocari ad pristina tradunt
 Sena canem, ac posita rabie mitescere rursus.
 Sunt qui silvestres ficus, adipemque vetustum
 Contundant: hederas alii ferventibus undis
 Emollire jubent, donec pars una supersit
 E tribus, atque ipsis foliis, tepidoque liquore,
 Pascere quadrupedem, Aurora surgente furentem.
 Nil tandem usque adeo prodest, ac prima sub ipsum
 Principium morbi rescindere semina ferro.
 Nam qua parte imo conjungi lingua palato
 Cernitur, & fauces, nativo concolor auro
 Occupat, in rabiemque feros agit usque Molossos
 Vulnificus vernis, suffunditque ora veneno.
 Quem si quis potuit serpo rescicare, potentem

Is tanti abstulerit causam, stimulumque furoris.
 Quæ sèperant, olim: nunc prædam ad testa jacentem
 Ferre monet præsens fugientis temporis hora:
 Quandoquidem calamos posuit Coridallus acutos,
 Et jam sublustres investat Luna tenebras.

I I.

IN OBITUM M. ANTONII TURRIANI

VERONENSIS,

AD JOANNEM BAPTISTAM TURRIANUM

FRATREM.

ETSI egomet tanti casu percussus amici
 Solamen nostris discerperem lacrimis,
 Ne mea perpetuo manarent lumina fletu,
 Pergeret aut tantus urere corda dolor,
 Attamen, ut mi animi valuit concedere amaror,
 Istæc mœsta tibi carmina persolvi:
 Quo fortasse meis consolaretur Camœnis,
 Si miseros quicquam Musa levare potest:
 Ac ne tu in lacrimas paulatim totus abires,
 Liquitur ut pluvio tacta pruina Noto.
 Quandoquidem cari fato te fratris acerbo est
 Rumor in extrema vivere tristitia,
 Nec iam posse quietis habere, aut commoda somni,
 Sed cedente die, sed redeunte queri:
 Moerentemque, vagumque, & turpem fletibus ora
 Amissum totis querere litoribus.
 Fertur ut Eridani ripas errasse per omnes
 Anxia fraterno funere Lampetie.
 Septem quam perhibent somni sine munere noctes,
 Jejunam septem continuasse dies.
 Et, quoties longo desessa errore viarum
 Umbrosi in ripa concidit Eridani,
 Reddite vos Phaetonta mihi, clamabat ad undas,
 O quæcumque sub hoc flumine Nympha latet.
 Te tamen, nullius si cuiquam morte dolendam est,
 Iusta quidem tanti causæ doloris habet.
 Quandoquidem inmaturo morte tibi omnia frater
 Commoda, teque ipsum perdidit, atque tuos:
 Perdidit hei misero carus tibi frater ademptus,
 Quo tibi non ullus carior alter erat.
 Ille amor, ille tuæ solamen dulce juventæ,
 Ille tuæ fuerat spes, columenque domus:

Qui

Qui cum versari semper, quicum esse solebas,
 Atque animi arcana dicere consilia:
 Unum mirari, atque unum præponere cunctis:
 Ambrosiæ e cujus effluere ore lepos.
 O nimium miseri nos, & genus ærumnosum,
 Deterius quorum est conditione nihil.
 In nos sævitum est bello, quo durius umquam
 Vidit nulla ætas, nec feret ulla dies.
 Servitium tulimus crudele, & barbara iussa,
 Parsque domos caras liquimus, & patriam.
 Reliquias, miserosque absumsit tabida cives
 Pestis, & huc illuc sævit Erinny's adhuc.
 Nec sat erat: miseri crudelia funera COTTÆ
 Flevimus, o indigna COTTA perempte neco,
 O COTTA infelix, quæ te fata impia nobis
 Tam subito ante tuos abripuere dies?
 Jam neque finierant gemitus & lumina siccis.
 Non bene cessarant tristia flere genis,
 Quum tu, MARCE, cadis, quum nos tot tristibus actos
 Deferis, heu falsos credulitate tui.
 Non hoc vivida nos tua jam sperare juventa,
 Hoc tua non virtus, non benefacta dabant.
 Exanimem ut nos te juvenem, nec jam ulla loquentem
 Externa miseri contegeremus humo:
 Sed fore, quem fama virtus æquaret Olympo,
 Unus qui multos instrueres populos.
 Qualis ad aerio decurrens monte jugi fons
 Communes multis sufficit unus aquas.
 Nam quid ego aut laudes memorem, aut tua maxi-
 ma laudum
 Præmia? quam humano profueris generi:
 Aut quam sæpe animas positas jam sedibus Orci
 Ad sua Apollinea membra vocaris ope?
 Vos testes, Ticine, & qui inter pascua læta,
 Medoace, antiquos abluis Euganeos:
 Illo quos fama est naturæ arcana docente,
 Sæpe inter Nymphas obstupuisse suas:
 At nunc amisso turbatis flecte sub undis,
 Inque mare assuetas non habuisse vias.
 Non tamen aut soli, nec vos magis omnibus, amnes,
 Indoluisse acerbo illius interitu.
 Illum etiam Grajæ, & Nymphæ flevire Latinæ,
 Illum etiam Tuscis Calliopea modis.
 Quin etiam silvæ, & montes gemitisse feruntur,
 Et vos extremi flectis Hyperborei.
 Sed mage Benacusque senex, & Sarca, sepulti
 Qui prope vicinum prætereunt tumulum.
 Sed magis ipse Atheis, olim qui corpus humandum
 Con-

Condendum caram perferet in patriam .
Ne extra cognatos cineres , TURRIENSIÆque ossa
Illum perpetuo terra aliena tegat .
Tunc vos o patrio prognatæ Najades amne
Spargite odoratis plena sepulcra rosis .
Tempus erit , quum posteritas mirata nepotum ,
Quantum isti , dicent , ah tribuere dei !
Atque aliquis monumenta legens , & scripta jacentis
Devota ad mutos ferta feret cineres .
Interea , o vos Benaco centum patre Nymphæ ,
Sarcatque ab Alpinis edite verticibus ,
Et vos o Naci rupes , & saxa Briani ,
Et nemora umbrosis densa cacuminibus ,
Ferte aliqua , o nunc ferte meo solatia BATTO ,
Et tantam ex animo demite tristitiam .
Quem neque sancta potest Sophie complexa levare ,
Musa nec assuetis sedula carminibus .
BATTE , tamen vates , longum ut quæssisset ademptam ,
Et longum flectet Thracius Eurydicen ,
Nullo solatus , blando quam carmine , curas ,
Nullo , quam Sophia , dicitur esse magis .
Illi , seu Rhodopes silvis erraret in altis ,
Sive in deserti Strymonis aggeribus ,
Semper Musa comes , semper pendebat eburna
Ex humero numeris docta sonare lyra .
Ille orbem immensum semper spectabat , & orbis
Ornatum , puris sidera luminibus .
Et maria , & montes vastos , atque irrequieta
Flumina , tum quidquid denique terra parit .
Quorum animadvertens certa sub lege tenorem ,
Pauulatim caram senserat Eurydicen
Deleri , & tristem mutari in gaudia mentem ;
Tantum animos ærum forma levare potest .
Aspice lucentem Lunæ Titanidis orbem ,
Et cum Sole suo quæ super astra micant .
Omnia sunt æterna , & vitæ juncta perenni :
Quæ loca felices Diique animæque colunt .
Inferior Leti regio est , sedesque malorum ,
In qua est , quod felix intucare , nihil .
Quippe solum hoc ventique imbresque & cuncta fatigant ,
Quæcumque aëria de regione cadunt .
Adde æstusque , hiemesque , & morborum genus omne .
Tum natura aliqua est indiga semper ope .
Nos porro desideriiis mala plurima nostris
Junximus : o præceps in sua damna genus .
Hinc odia , & timor , & lites , & bella cruenta ,
Et via non uni plurima aperta neci .
Attamen in tantis ærumnis est animi spes

Uni.

Unica, quem melior vita beare potest.
 Quippe, ubi præfulgens ulla virtute reliquit
 Corporeum, sedes advolat ætherias,
 Semideumque domos, & Divum morte carentum,
 Hic, ubi non æstas, nec fera sævit hiems:
 Nec dolor, aut desideria infelicia nostri,
 Nec fors partem aliquam, nec rude vulgus habet:
 At sancti heroes habitant, gens inclita bello,
 Ingenuique, novem qui colnere Deas:
 Quique pii, justique, Deum præcepta secuti,
 Et sancta insignes qui fuerunt Sophia.
 Quos inter tuus ipse recens a funere frater
 Miratur cælum, Cælicolumque domos,
 Æternamque diem, & felicem ex ordine gentem:
 Inter quos gaudet se quoque dinumerans.
 Quem circum illustres animæ, PROAVIQUE, PA-
 TERQUE
 Intentos oculos ore Nepotis habent,
 Et pulchram effigiem agnoscunt: miratur & ipse
 Egregiam stirpem, magnanimumque genus:
 Agnoscitque suos, & facta, & nomina discit:
 Tum quantum sit adhuc terra habitanda tibi.
 O fortunatum nimium, tristem ante senectam
 Carpere iter cæli cui potuisse datum est!
 Quas syrtes, quos & scopulos post terga relinquis,
 MARCE! tibi a quanto est salva carina mari!
 Fortunata iterum: tu non incommoda vitæ
 Passus adhuc, non quæ plurima habet senium:
 Sed dulces inter Musas, & Apollinis artes
 Fortunata nimis vita peracta tibi est.
 I, decus Ausoniæ juvenis, numeroque Deorum
 Te immisce: culta est jam tibi terra satis.
 Illa tuum, dum sidera erunt, dum flumina current,
 Nomen in ætra memor, & benefacta feret.

III.

AD JOANNEM BAPTISTAM TURRIANUM

VERONENSEM,

IN OBITUM PAULLI, ET JULII,

IPSIUS FRACASTORII FILIORUM.

BATTE, animos quando tristes, curasque levare
 Musa potest, ego nunc sortem, casusque su-
 premos

Ipse

Ipse meo tristi solabor carmine tecum .
Et tecum dulces natos , quos funus acerbum
Abstulit , æterna & pariter caligine texit ,
Conquerar : ut saltem tenebris , & nocte perenni ,
Quantum opis est nostræ , miserorum nomina demam ,
Quæ potui , dum vita illos auræque fovebant ,
Exhibui genitorque , gubernatorque duorum
Infelix : primas alter vix fingere voces ,
Alter adhuc teneris jam tum decerpere ab annis
Prima rudimenta , atque omen præbere parenti .
Quos ego (sed Zephyri spes portavere paternas)
Censueram , si fata darent , quum posceret ætas
Fortior , ad dulces tecum traducere Musas
Assiduos , citharamque humeris suspendere eburnam .
Inde , ubi jam cælum , ac Solem , fulgentiaque astra ,
Terramque , & liquidos ignes , æquorque profundum
Mirari inciperent , latisque animalia campis ,
Te monstrante viam , te rerum arcana docente ,
Mens fuerat dulces Sophiæ deducere ad hortos ;
Hortos , quos ver perpetuum , quos aura Favonii
Semper alit , semper cælesti nectare pascit .
Hic tremulo , & longa confecto ætate parenti
Purpureos legerent flores : senisque levamen ,
Threïcia canerent cithara , quæ plurima quondam
Audiissent te populea meditante sub umbra ,
Divino mirantem Athesim dum carmine mulces ,
Et rerum canis , & teneri primordia mundi .

Fortunate senex , si natorum ore referri
Fata sinant , ut nata chaos antiquissima rerum
Materies visi correpta cupidine pulchri
Arserit , atque Deum thalamo complexa , jugarit
Corpora prima : quibus discordia nata hymenæis ,
Et divisa locis , suprema petiverit ignis
Purior , & nitidis vicinis federit astris :
Quem juxta per inanes amplum se fuderit aer :
Ima autem tellus vasto circum obruta ponto
Consisterit : quam dudum hinc inde agitantibus undis
Substerni late campi , deformiaque arva
Paullatim apparere supra , & concreescere montes
Cœperunt , procul & nudas ostendere cautes ,
Mox memora , & virides undis mirantibus ornos .
Montanis tum speluncis , & rupibus altis
Exsiluere udæ formoso corpore Nymphæ ,
In viridi flavos siccantes littore crines .

O fortunatum nimium , si Numina tantum
Hæc mihi servassent , si non casara dedissent :
Verum aliter Lachesi visum est , quo tempore primum
Natorum cœpit producere fila duorum .

Quip-

Quippe auram miseris, & dulcem noscere vitam,
 Spemque sui dederat præbere: alia omnia ventis
 Tradita, nocte atra & tenebris involverat Orci.
 Non licuit firmos annis, viridesque juventa
 Inspicere, & caræ ad metam deducere vitæ.
 Nec potui votis, nec ope adjuvisse paterna
 Clamantes, frustra que patris suprema petentes
 Auxilia, & nota nequicquam voce vocantes.
 Heu mortem invisam: quis te mihi, PAULLE, Deorum
 Arripit, & miserum complexibus abstrahit istis?
 Tu prior immitti correptus morte, parentem
 Deferis, & dulces auras, & lumina linquis.
 Quod te si tali dederant sub lege futurum
 Fata mihi, non jam fuerat mœroris abunde?
 Non gemitus? quid me e tam multis patribus unum,
 Cælicolæ, lacrimisque novis, & morte recenti
 Opprimitis, caroque etiam spoliatis JULO?
 Heu, miserande puer, quanto plena omnia lusu
 Liquisti abscedens! quem non vesana Deorum
 Incusavit inops, quum te complexa jacentem
 Aspiceret laniata comas & pectora mater?
 Ah misera, ah male fausta parens, quid Numina æta
 Sollicitas? jacet ille, velut succisus aratro
 Flos tener, & frustra non audit tanta gementem.
 Ah misera, ah quid sublatum complexa moraris?
 Ille tuus non jam est: vos illam in funere, matres,
 Collapsam accipite, exanimemque reponite testis.

At vos, infantes animæ, carissima nuper
 Pignora (quod misero superest optare parenti)
 Semper avete mei, ut licuit, semperque valete
 Seu dulce Elysium sanctos, umbræque tenebunt
 Sanctorum nemorum, puro seu sidera cælo,
 Ipse ego vos semper lacrimis, vos carmine tristi
 Prosequar, & vestris persolvam iusta sepulcris:
 Donec me vobis tenuem conjunxerit umbram
 Summa dies, natis æquat quæ sola parentes.

Interea curas numeris, musaque levemus,
 BATTE, animos: quando verum mortalis origo est,
 Quando etiam vitæ norunt vasta æquora finem.
 Scilicet, & quondam veniet labentibus annis
 Illa dies, quum jam curvo sub vomere taurus
 Desudet, terramque gravis proscindat arator,
 Nunc ubi cæruleæ rostris spumantibus undæ
 Sulcantur, verruntque citæ freta longa carinæ.
 Nec vos, o liquidi fontes, æterna manebunt
 Sæcula, se tanto quamvis pater efferat amne
 Eridanus, tumidusque fluat tot cornibus Hister;
 Quin etiam acris montes, mirabile dictu,

Taygetus, Syphilusque, iugo & Cymbotus opaco
Innumeras post æstates, ac sæcula longa,
Senserunt seniumque suum, supremaque fata:
Ex quo Materies thalamos, primosque hymenæos
Atque elementa novus sensit discordia mundus.

I V.

AD DANIELEM RHAINERIUM

Veronæ Praefectum, Senatorem amplissimum.

RHAINERI venerande, nno quo sospite, nondum
Justitia, & virtus terris antiqua recessit,
Multa quidem monumenta tuis sub fascibus Urbis,
Multa cadunt antiqua piorum & templa Deorum,
Et Bromii vites, & amicæ Pacis olivæ.
Verum hæc ex Urbis re dilabuntur, & ipsi
Ultro etiam sua testa volunt procumbere Divi.
Ah, saltem antiquo medicorum parcere ritu,
Fasque, & suetus amor pietatis, & inclyta virtus
Magna tui valeant: valeant hoc more vetusto,
Quo nostri vixere atavi, vixere parentes,
Te duce venturi longum superare nepotes.
Sanctior hic templis, hic Divam est sanctior aris,
Quem neque tempus edax potuit, nec sæcula tot jam,
Non belli rabies, non ipsum infringere ferrum?
Tantum est justitiam violari, & fœdera rumpi!
Scilicet & sacra est medicina, vetisque Deorum
Inventum, & sacri medici, quibus auctor Apollo;
Qui revocare animas jam caligantibus Orbi
Faucibus impositas ad caræ munera vitæ,
Ætheriosque haustus, & dulcia lumina possunt:
Qui genus innocuum, vitæque ad publica nati
Commoda, divinas tantum didicere per artes
Exercere ævum, atque humanæ præesse saluti.
Hos æquum est te præcipue, longèque tueri,
RHAINERI, ante alios, idem cui cessit Apollo
Ipse suas artes, & munera nobilis otii:
Quemque domos Divam docuit, perque omnia duxit
Sidera: quem Grajo insignem Latioque cothurno
Secretas dedit Aonidum percurrere silvas,
Et calamos, citharamque humeris suspendit eburnam.
Idem te dulces Sophiæ deduxit ad hortos,
Hortos, quos ver perpetuum, quos aura Favonii
Semper alit, semper cælesti nectare pascit.
Salve, magne parens, qui tot virtutibus auctus
Urbem justitia, & Divis in pace secundis

Æraçast. Carm.

D

Egre-

Egregiam moderare, Athesis qua flumine pulchro
Labitur, & placido secatur arva virentia cursu.

Tu quoque magna virum genitrix, urbs inclita,
salve,

Cura Deum, VERONA: tui cessare labores,
Ærumnæque graves, atque horrida Martis imago,
Sanguinis & vesana sitis, & tristis Erinny.
Barbara jam cessit rabies, & in Alpibus atrox
Sævitiæ miles, gelidumque exercet ad Albim.
Jam duros nimium servitus, & sera iussa
Desuemus perferre, ullos non jam urbe Tyrannos
Conspicimus, sed te, RHAINERI maxime, sed te,
Magne pater, uno tandem quo sospite, nobis
Jam bona Libertas rediit, Pacemque per agros
Lata Ceres, Bacchique chorus comitantur ovantes.
Gaudete o quicumque boni speratis agrestes,
Quorum amor est sobolis, studiumque nepotibus arva
Incolere, & parvas ulmis attollere vites.
Tempus io, nunc tempus adest, quo sæcula Parcæ
Aurea nent, tandem quæ nunc te Præsides læta
Incipiunt: sed erunt nobis tunc maxima, quum te
Insignem sceptro Venetum, sanctaque tiara
Regna salutabunt terris diffusa, tuumque,
Qua Sol exoritur visus, quæ deserit orbem
Occiduus, late clarum ferret Hadria nomen.

V.

AD JOANNEM MATTHÆUM GIBERTUM,

EPISCOPUM VERONENSEM.

Ille tuus, GIBERTE, sacras qui in montibus aras
Melfineis tibi constituit, qui teque, tuumque
Per nemus omne canit, perque omnia littora nomen,
Hæc enata suis mittit tibi poma sub hortis
Aurea, quæ quondam Medorum e sinibus Atlas
Transtulit, & magno servabat tuta dracone:
Mox victor sacra expoliens pomaria Perseus,
Dum levibus nostrum talaribus æra tranat,
Donavit Charitæ Benaci ad flumina Nymphæ.
Insuper hos, GIBERTE, tibi date munera pisces,
Qui quondam Etrusci nautæ, nostraque fuere
Effigie, nunc Benaci sub gurgite nantes
Cæcula converrunt sinuatæ æquora caudis,
Quod si forte juvat tanti miracula facti,
Atque hominum quondam versas audire figuras,
Ipse edam, Saloi quæ quondam ad littora BATTUS,
BAT-

BATTUS amor Dryadum cecinit, mihi rettulit Ægon.

Forte senex Crætæ patris Saturnus ab oris
 Ab Jove depulsus, regnum sedesque quietas
 Quærebat Latio in magno, fataliaque arva:
 Jamque diem medio Sol inclinabat ab axe,
 Quum fessus, longaque via siccatus & æstu,
 Ad vada Benaci viridi prospexit in herba
 Vescentes nautas, & puri grandia Bacchi
 Pocula miscentes: placido quos ore salutaans,
 Ecquis, ait, vestrum, pueri, succurrit egenti,
 Defessoque seni? quis pocula parva ministrat,
 Exstinguitque sitim? poscenti illudere nautæ,
 Et ridere senem; quis enim præsentibus undis
 Possit habere sitim? en flumine largius illo
 Ebiberis, gelidaque æstum solabere lymphæ.
 Illusus Deus immixtis in flumina palmis
 Haurit aquas, pronusque bibit: tum versus ad illos,
 Quo tamen e pretio, pueri, ducetis ad illas
 Remigio cantes, quæ flustibus undique circum
 Clauduntur, mediisque jacet parva insula in undis,
 Ostenditque locum: pretium gens impia iniquum
 Postulat; at pactus senior tamen omnia firmat,
 Adjuratque Deos testes, scanditque phaselum.
 Illi autem, dum nave cita liquida æquora sulcant,
 Ignari, quisnam sedeat Deus, Eja age nobis
 Fare, senex, quonam latebras pro crimine quæris?
 Anne fugam subrepto auro, dominoque relicto
 In loca tuta paras? Sed te tua fata sequuntur,
 Demens, quem nullæ poterunt servare latebræ.
 Nomine Carpus erat, qui tam temeraria verba
 Dixerat, ingeminant comites, aurumque repossunt,
 Proferri subreptum aurum: ni proferat, omne
 Vi rapiant, pulsumque rate in media æquora turbent.
 Quos placidus distis senior demulcet amicis.
 Etrusci nautæ, quæ nunc mens impia suadet
 Nec servare fidem vos, nec meminisse Deorum?
 Dicenti jam vis, jam dextra infertur. At ille,
 Qui tandem agnosci posset Deus, impla, dixit,
 Gens inimica Deum, dabitur, quod poscitis, aurum.
 Hoc imo sub fonte aurum pascetis avari.
 Dixerat. Ast illis veniam poscentibus, & vox
 Deficit, & jam se cernunt mutescere, & ora
 In rictum late patulum producta dehiscunt:
 In pinnas abiere manns, vestisque rigeſcit
 In squammas, caudamque pedes sinuantur in inam.
 Qui fuerat subita obductus formidine, mansit,
 Pallidus ore color, quamquam livoris iniqui
 Indicium suffusa nigris sint corpora guttis.

Carpus aquas, primus Numen qui læsit, in amplas
 Se primus dedit, & fundo sub condidit imo.
 Inde alii celeri se se in media æquora saltu
 Præcipitant, vacuumque ratem, & sine remige linguunt.

Jamque Deus super unus erat: subit ipse magistri
 Munus, & adductis pelagi petit ultima ripis:
 Expositus ripa placidas conversus ad undas,
 Ecquid Io, Nymphæ Benacides, ista super sit
 Navis, & hunc amnem sacrum male fausta carina,
 Et vestras sulcabit aquas? En certe ita & hujus
 Criminis hoc scopulo semper monumenta manebunt.
 Dixit, & in partem rupis conversa pependit
 Cum remis ratis ipsa suis, ubi cernere conchas
 Nunc etiam licet, externo quas littore nautæ
 Collectas miseri media imposuere carina.
 Ex illo nunc Benaci per littora nantes,
 Atque auri venas fundo pascuntur in imo,
 Nunc etiam a primo retinentes nomina Carpo.

V I.

AD MARGARITAM VALESIAM

NAVARRÆ REGINAM:

Cæsaris Fregossi nomine.

DUM me Cenomanos inter tenet Italia tellus
 Zefredique arces, mens autem nescia claudi
 Libera trans gelidas Alpes Rhodanumque vagatur,
 Trans Ararim, cælumque beatum & Gallica semper
 Regna videt, Regemque suum, tecumque moratur
 Assidue, versatque tuas sub pectore laudes;
 Ecce mihi cælata auro gemmaque nitenti
 Armipotens, galeaque feros & Gorgone Pallas
 Oblata est, seu fors tulerit, seu fata dedere.
 Continuo visa ante oculos effulgere imago
 Magna tui, inque ipsa micuerunt Pallade vultus
 Virtutesque tuæ, moresque, & facta, decusque.
 Quippe illam e cunctis sic tu mortalibus una
 Assimilas, sic una refers, in Pallade ut & tu
 Noscare, & Pallas in te; sive illa Minerva,
 Seu dici Bellona velit, consensus utrimque
 Est idem, ora, animi genius, cognataque virtus.
 Jure igitur tibi debetur, tibi convenit uni
 Gemma, aurum, effigiesque Deæ: sive est Polycleti,
 Sive Myronis opus; placeat tibi munus: imago
 Est tua: sit gratus cum munere muneris auctor.

Quod

Quod si digressus paullum, & provectus amore
 Pierio, dum me dulces per grandia Musæ
 Fasta tua, & dum per monumenta heroica ducunt,
 Ipse tuas memorem laudes, quibus æthera ad altum
 Scandis, & illa simul referam, per quæ una Minervam
 Usque adeo assimilas, juvet auscultare canentem,
 Si vacat, & solitæ sunt te oblectare Camœnæ.

Illæ parente Deo Jove magno, fratre superbit
 Gradivo: tum forte acres in bella phalanges
 Si quando exacuit, late timor occupat urbes,
 Turbati tremuere hostes, ac terga dedere.
 Ipsa hastam quatit atque horrenti Gorgone sævit.
 Ante Deam diræ effigies, Terrorque, Minæque
 Sanguinæ, & dans terga Pavor, Visque impia, & iræ,
 Vinculaque, Vindictæque astant, & Mortis imago.
 At vero positis armis, atque ægide dira,
 Mollius humanas si demittatur ad artes,
 Mansuetosque usus, tum dulcia carmina cantat,
 Et facilem exercet Musam, aut heroica gesta
 Describit, numerisve orbes metitur & astra.
 Sin autem imperiis & majestatis honore
 Gaudeat, æternæ ramis insignis olivæ
 Aut justas sancit leges, aut jura ministrat,
 Aut arces struit, aut medias regina per urbes
 Incedit, matresque super longe eminent omnes:
 Condensi agglomerant altis clamoribus Afri,
 Spectatumque ruunt, arasque & publica ponunt
 Templa Deæ: plausu resonat Tritonia ripa.
 Tu pariter magno Gallorum Rege Deoque,
 Ac Jove nata simul, Germano Marte superbis.
 Nam Martem quisnam esse neget, seu fortia nudus
 Brachia, prævalidosque artus, atque Herculis armos
 Ostendit, taurumque uno prostraverit istu:
 Sive acrem, pictisque armis spectandus & auro.
 Pressit equum, struxitve acies, & victor in hostes,
 Ceu torrens, signa atque viros sternitque fugatque:
 Fulmineove Jovis tonitrus imitatus & arma
 Tormento, muros & magnas diruit urbes?
 Te quoque tantorum comitem, partemque secundam
 Bellorum, si quando acies atque arma movenda
 Percussæ tremuere urbes, horrorque, pavorque
 It campis, Mars germanam comitatur ovantem:
 Attoniti spectant populi gaudentque tueri
 Nunc primum, nunc & medium, nunc agmen obire
 Postremum, nunc pellere equum, nunc tendere in
 hostem,
 Turbantem cuneos, & abactis agmina signis.
 Assunt comites circum Solertia, & Astus,

Et magna audentes Animi, & Tolerantia dura,
 Curaque, Sedulitasque vigil, Spesque alta, Laborque,
 Et Divum Favor, & ventis Fortuna secundis:
 Pone sequens magno graditur Victoria plausu.
 Nec minus horrenti a bello, partisque triumphis
 Si juvat ingenii, pacisque incumbere in artes,
 Nunc lauro redimita comas, imitata sorores
 Castalias, plectis numeros, & carmina dictas,
 Carmina nec rerum fato subiecta, nec ævo:
 Nunc magnos dimensa orbes in templa Deorum
 Attollis animos, patrioque assuescis Olympo:
 Nunc tua describis vel regum gesta tuorum,
 Aut eadem depingis acu: stant curribus altis
 Et pater, & proavus, cunctique ex ordine reges,
 Captivosque hostes, & victos colla Tyrannos
 Ante rotas longis ducunt in templa triumphis:
 Ipsa opus & textum stupet immortale Minerva.
 Quam vero, o quam te dicam, quum legibus æquis
 Justitiaque feros populos frenasque, regisque,
 Et divina doces jura, & civilia ferre:
 Aut arces tollis, aut propugnacula condis:
 Aut matres inter medias, populosque frequentes
 Incedis Regina. Favor comitatur euntem,
 Majestasque, Pudorque, tamen qui Pallada possit
 Armatam, & Martis gradientem in bella decere.
 It dextra Pax læta manu, & prætendit olivam.
 Applaudunt Sequani, floresque & lilia passim
 Effundunt, gaudentque tuas attollere laudes,
 Reginamque, Deamque, salutiferamque salutant,
 Et pace insignem, & bello ferroque potentem.
 Fortunata nimis, magnus quam Cæsar, & omnis
 Suspicit admirans orbis, cui lumine tellus
 Felici arridet, totus cui militat æther.
 Diis quamquam visum aspectu tibi debita regna
 Paullisper privare tuo, seu crimine cives
 Id meruere aliquo, seu te tua fata reservant
 Ad majora, viamque tuis virtutibus amplam
 Expediunt, panduntque. Etenim jam tempora læta
 Illa instant, quum post lacrimas, post publica vota
 Te tandem tua regna novis decorata trophæis
 Accipiant, & iusta tibi solemnia solvant.
 Jam ludi, festique dies, jam sacra parantur:
 Jani placidus ripa gaudet Meniascus amœna:
 In templis pueri impubes, mixtaque puellæ
 Sacra canent, ortusque tuos ad sidera toilent:
 Ut nascentem ulnis primæ excepere Camœnæ,
 Melleque, & Aonio tetigerunt ora liquore:
 Ut Charites fovere Deæ, & decus omne dedere:

Ut

Ut parva in numerum pedibus cunabula Divæ
 Pellentes, manibus nentes fatalia pensa
 Grandia concordēs cecinerunt fata Sorores.
 Stabant ingentes sublatīs mollibus æcus
 Cælati gessisque tuis, factisque tuorum.
 Supra omnes humeris exsiliens altaque corona
 Frater erit, senosque ferox ex hoste triumphos
 Ducet ovans; mox fortuna congressus iniqua,
 Cum dura bellare Dea, & decernere dure
 Cogetur; longe illa Euris in bella vocatis
 Objicere adversos, & toto nubila cælo,
 Et casus, & monstra modis minitantiā miris
 Cerneretur: rex contra animis, & fortibus ausis,
 Et virtute nova tandem superare cadentem,
 Tendentemque manus; tum ferro & compede victam
 Protrahere, & campo captivam ducere aperto:
 Nubila diffugere, & turpi deformia monstra
 Vincta fuga, vario bello consumpta fameque
 In cæcās latebras obscuraque Tartara condi.

O, mihi si tantum juvenili in corpore vitæ,
 Et tantum det Parca mihi, hæc ventura superstes
 Ut videam, comiterque tuos, Regina, triumphos:
 Mox etiam spectare queam & majora parari!
 En erit, en umquam illa dies, quum Gallica signa
 Attolli, & Sequanos compleri milite campos
 Conspectiam, fremere arma Rhemos, fremere arma
 Cadurcos,

Anlercosque, Heduosque, & pictis Lingonas hastis?
 In mediis Regem secum cataphracta trahentem
 Agmina, sublimem sanctas procedere ad aras,
 Per caput & sacram regum de more coronam
 Jurantem, & Solymas repetentem debita sceptris
 Regna suis: te parte alia fortes Ituriscos,
 Andelos, Biturisque feros in bella moventem:
 Consiliis, tantoque operi comitemque ducemque
 Ascitam: nec non tanto sub rege coactam
 In ferrum ruere Italiam, & socia arma trahentem
 Signa sequi: mox o liceat Cæloque secundo,
 Et præsentē Deo, tot se se addentibus una
 Prospicere immensum consilii puppibus æquor,
 Carmelique procul rupes, & littora Ioppes
 Lætā Dei Classē, & victricia vela vocare,
 Et trepidum Euphratem, & magni tremere ostia Nili.
 Tunc ego non alium Martem mihi, Pallada poscam
 Non aliam mihi: rex Mavors, tu maxima Pallas
 Sola eris: o ego tunc gemino sub Numine tutus
 Per medios hostes videor densosque maniplos
 Victor agi, videorque mea sub cuspidē fractos

Munera magna tibi captivos ducere reges :
 Nec non & spolia ampla tuis addenda triumphis
 Jungere , barbaricas vestes , regumque tiaras ,
 Armaque , Mygdoniosque arcus , Lyciasque pharétras :
 Cernere & exanimem fuso cum milite portas ,
 Caucaeas , atque Hircanos inquirere saltus
 Maumethem , & se se extremis occludere Baetris .
 Hæc , precor , hæc propere eveniant felicibus astris ,
 Si qua fata dabunt , votis si Juppiter adsit .
 Interea , siue hæc te cura , & gloria tangit ,
 Seu pacem Europæ miseræ moliris , & arma
 In Superum sævos hostes avertere tentas ,
 Magnanimo assistente tuis conatibus ANNA ,
 ANNA spectato meritis , cui summa potestas
 Tradita , quo rerum moles onerosa recumbit ,
 Quidquid agis , si quando animum convertis ad ipsam
 Italiam (neque enim teneat non hæc quoque cura)
 Tunc dicas , Cælo ante alios mihi fidus in illo est ,
 Qui nisi pro Rege invigilans noctesque diesque
 Illic res Italas , & regia munera trahet ,
 Gallica suspiret regna , & tabescat abesse .

Præterea , Dea bellipotens , quæ munera CÆSAR
 FREGOSUS , parva illa quidem , sed congrua mitto ,
 Haud ingrata tibi Latii accedat ab oris ,
 Una eadem , faciesque tui , faciesque Minervæ .
 Quineriam , quoties Divam spectare juvabit ,
 Te toties spectare puta . Sed , me quoque tanti
 Si facies , si me tali dignabere honore ,
 Quam memor ipsa mei fueris , tum nomine nostro
 Longævamque diem , & felicia cuncta precata ,
 Diva , tuum salvere jube super omnia Martem .

V I L

AD M. ANTONIUM FLAMINIUM ,
 ET GALEATIUM FLORIMONTIUM .

DUM vos fatidicos vates , arcanaque sensa
 Volvitis , atque animum cælesti neſtare alentes ,
 Alloquiis , magnoque Dei consueſcitis ori
 Felices duce Giberto , Campense magistro :
 Quid dicam miserum me agere , & quam ducere vitam
 Irrequietum animi , & quærentem indagine vana
 Naturam semper fugientem : quæ se ubi paulum
 Ostendit mihi , mox facies in mille repente ,
 Ceu Proteus , conversa sequentem eludit , & angit
 Mœrentem senisque horas cassumque laborem ?

Nuper

Nuper enim tenues species simulacraque rerum
 Quæ fluere ex ipsis dicuntur, perque meare
 Omnia, dum sector meditans, tacitusque requiro
 Avia silvarum, & secreta silentia solus,
 Cognovi tamen his spectris illudier ipsis:
 Ut sensus feriant nostros, semperque laceffant,
 Perque fores, caulæque animæ ludantque meentque,
 Ac remeent, ipsamque nec inter somnia linquant.

Ergo hoc elusam studio, fessumque labore
 Tandem me miserata suos abduxit in hortos
 Musa memor, tetricumque animum somno, atque quiete
 Curavit, numerisque & blando carmine fovit.
 Tum mihi: Quo tandem, o semper mortalia quærens,
 Hanc colere usque voles terram? numquamne relin-
 ques

Has tenebras, numquamne in lucem lumina tolles?
 An nescis, quæcumque hic sunt, quæ hac nocte reguntur
 Omnia res prorsus veras non esse, sed umbras,
 Aut specula, unde ad nos aliena elucet imago?
 Terra quidem, & maria alta, atque his circumflus aer,
 Et quæ consistunt ex iis, hæc omnia tenues
 Sunt umbræ, humanos quæ tamquam somnia quædam
 Pertingunt animos, fallaci & imagine ludunt,
 Numquam eadem, fluxu semper variata perenni.
 Sol autem, Lunæque globus, fulgentiaque astra
 Cetera, sint quamvis meliori prædita vita,
 Et donata ævo immortalis, hæc ipsa tamen sunt
 Æterni specula, in quæ animus, qui est inde profectus
 Inspiciens, patriæ quodam quasi tactus amore,
 Ardescit; sed enim, quoniam hic non peritat, & ultra
 Nescio quid sequitur secum, tacitusque requirit,
 Nosse licet circum hæc ipsum consistere verum,
 Non finem: verum esse aliud quid, cuius imago
 Splendet in iis, quod per se ipsum est, & principium esse
 Omnibus æternum, ante omnem numerumque diemque.
 In quo alium Solem, atque aliam splendescere Lunam
 Aspicias, aliosque orbes, alia astra manere,
 Terramque, fluviosque alios, atque aera, & ignem,
 Et nemora, atque aliis errare animalia silvis:
 Denique cuncta alia cernas vegetantia vita.

Ergo, umbras quum jam satis, & specula illa, superque
 Spectaris, longa jamdudum in nocte pererrans,
 Fas tandem lucem, atque ipsum perquirere verum.
 Quod quoniam longe sejunctum est corpore ab omni,
 Nec nexus habet, aut affinem sensibus ullis
 Naturam, scito esse animum tibi dissociandum
 Corpore, purgandumque omni contagio recepta,
 Terrena labe, & mortalis luminis haustu:

Quærendæque aliæ silvæ callesque tenendi
Sunt alii, meliorque Deum quæ semita monstrat.
Hæc Musa, o si te comitem dent rura, beata
Bardolena mihi, o qui nos propter anicenum
Benacum viridi silvis in littore sistat:

Atque olea, lauroque tegat, detque abdita vaturni
Sensa, & utramque Dei præcepta evolvere legem.

Rura, oro, GIBERTE, tuo Benacea vati
Da, viridesque oleas, & multa protege lauro.
Ille tuas laudes primum canet, & tua facta
Inclyta Mæoniis numeris ad sidera tollet.
Ut puerum mirata sacro cum Tybride Roma
Ante annos meritis titulis & honoribus auxit:
Ut res Romana, & sacrorum tradita iussu
Pontificum tibi summa in te uno sæpe resedit:
Ut septem fremuere novis applausibus arces.
Maeste animis, maeste ingenio, tu trajicis æquor
Barbaricum, & ferro reges in bella ruentes
Alloquiis frenas, & coeptos ore tumultus,
Armaque, & hostiles animos, & prælia sedas:
Fœdera, amicitiasque feris, pacemque reportas
Italiæ, populisque Dei: nec te tamen ingens
Terra capit toto juvenem tot plausibus Orbe
Exceptum, tua te pietas, tua maxima virtus
In cælum vehit, & terræ dat spernere honores:
Dat contemnere opes, unique incumbere Olympo,
Ac solis Divorum epulis, & nectare pasci.

Hæc ubi perpetuo cantavit carmine, & omnes
Respondent late rupes: tunc concitus æstro
Fatidico, plenusque Deo, Davidica vates
Ipse etiam pater interpretor oracula solvit,
Dignus, qui ante omnes citharam pertraheret eburnam,
Quam quondam Solymæ stupuere arcesque Sionis.

VIII.

AD FRANCISCUM TURRIANUM

VERONENSEM.

Turri, si aut mihi villa & lar sit lætior, aut tu
Ferre domum tenuem possis, parvosque penates
Urbe procul ruri se se abscondentis amici,
Quantum ego te his mecum CAPHIIS in montibus
optem

Montibus his, ubi, si querulæ nemora alta cicadæ
Non rumpant, equidem vix norim æstatis adesse
Tempora, tam leni mitescit Julius aura!

Sed quid, si est angusta domus, dum pulvere & omni
 Munda sit: dum sit nullo turbata tumultu,
 Nescia curarum, nullius conscia culpæ:
 Alta ubi per totum sit pax, & amica Camœnis
 Otia, & integri per magna silentia somni?
 Quid refert, alius minio laquearia rubra
 Si inspicere, ipse velim fuligine nigra videre?
 Si non dejectum cælo Jovis igne Typhœa
 Terrigenasque alios, spirantia signa, videbis
 Admirans opus æterni memorabile Jull;
 At bona Libertas aderit, quæ rura beata
 Præcipue insequitur, simplexque incedit & exlex.
 Hic tibi, si paullo digitus sit inunctior, aut si
 Potanti insonuit cyathus, vel si pede utroque
 Non steteris, nemo objiciet, nemoque sedentem
 Arguet, hoc illi si fors super incubuit crus.
 Stare, sedere, esse ex libito, & potare licebit.
 Forsitan &, mihi quid vitæ, quid sit studiorum,
 Nosse optas, quo vel damnes, vel singula laudes.
 Mane venit, juvat Auroram Solemque videre
 Nascentem, qui non alio confurgit Eoo
 Pulchrior, unde nova lætantur singula luce,
 Et silvæ, scopulique, & piæis nubibus aer,
 Parte alia Benacum alto de colle saluto,
 Centum cui virides invergunt flumina Nymphæ:
 Ipse sinu magno Genitor magno excipit anne.
 Tum juvat aut spectare boves mugitibus alta
 Complentes nemora, aut pulsas in pascua capras:
 Præ caper it, cui barba jubat, cui cornua pendent
 Intorta, & grandes olido de corpore setæ.
 Pone gregem reliquum compellit arundine virgo
 Upilio, multo armantur cui baltea fuso.
 Interea natos discennes rustica amare
 Numina, vicini nemoris gelidam voco in umbram,
 Qui libros, qui secum horæ solaria portant.
 Hic legitur, viridique toro, saxove sedetur
 Glandifera sub fago, aut castanea hirsuta.
 At variæ circum silvis, & frondibus altis
 Assuetæ ludunt volucres, atque æthera mulcent.
 Tum densum nemus, atque umbræ per gramina læta
 Jejunas nos invitant spatiarier horas.
 At fessi hæc inter pueri siriuntque, dolentque
 Plus æquo retineri, & jam Musasque, librosque,
 Et Pana, & gelidi pinus odere Lycæi.
 Ergo præcurrere, & aquas, & vina pararunt
 Incenti in vitro, & flores sparsere nitentes.
 Advenio: primas atro lita mora cruore
 Aut grossi mensas ineunt, cors cetera, & hortus

Sufficit. Interea crebro sonat area pulsu,
 Increpitat seges, & duri sub Sole coloni
 Alternis terram feriunt & adorea flagris,
 Fit clamor, resonat tellus rupesque propinqua,
 Et paleæ sursum strepitu jactantur inanes:
 Læta Ceres alto ridens despectat Olympo.
 Umbra diem reliquum, somnus, librique, viæque
 Introducunt, dum siccam æstu Canis excoquit urbem.
 Verum, ubi cæruleis serus se se extulit undis
 Vesper, & in cælum surgentia sidera vexit,
 Vicina e specula, magni admirator Olympi,
 Alta rupe sedens natis astra omnia monstro:
 Accendoque animos patriæ cælestis amore.
 Illi admirari, & cognoscere sidera discunt
 Cephæaque, Arctonque & servantem plaustro Bootem.
 Hæc ergo præferre urbi, & contemnere magna
 Si possis, quid te teneat, ne tu ocyus ad nos
 Accurras? etiam has sedes, hæc limina magnus
 NAUGERUS subiit, nec dedignatus adire est
 BATTUS amor Musarum, ipsum quo tempore primus
 Pana, atque antiquos cecinit Telluris amores.
 Hic me etiam desueta Deæ, medicumque, senemque
 Carmina iusserunt canere, & ridere beato
 Illudentem urbem, & male sani murmura vulgi.
 Verum, hæc GIBERTUS ne viderit ipse, caveto:
 Ni forsân Bubulone animum, curasque relaxans
 Propter aquam viridi lætus confederit herba,
 Quæ placidus leni descendit Tartarus amne.
 Scilicet hic numeros non aspernatur, & audit
 Nos etiam, & nostram, quamvis sit rustica, Musam.
 Verum, ubi se sibi restituit, mentemque recepit
 Illam altò intentam cælo, seu sacra sacerdos
 Munera obit, totum sen contemplatur Olympum.
 Tum supra & Musas, & ruris Numina supra est,
 Vitam agitans Divum, Diis se cælestibus æquans.

I X.

IN MORTEM ALIPRANDI MADRUTHI,

Fratri Christophori Cardinalis Tridentini.

Impositum quum te pheretro, miserande MADRUTHI,
 Cerneret illacrimans Cæsar, circumque videret
 Et spolia, & victis erepta ex hostibus arma,
 Et modo victrices juxta mœrere phalanges,
 Quantum, inquit, tua Mors nostris inimica triumphis
 Læpitiæ, decorisque adimit! spes quanta futuri

Te-

Tecum, ALIPRANDE, cadit! Sed non tua vivida
 virtus,
 Ut te hunc aspicerem, tua non promiserat ætas:
 Sed fore, qui Solymis mecum atque Oriente subasto,
 Barbaricis regum spoliis & mille trophæis
 Olim magna tui decorares templa Tridenti.
 Invidit Mors tanta tibi. Vos nobile corpus
 Ferte Ducis vestri, juvenes, & reddite matri
 Exanimi: sed & hæc miseræ solatia ferte,
 Tantum ipsam peperisse virum, qui Cæsaris usque
 Et comes, & bene gestarum pars maxima rerum,
 Cæsaris ex animo nullo delebitur ævo.

X.

AD ALEXANDRUM FARNESIUM
 CARDINALEM AMPLISSIMUM.

PRISCÆ virtutis, Romani & sanguinis hæres,
 FARNESI, quoniam nec Dii munuscula læta
 Despiciunt hominum spicas, ac ferta rosarum,
 Libaque, & exigui devotum turis honorem:
 Tu quoque (si mores imitari, ac facta Deorum
 Præcipue Heroum est) non dedignabere parva
 FRASTORI quæ dona tui natusque, paterque,
 Perpetui affectus monimenta, ac pignora mittunt,
 Hos tibi patre Lyco, Scylla genitrice gemellos
 Dat natus sua dona canes. Scyllæ inclyta origo
 A Nilo est: Lycus a magno descendit Araxe:
 Qui quondam Euganeas transmissi munus ad oras
 Præstabant cunctis, sive aprum figere morsu
 Effet opus, rapidum cursu seu vincere cervum.
 Horum igitur sobolem natus tibi ab ubere matris
 Nutriit ablatam, & nostris exercuit arvis,
 Venatu assiduo, & vires durante labore,
 Nostrorum famam nemorum, geminumque ferarum
 Terrorem, nunc ille tibi quam mittit habendam,
 Romanis eadem in campis si forte sequetur
 Gloria, & ignota fors in regione juvabit.
 At genitor, nati cum munere, carmina mittit
 Hæc tibi: quæ, quamquam tristi fugiente senecta
 Lætitiæ cantusque, tamen voluere Camœnæ
 In te unum, dominæque mei, nimiumque potentes,
 Ut canerem, Musaque canes comitarer amica.
 Ergo tot rerum curis, ac pondere tanto,
 Quo premeris, dum rem Romanam, ac publica curas,
 Si quando defessum animum, mentemque remittes
 Liber,

Liber, & ad dulces poteris te vertere Musas,
 Hæc quoque nostra leges: ea si dignabere tanti,
 Inter Romanas ut eant spectanda Camœnas.
 Quod si etiam recreare animum corpusque juvabit
 Venatu, & latos saltus ac densa ferarum
 Lustra fatigare, & capreas agitare fugaces.
 Tum canibus miscere tuis, tecumque vocare
 Ne pigeat nato missos; hirsutior ille
 Cuncta niger, tantum pedibusque & gutture canus,
 Non invirus herum Tiberonis voce sequetur.
 Ast Athiso (nanique hoc alter de flumine nostro
 Nomen habet) nec cursu impar, nec dente minaci
 Segnior, anguineo suffusus terga colore,
 Frontem albo pictus discrimine, pictus & albo
 Cervicem, caudamque imam, pectusque, pedesque,
 Additus lateri numquam discedet herili:
 Tantus amor domini: nisi forte cupidine prædæ
 Conspectæ impatiens etiam retinacula rumpat.
 Hic tu, vel pulchro Calai, vel Tyndaridæ alto
 Polluci similis, silvas latratibus omnes
 Complebis, rupestresque hominum claustris altas,
 Vestus equo Hæmonio, & fulgenti clarus in ostro.
 Attonitæ visu dicent nemora inter amare
 Russicæ Hamadryades, disceris amare, Dianæ
 Insuetæ Comites: volucris sed concitus ille
 Fertur equo, vestrosque alio deportat amores,
 Insequiturque feras; ah, ne illum accensa cupido
 Venandi, excitos silvis impellat in urfos:
 Ne in sævos impellat apros: tibi cura, Dione
 Æneadum genitrix, sit custodire Nepotem,
 Et juvenem ilicea defessum sistere in umbra.
 Sat silvis animæque datum est: illum sua Roma
 Poscit, & expectat lati res publica Mundi.
 I, spes magna Urbis, rebusque vocantibus adsis.
 Interea, quando mihi Divus habebere semper,
 Ipse tibi CAPHIS sacras in montibus aras
 Institutam, qua se summo de vertice collis
 Tollit, & æquatam Benaci prospicit æquor,
 Et virides olæa ripas, Patriamque Catulli:
 Hic tibi solennemque diem, & renovanda quotannis
 Sacra, tuo statuam semper de nomine dicta.
 Tunc rosa, tunc violæ, tunc purpurei hyacinthi,
 Verbenæque Yenem deceant, tunc texere flores,
 Et viridem cano capiti imposuisse coronam,
 Lætitiæque diem & multo producere Baccho,
 Fallentem senium, & curas de corde fugantem.
 Forsitan, & Musarum aliqua, & tibi fautor Apollo
 Plestra mihi, citharamque dabit: Deus ipse canentem
 Per-

Perque tuos annos, perque acta illustra ducet.
Infanti ut prima impellens cinnabula Pallas
Accinuit cantu Grajo, cantuque Latino,
Scilicet & fari lingua assuescit utraque.
Ut puerum Aonio perfusum labra liquore,
Per dulces Musarum hortos & amœna vireta
Perduxit, nunc Uranie, nunc Calliopea,
Nunc Clio monstrante viam, nullaque Sororum
Non donante rosas, & ferta virentia lauro.
Tum mores animumque dedit, sensumque senilem,
Atque Urbem regere, ac sacro splendere galero.
Nec jam Roma capit, sed lata in regna vocatum
Ad pacem Europæ, non te maria alta fatigant,
Non juga, non toties superatis nubibus Alpes.
Te Pœninæ arces, celerem te Norica saxa
Spectarunt rapido montana per ardua cursu,
Quantum Sol cæli, tantum telluris obire
Matre Dea comitante, & iter monstrante Nepoti.
Nec satis hæc: majora urgent. Germania nuper
Grata Deo, nunc ingeniis elata superbis
Detrectare jugum Imperii, & se opponere Patrum
Sanctorum placitis, & sacris legibus audet.
Nec jam Pontificum, nec jam ullos Cæsaris audit
Infelix monitus, sed lævo numine Divum
Arma parat: socium Cæsar te poscit in hostes,
Pro sceptro Imperii, pro religione Deorum.
Tunc primum attonitæ gentes videre Latinæ
Te, Fratremque tuum patria virtute, animisque
Invisis pariter, res duri & munera belli
Trastantes: gemini quales duxisse feruntur
Tyndaridæ pulchri Grajas in bella cohortes.
Tunc primum Romana acies, antiquaque virtus
Visa fuit: Ducibus tantis Mavortia pubes
Magnanimi Æneadæ, memores virtutis avitæ
Bella cient: Italo pleni jam milite campi
Densantur: jam procedunt longo ordine signa
Sublata in ventos, lateque inimica minantur.
Nec mora, jam summis Romanus miles, & arma
Alpibus apparent: concussæ motibus illæ
Fuderunt gemitus: longe vagus audiit Œnus,
Obrigitque gelu: riguerunt flumina Rheni,
Et pavidus fluxit demissis cornibus Hister.
Romanum ad nomen planxerunt pectora matres,
Caraque in Hercynias traxerunt pignora silvas.
Sed quo me rapitis, Musæ? quid facta revolvo
FARNESI? Majora animo jam concipe, teque
Impavidum, invictumque, aliis accinge triumphis.

X I.

A D E U M D E M

ILLUSTR. ET REVEREN. CARDINALEM

A L E X A N D R U M F A R N E S I U M ,

*Cui libros de Contagione & Contagiosis
Morbis dedicavit .*

HÆC ego florentes Sophiæ digressus in hortos ,
 Italiæ decus o Juvenis , FARNESIA proles ,
 Condebam , lætasque tibi de more sacrabam
 Primitias , dum tu magni inter Cæsaris arma ,
 Gallorumque acies , resti pacisque sequester
 Res miseræ Europæ fractas componis , & omne
 Robur , & arma Dei Maumethen vertis in hostem ,
 Percurrisque omnem , veluti Sol aureus , Orbem .

Fortunate nimis , quem cunctæ applausibus urbes
 Excipiunt , Pacisque vocant Patremque , Deumque ,
 Inque caput , sacrosque sinns , humerosque , manusque
 Et nigras violas , & candida lilia jactant .
 Cui magna Italia , & terrarum maxima Roma
 Assurgit , festosque dies , & sacra Nepoti ,
 Solennesque agitât pompas : densi undique circum
 Stant populi , & studio ingenti , & clamore secundo
 FARNENSUM genus omne alto de sanguine ductum
 Æneadum longa serie , super æthera tollunt
 Patres , atque Duces , & partos mille triumphos :
 Assensu resonat Tybris , & Tyrrhena resultant
 Littora : septeni responsant gaudia colles .

O nimium dilecta Deo , prælataque longe
 Progenies , sive imperiis & Marte regendæ
 Sint res Romanæ , seu Religionis habenis .
 Atque equidem e fracto Imperio , Romaque cadente
 Servatam hanc stirpem fâto , statuentibus & Diis
 Crediderim , quo Romanum per sæcula nomen
 Staret , & ara Dei , quæ primum maxima magnis
 Auspiciis fundata fuit , sit maxima semper .

Quo me, PAULLE, rapis, quo tuque Neposque vocatis
 Laudibus heroum insuetum ? tu maxime ille es ,
 Uni cui Regni triplicis capite alta tiara
 Confurgit , cui summa uni terna illa potestas
 Terrarum , Cælique data est , vastique Profundi ,
 Illorumque aperire fores , & claudere posse ,
 Qui PETRI , CHRISTIQUE Ratem turbante procella
 Ventorum varia , & remorum parte revulsa ,

Tem-

Tempestatem omnem; atque adversos discutis Euros,
Nec sanctam sine honore finis, sine remige certo
Fluſſibus in tantis agitari turbine Cymbam,
Maſte animo Romano, & maſte ingentibus auſis.

At tibi quas, Juvenis fortunatiſſime, dignas
Attribuam laudes, generis ſpes altera tanti,
Inclyte Alexander, puerum quem plurima Virtus,
Canaque conſurgens teneris Prudentia in annis,
Et ſpondens majora aſtris felicibus Æther
Ad ſummos meritum ante annos evexit honores,
Et ſacri geſtare dedit decora alta galeri?
En quantum de te ſacri ſibi Paſtor ovilis
Spondet Avus. tuus ille, animo quæ gaudia verſat.
Forſitan & proprio non tam gaviſus honore,
Quam ſpe ſublatus, tanti & virtute Nepotis,
Neſcio quid majus præſaga mente volutat.
Scilicet & gnarus fatorum, & præſcius ævi
Venturi, illa videt felicia tempora, quum tu
Sede ſua, ſolioque Dei, Diis proximus ipſis
Conſideas, quum Pontifici tibi maximus Orbis
Gratetur, ſupplexque tuis ferat oscula plantis.

O mihi poſtrema tantum dent Numina vitæ,
Ipſe etiam ut tum te tremulus, conſectus & annis
Aſpiciam, ſanctosque pedes proſtratus adorem.
O & ſi poſſim canere, & tua dicere facta,
Et ventura novo tecum ſæcla aurea Mundo?
Nam video ſub te viſtum, longeque fugatum
Mæumethen ſe Caucaſeis includere portis:
At pacem viridi redimitam tempora oliva
Ire per Europam magnam, atque inviſere terras:
Quam pia Relligio, & junctis Concordia dextris,
Et Probitas, & Amor recti comitentur euntem.

Salve, magne Tybri: ſalve & tu, maxima rerum
Roma parens, ſalvete arces, collesque Latini,
Aurea qui primi longo meministi ab ævo
Sæcula, quum nulli variarent jugera ſulci,
Sponte ſua ſed terra ferax daret omnia, & ipſæ
Præberent dulci viſtum de robore glandes;
Et nunc venturis eadem ſperetis ab annis.

XII.

A D J U L I U M III.

PONTIFICEM MAXIMUM.

Maxime Divini Paſtor gregis, inclyte JULI,
In terris cui ſumma uni eſt conceſſa poteſtas,
Sceptra

Sceptra vicesque Dei gerere, & regna infera Ditis,
 Cælorumque fores aperire, & claudere posse:
 Si tu, dum magnæ Italiæ, dum prospicis omni
 Europæ, & vastâ Mundi sub mole laboras,
 Paullisper potes a tantis secedere curis,
 Et potes agrestes pastorum audire Camœpas,
 Nunc aures adhibe placidas mihi: Namque ego, quæ Pan,
 Pan magnus cecinit, nostros ventura sub annos,
 Nunc referam, tua, Magne Pater, pars maxima
 quorum est,

Cujus ab auspiciis Parcæ nova sæcula volvunt.
 Nec te pœniteat pastorem audire canentem,
 Quando etiam Admeti tauros formosus Apollo
 Pavit ad Amphrysi ripas, tenuique cicuta
 Non puduit cantare Deum sub tegmine acerno:
 Et Veneri dilectus oves duxavit Adonis.
 Scilicet & tu etiam post grandia nomina Pastor
 Diceris, atque hoc in primis cognomine gaudes,
 Et pecudes curare soles, pecudumque magistros.
 Forte ego, dum medio terras Sol excoquit æstu,
 Ipse Sueslani pastor puer incola campi
 Ducebam pastas viridi de valle capellas
 In nemorum secreta, umbras & frigora querens,
 Qua placidus cursu descendit in æquora Lyris.
 Est lucus, prisca quem sacrare Latini
 Silvano: in cuius medio densa ilice cinctum
 Est pratum, agrestes ubi Dii persæpe videri
 Audiri que solent: hic capripedes Saryriscos
 Pastorumque manuum iunctis per mutua palmis
 In gyrum canere, & lætas agitare choræas
 Invenio admirans; medius Pan magnus ovariantem
 Ad calamos, cantusque regit ducitque coronam.
 Dumque Deus canit ipse, filet tum cetera pubes.
 Dum filet ille, alii thiasos, cantusque, sequentes
 Instaurant, repetuntque Dei postrema canentis.
 Ingeminat postrema nemus, respondet & Echo.
 Tum me respiciens, mihi sanguine proximus Anthus,
 Anthus, Aquinatis pastor gregis, Huc, puer, inquit,
 Huc ades, o Neore, & te his adijunge choræis:
 Aut, spectare magis si te juvat, aggere ab illo
 Prospice, dum saturæ suæ ducant otia capræ.
 Cui ego: Quin potius juvet hoc de cespite vestros
 Spectantem lusus, molli requiescere in herba.
 Et tum forte Deus buccas sandyce rubentes
 Inflans, & picea frontem præcingens acuta,
 Ad calamos circumfiliens, hæc carmina cantu
 Fatidico infans latas fundebat ad auras:
 Dicite io, Satirisci, & io geminasse, coleni.

Aurea

Aurea felici nascuntur sæcula Mundo.
 Excipiunt juvenes, iterat nemus, assonat Echo.
 Aurea felici nascuntur sæcula Mundo.
 Tum sequitur Deus; ante tamen Rex magnus Olympi
 Bellumque, horribilemque famem, diramque flagellis
 Armatam Alesto e tenebris, & faucibus Orci
 Immittet terris, genus ut mortale coercens
 Castiget, fraudesque hominum, fastusque superbos,
 Et luxus, & spes miseras, & gaudia vana:
 Dum tandem se se, atque Deos cognoscere discant.
 Mox tantum expectatum illud, quod carmine sacro
 Tot Vates cecinere pii, felicibus astris
 Adveniet tempus, quo MONS ille arduus, ille
 MONS ingens, sublime caput super omnia tollat
 Culmina, sidereum qui vertice tangat Olympum:
 Quo neque vis ventorum adeat, non fulminis ignes.
 Dicite io, Satyrisci, & io geminate, coloni;
 Aurea felici nascuntur sæcula Mundo.
 Hoc in MONTE Dei pecudes pascentur & agni,
 Graminis æterni pingues, & velleris aurei.
 Exsiliunt & aquæ vivæ, quibus ubera capræ
 Grandia distendant, distendant ubera vaccæ.
 Non malus hic serpens, non noxia creverit herba,
 Non sentes, sterilisve filix, non frigida taxus,
 Sed bis læta seges, sed bis gravis uva racemis.
 Corticibusque cavæ sudabunt balsama pinus.
 Hinc magnis præstantem animis, & fortibus ausis
 Fortunata nimis Pastorem hæc sæcula habebunt,
 Qui virtute regat populos, & legibus æqui,
 Divinas qui pascat oves, & pascua late
 Extendat, pecudesque ipsas, & ovilia servet.
 Hic primum diram Alesto, & Cocytia monstra
 Caucasæa ærata religabit rupe catena.
 Inde famem miseram e Latio populisque Deorum
 Pellet in hostiles gentes, & barbara regna.
 Tum læta Ubertas, segetumque operata manipulis
 Alma Ceres Italas spicis venerabitur aras:
 Quam circum pueri salient, & rustica pubes,
 Ridentesque jocos: incommataque carmina dicent.
 At noti Musis Damones & Alpheisibœi
 Vota Patri magno, laudesque & sacra canentes
 Æternis illum numeris ad sidera tollent,
 Heroemque, Deumque, salutiferumque vocabunt.
 Dicite io, Satyrisci, & io geminate, coloni;
 Aurea felici nascuntur sæcula Mundo.
 Ille animum mox ad pacem, & discordia regum
 Pœlora convertet, sanctisque hortatibus iras,
 Atque odia, & cæcos regnorum & landis amores,
 Hor-

Horrendamque sitim cædis, fusque cruoris
 Sedabit, pelletque feri mala semina belli.
 Tum Pax alma ferens ramos felicitis olivæ,
 Atque Amor, & junctis pariter Concordia dextris,
 Et Genius comitum, & generis Hymenæus amator
 Invisent late populos, Latiiq; per arva
 Lætitiâ, risusque ferent: tum iusta cupido
 Bellorum, piaque arma, Dei vertentur in hostes.
 Jam video augustis late plena æquora velis
 Fervere, jam trepidare vagi septem ostia Nili,
 Euphratemque, Tygrimque suo se condere in amne.
 Jam nec Bactra ipsum capiunt, non India tota
 Maumethen fugientem, ipsum non Caucasus ingens,
 Non qui tot silvas, juga tot comprehendit Iniaus.
 Dicite io, Satyrisci, & io geminate, coloni;
 Aurea felici nascuntur sæcula Mundo.
 Quæ nam, quæ properant tantæ per cæcula puppe,
 Devotæ ad Tiberim, magnæque ad moenia Romæ,
 Ceu densæ ad nidos latum per inane columbæ?
 Agnosco gentem innocuam, numerumque beatum,
 Felices animas, fatis ab origine prima
 Dilectas, quæ cælo olim, Divisque fruuntur.
 En jam sanctam Urbem, jam septem in collibus aras
 Impositas, summique pedes Pastoris adorant.
 Hos inter, video, & nostri longa æquora sulcant
 Arcades, Italiamque petunt, fataliaque arva
 Arcades; o soli quondam cantare periti
 Pastores, quos Justitia e tellure recedens
 Postremos liquit, nunc rursus læta revisit.
 O sancti, properate; vocat Deus æthere ab alto:
 Vos alius jam grex, aliudque expectat ovile.
 Quin venit illa dies, quum nos quoque Mænala nostra,
 Arcadiamque omnem, qua inhumani a gente repulsi
 Fugimus in Latium, longo post tempore tandem
 Visamus, dulcemque auram; o placidissime Peneu,
 O Ladon, vos o gelidi pineta Lycæi,
 Quando ego per vestros meditabor carmina lucos?
 Mænalios quando recinet mea tibia versus?
 Menalus auritas, dantesque oracula quercus
 Semper habet, semper doctas ille audit avenas.
 Concipe Mænalios, mea tibia, concipe versus.
 Talia cantabat memorans Pan magnus: at Anthus
 Hæc referes, puer, inquit, & hoc tibi munus habeto
 Nunc parvum: ventura dies majora reservat.
 Tum mihi fiscellam dono dedit optimus Anthus,
 Dicere & occasus astrorum, dicere & ortus,
 Et quid quæque ferat tellus, quæ comoda Baccho,
 Quæ Cereri, quidnam ventos, quid nuntiât imbres,
 Quæ

Quæ tempestatum, cæli quæ signa sereni:
 Denique quæ cunctis natura sit indita rebus.
 Virtutem in primis & honestum, quemque docere,
 Ac vitii ipse expers, aliena notare paratus,
 Et jam tempus erat pastum deducere capras.

XIII.

I N C I D E N S.

BATTUS amor Dryadum defunctum pastor IOLAM
 Flebat; cum Fontes, Alpinaque Numina circum,
 Sarcaque, pumiceoque sedens Benacus ab antro
 Mœrentem lacrimis consolabantur obortis:
 Ille autem nulla accipiens solamina, tantum
 Deserta sub rupe, in littoribus Benaci,
 Talia nequicquam surdas iactabat ad undas.

Immites Divi, & crudeles vos quoque Parcæ.
 Crudeles nimium Parcæ: vos ibitis amnes,
 Aeris stabunt rupes: nusquam amplius ipse
 His terris, numquam hoc cælo agnoscetur IOLAS
 Ut cecidit semel? in pratis ut purpureus flos,
 Quem tetigit vel hiems, vel iniquo Seirius astro.
 Currite jam, fluviorum undæ, & producite vitam;
 Et, rupes, durate: tamen non alter IOLAS
 Hos pæcus in montes, non hæc ad flumina ducet.

XIV.

I N C I D E N S

AD JOANNEM BAPTISTAM TURRIANUM

V E R O N E N S E M.

ILLA colum exercens saxo confedit aprico,
 Læta tepore novo, & liquefacta Sole pruina:
 At juxta nemore in magno grex pascitur omnis.

XV.

H I E M S.

A D E U M D E M.

FRigidus at silvis Aquilo si increverit, aut si
 Hiberni pluviis descendent nubibus imbres,
 Nos habeat domus, & multo lar luceat igne,
 Upilio

Upilio ingentem aut fagum, vel scissile robur
 Sufficiat, tum vos, claro quando igne soletis,
 Juniperi, suaves circum diffundere odores,
 Et vos, Palladiæ, flammis imponat, olivæ.
 Ante focum tibi parvus erit, qui ludat, JULUS,
 Blanditias ferat, & nondum constantia verba.
 Ipse legam magni tecum monumenta Maronis.
 O fortunatos nimium, si fata, quod ævi
 Nos manet, hanc una dederint producere vitam.

XVI.

V E R.

AD EUMDEM.

JAM veniet Ver purpureum, juvenisque revertens
 Annus aget Zephyros, & cælo desuper alto
 Deducet pleno genitalia semina cornu:
 Unde hominum genus, & pecudum vitæque natantum,
 Et piæ volucres, & amantes roscida plantæ
 In Venerem cæco æterni rapiuntur amore.
 Gaudete, o quicumque bonum speratis, agrestes,
 Quorum amor est sobolis, studiumque nepotibus arva
 Incolere, & parvas ulmis attollere vites:
 Annus io, novus annus adest: mutatur & ætas,
 Et meliora novo nascuntur sæcula Mundo.
 Bella pater procul, & diras Saturnus Erinnes
 Arcebit caro e Latio, ac sub Tartara mittet.
 Tum Lethum, & cæcus Furor, & vesana Cupido
 Perpetuis extra terras religata catenis
 Perfolvent poenas scelerum: at Pax alta per omnem
 Italiam magno populos sub Cæsare viset.
 Ille autem insignis spoliis, & mille trophæis
 Instituet festos alta ad Capitolia ludos.
 Stabit onusta ingens, Tarpæji ad limina templi
 Quercus honore sacra, & prænumcia temporis aurei.
 Tum vescæ glandes, tum terra sponte ferente
 Omnia, comparibus disjunget colla juvencis
 Agricola, & rudibus mirabitur hordea sulcis
 Sponte adolere sua, & nullo frumenta colono
 Undantem lætis segetem flavescere campis.
 Noctibus in silvas & mollia prata serenis
 Ætherio dulcem commixtum nectare rorem
 Sudabit cælum: tenera qui lectus ab herba
 Mortales saturet mensa dapibusque Deorum.
 Salve, magne Tybri, & vos, natæ Tybride Nymphæ,
 Tuque, senex pater Eridane, & qui flumine Tusco,
 Benæ-

Benace, in nostro placidus perlaberis agro.
 Tuque, Athesis, cunctique amnes salvet Latini,
 Dique omnes magnæ Hesperiae, qui sæcula soli
 Aurea Saturi primo meministis ab ævo:
 Quum sepes vel limes adhuc communibus agris
 Non foret, aut ulli variarent iugera sulci;
 Sponte sua sed terra ferax daret omnia, & ipsæ
 Præberent dulci victum de robore glandes.

XVII.

INCIDENS AD EUMDEM.

QUarum pars brumæ impatiens, & condita terræ,
 Expectat ver egelidum, statisque Favoni:
 Pars passura hiemem, læta ab radice virescit,
 Emittitque comam, siculumque atque altera beta,
 Atque ari virides, & odoriferæ calamithæ,
 Atque olus, atque rumex, & falsi gramina crithmi.
 Quas inter suaves mollesque aspirat odores
 Nunc decus hortorum, menta: at, si vera loquuntur
 Nympharum quondam pulcherrima Grajugenarum.
 Tum juvat & frondes apii, & sisymbria læta,
 Intubaque, & toto florescentes frigore sonchos
 Incolere, atque hortis Aquilonem arcere nocentem.

XVIII.

ALIUD.

NOX venit, & pastæ redeunt ad testa capellæ.
 Præcaper it, cui barba jubat, cui cornua pendet
 Intorta, & grandes olido de corpore setæ.
 Pone gregem reliquum compellit arundine virgo
 Upilio, multo armantur cui baltea fuso.
 At mater longæva, igni dum brassica fervet,
 Mulstra effert, gravidoque recens lac ubere mulget.
 Rusticus interea pinguis collector olivæ,
 Interea & validus prima de nocte bubulcus
 Advenere domum: congesta tum focus orno
 Ingenti, aut fago, vel fragmine roboris, ardet.
 Tolluntur lætæ flammæ, lateque relucet.

XIX.

ALIUD INCIDENS AD EUMDEM.

AT nemora, & liquidis manantia fontibus arva,
 Et placidus myrteta inter, laurosque virentes
 Vicinus nitido Benacus labitur amne.
 At focus, & circum pueri, vernæque canentes,
 Dum cœna undanti coquitur silvestris aheno,
 Grandiaque exurunt crepitantes robora flammæ.
 Suspensæ e summis pendent laquearibus uvæ,
 Malæque, castaneæque, & passo fistula ventre.
 Hiberna de nocte, boum stabula alta petuntur.
 Una omnes matresque, virique, omnisque juvenus
 Insomnem exercent noctem: pars pensa fatigat:
 Pars texit teneros Amerino vimine qualos:
 Atque anus hic aliqua interea, dum vellera carpit,
 Et teretem tremulo propellit pollice fufum,
 Languentes oculos fabella fallit inani.

XX.

A L I U D.

MAne domi validos pluvia ut conclusit agrestes,
 Cæditur iliceo distenta sagimine porca.
 Læta domus; tum sollicita in farcimine mater
 Pingue suis niveum, & dissecti frusta cerébri,
 Et niveum lac purpureo cum sanguine miscet.
 Tum semen marathri, atque arentis gramina thymbræ
 Adjicit, & coli insperso sale concava complet.

XXI.

I N N A T A L E M D I E M

JANI FREGOSII, CÆSARIS F.

SAcrorum si plena Deo sunt pectora vatum,
 Si norunt triplices fata futura Deæ.
 Fortunate Infans, verus tibi gloria vates,
 Grandia concordēs concinuere Deæ.
 Ecce tuo felix nasci novus annus ab ortu
 Incipit, atque omen nomine habere tuo.
 Cresce cito, magnique Patris mirarier æsta
 Incipe, & invicti CÆSARIS arma sequi.
 Tempus erit, tibi quum partis jam mille trophæis,
 Et

Et fessi rebus compositis Latii ,
 Barbaricis captis opibus , Ducibusque subactis
 Multa tibi circum tempora laurus eat .
 Tum læta ante tuum stabit Victoria templum ,
 Claudet & ærata limina athena sera .

XXII.

DE PARTU
 VICTORIÆ FARNESIÆ
 GUIDI UBALDI FERETRII,

Urbini Ducis Conjugis.

LUCINÆ Junonis opem VICTORIA supplex
 Quum peteret , placido sic ait ore Dea :
 Sis licet Æneadum & Veneris de sanguine avito
 Nata , Puella , tamen digna favore meo es .
 Quam Charites tanto junctæ comitantur honore ,
 Grandia quam Parcæ fata manere canunt .
 Quippe ubi Junonis flos & Saturnia quercus
 Jungantur , faustis currere Isauron aquis ,
 Promittique tibi sobolem , qua pristina virtus
 Italiæ , & priscus restituatur honos .
 Nascere , magne Puer , Patremque imitatus Avosque ,
 Magna aude ; non vos Umbria magna capit .
 Et jam Infans sanctasque manus Divamque secutus
 Optati in lumen ætheris exierat .
 Ergo quod potuit risu agnovitque Parentem ,
 Præsentisque dedit nuntia signa Deæ .

XXIII.

TUMULUS FRANCISCI MARII MOLSÆ
 MUTINENSIS.

QUOD MOLSÆ fuerat mortale , hac conditur urna ,
 Exstruxere suis quam Aonides manibus .
 Coetibus at Superum fruitur nitidissimus alnis ,
 Itque comes magno spiritus HIPPOLITO ,
 Quem MEDICA de gente satum pulcherrima Virtus
 Extulit , & cæli templa tenere dedit .
 Quemque unum ante omnes coluit dum fata sinebant ,
 Atque oculis vates prætulit ipse suis .

Fract. Carm.

E XXIV.

XXIV.

AD JOANNEM LIPOMANUM

Ex Veronensi Prætura decedentem.

HAdriacum, LIPOMANE, Athesis dum curret in æquor,
 Dum meritis reddetur honos, & gratia, semper
 Prætori tibi debebit Verona, patrique
 Linquenti monumenta annos mansura per omnes.
 Illa tibi semper divinos solvet honores,
 Et condet tua perpetuis annalibus æta.
 I, spes o Venetum, & quem jam moderamina parva
 Non capiunt, i, te majoribus inferre sceptris:
 Et lacrimas, & vota, quibus comitamur euntem,
 Accipe, discessusque tui dona ultima porta.

XXV.

IN MORTEM

JOANNIS BAPTISTÆ MONTANI

MEDICI VERONENSIS.

DUM medica, MONTANE, doces ope vincere fata,
 Et Lachesi invita vivere posse din,
 Lethæo indignans pressit te Parca sopore,
 Et secuit vitæ grandia fila tuæ.
 Sic, animas, & tu, Asclepi, dum subtrahis Orco,
 Te quoque savorum perdidit ira Deum.

XXVI.

AD JO. MATTHÆUM GIBERTUM

EPISCOPUM VERONENSEM.

MELSINÆ rupes, subiectaque littora Tusci,
 Quæ suprema sonans alluis unda lacus,
 Annuite: agrestem dum, votum pauperis, aram
 E vivo Thyrsis cespitem tollit humo.
 Nunc herba struit, atque hederis & floribus ornat:
 Et, GIBERTE, tibi rustica sacra facit.
 At olim auratam niveus tibi taurus ad aram
 Cornibus auratis victima magna cadet.

XXVII.

XXVII.

AD EUMDEM.

NAjades hoc, GIBERTE, tibi Benacides antrum,
 Et qui muscoso fons cadit e lapide,
 Sacrare, tibi sit cura & fontis & antri:
 Et quandoque Deus ad tua sacra veni.
 Et sacer est, & habet spirantes suaviter auras
 Hortus: & est nullo gratior umbra loco:
 Et nusquam est longæva mage, & felicior arbor,
 Pulcher Adoni, tua; pulcher Apollo, tua.
 Hic canere, & tenuem posse exercere Camenam
 Ille dedit: sanctus qui mihi semper erit.
 Hic herbas, succosque tuos, artemque relinquo,
 Phœbe: soles Musas tu quoque amare magis.

XXVIII.

AD EUMDEM.

IPsa tibi, GIBERTE. Deus, lego lychnida Leuce
 Melsineis Leuce cognita lictoribus.
 Et pulchram cyanum, & canentia lilia nescio:
 Illa colore magis, hæc & odore placent.
 Roma caput sacro decoret tibi magna galero:
 Non tamen & Leuce, non sua ferta dabit.

XXIX.

AD EUMDEM.

ET laurum, & citrum hanc teneram de matre re-
 vulsam
 GIBERTO sacram Thyrsis utramque ferit.
 Hanc, Venus, ast illam Juveni servabis, Apollo,
 Ne noceant æstus, ne noceatve gelu.
 Tu quoque Benaci vicino, Nais, ab amne
 Clam gelidas teneris frondibus affer aquas:
 Dumque feres, dic: Sancte, humili tibi nunc Dea rivo,
 Quum venies, toto serviet amne tibi.

XXX.

DE MARSANGO FLUVIOLO,

PROPE VILLAM

JOANNIS BAPTISTÆ RHAMNUSII,

In Agro Patavino.

QUI te populea cingit, MARSANGE, corona,
 Dulce ut in umbrosis cornibus aura sonet:
 Ac ne umquam inficiat lutulenti sordida plaustrum
 Te rota, sub firmo dat tibi ponte viam,
 Vicinæ cultor villæ, RHAMNUSIUS, horti,
 Agrique, & dominus ripæ utriusque rogat;
 Lenis vere sue, atque nivali providus undæ
 Arida in æstivi sidera parce Canis.
 Sic tibi grata Nape geminabit ferta quotannis,
 Et tua par magnis amnibus ibit aqua.

XXXI.

DE EODEM.

QUI modo fons, MARSANGE, humilis, modo
 cornibus ingens,
 Per salicum rapido laberis amne nemus.
 Vere novo, MARSANGE, mihi sue lenior undis,
 Uterior, sitiens quum coquit arva Canis.
 Frigentes æstate tibi RHAMNUSIUS umbras
 Sparget, & ad gelidas ipse sedebit aquas.
 Vere rosam violasque feret: pistasque corollas
 Pulchra tibi hinc Nais, hinc Galatea dabit.

Quæ sequuntur, sumta sunt de libris, quos FRACASTORIUS soluta oratione conscripsit.

In calce Homœocentricorum.

Sed jam me rapidi diversa volumina cæli
 Dimensum satis, & nunquam requieta secutum
 Sidera, per varios cursus variosque recursus,
 Itæ jâvet insudasse tenus: nunc ultima fessum
 Accipiat, finemque meo det meta labori.
 Ves æterni orbes, æternique ætheris ignes,
 Qui tacito circum labentes tempora cursu

Duci-

Ducitis, & longum per sæcula volvitis ævum,
 Si non æternum (neque enim fas poscere tantum)
 At saltem durare diu, & producere vitam
 Hoc concedite opus, videant ut vestra nepotes
 Sæcula, & æternis vos admirentur ab annis.
 Mirenturque vias, quum jam non tramite sueto
 Curret iter solitum Titan, sed purpureum ver
 Et juvenem signis conversis invehet annum.
 Tuque etiam, seu te tua tanta inventa, novosque
 Admirantem orbes, puro fulgentia cælo
 Tempa tenent, seu Threiciæ testudinis audens
 Tangere ebur plestris, numeros & carmina distas,
 Qua via sidereo candescit laetæa cælo,
 TURRI, ades, inventisque tuis, nostroque labori
 Da, sancte, augurium, atque optatis annue nostris.

*Postremo Capite Libri Primi de Contagione, &
 Contagiosis Morbis.*

Sæpe exiguis mus
 Augurium tibi triste dabit, tellure sub ima
 Quem non ullus amor tenuit, sed in æra apertum
 Erupt scrobibus, vitæque, atque immemor usus,
 Et parvos natos, & dulcia testa reliquit.
 Ipsa etiam tellus ceu non ignara futuri,
 Quum tremat, atque intus gravida suspirat ab alvo,
 Signa dabit: tremuere urbes, & vertice toto
 Formidavit Athos, timuitque sub æquore Nereus.

Capite Septimo Libri Tertii de iisdem.

Proderit & latos stipularum incendere campos,
 Et nemora intacta, & sanctos exurere lucos.

Dialogo de Poetica.

Huc ades, o Thelayra: quid ah quid grandia farra
 Æstivo sub sole teris, medioque sub æstu,
 Nec parcis tibi, sæva? ah te ne immitis adurat
 Scirius: ah teneras ne rumpat pustula palmas.
 Demens, o Thelayra, patri concede laborem,
 Cui Cereris cura est: melior te cura Diones
 Sollicitet; tu, dum fervet tritura sub æstu,
 Dum crepitat seges, & multo sonat area pulsu,
 Clam te operi furare, & aquas effinge ferendas.
 Hic nitidus fons est: hic plurima populus umbram
 Sufficit, & gelidæ summittit frigora ripæ.
 Vos auræ, Alpinis placidæ de montibus auræ,
 Hæc illi portate: aut, si pater obstat eunti,
 Saltem æstum lenite, gravem lenite laborem.

Libro Primo de Intellectione.

Natalem, Thelayra, tuum lux crassina reddet.
 Crassina lux mihi sancta; tubs age Lucifer, ortus
 Profer, & Auroram propero dux evehe curru:
 Evehe, sed sero tardus cede, Hespere, cælo
 Longa ut eat, felixque diès; lege lychnida, Leuce,
 Et viridem violis intextito amaracon albis.
 Serta duo mihi necte: unum, quod postibus ipse
 Appendam, Thelayra, tuis, nrea maxima dona
 Nota tibi: ast aliud, quod festia luce laborum
 Immunes decoret plena ad præsepia tauros.
 Tu Vulgo Venerique palam formosa videnda
 Comtaque, sed clam pulchra tuo, sed comita Myconi
 Incedes, tacitisque Deam venerabere votis,
 Ut mea tu, tuus ipse ut sim: Dea maxima votis
 Annuet; at tu omnem, Thelayra, abrumpe pudorem
 Tum, quum expectatum diffabit tibia cantum,
 Ardentesque sono in choreas accendet amantes.
 Tum dextram lavamque manus jungamus amicas,
 Invideantque omnes, neque enim te doctior usquam
 Ulla salit, non ipsa Jole, non nata Lycoræ.
 Me vero quales in cælum tollere saltus
 Aspicias, Thelayra! modo & te flectere in orbem,
 Et modo te contra stantem mira arte movere
 Ante retroque pedes, spatio nec cedere ab uno!
 Ipsa Venus cælo ridens spectabit ab alto.

Eodem Libro Primo.

Ollis divina super mens
 Astat, magna, micans: cujus radiata nitore,
 Quæ fuerant obscura prius simulacra, repente
 Fiunt coram anima, claraque in luce refulgent.
 Non aliter, quam quæ cæca sub nocte tenentur,
 Si seriat rutilum Solis jubar, omnia late
 Splendescunt, pulchraque petunt in luce videri.

In calce ejusdem Libri.

Lyncas nec acres advehe, neu gere
 Thyrsos, venustum nec tege casside
 Horrente vultum, sed tenero veni
 Cinctus tempora pampino:
 Tuisque mitis & placidus sacris
 Adesto, qualem te memorant joco,
 Bastris subastis, in medio Deum
 Convivam Jove cum patre

Sedis.

Sedisse, circum Diis resonantibus
 Evoc: pharéttra quum posita tuas
 Laudes eburna grandiloquus lyra
 Latona cecidit satus.
 Ereptus igne ut fulmineo Jovi
 Bis natus infans duceris ad Deos,
 At tibi magnis plaussibus omnium ad-
 risit Cælicolam cohors.
 Namque ore pulchro talis erat color,
 Rubente qualis enitet in rosa.
 Tum prominebat exsiliens caput
 Sacrum corniculis caput.
 Tyrrenus ut te navita deprecans
 Sero, furoris, numinis & tui
 Expertus iras squammeus in mare
 Piscis defiliit rate.
 Sensit Lycurgus vitibus impiam
 Ausus securim immittere; sensit &
 Cohors Gigantum trudere tum rata
 Alto Cælicolas polo.
 Tu Gange victo miles ab ultimis
 Indis triumphos victor io refers:
 Et redeunti Susa & Achæmenes
 Aras constituunt tibi.
 Fremunt in ætis orgia montibus
 Euoë: solutæ per iuga Thyades
 Crines in auras, raucisonis replent
 Altum cornibus æthera.

Libro Secundo de Intellectione.

Carpe fugam, Galatea; feris petit æquora Cyclops:
 Carpe fugam, pelagoque procul speculator ab alto,
 Te qui amat, dignumque tuo se censet amore.
 Humano primum rorantem sanguine barbam,
 Et scædum os, oculumque unum, quem fronte patentem
 Ipse gerit media, multo lavere æquore cernes.
 Pestere dein rastro crines, apioque virenti
 Assimiles, laudare: silens tum consulere æquor,
 Et se spectatis formosum dicere ab undis.
 Te vero, Galatea, quod hunc contemnis amantem,
 Nec pecoris numerum, nec avenæ sibi cura,
 Crudelem, & pistri natam Scyllaque vocato:
 Crudelesque Deos: si Dii tamen æthere in alto
 Vel mare sunt aliqui; neque enim se posse putare
 Ullos esse Deos; demum tibi dira minari.
 Nam fore, ut istu uno magno cum fragmine montis
 Teque tuumque Acim medium disperdat in æquor.

At tu tuta mari magno, Cyclopis amores
 Despiciens; ridensque minas, & inania verba,
 In, nostros Galatea, sinus, formosa, recurre:
 Ille inter pecudes & amore uratur, & Ætna.

Eodem Libro.

Telamonius Ajax

Arma rapit, Superosque furens in prælia poscit.
 Jamque hominum hos nunc insequitur, nunc percussit illos.
 At tacitus moerensque hominum consortia vitans
 Bellerophon solos errat male sanus in agros:
 Bellerophon, quem Martis honos, quem gloria curruum
 Per deserta fugit, nec amor comitatur equorum.

[Dialogo de Aniras, non procul ab initio.]

Ne timeas, Trojane Puer, quod in ardua tantum
 Tolleris a terra: quod rostro, atque unguibus uncis
 Te complexa ferox volucris per inania portat.
 Audistine umquam sublimis nomen Olympi?
 Audistine Jovis tonitru, qui fulmina torquet,
 Qui pluit in terras, cui templa arasque dicatis
 Vos homines, taurosque tua mactatis in Ida,
 Quique etiam vestri est, si nescis, sanguinis auctor?
 Ille ego sum; non te hæc volucris, sed Juppiter est, qui.
 Haud præda captus, cari sed amore Nepotis
 In summum amplexu innocuo te portat Olympum:
 Astra ubi tot spectare soles, ubi pulcher obit Sol
 Ortusque occasusque suos, ubi candida noctes
 Currit Luna nitens, Auroram Lucifer anteit.
 Hic ego te in numero Superùm, domibusque Deorum,
 Ver ubi perpetuum, felix ubi degitur ætas,
 Æterna & semper viridis florensque inventa,
 Consistam: æqualemque annis pubentibus Heben,
 Officioque dabo comitem, qui pocula nobis
 Lætâ ministratis, reliquum cælestibus una
 Astragalis choreisque diem exercere licebit.
 Pone metum, discede Jovi, melioraque longe
 Prospiciens, caram, Puer, obliviscere Trojam.
 Neve Deum te jam, & Divorum regna petentem
 Ulla cauum, aut Idæ nemorosa cura sequatur.

Eodem

Eodem Dialogo .

P S Y C H E .

Huc , Amor o dilecte , ades o dilecte Cupido :
 Formosum tua te PSYCHE formosa requirit ,
 Et poscit te Dia Deum , puerumque puella .
 O tibi tam similis si te peramatque cupitque ,
 Nonne & amabis Amor illam , cupiesque Cupido ?
 Est eadem nobis patria : est celestis origo
 Ab Jove : nos terris pariter , nos æthere in alto
 Versamur pariter , conjunctaque munera obimus .
 Ipsa bonum pulchrumque modis in pectora miris
 Infuso , tu corda feris , tu suggeris ignes ,
 Accendisque ardore novo : genus unde animantum
 Concipitur , crescitque , sua & connubia jungit .
 Me miseram , quod & ipsa meis in me artibus usa
 Ah nimium tenera , & pulchro nimis apta moveri ,
 Ut te confexi , ut novi , pulcherrime rerum ,
 Continuo facibusque tuis , & amoris amore
 Exarsi ; juvat hoc , paribus si & tu ignibus ardes .
 Tolle , Puer , vittas , atque in me lumina solve ,
 Nempe & amabis Amor pulchram , cupiesque Cupido .
 Ipsa tibi tennem , qua cingas tempora , vittam
 Intertextam auro , & molli hombyce laboro :
 Pictus ubi Narcissus hiat , Mæander oberrat .
 Hic ego te latas terras , atque alta volatu
 Nubila tranantem fingo , & maria uda secantem :
 Cuncta tibi imperio subdentem , hominesque , ferasque
 Et pictas volucres , & , quæ nant æquore , monstra .
 Diis quoque nec parcis : curru rex Juppiter aureo
 Invehitur , cinctus humeros & brachia ferro .
 Quos inter tua PSYCHE etiam religata catenis !
 It moerens , sequiturque tuos captiva triumphos .

*Vetus Epigramma , in calce Sententia de
 Vini temperatura .*

Infantem Nymphæ Bacchum , quo tempore ab igne
 Prodiit , inventum sub cinere abluerant .
 Ex illo Nymphis cum Baccho gratia multa est ,
 Sejunctus quod sit ignis , & urat adhuc .

HIERONYMI FRACASTORII

Carminum Finis .



ILLUSTRIUM ALIQUOT POETARUM

C A R M I N A

AD FRACASTORIUM,

ET DE FRACASTORIO.

ANTONII MARI VISDOMINI.

FRACASTORI venerande, anima tibi carior ipsa,
Us valeas, quidnam juncto pede, quidve soluto
Scribas, scire velim, dum te Marpesia cello
Colle tenet, placidi sectantem commoda ruris.
An medicas herbas Phæbo monstrante per agros
Colligis, ut caros cives a funere serves?
An Dryadum mistus choreis, Faunisque jocosis
Agresti ludis calatno: quæ Tysirus olim
Cantet, & umbroso mivetur Nais ab antro?
An potius volucris raptus super æthera mente,
Colloquio frueris TURRII, secumque vagaris,
Ignotasque vias stellarum, orbisque sueris
Ienosos, veterumque palam commenta refutas?
Felix, quem populi de tempestatibus arvis
Ereptum, claro sistit Sapientia celo.
At nos indoctæ sequuntur vestigia turbae,
Parvæque miramur, quia numquam cernere magna
Contigit, hinc vana deludit imagine mentem
Aut spes, aut metus: invadit nunc falsa voluptas,
Nunc falsus dolor, in primis me torva feroci
Pauperies vultu terret, ceu tristis Erinnyis,
Quum pavidum flammis ulericibus urget Orestem.
Sepe loquor mecum, tactusque hæc corde voluto:
Incipe serse tua contentus vivere, teque
Liber, & impavidus fortuna opponere superbæ.
Nemo pauperie miser est, aurove beatus.
Oppressum morbo Crémilum de paupere lecto
Transfer in auratos thalamos, & stragula picta;
Non samen agroti decedet corpore febris.
Impatiens, æstuque amens vigilabis, at idem,
Quum validus silvis apros venatur, in alta
Hibernas noctes nive dormit suaviter, ægrum
Sic animum nec divitiæ sanare valetunt,

Nec

*Nec mentem sanam vel magna offendere exestas .
 Quare age , si carus Superis , si carus amicis
 Esse velis , animum semper cole : cetera mitte .
 Cuncta potest sprevisse aliquis , nemo omnia habere .
 Ille opibus vincet Crasos , illi fluet Hermus ,
 Cui licuit contemnere opes , sunt denique ceteræ
 Divitiæ , Virtus , Sapiëntia , quas neque bellum ,
 Nec mors Suprema potis est rapuisse favilla .
 Hæc mecum . Sed cuncta fluens animo , simulatque
 Tabentes artus , & commoda multa volentem
 Aspicio miseram juvenili in flore senectam .
 Crudeles Parca , dulcis nec dona juvenem
 Carpere , nec lentos finitis finire dolores .
 Non mea vos pietas , tremuli non vota parentis ,
 Non lacrimæ vestras potuerunt flectere mentes .
 At tu , quem Phæbus letales pelleret morbos
 Edocuit , citharaque amnes cantuque morari ,
 Huc ades , o FRACASTORI , aversaque Numina flecte
 Carminibus , tabemque meo de corpore pelle .*

JOANNIS BAPTISTÆ AMALTHEI,

IN OBITU

HIERONYMI FRACASTORII.

NEC Sol ab ortu pulchrior aureum
 Ostendit axem , nec magis Hesperus ,
 Quam pura nox invexit astra ,
 Sidereos micat inter ignes ,
 Quam vera virtus munere Calitum
 Terris refulsit , quam neque fulminis
 Exterret ictus , nec minaces
 Martis equi , nec iniqua bella .
 Sed Disis atri , quæ semel horridis
 Adjecit umbris dura necessitas ,
 Non dia Virtus , non Camænæ
 Ætherias revocant ad auras .
 Nec Musa quondam restituit parens
 Fatis ademptum Threicium Orpheus ,
 Quamquam ille dudum corda molli
 Flexerat Eumenidum querela ,
 Ausus profundos flebilibus modis
 Excire Manes , nigraque Tartara ,
 Nostemque damnatam subire ,
 Dum miseram Eurydicen reposci .
 Nec morte functum candida Pieris
 Ad lucis oras , ad misidum diem

FRASTORIUM vatem reducis
 Sæpe Deos precibus fatigans :
 Seu flexuoso Tethyos o sinu
 Phœbus recurrens explicat aureas
 Equis habenas , & rubente
 Exhilarat sua regna curru :
 Seu noctis udae præviis Hesperus
 Sacros reliquit Nereidum choros ,
 Et Luna vorantes aperto
 Extulit Oceano jugales .
 Illum gementes Aonio in specu
 Flevere Musæ ; nec mel apes , neque
 Dulcem dederunt astra rorem , &
 Edumina destituere cycni .
 Nunc plena luctus omnia : nunc humi
 Phœbea laurus , nunc hedera jaceat ;
 Nunc cæca nubes sidus urget
 Pierium Stygia sub unda :
 Sic puppis atro mergitur æquore ,
 Quæ bella nullis gentibus inferens
 Fulgebat insignis Sabeis
 Muneribus , Phœbiæque merce .
 Declivis alto Sol ruit æthere
 Fessas reclinans Oceano rotas :
 Sed luce terras vestit idem
 Purpureo rediens Eo .
 Nos ut severa turbidus alluit
 Cocytus unda , fataque Gneissus
 Iudex ævena movit urna ,
 Ad superos via nulla ducit .
 Quis vincta morbis , vincta doloribus
 Firmabit herbis membra potentibus ?
 Quis verba devolvat rosata
 Ambrosio nivis instar ore ?
 Tardasque nectet fluminibus moras
 Carmen decore pectine temperans ?
 Carmen , quod argutis ab antris
 Sæpe loquax iterabat Echo ?
 Tu , Phœbe , testis quum sibi servida
 Sacrabat alto pectora numine
 Oracula edoctus Pelasgum ,
 Sanctæque templa animi recludens ,
 Sive ille facti præpes obvias
 Tardaret alas Pæonis artibus ,
 Seu voce mallet , seu canoris
 Pronum Athysm fœdibus morari ,
 Quæ pulchra labens per ræda libero
 Amnis natatu Naiadum sacros

*Pertentat amplexus , & uadana
 Mordet aqua fugiente ripam .
 Sed pone latus , anxia Pieri :
 Non ille magni cultor Apollinis
 Urgetur obductus perenni
 Nacte oculos , gelidoque somno :
 Qui sempiternæ mensus iter plage .
 Et se beatis sedibus inferens
 Accessit astris , & nescit
 Altior invidia tenebris .*

ADAMI FUMANI VERONENSIS

LONGE Vir unus omnium doctissimus ,
*Verona per quem non Marones Mantua ,
 Nec nostra prisca invident jam secula ,
 Virtute summam consecutus gloriam
 Jam grandis ævo hic conditur FRASTORIUS .
 Ad tristem acerba mortis ejus nuntium
 Vicina flevis ora , flerunt ultima
 Gentes , perisse muscorum candidum
 Florem , optimarum & lumen artium omnium .*

LUDOVICI NOGAROLÆ

COMITIS ,

Ad Paullum Rhamnufium Venetum .

FRASTORII monumenta hoc tu dum , PAULLE ,
*libello
 Colligis , e cæcis eripiens tenebris ,
 Scilicet ut Vates , Medicæque excelluit arte ,
 Percurritque domos æthereas animo ,
 Ingentes VERONA refert tibi nunc mea grates
 Cum Baldo , Benacæque suo , atque Atheſi .
 Qui tanto assurgens plausu , quantum ipsa labore
 Fama sui civis se efferet aucta tuo .*

JULII CÆSARIS SCALIGERI ,

Cujus etiam inter Poemata libellus exstat ,
 quem inscripsit :

ARÆ FRACASTOREÆ .

O FRACASTORIO nascenti defuit ergo ,
Sedulus attente finxit Apollo manu .

Inde

*Inde hauri , Medicusque ingens , ingensque Poeta ;
 Et magno facies omnia plena Deo .*

JOANNIS MATTHÆI TOSCANI
 DE FRACASTORIO ,

Poetarum sui sæculi vere Principe .

QUI FRACASTORIUM sisulo fortasse negabit ,
*Quem Vati tribuit pagina nostra , parem ,
 Aut non Pieriam gustaverit ille , Marone
 Quæ demto nulli vena secunda fuit :
 Aut si gustaris , nec mecum sentias , ille
 Jam penitus gustu judicioque caret .*

E J U S D E M .

ANTE suo quamvis sumuit Verona Catullo ,
*Et fuit e claris urbibus una diu :
 Attamen invidit primam sibi , Mansua , palmam
 Hæc non lata satis proximior gradu .
 Atque aliquem , possis quem magno æquare Maroni ,
 Sollicita Phœbum des sibi voce rogar .
 At FRACASTORIUM lætis excepis ut ulnis ,
 Plus aliquid votis das mihi Phœbus , ait .*

F I N I S .



M. A N T O N I I
F L A M I N I I
C A R M I N U M,
LIBER PRIMUS.
AD FRANCISCUM TURRIANUM
PATRICIUM VERONENSEM.

I.

E Cce Flamini tui libellum ,
Candidissime Turriane , quem nos
Donamus tibi jure , quando nemo
Tantum nos amat , aut amavit umquam
Neque hoc munere , quod mihi dederunt
Formosæ manibus suis Camœnæ ,
Dum colo Aonios puer recessus ,
Potest dignior ullus esse , quam tu ,
Quem Phœbus pater , & novem sorores
Amant non minus ac suos ocellos .
At vos , numina cara , Turriani
Famam cum lepido meo libello
Servate incolumem perenne in ævum .

II.

H Y M N U S I N P A N A .

J AM satis cecini fera
Regum prælia : nunc age ,
Mater Pieri , quem Deum ,
Quem dulci Æoliæ fidis
Plectro rite canemus ?
An te , lanigeri gregis
Silvarumque virentium
Custos , cui nigra Mœnali
Terga , cui gelidi placent
Summa templa Lycæi ?
Nymphæ , semiferam Jovis
Prolem dicite , dicite

Pana capripedem , leves
Suetum cum Dryadis choros
Silvis ducere in altis .

En ut grata silentia
Cantu noctivago Deus
Rumpit ; cernite , io , venit ,
En venit capitis feri
Serta pinea quassans .

Huc concurrite , virgines
Intactæ , & pueri integri :
At quibus scelera impia
Mentem sollicitant , procul
Hinc abeste , profani .

Absint & querimonix ,
Et mixtus lacrimis dolor :
Hic lætis choreis dies
Ducenda , hic leve tinnula
Carmen voce sonandum .

O Pan Najadum pater ,
Qui per devia montium
Valliumque reconditarum
Agrestes agitas , canum
Cinctus agmine , lyncas :

Te divum , atque hominum fator
Silvarum dominum dedit
Esse , qua roseus dies
Surgit , quaque cadens rubris
Ponti mergitur undis .

Tu fontes liquidos gregi , &
Lætæ pabula sufficis :
Tu custos ovium potens
Dictus , mollia candidis
Exples vellera lanis .

Quos tu , sancte , pio semel
Agnos lumine videris ,
Illos nec stabulis lupus
Infestus rapiet , mala
Nec contagia lædent .

Felices nemorum comæ ,
Quæ te , cum vaga roscidas
Vesper sidera protulit ,
Dulci carmina fistula
Audivere canentem ;

Tunc puræ melius nitent
Noctis conscia sidera :
Tunc auræ Zephyri tacent :
Tunc lætas croceis humus
Spargit floribus herbas .

Non

Non tam dulce sonat cadens
 Udo in gramine cyncus , aut
 Veris tempore floridi
 Ales sub silvæ querens
 Densis Daulias umbris.
Ergo Hamadryades deæ ,
 Limpidis ubi procubat
 Umbra saxeæ fontibus ,
 Ludunt in numerum , & levi
 Campos ter pede pulfant .
Tu vero choream regens ,
 Cantus ingeminas : sonant
 Lætis omnia plausibus ,
 Et cultrix nemorum gemit
 Imis vallibus Echo .
Mox fessa Dryadum agmina
 Propter gramineam sedent
 Ripam fluminis , hic ubi
 Dulcem mollis amaracus
 Late spirat odorem .
Et dum suave rubentia
 Carpunt mala , vel aureos
 Crines frigidulis aquis
 Immergunt , liquida simul
 Voce carmina dicunt .
Ut fulgentia sidera
 Et magnas superum domos
 Linquens , ad vaga flumina
 Paverit niveas oves
 Majæ clara propago ,
Qua Cyllenia verticem
 Rupes umbriferum nigris
 Late fontibus irrigat ,
 Et gratas pecori vago
 Semper sufficit herbas .
Hic flavæ Dryopes sinu
 In molli recubans Deus
 Cælo frondiferum nemus
 Præfert , heu nimium gravi
 Victus vulnere amoris .
At felix Dryope , novem
 Post fastidia mensium ,
 Optatum ex utero dedit
 Pondus . Vix puer hauserat
 Dias ætheris oras ,
Fugerunt Dryades , parens
 Fugit territa , nam inguinum
 Tæquus hircus olens erat

Infans ,

Infans , binaque flammea
 Stabant cornua fronte .
 Tunc illum genitor ferens
 Albis pellibus abditum ,
 Ad magni solium Jovis
 Venit : nec mora , risit im-
 mensi rector Olympi :
 Riserunt superi : at Venus
 In sinu puerum tenens ,
 Visus pascit amabili
 Monstro , grataque tutgidae
 Libat oscula fronti .
 Salve o Naiadum potens ,
 Salve , & hinc lacrimabiles
 Morbos , & miseram famem in
 Extremas Arabum domos ,
 Et feros age Turcas .

III.

H Y M N U S

In Bonam Valetudinem .

Diva funestis inimica morbis ,
 Cui vigor mentis , solidumque robur ,
 Et joci dulces , animique semper
 Gaudia cordi :
 Te voluptatis canimus Parentem ,
 Candidam blandæ Veneris sodalem ,
 Unicum vitæ decus , & malorum
 Dulce levamen ;
 Quam colunt sancte juvenes , senesque ,
 Quam sibi cuncti cupiant , suisque ;
 Nam simul cœtus hominum caducos
 Alma revisis ,
 Illicet Morbi fugiunt protervi ;
 Occidit Febris truculenta , dirus
 Occidit Pallor , fera Mors profundo
 Exulat Orco :
 At domus florent pueris , senesque
 Indunt fortem virides juventam .
 Et Venus terras colit , & Lyæus ,
 Et bonus Hymen .
 O quies rerum , o hominum benigna
 Mater , o cunctis veneranda ; namque
 Quid potest gratum sine te , quid nisi
 Dulce videri ?

Huc

Huc ades nostrum miserans laborem ,
 Sive te cæli tenet aula , sive
 Insulis molles choreas beatis

Læta frequentas .

Huc ades tandem , bona Diva , & artus
 Languidos aura refove salubri ,
 Ne meam tabes edat immerentis
 Atra juventam ,

IV.

H Y M N U S

In Dianam .

AT te quis tacitam sinat ,
 O castissima cælitum ,
 Cultrix o Erymanthii ,
 Cynthiique recessus ?

Te chori , & citharæ juvant ,
 Te , juvat strepitus carum
 Audire , & celeres feras
 Acri figere cornu .

At cum Sol abit aureus ,
 Tu perfusa liquentibus
 Undis Oceani , vago
 Lustras æthera curru .

Curru lucida sidera
 Sectantur pede candido ,
 Lascivas meditantia
 Pura nosse choreas .

Tunc silvæ memor , aureos
 Flores , & violaria ,
 Et parvas segetes levi
 Nutris humida rore .

Tu ferum mare temperas ,
 Tu noti , & pluvie potens ,
 Tu partus aperis prece
 Ter vocata puellæ .

Salve , dux bona siderum ;
 Altorum dea montium ,
 Salve , voræque virginum
 Audi rite precantum .

V.

H Y M N U S

In Auroram.

ECce ab extremo veniens Eo
 Roscidas Aurora refert quadrigas,
 Et sinu lucem roseo nitentem
 Candida portat.
 Ite, pallentes tenebræ, sub Orcum,
 Ite, quæ tota mihi nocte diros
 Manium vultus, mihi dira semper
 Somnia fertis.
 Da lyram vati, puer, ipse flores
 Sparge, dum canto: Bona Diva, salve,
 Quæ tuo furvas radiante terras
 Lumine lustras.
 En tibi suaves violas, crocumque,
 En odorati calathos amomi
 Surgit, & nostros tibi dulcis aura
 Portat odores.
 Deferat laudes utinam precesque,
 Quas tibi supplex mea Musa fundit,
 Jam pio sanctos bene docta Divos
 Tollere cantu.
 Quis tuam digne celebrare lucem
 Possit, o almæ genitrix diei?
 Quis tuam formam, o Dea ante divas
 Pulchrior omnes?
 Ut genas cælo roseas, comamque
 Auream profers, tibi sulva cedunt
 Astra, decedit rutilante viâ
 Luna decore.
 Te sine æterna jaccant sepulti
 Nocte mortales: sine te nec ullus
 Sit color rebus, neque vita doctas
 Culta per artes.
 Tu gravem pigris oculis soporem
 Excutis; (leti sopor est imago).
 Evocans testis sua quemque lætum ad
 Munia mittis.
 Exsilit stratis rapidus viator,
 Ad jugum fortes redeunt juveni,
 Lætus in silvas properat citato
 Cum grege pastor.
 At amans caræ thalamum puellæ

Defe-

Deferit flets, & tibi verba dicit
Aspera, amplexu teneræ cupito a-
vulsus amicæ.

Ipsæ amet noctis latebras dolosæ,
Me juvet semper bona lux; nitentem
Da mihi lucem, Dea magna, longos
Cernere in annos.

VI.

DE DELIA.

O Fons Melioli sacer,
Lympha splendide vitrea,
In quo virgineum mea
Lavit Delia corpus;

Taque lenibus enitens
Arbor florida ramulis,
Qua latus niveum, & caput
Fulsit illa decorum;

Et vos prata recentia,
Quæ vestem nitidam, & sinum
Fovistis tenerum uvida
Læti graminis herba;

Vosque auræ liquidi ætheris,
Nostri conscia amoris, ad-
esse, dum queror, atque vos
Suprema alloquor hora.

Si sic fata volunt fera,
Si sic est placitum deis,
Ut nobis amor impia
Morte lumina condat,

Saltem pro pietate mea
Hoc concedite, frigidum
Ut corpus liceat mihi
Vestra ponere terra.

Sic satis moriar libens,
Si spes hæc veniat simul:
Quod nullo melius loco hos
Linquet spiritus artus.

O si tempus erit modo,
Cum suetum huc aditum ferat,
Quæ nos ante diem nigros
Cogit visere manes,

Et locum aspiciens, ubi
Illo purpureo die
Me vidit, miserum suis
Multum quærat ocellis!

Sed

Sed jam frigida pulverem
 Inter saxa videns, statim
 Pectore ardeat intimo, &
 Me sic fata reposcat,
 Ut vitæ veniam impetret,
 Et cogat superos suum
 In votum, humida candido
 Tergens lumina velo.
 Pulchris undique ramulis
 Instar imbris in aureum
 Manabant dominæ sinum
 Flores suave rubentes.
 Talis Idalia Venus
 Silva, sub viridi jacet
 Myrto, puniceo hinc & hinc
 Nimbo testa rosarum.
 Hic flos purpureas super
 Vestes, hic super aureos
 Crines, hic rosei super
 Oris labra cadebat:
 Ille gramine roscido
 Inferni, hic vitrea super
 Lympha nare, alius cito in
 Gyrum turbine verti.
 Leni murmure candidum
 Audisses Zephyrum tibi
 Palam dicere, Regnat hic
 Blandi mater Amoris.
 Tunc mecum ter, & amplius
 Dixi: Aut venit ab æthere
 Hæc alto, vel Oreadum
 Certe sanguinis una est.
 Sic & blanda protervitas,
 Sic & virgineum decus
 Oris, verbaque dulcia
 Memet abstulerant mihi,
 Ut suspiria ab intimo
 Fundens pectore, sæpius
 Dicerem: Huc ego qua via,
 Quove tempore veni?
 Nam super nitidum æthera
 Evectus volucris pede, &
 Magni concilio Jovis
 Interesse videbar.
 Illo ex tempore frigerans
 Fons, & prata recentia, &
 Arbor florida sic mihi
 Mentem amore revinxit,

Ut seu nox tenebris diem
 Pellit, seu rapidum fugit
 Solem, non alia miser
 Umquam sede quiescam.

VII.

DE SACELLO CORYCIANO.

DI, quibus tam Corycius venusta
 Signa, tam dives posuit sacellum,
 Ulla si vestros animos piorum
 Gratia tangit,
 Vos jocos risusque senis faceti
 Sospites servate diu, senectam
 Vos date, & semper viridem, & *Falerno*
 Usque madentem.
 At simul longo satiatus ævo
 Liquerit terras, dapibus deorum
 Lætus intersit, potiorem mutans
 Nestare Bacchum.

VIII.

PAULI TERTII

PONTIFICATUS MAXIMUS.

JAM nox sidera Tethyos
 Undis cæruleis condere cœperat,
 Cum lætæ volucres diem
 Venturum vario carmine nuntiant;
 Argutæ fidicen lyra
 Alcon, auricorno gratus Apollini
 Alcon, in viridi sedens
 Ripa Tybridis hæc dulcia fundere
 Cœpit carmina, Lesbium
 Aurato feriens pectine barbiton.
 Jam Sol Oceano diem
 Ducet purpureis, Roma parens, equis,
 Quo Farnesius inclyti
 Heros imperii sceptris potentia
 Sumens auspicio Deum
 Felici, Ausoniis attulit urbibus
 Pacis gaudia candidæ;
 Et belli furias alpidibus, & mari
 Arcens, tristia dulcibus.
 Mutavit litui marmura canticis

Ex illo nitidis viret

Arvis tuta Ceres, Bacchus & exteris

Crescit liber ab hostibus,

Nec nostros abigit miles atrox greges,

Nec passim pila ferrea

Ictu fulmineo mœnia concutit,

Nec discordia civium

Cognato maculans sanguine dexteris

Miscet prœlia; quo nihil

Sol, qui cuncta videt, spectat acerbius.

PAULLO denique tertio

Rerum præside, vis & furor impius,

Et tristes superùm minæ

Excessere procul finibus Italis,

Illuxitque beata diu

Oprato veniens tempore Fauscitas;

Ut quondam medio in mari

Iactatis validi turbinis impetu

Nautis Tyndaridæ ferunt

Fratres auxilium fidere dextero.

Ergo jam novus incipit

Rerum ordo, faciès jam nova ternitur:

Antiquum revocat decus

Divùm Roma domus, & caput urbium,

Et magnis legionibus

Turcam, & Danubii flumina territat.

Fortuna per oppida

Cornu fundit opes Copia divite:

Virtuti suus est honos,

Et legum timor, & prisca redit fides.

Sed jam purpureum bonæ

Ostendit Veneris stella oriens diem.

Salve, lux nitidissima,

Natali proprio carior omnibus,

Quos pulcherrima sustinet

Regnis Hesperix terra feracibus,

Te nec Juppiter horridis

Insuget nebulis, nec malus invida

Contristet pluvia Notus,

Nec lux Oceano pulchrior exeat.

Fœcundi aura Favonii

Pingat cæruleis gramina liliis:

Stillent mella virentibus

Ramis; læte mero, Tybri pater, fluas.

Tum læti choreas Joci

Ducant, nec geminis juncta sororibus

Abstet Gratia, nec Pudor

Sanctus, nec Pietas, almaque Veritas.

At tu, nobilis imperi
 Vertex, magnanimum Roma Quiritium
 Mater, surge cadentibus
 Astris, & superum dona fer omnibus
 Templis: incipe debitas
 Prima luce Deis reddere gratias
 Cantu, ac turis honoribus,
 Et PAULO Pylii tempora Nestoris
 Ora, qui tibi sæcula
 Saturni veteris rettulit aurea.

I K.

AD ALEXANDRUM FARNESIUM

CARDINALEM.

PULCHRÆ Naiades, bonique Fauni,
 Dilectum juvenem vocate ad istas
 Mecum delicias. Ades, Quiritum
 Alexander ocelle; sat tulisti
 Dura frigora, sat graves calores,
 Et casus varios periculorum.
 Te vidit Tagus aurifer-citatis
 Equis currere, te rapacis unda
 Rheni, te Liger, & Garumna vidit
 Iratos properantem adire reges,
 Et componere bella, sedesque
 Leges dicere: te feras per alpes
 Nuper terrificis euntem in armis
 Faunisque stupere Oreadesque,
 Dum cinctus legionibus Latinis
 Petis Vindelicas tremendus oras,
 Et magnum Carolum tuo labentem
 Firmas præsidio, trucesque nostris
 Agris Teutonicas minas repellis.
 Sed jam desine, jam satis laborum
 Pro cara Italia subisti: omitte
 Curas Urbis, & Orbis, æstuosa
 Dum Canicula sævit, otiumque
 Præfer dulce negotiis, ut alti
 Virtus Scipiadae solebat olim
 Fastitare, tumultuosa Romæ
 Linquens moenia ter, quaterque in anno.
 Hic quiesce parumper, hic molestis
 Te forare laboribus, licebit
 Horas fallere servidas legendo
 Musæ versiculos Horatianæ,

Frugast. Carmo.

E

Et

Et quæ Mæonides sacer, sacerque
 Canit Vergilius, licebit antra,
 Et fontes gelidos adire; risus,
 Et joci comites procul fugabunt
 Curas, tristitiamque, nec pudebit.
 Modo incompósitos videre motus
 Saltantis Pholoes: modo assidere
 Canenti Melibœo; aves tenaci
 Visco fallere, piscibus javabit
 Dolos tendere vitreis sub undis.
 Nec cervi, leporesve, capræve
 Absunt; accipiterque copiosas
 Hic prædas agit: omnibus venusta
 Rura denique gaudiis redundant.
 Ergo mœnia Romuli, & severa
 Cuncta desere: sed cavebis illas
 Turmas innumerabiles clientum
 Tecum ducere, sit comes Mapheus,
 Et Miranda, Romulusque docti
 In primis homines bonique; ad illos
 Addantur alii viri elegantes,
 Sed pauci tamen, haud beata gustos
 Ruris commoda, ni superfluentes
 Pompas Urbis in Urbe derelinquas.

X.

AD AGELLUM SUUM.

Formosa silva, vosque lucidi fontes,
 Et candidarum templa sancta Nympharum,
 Quam me beatum, quamque dis putem acceptum,
 Si vivere, & mori in sinu queam vestro!
 Nunc me necessitas acerba longinquas
 Adire terras cogit, & peregrinis
 Corpusculum laboribus fatigare.
 At tu Diana, montis istius custos,
 Si sæpe dulci fistula tuas laudes
 Cantavi, & arma floribus coronavi,
 Da cito, dea, ad tuos redire secessus.
 Sed seu redibo, seu negaverint Parcæ,
 Dum meminero mei, tui memor vivam,
 Formosa silva, vosque lucidi fontes,
 Et candidarum templa sancta Nympharum.

X I.

AD LITAVIUM SPERANTIUM.

NON semper rapido Cynthia belluas
 Cursu persequitur, nec miseris solet
 Semper letiferam Delius impiger
 Arcum tendere gentibus,
 Aut regina suum Calliope melos
 Noctes, atque dies continuat, neque
 Iphis perpetuo sævit in ignibus
 Infestus Veneris puer:
 Tu numquam studiis otia tristibus
 Interponere amas: sed magis in dies
 Pallentem sequitur cura scientiam,
 Atque alti labor ingeni.
 At contra sapiens quam bene Socrates
 Doctus cum pueris ludere! sic gravis
 Olim Panthoides seria mollibus
 Condibat citharæ modis;
 Quin & Scipiadæ Lælius abdito
 Lucrini varias littore conchulas
 Certabat legere, ut grandia publicæ
 Curæ tedia poneret.
 Jam mittas, Litavi, querere, quæ Dei,
 Quæ natura animæ, cur Jovis optima
 Sit lux, curve senex falcifer invido
 Terras lumine fascinet.
 Indulge potius, dum licet, otio,
 Et solare levi Flaminium lyra
 Moerentem ob dominæ dissidium Chloes,
 Et Lygdæ nova proelia.

X I I.

AD SE IPSUM DE ADVENTU HIEMIS.

TAM bruma veniente præterivit
 Æstas mollior, & cadunt ab altis
 Frondes arboribus: tepor Favoni
 Immanes Boreæ furentis iras
 Formidans abiit: illum agri voluptas
 Canoræ volucres sequuntur; ergo
 Et nos dulcia rura deseramus,
 Dum Ver purpurea coma decorum
 Reducat Zephyri tepentis auram.
 Horti deliciæ meæ valete,
 Fontes luciduli valete, salve

Mihi villula carior superbis
Regum liminibus ; recedo , sensum
Sede meum hic animumque derelinquo .

XIII.

DE LAUDIBUS LAURI.

LAure , conspicuo nitens
Semper tégmine frondium ,
Quas nec bruma gelu rigens ,
Nec sævi rabies Noti
Læto privat honore ,
Te canam , nêmorum decus
Arborumque virentium ,
Inter quas ita gloria
Præstas , ut teneras super
Vites tollitur alnus .
Iratæ fugiens minas
Junonis , celeri ut pede
Latona Ortygiam attigit ,
Te visa , gemini statim
Solvit pondera fœtus .
Hinc tantis meritis parem
Phœbus reddere gratiam
Quærens , horrificum neci
Ut Pythona dedit , tuâ
Cinxit tempora fronde .
Te in vocalibus Aonum
Silvis inseruit , te ubi
Lactis fluminibus leves
Nymphæ , & capripedes tigan
Dulci nectare Fauni .
Nec colles Heliconios
Dextro contigerit pede
Te quisquam sine , nam prius
Ex Lauro capiunt sua
Sancti præmia vates .
Quin & limina Cæsarum ,
Victoremque etiam tuis
Exornas foliis ducem ,
Cum Victoria nobili
Plena pulvere venit .
Cum primum hæc dea præpete
Penna fortia Romuli
Intrat mœnia , poneris
Tarpeii in gremio Jovis
Lætæ nuntia pacis .

Quam-

Quamvis ipse Diespiter
 Crebris fulminibus Deum
 Templa concutiat, tamen
 Nullis ipsa tonitribus
 Igni tacta corusco es.
 Quis te laudibus efferat
 Dignis, Laure? nocentium
 Tu purgamina sordibus
 Præbes, veraque cornea
 Mittis somnia porta.
 Te pulcherrima sospitet
 Latona, & cohibens levi
 Arcu Cynthia belluas:
 Te Phoebus viridem tuus
 Omne servet in ævum.

XIV.

A D B A C C H U M.

AGE, Bacche, quis furor me rabidum occupat? io io
 Rapior, & alta cursu volucris in nemora feror
 Ubi sacra Mænades cum trieterica celebrant,
 Furibunda solent vagantes agitare tripudia.
 Audire videor alto reboantia strepitu
 Ubique æra: jam choris, jam videor nemorivagus.
 Celer interesse turmis; evoe mihi sola sub
 Pedibus tremunt, nubes evoe pulvereæ diem
 Mihi tollit; adest, adest jam Semeleja propius
 Soboles: io venit, tingula cymbala resonant,
 Phrygis recurva stridet grave tibia calamis.
 Evoe evagus abis animus, evoe tremula flagris
 Mihi terga quatit furor: parce precor, precor, animum
 Stimulis citare tantis: alios rape celeres
 Per opaca Thraciæ rura, alii capita rotent
 Hinc & hinc reflexa, thyrsisque seras hederigeris
 Lanient; in otiosis ego sacra latibulis
 Faciam, aureisque Bacchi pia numina fidibus
 Referam novus sacerdos; tua, Liber, initia
 Cantabo, & ista, donec mihi vita supererit,
 Habitabo nemora, semper tuis, Evie, famulus.
 Quod si bene, pater, Evantum me inferere choris
 Animo est, & altæ furibundum per juga Rhodopes
 Agitare, tuo mihi saltem munere liceat
 Rabidi furorem amoris compescere, pater, &
 Da servitio gravi dominæ vivere vacuum.

XV.

AD AGELLUM SUUM.

UMbræ frigidulæ, arborum insurri,
 Antra roscida, discoloris pista
 Tellus gramine, fontium loquaces
 Lymphæ, garrulæ aves, amica Musis
 Otia, o mihi si volare vestrum
 In sinum superi annuant benigni,
 Si dulci liceat frui recessu,
 Et nunc ludere versibus jocosis,
 Nunc somnum virides sequi per umbras,
 Nunc mulgere mea manu capellam,
 Lacteoque liquore membra sicca
 Irrigare per æstum, & æstuosis
 Curis dicere plurimam salutem;
 O quæ tunc mihi vita, quam beatâ,
 Quam vitæ similis foret deorum!
 At vos, o Heliconiæ puellæ,
 Quis fontes & amœna rura cordi,
 Si cara mihi luce cariores
 Estis, jam miserescite obsecrantis,
 Meque, urbis strepitu tumultuosæ
 Ereptum in placido locate agello.

XVI.

AD ALEXANDRUM FARNESIUM
CARDINALEM.

TAM diem gyro brevior claudens
 Phœbus insani rabiem Leonis
 Sedat, Autumnumque refert decorum
 Mollior æstas.
 Ille-maturis redimitus uvis
 Lætus incedit per amœna rura:
 Ejus aspectu exhilarata ducunt
 Poma colorem.
 At puer flavæ Semeles sodalem
 Candidum gaudens rediisse, prodit
 Obviam longe: socias choreas
 Jungit uterque.
 Saltat hos circum thiasus, jocosus
 Panes, & passo Dryades capillo,
 Fistulis mixtum resonat suavis
 Tibia carmen.

Ipsa

Ipsa pomos Cytherea in agros
 Migrat, & pulcher Jocus, & Voluptas:
 Tu tamen durus potes in molesta
 Urbe morari,
 Semper & magnum celeri per orbem
 Mente, Farnesi, volitas, quid acer
 Turca, quid Rhēnus paret, ac remota in
 Parte Britannus,
 Providens longe: sed omitte curam
 Imperi paucis vācuus diebus:
 Te magis tantos vegetum ad labores
 Rura remittent.

XVII.

AD AGELLUM SUUM.

Venuste agelle, tuque pulchra villula,
 Mei parentis optimi
 Olim voluptas, & quies gratissima
 Fuiſtis: at simul ſenex
 Terras reliquit, & beatas cœlitum
 Petivit oras, incola
 Vos alter occupavit, atque-ferreus
 Amabili veſtro ſinu
 Me lacrimantem ejecit, & caris procul
 Abire juſſit ſinibus.
 At nunc, amica rura, vos reddit mihi
 Farnesii benignitas.
 Jam vos reviſam, jam juvabit arbores
 Manu paterna conſitas
 Videre, jam libebit in cubiculo
 Molles inire ſomnulos,
 Ubi ſenex ſolebat artus languidos
 Molli fovere lectulo
 Gaudete, fontes, rivulique limpidi;
 Heri vetuſti filius
 Jam jam propinquat, voſque dulci fiſtula
 Mulcebit, illa fiſtula,
 Quam vero Iolæ donat Alcoa Maximus,
 Ut inclyti Farnesii
 Laudes canentem Naidum pulcher chorus
 Miretur, & Pan capripes.

XVIII.

AD MUSAM DE PHILIPPO OBERMAIRO.

Collis Aonii puella cultrix,
 Una ex virginibus novem tenellis,
 Quam nec bella cruenta, nec labores,
 Solis dicere, sed puellularum
 Amores, querimonias, jocosque
 Lascivis elegis juvat referre;
 Hanc myrtum tibi dedicat Philippus,
 Natus Vindelicis Philippus oris,
 Sed tam cultus, & elegans poeta,
 Tam dulcis lepidusque, ut Italarum.
 Nemo sit propior tuo Tibullo.
 Hanc ille irrigua fovebit unda,
 Hanc perfundet odoribus, tuasque
 Laudes assidue sub hujus umbra,
 Molli carmine concinet; puella,
 Pulchra, tu juveni fave, tuæque
 Fac sit deliciae, tuique amores.

XIX.

AD VETURIAM MATREM,
ET JULIUM, ET FAUSTUM.*FRATRES MORBUOS.*

Mater candida, candidique fratres,
 Qui me funere rapti acerbo, in atris.
 Ingentem tenebris videtis, & cum
 Sol terras hilarat nitente luce,
 Et cum nox placidum refert soporem,
 Jam mei miserescite, & deorum
 Supplicate parenti, ut exuens me
 Vinculis corporeis, volare vestros
 Ad manes sinat; est enim relictum
 Nihil dulce mihi, nihil, quod ægrum,
 Et mærentem animum levare possit,
 Præterquam lacrimæ, & querelæ, ab imo
 Et suspiria corde tracta; quod ni
 Timeret mea mens adire, dum vos
 Urget, ne, procul a piis repulsa,
 Vobis perpetuo careret, ipsum
 Ferrum jam mihi corpus exuisset.

XX.

X X.

AD JOANNEM ANTONIUM FLAMINIUM

Patrem morientem.

Vixisti, genitor, bene, ac beate,
 Nec pauper, neque dives, eruditus
 Satis, & satis eloquens, valente
 Semper corpore, mente sana, amicis
 Jucundus, pietate singulari.
 Nunc lustris bene sexdecim perastis
 Ad divum proficisceris beatas
 Oras; i, genitor, tuumque natum
 Olympi cito sistite tecum in arce.

X X I.

AD ANTONIUM MIRANDULAM.

Antoni venerande, anima mihi carior ipsa,
 Romanne semper incoles?
 Te neque avaritiæ morbus, nec servida honorum
 In Urbe detinet fitis.
 Vis igitur properemus, ubi Dovadula Mafis
 Amica præbet otia?
 Hunc agrum dat habere tibi Farnesius heros,
 Quo nil amœnius, n̄ que
 Fertilius Baccho, & Cereri gratissima tellus
 Togata cernit Gallia.
 Has age delicias, & dulcia rura petamus,
 Quo pulcher Autumnus vocat,
 Et Bacchus pater, & virides Pomona per herbas
 Cum Gratiis ducens choros.
 Jam videor tecum patula projectus in umbra
 Ad lucidi fontis caput,
 Discere, nubigenam quæ mille coloribus Irim
 Vis pingat imbris nuntiam;
 Cur cadat æstivo glacialis fidere grando;
 Quis tantus excitet furor
 Ventos, horrifonas curvato gurgite ut undas
 Ad alta mittant sidera;
 Altera cur auro tellus fluat, altera ferro,
 At illa gemmis splendeat.
 Felix, qui rerum causas, Mirandula, nosti,
 Et eleganter explicas.
 Tu docti pridem male culta vireta Lycæi
 Post longa primus sæcula

Efficis, ut prisco revirescant more, quod omnis
 Miretur ætas postera,
 Teque parem dicat magnis heroibus illis,
 Quos ipsa Pallas artibus
 Erudiens claris dat adhuc splendere per orbem,
 Ut pulchra cæli lumina.

XKII.

AD APOLLINEM.

Cynthii cultor nemoris, beatas
 Voce qui Nymphas, citharaque mulces,
 Phœbe, supremi Jovis, & deorum
 Blanda voluptas,
 Si tibi semper mea mens ab annis
 Serviit primis, neque dulce cordi
 Est meo quidquam sine te, precanti
 Annue dexter.
 Ut mihi optatum dat habere agellum
 Clara Farnesi pietas, gravique
 Liberans cura, jubet otiosam
 Ducere vitam.
 Sic tuo vati liceat, perenni
 Nomen illius celebrare cantu;
 Et viri in nostris vireat libellis
 Gloria semper,
 Myrtus ut luce viret in latenti,
 Fonte quam nutrit liquido decora
 Nais, & sævas hiemes, & æstus
 Arcet iniquos.

XXIII.

NÆNIA IN MORTEM

FRANCISCÆ SFORTIÆ SORORIS

GUIDI ASCANII CARD.

PUELLA delicatior
 Molli columba, pulchrior
 Rosæ rubentis foscule,
 Cur immerentem candidis
 Te sæva Parca fratribus,
 Et conjugii dulcissimo.
 Prima juvenia sustulit?
 Sic florem hiantem mollibus

Telluris almæ amplexibus
Vellens procella turbinis
Leves in auras dissipat .
Francisca , acerbo funere
Cæli relinquens lumina ,
Tuz domus , & patriæ
Cuncta abstulisti gaudia .
Te mollis unda Tybridis
Flens crevit , ipsæ crinibus
Passis puellæ Naides
Flevire ; septem collium
Questus ad alta sidera
Ivere : lucidam caput
Sol lugubri ferrugine
Velavit , atra civitas
Cum te sepulcro poneret ,
Pudor , Venustas , Gratia .
Sunt hoc sepulcro condita .
Crudelis , implacabilis ,
Iniqua Mors , cornicibus
Tam longa parcis sæcula ,
Et huic puellæ tam cito
Manus rapaces injicis ,
Quæ debuit Amphrysiæ
Vicisse vatis tempora .
Nec te rogantis dulcia
Flexere verba , ferream
Quæ vim valebant frangere ,
Nec oris illa dignitas ,
Cui Pallas ipsa cesserat ,
Tui furoris impetum
Tardare quivit , impia .
Nil fratris Ascani favor ,
Quem magna Roma suspicit ,
Caræ sorori profuit :
Nil vota PAULLI Tertii ,
Quo terra nil majus videt ,
Juvere neptem candidam .
At sævias licet , fera
Mors , vivet ipsa funeri
Suo superstes , omnium
Volans per ora gentium
Francisca , magnæ gloria , &
Dolor perennis patriæ .

XXIV.

EPITAPHIUM FRANCISCÆ SFORTIÆ.

FRANCISCÆ tumulo teguntur isto
 Offa Sfortiadis, viator: Illa
 Et forma memorabili puella,
 Et sancti specimen fuit pudoris,
 Digna vivere ad ultimam senectam:
 Sed mors, optima quæque prima tollit.
 Ipsam Romula gens, avusque PAULLUS
 Tertius lacrimis piis honorant:
 At deum genitor, deque gaudent
 Esse concilio suo receptam.

XXV.

 EPITAPHIUM JOANNIS MATTHÆI GIBERTI,
 PONTIFICIS VERONENSIS.

Giberti venerator hic sepulcrum,
 Quem Ligur genuit Panormi in urbe,
 Roma nutrit, & diu regendi
 Orbis participem beata vidit,
 Dein Verona recepit, & magistrum
 Sinceræ pietatis, & parentem
 Mirata est; nihil ille, quod beatam
 Posset reddere civitatem, omisit:
 Nunc cælo fruitur beatus ipse.

XXVI.

AD SUAVISSIMUM SODALEM SUUM.

Senex plaustribus loquacior ranis,
 Turbaque semper garrula cicadarum,
 Tu nunc relictis villulis Capenatum,
 Siqu Bononiæ educaris in dulci,
 Qua civitate delicatior nulla est;
 Vitamque lætam vivis atque felicem
 Fruens Morono, strenuoque Cervino,
 Quos publicarum cura nobilis rerum,
 Ardensque ad alta sidera evehit virtus.
 At cum reversus ad tuos agros, tristi
 S lentio miser, otioque marcesces,
 O quam vicem tuam dolebis: & cæli

Lucem nitentem quam videbis invitus,
 Cum vita morte jam videbitur pejor !
 Senex dicacule , & facete nugator ,
 Festivitaris magne amator urbanæ ,
 Dic , caprimulgos inter atque folfiores ,
 Et fenticofa rura gentis infulfæ
 Quid dulce poterit effe , quidve jucundum ?
 Cum quo jocando tunc dabitur ineptire ?
 Quis elegantes ventitabit ad cœnas ?
 Cui poft Falerna vina de malo , & facro
 Lino venena verſuum propinabis ?
 Megæra , non Camœna , quos tibi dicat ,
 Ut fic acerba peſilentior peſſe
 Tuos ſodales eneces , quibus centum
 Abefſe millia paſſuum , nihil prodeſt :
 Nam charta tetro infecta carminum tabo ,
 Quam ſape doni maximi loco mittis ,
 Modis legentum corda polluit miris ,
 Ut liberare languidos ſuis ſuccis
 Nec ipſe Phœbus , ipſa nec Salus poſſit .
 At tu poeta letifer , tuos , quæſo ,
 Amiculos ne perde peſſe tam dira ,
 Sed peſſimis jam pone verſibus finem ,
 Savire vel ſi pergis , hoſtibus ſavi .

XXVII.

DE VERSIBUS PHILIPPI OBERMAIRI.

Dulces verſiculi , meo Philippo
 Quos dulciſſima Muſa molli in umbra
 Diſtat Caſtaliæ , ſuo lepore
 Sic ſenſum afficiunt meum , meumque
 Sic cor exhilarant , ut iis legendis
 Curæ ſollicitæ , anxii timores ,
 Et ſuſpiria , lacrimæque amaræ
 Confeſtim fugiant ; velut , ſuaves
 Cum ſpirant Zephyri tepente vere ,
 Cælo nubila , candidæ pruinæ
 Terris diffugiunt ; novique flores
 Pingunt gramina gemmeo colore .
 Dulces verſiculi , tenelli , Amorem
 Spirantes , Veneremque , Gratiaſque ,
 Semper vivite , ſemper irrigate
 Veſtro neſtareo liquore ſenſus ,
 Et mentes hominum venuſtiorum .

XXVIII.

XXVIII.

AD PHILIPPUM BEROALDUM
JUNIOREM.

Scribes Bentivoli fortis Principis
 Tu facta, & Ligurem sanguine Julium
 Gaudentem Latio, infestaque Gallia
 Nostris agmina finibus.
 Nec parco referes carmine, quam fera
 Atrox in Selinum bella gerat Sophis,
 Dum Turcas odio persequitur gravi
 Regnis pellere patriis.
 Nos diva, Idalium quæ nemo incolit,
 Et miscere simul dulcia tristibus:
 Gaudet, Mæonia non patitur tuba
 Regum dicere prælia,
 Nec Thebas veteres, primave Romuli
 Sceptra, ausamve Deum testa refringere
 Telluris sobolem, aut excidio datum
 Grajis Ilion ignibus.
 Nos heu Hierophiles cogit amor male
 Cervicem laqueo subdere dispari,
 Quem nec Thessalico murmure saga, nec
 Duræ gramen Iberiæ,
 Nec Circeja queat solvere nœnia.
 Tu non visa canes prælia: nos gravem
 Experti dominæ savitiam, levi
 Curas eluimus fide.

XXIX.

A D G R A T I A S.

GRATIAE, pulchræ Veneris sodales,
 Queis sine gratum nihil aut venustum est;
 Non Amor, non ipsa Venus, jocive,
 Blanditiæve;
 Tres fero vobis violæ coronas
 Flore fulgentes, ego terna vobis
 Candidi lactis, totidemque libo
 Cymbia mellis:
 Vos meis dulcem numeris leporem
 Addite, ut semper bene docti ad aures
 Grata Farnesi veniant Iolæ
 Carmina vestri.

XXX.

DE LAUDIBUS MANTUÆ.

Felix Mantua, civitatum ocellæ,
 Quam Mars Palladi certat usque & usque
 Claram reddere gentibus, probisque
 Ornare ingeniis virorum, & armis!
 Te frugum facilis, potensque rerum
 Tellus, te celebrem facit virente
 Qui ripa, calamisque flexuosus
 Leni flumine Mincius fuferrat,
 Et qui te lacus intrat, advenisque
 Dites mercibus invehit carinas.
 Quid palatia culta, quid decorum
 Tempia, quid memorem vias, & urbis
 Moles nubibus arduis propinquas?
 Pax secura loco, quiesque nullis
 Turbata exiliis, frequensque rerum
 Semper copia, & artium bonarum.
 Felix Mantua, centiesque felix,
 Tantis Mantua dotibus beata:
 Sed felix magis, & magis beata,
 Quod his temporibus, rudique sæclo
 Magnum Cassaliona protulisti!

XXXI.

AD CÆSAREM FLAMINIUM.

CÆSAR æterno mihi junctæ amoris
 Vinculo, immites aditure mecum
 Non modo Hyrcanos, Erebi sed atra
 Regna profundi,
 Ne mihi pulchros Ligurum recessus,
 Neve Campani memores venusta
 Rura Sebethi, aut placidas amœni
 Tiburis arces.
 Ipse nil docti patriæ Catulli
 Comparo; hic vivam, & moriar beatus:
 Hac mihi toto nihil est in orbe
 Gratius urbe.
 Tu ferax vatium generosa tellus,
 Hospitum nutrix, & amica, vatem
 Hospitem se se tibi dedicantem
 Candida nutri.
 Vos lares dulcis patriæ valete;
 Non enim possum miseras videre

Civium

Civium pugnæ, gladiosque fratrum
 Sanguine tinctos.
 Vos tamen semper mea mens amabit,
 Me licet Parcæ rapiant ad orbem,
 Zona quem Solis dirimit corusco
 Torrida ab igni.

XXXII.

DE FONTE BAGNAJÆ.

Hunc fontem amœnum, qui vireta limpidis
 Et ornat, & fecundat ista rivulis,
 Magni Rodulphi magna liberalitas
 Cælis medullis montium Canalia
 Per longa duxit; hoc tibi, terra optima,
 Dans munus omni præferendum muneri.
 Nam quod vetusto polliceris nomine,
 Præstare nunc primum incipis uberrima
 Lympha; vocari scilicet BAGNAIA,
 Vocabulo jam patrio dignissima.

XXXIII.

AD VILLAM MARIANAM.

De Victoria Columnæ.

Salve magna domus, meæ Columnæ
 Natalis, domus o beata salve.
 Hic ne vagiit illa Musa, doctis
 Quam Phœbus decimam addidit Camœnis?
 Cæli lumina vidit hicne primum
 Cælo femina digna? digna celsis
 Nasci, & vivere in ædibus deorum:
 Sopra sidera sidus ipsa clarum.
 O felix domus! hic Minerva pulchras
 Artes edocuit meam Columnam:
 Hic illi citharam dedit canorus
 Apollo; Superaque, dixit, omnes,
 O Victoria, feminas canendo,
 Quotquot magna tulit, feretque tellus;
 At te ne superent novem sorores,
 Jovis progenies novem sorores.
 Fortunata domus, domus beata!
 Audisti toties meæ Columnæ
 Illa carmina, quæ movere mentes,
 Quæ vim sistere fluminum solebant.

Tibi

Tibi Cynthia silva saepe, saepe
 Invidit tibi Cirrha, & antra Pindi,
 Et fontes Meliconii recessus.
 Jactat Creta Jovem, suam Dianam
 Delos inclita: tu tua Columna
 Gloriare domus beata: pace
 Et Jovis liceat loqui & Dianæ,
 Non Delo minor es, minorve Creta.

XXXIV.

AD DIANAM.

Casta Latonæ soboles Jovisque,
 Quæ pharetratis comitata Nymphis,
 Cynthium collem petagras, nigrique
 Silvam Erymanthi;
 Bocchius, linguæ decus utriusque,
 Doctus errantes agitare cervos,
 Hanc tibi villa media locatam
 Dedicat ulmum;
 Unde veloci domitæ sagitta
 Pendeant lynces, timidique danæ,
 Atque vivacis tibi consecrata
 Cornua cervi.

XXXV.

CATELLA AD REGINALDUM POLUM.

CUR me, Pole, tua venire ad urbem,
 Lætica prohibes? tuæ quid, oro,
 Summæ participem benignitatis
 Esse non pateris? Canes bonorum
 Heroum comites fuere semper;
 Et cælum Canis incolit supremum
 Inter sidera; nec polus, beata
 Sedes cælicolûm, suam Catellam
 Dedignatur habere secum: at ipsa
 Sum despecta tibi, nec unum apud te
 Angulum valeo impetrare; verum,
 Si nostram vacet æstimare formam,
 Non indigna tuo favore credar.
 Est pilus mihi lucidus, venustæ
 Pendent auriculæ; nigris ocellis,
 Et caudæ placeo jubis comatæ.
 Nec sum corpore vassa, nec figura-
 Tam brevi, ut videar puellularum

Comes dignior esse, quam virorum.
 Nec turpi scabie laboro; nec sunt
 Invisi pulices mihi molesti.
 Nec sum prorsus mutilis futura,
 Si lassam recreas, vehisque tecum;
 Nam pedes tibi suaviter foveo,
 Qui jam frigoribus rigent acutis,
 Nec vero timeas, luto referta
 Quod via assidue ambularim; amicus,
 Et cliens tuus optimus, Mörilla
 Me suis manibus pie, ac benigne
 Puro flumine ter quaterque lavit,
 Et munda dedit esse mundiorum
 Sponsa, quam bona mater ad maritum
 Vult deducere nuptiis paratis.
 Quod si non tatis hæc videntur esse
 Ad sescendum animum tuum; catelli
 (Ah nimis miseri mei catelli!)
 Te, precor, moveant, tenella pleno
 Quos gestans utero, pedes movere
 Vix queo amplius: & tamen necesse est,
 Milliaria singulis diebus
 Multa conficiam misella, ni te
 Volo linquere. Sed prius vel istis
 Optem filiis meis sepulcrum.
 Fiant viscera matris; ipsa præda
 Optarim prius esse vel Iuporum,
 Quam te, maxime Pole, derelinquam.

XXXVI.

CATELLA IN MADIUM.

Quid, efferate, quid, Madi nequissime,
 Catella feci blandula,
 Cur me meosque liberos crudeliter
 Lingua proterva perderes?
 Per te, scelesse, factum, ut asperas quoque
 Polus benignus in feras,
 In me foret crudelis, ac meas preces
 Ventis ferendas traderet;
 Et quæ reliqui patriam, & dulces lares,
 Ne stulta vos relinquerem,
 Afflicta, moerens, semimortua cum meis
 Linquor catellis in via,
 Futura præda mox lupis rapacibus,
 Turpive corvorum gregi,
 Nec forma rara, nec mihi fidelitas
 Favore digna profuit:

Nec

Nec pulchra proles, ventre quam gero, sanæ
 Mollire quivit pectora.
 Proles misella, matre cum miserrima,
 Eheu tenebras horridas
 Adibis Orci, antequam nata haurias
 Jucunda cæli lumina!
 Hoc urit anxium cor, hoc multo mea
 Me morte pejus enecat.
 At tu catellam amabilem, & mitissimam
 Qui cæde perdis impia,
 Madi, in molossum pessimum incidas, precor,
 Qui te Deos inanibus
 Votis vocantem laceret, ac membra omnia
 Dente cruento differat.

XXXVII.

AD AURAM DE REGINALDO POLO CARD.

Aura, quæ lucum viridem pererrans
 Nos levi blande recreas susurro,
 I, citis, quæso, pete Reginaldum
 Candida pennis;
 Tempera & suavi rapidum calorem
 Spiritu, circum voltans, nec æstus
 Igneus frangat sine delicati
 Corporis artus.
 Sic ferum semper Boream sonoro
 Æolus clausum teneat sub antro:
 Sic tibi numquam noceat furentis
 Impetus Austri.

XXXVIII.

DE LIBELLIS ANDRÆ NAUGERII.

Quot bruma creat albicans pruinas,
 Quot tellus Zephyro soluta flores,
 Quot spicæ Libycis calent in agris,
 Quot vindemia porrigit racemos,
 Quot vastis mare fluctuat procellis,
 Cum nascens pluvias reportat Hædus,
 Quot Ceraunæ frondibus teguntur,
 Quot cælum facibus micat serenum,
 Quot sunt millia multa basiorum,
 Quæ dari sibi postulat Catullus,
 Quotque sunt atomi Lucretianæ,
 Tot menses, bone Naugeri, tot annos
 Vivent aareoli tui libelli.

XXXIX.

AD MUSAS DE HORATIO GUALTERUTIO
CAROLI FILIO.

NYMPHÆ progenies Jovis supremi,
 Cultrices Heliconii recessus,
 Quas cantus juvat & leves choreæ,
 Vobis se famulum dicat tenellus.
 Hic puer citharam ferens eburnam,
 Et stylum, & tabulas, puer disertus,
 Et dicaculus, & nitens; novella
 Ut myrtus viridi hortulo: Puellæ
 Pulchræ, illum finite ad vireta vestra
 Lætum accedere; nec juvena molli
 Flore vestiat os ei, poeta
 Dum factus culicem Maronis æquet,
 Aut vincat potius, venustiora
 Ludens carmina roscidis sub antris.

X L.

AD HORATIUM GUALTERUTIUM
CAROLI FILIUM.

ALumne Musarum puer, tibi Thalia dulcis
 Ab urbium frequentia remoto in antra Pindi,
 Frondis corona myrtæ caput decorum inumbrat,
 Lyramque eburneam aureo docet ferire plectro;
 Docet sonare vocola dulci melos suaves,
 Quo fluminum volubiles moratur illa cursus.
 Non plus Marone parvulo canorus olim Apollo
 Gaudebat: Orpheum parens non plus tenellum amabat.
 O digne vira cælitum, tibi neant Sibyllæ
 Vivacis ævum innoxia manus trium sororum.

X L I.

DE GASPARE CONTARENO.

Descripsit ille maximus quondam Plato
 Longis suorum ambagibus voluminum,
 Quis civitatis optimus foret status:
 Sed hunc ab ipsa sæculorum origine
 Nec ulla vidit, nec videbit civitas.

At Contarennus optimam Rempublicam
 Parvi libelli disputationibus
 Illam probavit esse, plus millesima
 Quam cernit æstas Adriatico in mari
 Florere pace, litteris, pecunia.

X L I I.

AD RODULPHUM PIUM CARD.

DE MORTE CONSTANTINI FRATRIS.

JAM modum figas nimio dolori,
 Magne Rodulphe, & pueri quietam
 Desinas umbram miseris querelis
 Sollicitare.

Occidit frater tibi jure dulci
 Carior vita; tamen ille iustis
 Non reviviscet lacrimis; nec ipsa
 Parca movetur

Questibus; nec te pietas juvabit
 Hic tua; Obscuras potuit deorum
 Manium sedes penetrare quondam
 Thracius Orpheus,

Vifus & blandæ citharæ canoris
 Vocibus sævas Furias movere,
 Conjugem caram superas ad auras
 Ducere tendens.

Pene jam lucem miser hauriebat;
 Ditis impulsu stetit, & sequentem
 Respicit: retro fuit illa venti
 Ocyor alis:

Hanc Charon putri revehit phaselo,
 At procul ripa minitans, maritima
 Arcet incassum repetentem avari
 Munera Ditis:

Scilicet leges superum refringat
 Nemo; mortalis pereat, necesse est:
 Ut libet, vitam pater ipse divum
 Donat, & aufert.

Mors rapit cunis cita vagientem:
 Flore sub primo cadit alter ævi;
 Hic nimis vivax queritur caducæ
 Damna fenestæ.

Sic Jovi magno placitum. Quid ergo
 Nitimur contra? miserique semper
 Vivimus? quanto satius, libentor
 Ferre, quod æqua

Mente

Mente ni suffers, tamen est ferendum,
 Quo reluctantes trahere obstinata
 Vis solet stultos, sapienter ipsi
 Ibimus ultro.

XLIII.

AD ACHILLEM BOCCHIUM.

ERgo (proh superum fidem!)
 Isto contegitur marmore Julia,
 Clarum Felsinae decus
 Urbis? sic igitur, sic periit bona
 Nostri mater Achillei?
 Nec quidquam pietas sollicita in Deos,
 Nec quidquam integra profuit
 Et mens, atque animi candor amabilis?
 En quisquam, juvenum optime,
 Consolando tuis ponere lacrimis
 Finem cogitet? hic, miser,
 Hic flendum, hic querulis omnia cantibus
 Imple; haud aspera nunc suis
 Intransem pepulit te foribus Chloë:
 Non non candidior nive
 Fastidit tua nunc carmina Tyndaris.
 Et collo dare brachia
 Orantis refugit: sed miser, ah miser,
 Mater Julia, Julia
 Heu mater, propriis luminibus tibi, &
 Vita carior occidit!
 Quid laudare sacris usque pia juvat
 Vatem numina cantibus?
 Lesboumque agili tangere barbiton
 Plestro? ah carmina, barbitos,
 Surdorum ah valeant numina caelitus.
 Sed quid irrita fundimus
 Lamenta? immeritos invidia Deos
 Quid pulsamus inutili?
 Omnes una eadem mors manet; ibimus
 Omnes ad tenebras nigri
 Plutonis; sed enim cum semel occidis,
 Non forma, aut decor ingeni,
 Nec te cana Fides eripiet feri
 Ex Orci manibus; pius
 Frustra, parce mihi proficientibus
 Jam, Bocchi, querimoniis.
 Maternas, aliquis si manet Inferis
 Sensus, credibile est tuo
 Ladi umbras gemitu; desine, desine;

Et

Et constanti animo feras ,
Quod mutare nequit dura necessitas .

XLIV.

AD CÆSAREM FLAMINIUM.

NE Midæ ingentes stupeas acervos ,
Cæsar , aut sultam Pariis columnis
Regiam , aut regis nitido micantes
Ære catervas :

Ista sed vulgus feriant inane .

Tu piam mentem superos domumque
Parvulam , & quantum satis est agelli
Fertilis ora .

Ille thesauros Arabum , & superbas
Indiæ gazas habet : has , & illos ,
Mente qui celsa , populique vanos
Spernit honores .

Tu licet regno potiare , dives
Quod tenet Medus , tamen usque servis ,
Imperat donec tibi plus habendi
Dira cupido .

Triste portentum , macieque semper
Lurida pallens ; nihil hac ab Orco
Sævius misit superas ad auras
Ira deorum .

Cautus hanc vita ; fugit hora curis ,
Et simul vitæ positura finem ,
Post rogum distat nihil ipse audo
Croesus ab Iro .

XLV.

GRATULATUR,

ALEXANDRUM FARNESIUM

Gravi morbo liberatum esse .

DA vati citharam , puer ,
Et mecum superis incipe debitas
Cantu solvere gratias ,
Qui nobis juvenem restituunt sacrum .
Jam tristes querimonias
Cessent , jam lacrimis , optima civitas ,
Tandem pone modum piis ;
Jam Di , Roma , tuas audierunt preces .

En

En Farnesius inclytus
 Vivit, nec miseram funere patriam
 Fœdat; dicite, virgines,
 Dis laudes, pueri dicite candidi:
 Ludis, lætitia, jocis,
 Et faustis resonent omnia planfibus.
 Cælo nubila Juppiter
 Pellat. Sol, nitidum jam caput exsere.
 Urna fundere limpidas
 Undas incipiat jam Tyberis pater,
 Et septem geminos tegant
 Montes purpureis lilia cum rosis.
 At tu, Romulæ parens
 Urbis, certa salus, & decus Italæ
 Gentis, maxime PAULLE, jam
 Divis solve bonis vota; nepos valet;
 Invisoque animo feret
 Tecum una imperii pondera maximi;
 Alcides velut impiger
 Fulfit supposito sidera vertice.

XLVI.

AD BACCHUM.

Hanc vitem tibi dedico racemis
 Gravem purpureis, pater Lyæ;
 Pro qua tu mihi vineam tuere
 Non dico a Satyrisve, capreisve,
 Non a grandinis impetu, vel Austri,
 Sed a Pygmalione Formiano,
 Qui sua horribili voratione
 Plus nocere queat duabus horis,
 Quam grando, Satyrique, capreæque,
 Et venti rabies duobus annis.

XLVII.

JOCATUR IN PYGMALIONEM

FORMIANUM.

Si villam mihi læserit pusillam
 Pagus, surripiens favos, merumve,
 Aut pernas, oleumve, fistilefve
 Urnas, haud equidem deos rogabo,
 Furum ut grandine rura verberentur,
 Dum fruges gravidis tument aristis,

Nec

Nec lupi ut rapiant oves, sed unum hoc
Vindicem scelerum Jovem precabor,
Ut cum ducere coeperit colorem
Uva livida, mittat horum in agros
Dirum Pygmaliona, vinearum
Pestem, & Tartareo cane, & Charybdis
Hiatu horribili voraciorem.

XLVIII.

AD VICINOS.

Vicini, moneo, procul fugate
Istum Pygmaliona, vinearum
Diram perniciem; canum frequentes
Adsint excubiæ: diem, atque noctem
Sagittæ, & lapides minentur; & cum
Isthæc omnia feceritis, ipse
Vias inveniet tamen vorandi.

XLIX.

VINEA.

Illa ego innumeris onusta nuper
Racemis, decus inclytum coloni,
Omnes vinea vineas propinquas
Vincens fertilitate, nunc nec unum
Quidem servo acinum misella, quæris,
Unde hæc perniciēs mihi, viator?
Venit Pygmalion silente nocte,
Et una minus hic moratus hora
Me, quis crederet? integram voravit.

L.

VINITORES.

Prætor optime, vineas tueri
Ab hoc Pygmalione jam nequimus,
Quo vorat magis, in dies, & horas
Augescit magis & magis vorandi
Libido furiosa, nec Charybdis
Hujus viscera quidquid est ubique
Uvarum saturare possit; ergo
Rogamus miseri coloni, ut ista
Tempesta, barathrumque vinearum
Pellatur procul hinc malas in oras,
Fræcast. Carm. G

Dum

Dum vindemia pendet : aut bibemus
Lympham pro mero , & omnium labores
Obscœna ingluvie unius peribunt .

L I.

A D P Y G M A L I O N E M .

CEdat , Pygmalion , tibi Celœno ,
Harpyæque aliæ malæ , & rapaces ,
Cedat horribilis Chimæra ; cedat
Et Scyllæ rabies tremenda ; & illa
Cedat insatiabilis vorago ,
Quam Graji veteres vocant Charybdim :
Cedat tergeminus canis , laborque
Cedat Herculis Hydra ; vincit omnes
Tua insignis edacitas ; nec illam
Jam queat saturare vinearum
Quidquid maximo in orbe Sol tuetur .

L I I.

A D E U M D E M .

UVÆ perniciēs nefanda , si quam
Pro tua ingluvie fera , & tremenda
Pœna iudicio meo mereris ,
Hanc ius exigat : optimas ad uvas
Relegere , manus , pedesque vinctus :
Et semper capiti tuo imminentes
Racemos habeas eosque numquam
Kossis tangere . Non mehercule orbis
Rotæ Ixionæ , vel unda fallens
Parentem Pelopis , vel omne in ævum
Renascentis Tityi jecur , vel ingens
Saxum Sisyphi , & omnium impiorum
Pœnæ omnes simul huic tuo , misello ,
Queant supplicio pares vocari .

L I I I.

A D B A C C H U M .

TU , qui centimanum potes gigantem
Cælo trudere , Pentheumque regem
Leto mittis & impium Lyncæum ;
Et Gangem superas , & ultimum Indum ,
Invisitissime Bacche ; non furentem

Istum Pygmaliona jam coerces ?
 Qui fera ingluvie incitatus omnes
 Vineas vorat , & tuum liquorem ,
 Qui servandus erat cadis in annos
 Plures , mittere ventris in cloacam
 Totum pergit , & annuos labores
 Absumit male pauculis diebus .
 O monstrum horribile ultimas in oras
 Pellendum , aut magis Inferos ad imos !

L I V.

A D E U M D E M .

Quod nostras , bone , vineas , Lyæ ,
 Servasti incolumes , & integellas
 Dico Pygmalione ceterorum
 Vineta ingluvie fera , & nefanda
 Vastante , hoc tibi ponimus facellum ;
 Quod pro tempore sit quidem pusillum
 Acerna ex trabe , sed tamen venustum est ,
 At si sustuleris serum , & tremendum
 Hoc monstrum , pópulus tibi merenti
 Ædem marmoream , pater , sacrabit .

L V.

DE HORTIS BLOSI PALLADII .

BLOSI villula ter quaterque felix ,
 Felicissimi hortuli poetæ
 Venuisti , teneri mei sodalis ,
 Quo vivente , sales , joci , lepores
 Vivent : ac pereunte , disperibunt :
 Ille molliculam suam Turundam
 Vos docet resonare , vos jocosos
 Ludentem hendecasyllabis odoro
 Fovetis gremio : relicta Apollo
 Cirrha , Pieridesque vos frequentant ,
 Ex quo deliciae suæ , suique
 Amores Blosius vireta vestra
 Cirrhæ prætulit , Aonique monti .
 Quid mirum , bona rura , si feratis
 Dulci nectare poma dulciora ?
 Has dulcissimus omnium poeta
 Plantulas manibus suis feraces
 Sevit , inserit , & colit , suoque
 Musæo assidue rigat lepore .

Hoc perfusa lepore tam venustos
 Flores, tam varios benigna tellus
 Passim fundit humo: hoc lepore eodem
 Fontes luciduli, antra opaca, amœnum
 Nemus, testaque pulchra condiuntur,
 Ut omnes Veneresque, Gratiæque
 Hortis omnibus, omnibusque villis
 Omnino videamini abstulisse:
 Hortuli nimis, & nimis beati,
 Tuque villula ter quaterque felix.

LVI.

AD BLOSIUM PALLADIUM.

Qualis susurrus arboris, cum florido
 Jam vere ludit aura primis frondibus:
 Vesanientis quale per Caniculæ
 Æstum jacere in discolore gramine,
 Sub umbra amœna, fontis ad lympham sacri;
 Tales mihi, poeta jucundissime,
 Lusus tui, quibus Turundam carmine
 Tam bello, amabili, & faceto concinis;
 Ut illa carior Catulli passere
 Jam sit mihi, siue est quid illo carius.

LVII.

DE TURUNDA BLOSI PALLADII.

Turunda, turdis esca solis cognita,
 Venusta cum te Musa non cognosceret,
 Nunc es lepore versuum dulcissimo
 Condita sic a Bloso nico, ut cibus
 Sis fastæ mensis principum gratissimus.

LVIII.

DE EADEM.

Turunda, turdos sueta edaces pascere,
 Postquam faceti Musa culta Blofii
 Dulcem leporem carminis tibi addidit,
 Non amplius turdos agris, sed urbibus
 Mentis virorum pascis elegantium.

LIX.

TURUNDA.

CUM domos humiles Turunda ruris
 Ignota incolem, dolosque turdis
 Hic parare solem, amore captus
 Mei Blossius, omnium poeta
 Urbanissimus, ad suos penates,
 Et palatia celsa Vaticani
 Montis ducere rusticam, rudemque
 Haudquaquam erubuit, suæque Musæ
 Joci, & numeris, leporibusque
 Condiens, ita amabilem saporem
 Addidit mihi, ut ire non verer
 Ad mensas hominum elegantiorum.
 Quin Farnesius ipse, flos Quiritum,
 Coenas magnificas sua Turunda
 Ornat cotidie. Hæc ego ipsa mecum
 Non semel reputans, satis superque
 Fortunata mihi videbar esse,
 Ut quod præterea Deos rogarem,
 In mentem hercule nil venire posset.
 At nunc maximus ille rex Olympi,
 Qui terras tonitru quatit sonoro,
 Misit alipedem Deum venusta
 Forma, pileolo comas tegentem
 Flavas, anguibus implicata virga
 Cui gestamen erat manus decoræ;
 Ardebant oculi, & genas rubentes
 Pingebat niveus color, novoque
 Malas flore juvena vestiebat.
 Is me purpureo ore ter quaterque
 Tentans corripuit, volansque summum
 In cælum ad teneram tulit puellam,
 Pulchram, Juppiter! & decentem, aitque:
 Quam gentes Italæ vocant Turundam
 Servato, soror, usque dum parata
 Jam coena pater accubet: petenti
 Tunc dato hanc; etenim poeta summus,
 Cui nomen Blossio est, eam canendo
 Tantis laudibus extulit, comesse
 Ut ipsam cupiat pater deorum;
 Et quidem meritiissimo, sapore
 Hæc enim ambrosiæ mihi videtur
 Longe suavior, omnibusque rebus
 Mortales quibus, & quibus beati

Pascuntur superi ; hæc locutus ille
 Abit : me nivea puella dextra
 In cella bene olente collocavit ,
 Ubi sunt epulæ deum repositæ .
 Sic ego auspiciis bonis ab agro
 Ad urbem veniens , ab urbe summum
 In cælum penetro , cibus supremo
 Jovi , & cælitibus futura magnis .

L X.

T U R U N D A .

Q uis hoc credat ? ego illa , quam comesse
 Nec dites , neque pauperes solebant ,
 Quæ solis avibus parabar esca ,
 Nunc lautis superum Turunda mensis
 Acceptissima sum ; nec ullus est jam
 Qui non ambrosiæ meum saporem
 Longe præferat ; ore quisque divum
 Me vorat cupido , & canistra plena
 Mensis terque quaterque fert Juventa ;
 Nec tamen satis est . Quid erudito ,
 Dicat forte aliquis , deum palato
 Te gratam facit , o Turunda ? nempe
 Blofi dædala Musa me lepore
 Suo condit ita apte , & eleganter ,
 Ut quo plus edor , hoc magis magisque
 Augescat studiumque , amorque edendi .
 Quod ni cælicolas pudor vetaret ,
 Ab iis manderer usque & usque & usque :
 Junonique , Jovique , ceterisque
 Dis magnis , mediocribus , pusillis
 In manu forem , & ore continenter .

L X I.

T U R U N D A .

Q uam sim cælitibus Turunda grata ,
 Blofi , discite simul , simulque ride .
 Formosus Veneris puer , puerque
 Idem Jovis inclyti minister ,
 Me semper manibus gerunt , vorantque ,
 Seu domi libeat manere , sive
 Per cæli varias vias vagentur .
 Hos quidam e superis senex , opacam
 Qui barbam gerit , intuens ocellis

Obliquis gemit, dolensque dixit :
 Felices pueri, quibus Turundam
 Per annos licet esse continenter,
 Et domi, & platea quoque frequenti;
 Quod idem ut liceat mihi, libenter
 Sim trimus puer. At tibi senectus
 Sit semper viridis, poeta magne,
 Cujus munere præferor beatis
 A dis ambrosiæque, nectarique,
 Seu quid suavius est, magisve dulce.

LXII.

T U R U N D A .

Illa ego, illa Turunda, rusticorum
 Quæ spurca fieri manu solebam,
 Ut turdos caperem, cibus dolosus,
 Nunc domum Jovis incolo supremi,
 Ad cælum hendecasyllabis vocata
 Blosi, candidi, & optimi poetæ.
 Hinc me pulchra Juventa delicatis
 Consectam manibus suis, deorum
 Ad mensam aureolo ferens canistro
 Omnes exhilarat; vorat jocosa
 Ore purpureo Venus Turundam :
 Implet Juppiter os suum Turunda :
 Turundam ambrosiæque, nectarique
 Præfert Mercurius : Deum palato
 Nil est denique gratius Turunda.
 Immo dique, deæque cum Turundæ
 Nil dulcedine posse comparari
 Arbitrantur; & omnium Turunda
 Præstantissima iudicor ciborum.
 At tu, culte poeta, qui facetis
 Tuis versibus evehens ad astra,
 Me misces dapibus deorum, amicos
 Illos experiare semper, & cum
 Terras liqueris, ad tuam Turundam
 Friendam venias, receptus almi
 Jovis concilio, sacraque mensa.

LXIII.

T U R U N D A .

Quod orta in agro, & educata rusticis
 Castis, Quirini moenia, & celsas domos
 G 4 Men-

Mensasque principum virorum maxima
 Cum laude adivi, & inde campos aeris
 Erecta supra, Solis aureum jubar,
 Et clara Lunæ cerno sub me lumina;
 Quod me Juventa pulchra delicatulis
 Formare palmis gaudet, & quod infimis
 Terris cibus volucrum, at alto in æthere
 Cibus deorum nominor gratissimus;
 Quod denique ille rex Olympi maximus,
 Suprema rerum cui potestas omnium?
 Me dulciorem affirmat ipso nectare.
 Tuæ Camœnæ, Blosi, id omne debeo;
 Tuæ Camœnæ, qua nec ulla dulcior,
 Nec ulla cœtu dignior cælestium.

L X I V.

T U R U N D A.

Pater deorum, vosque magni cælitæ,
 Si quid Turundæ vota supplicis valent,
 Si dulce vobis extitit quidquam meum
 Meo poetæ digna, quæso, præmia
 Pro liberalitate vestra solvite.
 Ut ipse dulci dulciorem nectare
 Vobis Turundam reddidit, sic illius
 Vos integratis viribus concedite,
 Forti juventa ut sic senectæ fortior,
 Cunctisque rebus, ut cupit, fluentibus,
 Tantis dies noctesque abundet gaudiis,
 Ut semper ipsi læta portet somnia
 Quies profunda, dulcis, & facillima.
 Tum quos paravit delicatos hortulos,
 Pomona semper incolat, nec arbores
 Æstui sinat, durove lædi frigore,
 Notive flatu, aut verberante grandine.
 Hic uva Cretam vincat; & Phæaciam
 Malus, pyrusque, Mediamque citrinus:
 Hic prata semper floribus lætissima,
 Hic sint Favoni grata semper murmura,
 Semper volucrum silva cantus audiat,
 Nec manet ullo fonte lympa purior,
 Loquaciorve; cumque vis Caniculæ
 Furens hiulcat arva, siccat uberes
 Aquas, abundet hic amœnus fontium
 Liquor, gelu, nivisque vincens frigora.
 Senex facetus, sub virente pampino
 Proiectus alta in herba ad undas vitreas

Suam Turundam cantet : illum Naides
 Infitato carminis tactæ sono
 Lustrent choræis : ferta canis crinibus
 E fronde myrti nectat alma Cypria .
 Sic ille centum latus annos exigit ,
 Nunc civitatis deserens frequentiam ,
 Nunc infrequentes urbe mutans hortulos .
 At cum peractis cursibus vitæ seni
 Jam fila Parcæ legerint novissima ,
 Illique placida mors ocellos clauferit ,
 Blandi soporis more sensus auferens ,
 Suam Turundam visat alto in æthere
 Poeta cœtu cœlitum dignissimus .

L X V.

AD BLOSIUM PALLADIUM .

Poeta docte , culte , amabilissime ,
 Ipsa Turunda dulcior , quod audeo
 Tuæ Camœnæ candidæ facetias
 Laudare turpi & infaceto carmine ,
 Ecquid perinde ineptio , ac si condiam
 Absinthio mel ? aut lutosâ dextera
 Velim polire virginem pulcherrimam ?
 Sed contra habeto sic , & animum advertito ;
 Ut pulchra turpi comparata pulchrior
 Puella sit , sic & Poetæ non bono
 Bonus poeta copulatus , optimi
 Nomen lucratur ; ipse , qui jure optimo
 Poeta passim nominaris optimus ,
 Quid ergo non lucraberis , si plumbeas
 Nugas meas , tuosque versus aureos
 Uno atque eodem junxeris volumine ?
 Sed serio tandem ut loquar , quæ carmina
 Scripsi jocando de Turunda , hæc nemini ,
 Si quid tuum sodalem amas , ostenderis ;
 Nam tecum ineptus esse , & insulsiſſimus
 Impune possum , ceteris sim fabula .

M. A N T O N I I
F L A M I N I I
C A R M I N U M

LIBER SECUNDUS.

AD STEPHANUM SAULIUM.

I.

PONE metum, Sauli, longas jam pone querelas;
 Flaminius valet, ac lætus tibi carmina dicat.
 Scilicet ut Romæ corruptas fugimus auras,
 Et riguos patriæ montes, saltusque salubres
 Venimus, effoetos venit quoque robur in artus.
 Diffugit macies, diffugit corpore pallor,
 Et somnus vigiles irrepsit blandus ocellos;
 Quem neque defiliens crepitanti rivulus unda,
 Nec Letheæ mihi duxere papavera quondam.
 Jam valeat Romana meo cum Principe tellus,
 Certum est, in patriis ævum consumere silvis.
 Si lætus pomis, & vili pascor oliva,
 Et juvat angusto vitam traducere tecto
 Ignotum, duplici pellentem frigora panno,
 Quid Regum turres, ac limina magna potentum
 Persequor, & dulcem dimitto stultus agellum?
 At tu, quem virtus, generis quem antiqua superbi
 Ad summos jam nobilitas tollebat honores,
 Vitasti sapiens urbana negotia: nunc te
 Lauricomas inter silvas, citriosque nitentes
 Musarum placidæ traducunt otia vitæ.
 Tu gelidam stratus formosi fontis ad undam,
 Qua leviter cultis immurmurat aura viretis,
 Occultas rerum causas, cælique meatus,
 Quid deceat, quæ sint fugienda, sequendave, tractas.
 Tum magni eloquium Tulli, numerosque secutus,
 Condīs perpetuis mansura volumina chartis.
 Nec tamen irriguos hortos ornare colendo,
 Nec citrium ferere, aut buxum tondere comantem
 Negligis, aut sedes apibus aptare quietas;
 Dulcia divini decerpens gaudia ruris.
 Te, juvenis venerande, sequar; quantumque benigni
 Di dederint vitæ, contentus paupere tecto
 Jam vivam mihi secretis inglorius arvis.

II. IAN.

II.

I A N T H I S.

Venisti tandem, tandem mea sola voluptas,
 Venisti, & lucem miseræ vitamque tulisti.
 Quantum vere novo gaudet lasciva capella,
 Æstivis quantum sitientes imbribus horti,
 Tantum, Mopse, tuo reditu lætatur Ianthis.
 Te sine, cære puer, leto mihi tristior ipso
 Vita fuit, tardoque dies mihi tardior anno.
 Seu tenebras Vesper, seu lucem ferret Eous,
 Me sentem Vesper, sentem cernebat Eous.
 Lugebant silvæ, lugebant mollia prata,
 Formosæque suos amiserat horti honores;
 Et desiderio domini pecus omne peribat.
 Dulcia nunc tecum redierunt gaudia cunctis.
 Aspice, te læta pinus complectitur umbra;
 Arguto properans te murmure lympa salutat,
 Albaque purpureum tibi ducunt poma colorem;
 Ipsa ego nunc dulci saturabo lumina vultu:
 Discedet macies, discedet corpore pallor,
 Et tecum longos peragam feliciter annos.
 Seu teneras solito pasces in monte capellas,
 Sen patrios fines linques, & pabula nota,
 Quidquid ages, formosæ puer, tua cara puella
 Tecum semper erit, terras comes ibit in omnes.
 Jam didici, quid sit juvenem expectare morantem;
 Expectans una vel nocte puella senescit.

III.

AD NYMPHAS DE FONTE PHILALETIS.

Najades pulchræ, pulchris e fontibus ortæ,
 Hanc lympham vobis Philaletes dedicat; illa
 Nec fons frigidior quisquam, nec purior: at vos
 Arenti vestram lympham defendite ab æstu,
 Neu sitiant myrti, neu desit floribus humor;
 Et domino ruris viridem servate senectam.

I V.

AD ALEXANDRUM FARNESIIUM

CARDINALEM.

Farnesi, vatuni decus, & spes unica, nostri
 Solus principium, & finis tu carminis esto:
 Utque optata mihi dexter facis otia, sic te
 Mansuro liceat cantu celebrare, meisque
 Florcat æternum tua virtus inclyta chartis;
 Quod spondent Musæ, & vultus mihi semper Apollo.
 Nam qui nec vates, nec dulcia carmina curat,
 Ille licet gazas Arabum, Cræsiæque talenta
 Congerat, & prisco sit regum a sanguine cretus,
 Attigit infelix ubi metam ignobilis avi,
 Despectum jacet in tenebris sine nomine corpus,
 Villicus occulto moriens ut pauper agello.
 Quæque pio vati prudens si dona dedisset,
 Viveret exequiis invita morte superstes:
 Illa meretrici dabit hæres. O male sani,
 Discite, divitiis uti sapienter. Avâris
 Obruit hic aurum terris, cæcoque furore
 In mediis opibus vivit rerum omnium egenus:
 Alter avaritiam sæva plus morte perosus,
 Rem patriam stulte vetitos effundit in usus,
 Ingentemque auri scurræ populantur acervum.
 At sapiens recte dispensat dona deorum;
 Dat partem patriæ; reficit labentia templa;
 Et Musas fovet, & sacros ante omnia vates.
 Ergo illum dulci tollunt super æthera cantu,
 Mortalemque vetant invisæ occumbere morti.
 Sic Mœcenatis quo Tuscia gaudet alumno,
 Usque seret nomen diversas fama per oras,
 Dum rapidus circum terras volvitur Olympus.
 Ille quidem magnis reges æquaverat auro,
 Cumque ipso curas partiri & gaudia fuerat
 Augustus Cæsar, rerum cui prima potestas.
 Sed nihil Augustus, nil pondera divitis auri
 Profuerunt, vitæ legeret cum fila suprema
 Parcarum manus; obscura caligine lecti
 Conditus inferna semper latuisset in umbra,
 Ni miserata virum divini Musa Maronis,
 Ipsi ad clarum famam evexisset Olympum.
 Scilicet ingeniis varia est vis insita; rerum
 Invigilant alii causas aperire latentes;
 Et convexa poli penetrant, manesque sub imos.

Hic

Hic jura imperiis describit : at ille rotundo
 Attentum ore tenet populum magnumque senatum .
 At si quem placidis nascentem vidit ocellis
 Castalii regina chori , & formosus Apollo ,
 Ille urbis strepitum fugit ; & viridantia silvis
 Rura colens , gaudet longos extendere in annos
 Magnanimum heroum divino carmine laudes .
 Ergo age virtutem , juvenum flos candide , solam
 Mirare , & doctos tua semper cura poetas
 Ornet alatque ; tuum ut vivat per sæcula nomen .

V.

DE SE ÆGROTANTE.

ERgo adeo cœptum peraget Mors impia cursum ,
 Ut post everſæ triſtia fata domus ,
 Me quoque ſurripiat primo vix flore juventæ ?
 Et noſtra exiguis jam tegat oſſa lapis ?
 Di , quorum auſpicio communes hauſimus auras
 Parcite nunc vitæ rumpere fila meæ :
 Parcite , ſi veſtros ſuſpexi ſemper honores ,
 Si nullo infecta eſt candida mens ſcelere .
 Non prius ac cæli curſum conſecit , Ibero
 Tingit anhelantes gurgite Phœbus equos :
 At nunc perpetuam nobis Mors pallida noſſem
 Portat , & Infernos cogit adire lacus .
 Et nondum eſt rugis facies mihi languida , nec dum
 Infectis nigras alba ſeneſta comas .
 Sic roſa vix lætum calathi pandebat honorem ,
 Cum cadit , & rutilo murice pingit humum .
 Jane pater , noſtræ quondam ſpes una juventæ ,
 Jam condes manibus lumina noſtra tuis .
 Jam me poſtremo tumuli donabis honore ;
 Et cupies tantis non ſuperſeſſe malis .
 Aſt ego ſecura nequidquam mente parabam
 Grandia mox Umbri dicere facta Ducis .
 Ut validas olim bello devicerit urbes ;
 Quem tremuit viſtis pulcher Iſaurus aquis :
 Ut nunc indomitos certet contundere Iberos ,
 Italiæque gravi ſolvere colla jugo .
 Hæc heu Perſephone , ſupremi nuntia luſtus ,
 Vota dedit levibus diripienda Notis .
 Sæpe ſalutifero morbum depellere ſucco
 Tentavi : at nulla ceſſerat arte dolor .
 Sæpe Deum ſupplex clamavi numina : ſed non
 Auderunt noſtras numina ſurda preces .
 Quod ſi tanta ſitis , noſtræ ſi tanta cupido eſt
 Mor-

Mortis, & effugii spes mihi nulla manet
 Ah liceat saltem Elyfios invifere campos,
 Et fortunatæ regna beata plagæ;
 Hic ubi cum molli Nemefis formofa Tibullo
 Ludit; & eft vati Lesbia juncta fuo.
 Et mihi, qualis erit teneris comitata puellis,
 Occurret celeri candida Lygda pede:
 Et dulces dabit amplexus, & bafia junget,
 Junget & optati gaudia conjugii.

V I.

DE HERCULE, ET HYL A.

Quid mirare, tuo fi regnat corde Lycinna,
 Nec ceffat tantis te cruciare malis?
 Crede mihi, non folus amas; Veneris puer omnium
 Eft divam, atque hominum maxima perniciēs.
 Audiſti ne, humeris cælum qui fuſtulit altis,
 Auſus & inferni regna ſubire Dei?
 Ille idem tanto puerum dilexit amore,
 Ut, ſeu nox alto ſurgeret Oceano,
 Seu roſeo terras veſtiret lumine Titan,
 Hercule cum magno candidus eſſet Hylas.
 Nulla dies miſerum puero ſine vidit amantem,
 Nec cum tergemini corpora Geryonis
 Sterneret, atque alios invictus mille labores
 Imperio duri ſuſciperet domini.
 Quin etiam Colchos peteret cum pulcher, Iafon,
 Amphytrioniadæ tunc comes ibat Hylas,
 Ibat Hylas, clavamque gerens, Lybicamque pharetram,
 Qualis cum molli parthenice pluvia
 Stat gravis, ac Phœbi radiis aſperſa nitentem
 Dat lucem, Paphiæ rarus honos Veneris.
 Et jam Pleiades cælo caput attollentes
 Linquebant ſacras Nereidum choreas,
 Cum Pagasæ curvis e littoribus digreſſi
 Currebant celeri per vada ſalta rate;
 Quos comitabantur cinctæ fulgentibus armis
 Pallas, & ipſa potens cælicolũ domina.
 Jamque volans undis Nerei mirantibus, Argo
 Myſorum clariſ urbibus appulerat.
 Hic juvenes piſtis e puppibus egredientes,
 Deponunt altis membra ſub arboribus,
 Et molles ſibi quiſque toros bene olentibus herbis
 Exſtruit: intonſo creverat herba ſolo.
 At formoſus Hylas taciti per devia montis
 Ibat lucidali ſumere ſontis aquam.

Fons

Fons erat in silva puris argenteus undis ,
 Quem bicolore tegit populus alta coma .
 Ac circum Paphiæ densant umbracula myrtus ,
 Et parit assiduas aura benigna rosas ,
 Narcissumque , crocumque , immortalemque ama-
 rantum ,
 Et te flebilibus scriptum , hyacinthe , notis .
 In medio faciles nudato corpore Nymphæ
 Ludebant sparsis per rosea ora comis ;
 Quæ puerum cupido miratæ lumine cum vix
 Illius molles tingeret unda pedes ,
 Arreptum subito vitreum traxere sub amnem ;
 Ut quondam veris tempore purpurei
 Stella volans , cælo noctis delapsa per umbram
 Emicat , inque alto conditur Oceano .
 Tunc latus clamat summa de puppe magister ,
 Candida felici pandite vela Noto ,
 Pandite ; nam cælo superi bona signa dedere .
 Sic ait , & placidis per mare fertur aquis .
 At miser Alcides casu perculsus acerbo
 Amissum toto littore clamat Hylam ;
 Littore Hylam , furibundus Hylam per devia quærit ,
 Qualis turicremas parva juvenca deum
 Concidit ante aras : sed fati nescia mater
 Non jam frondifero pascitur in nemore ;
 Nec dulcem puri libavit fluminis undam ,
 Sed fertur celeri per nemora alta pede .
 Omnia mugitu complens , si forte veniret
 Bucula maternis obvia luminibus .
 Sic heros , Hyla ingeminans , Hyla omnia replens
 Errabat dubio per loca sola pede .
 Quantas ille fero profundit corde querelas !
 Pallenti quantas ore dedit lacrimas !
 Cum sæpe optaret scopulo se mittere ab alto ,
 Aut vitam rapidis ponere fluminibus .
 Interea curvo solvens de littore funem ,
 Colchorum fines iverat Æsonides ;
 Quem desiderio pueri confectus inani
 Mox sequitur lacrimans Amphytrioniades .
 Hos tu sollicitos heroum doctus amores ,
 Disce libens duræ ferre jugum dominæ ;
 Nec te jam pigeat quemvis perferre laborem .
 Omnis amor longo vincitur obsequio .

VII.

DE SE PROFICISCENTE NEAPOLIM.

PAUSILYPI colles, & candida Mergillina,
 Et myrteta sacris confita littoribus,
 Si mihi post tantos terræque marisque labores
 Contigerit vestræ limina adire DEÆ;
 Limina, quæ vates specula fundavit in alta
 Aëlius, Eois clarus & Hesperii;
 His ego pileolum figam, & calcaria, & ensen,
 Et quæcumque vagus arma viator habet.
 Nec mihi jam quisquam vel prudentissimus ullas
 Aut pelagi, aut terræ suaserit ire vias;
 Non mihi Persarum si detur regia gaza;
 Non mihi si rubri serviat unda maris.
 Quis furor est, nullis umquam requiescere terris,
 Atque alia ex aliis semper adire loca?
 Nec vitare graves æstus, nec frigora sæva,
 Nec timuisse vagæ mille pericla viæ?
 Felix, qui parvo contentus vivit agello,
 Nec linquit patriæ dulcia testæ domus.
 Quem versare juvat fœcunda ligonibus arva,
 Et nitidam vitis fingere falce comam,
 Aut gelidam summo lympham deducere clivo,
 Aëstibus ut mediis arida prata bibant.
 Aut tondere gregem lucenti vellere amictum,
 Et tonsam liquidis mergere fluminibus.
 Hic laribus certis, certisque sodalibus utens
 Magnorum vita cœlicolum potitur.
 Nec violentus eum crudeli vulnere latro,
 Nec fera cæruleo perdidit unda mari.
 Ille suis moriens suprema dat oscula natis
 Deficiens casto conjugis in gremio.
 Illa viri fugientem animam dulci excipit ore,
 Et claudit tenera lumina clara manu:
 Dehinc tumulum viridi componit margine fontis,
 Qua vetus arboreis decidit umbra comis.
 Huc madefacta piis lacrimis fert liba quotannis
 Cum pueris veniens mœsta puella suis:
 Et magna manes compellat voce mariti,
 Spargens fistilibus lac niveum calathis:
 Nec potis est dulci tumulto se avellere, donec
 Hesperus invitam cogit abire domum.
 O fortunati cineres, umbræque beatæ,
 Morte obita si quem talia fata manent!
 At me, dum terras, & vasta per æquora carro,
 Si vocet in Stygiam pallidus Orcus aquam,

Quis

Quis tumulum faciet? tumulo quis tristitia libans
 Dona, peregrinas flebit ad inferias?
 Jam valeant Alpes, & nimbifer Apenninus,
 Tuque maris nostri littus utrumque vale.
 Me juvat umbrosis vitam nunc degere in hortis,
 Et Phœbo, & musis otia digna sequi.
 Tum rerum causas, eventaque dicere: qua sint
 Lege colenda homini numina sancta Deum a
 Qui deceant mores, faciat quæ vita beatum:
 Quid verum falsis distet imaginibus.
 In primis celebrare Patrem fidibus juvat, a quo
 Ex nihilo Vates omnia facta canunt,
 Cœlicolæ quem Tergeminum venerantur & Unum;
 Qui mare, qui terras, qui supera alta regit.
 O utinam ille suo me sistat numine sancto
 Ad fortunati littora Pausilypi!
 Littora divino quondam celebrata Maroni,
 Et patrio Minci flumine cara magis,
 Littora, quæ toties viderunt Calliopeam
 Distantem vati carmina docta suo.
 Sirenes illis stupuerunt versibus: illis
 Carminibus omnis Neræis obstupuit.
 Ipse pater Tegeæus amœna vireta Lycæi
 Linqens insolitis cantibus intererat:
 Quem comitabantur silvarum numina Fauni,
 Et Nonacrinæ maxima turba deæ.
 Ille coronatus viridanti tempora myrto
 Dicebat laudes, candide Daphni, tuas;
 Et quæ Mænalius dulci cantarat avena,
 Dum pascit niveas Alpheisbœus oves.
 Tum miseros Galli consolabatur amores,
 Duritiam incusans, pulchra Lycori, tuam.
 Hinc lætas segetes, & Bacchi dona canebat,
 Et pecus, & liquidis dulcia mella favis.
 Mox se se attollens, numero graviore sonabat,
 Trojani referens horrida bella dncis;
 Erroresque vagos, & diruta Pergama flammis,
 Visaque Tartarei pallida regna Dei;
 Tum patri celebrata prius certamina, pene
 Femina cum Phrygias perdidit una rates.
 In primis fatum miseræ deslebat Elisæ,
 Quam tulit heu diro vulnere sævus amor.
 Nescite ratem, Ænea, properas quid funus amanti?
 Per Veneris quæso numina siste ratem.
 Quod si forte tuæ mors est tibi cara puellæ,
 Ah saltem in gremio concidat illa tuo.
 Vos, o cœruleæ formosa Doride natæ,
 Vos dominam ad littus, quæso, referte meum.

Sic vestro nulli veniant in amore dolores :
 Sic vobis semper mutuus adsit amor .
 Ille canit : celfo properant de vertice lauri ,
 Et prata omnigeno flore colorat humus .
 Tu ne sacrum felix aluisti terra Maronem ?
 Tu ne pio celas ossa beata sinu ?
 Anne etiam , ut fama est , Vatis placidissima saepe
 Inter odoratum cernitur umbra nemus ?
 Felices oculi , fortunatissima silva ,
 Et quidquid sancto nascitur in nemore !
 Cui non sit dulci patria tua dulcior ora ?
 Quis non te lucis præferat Elysiis ?
 Jam mihi Renaci lætissima littora sordent ,
 Jam formosus aquis Mefulus irriguis .
 Me tibi , terra beata , dico ; tu meta laborum ,
 Jamque senescentis grata quies animi .
 Tu , dum fata sinunt , lucemque , auramque ministra ;
 Tu , præcor , extincti corporis ossa tege .

VIII.

DE ALEXANDRO FARNESIO CARDINALI.

DUM puer acrias superat Farnesius Alpes ,
 Et permutato currit anhelus equo ,
 Illius crines flavos , corpusque decorum
 Ambrosiæ liquido sparsit odore Venus ;
 Ne teneros pueri Sol igneus ureret artus ,
 Frangeret aut nimius mollia membra labor .
 Tum mirans ait , O divum pulcherrima cura ,
 Progenies claris edita semideis ,
 Tu ne per alpinas cautes , & inhospita saxa
 Tam tener admissio currere pergis equo ?
 Et rapido cursu noctemque diemque fatigas ?
 Ut natus Maja pulcher Atlantiades ,
 Cum celeres patris desert mandata per auras ,
 Et pennis terras transvolat , & maria .
 Macte puer virtute , puer dignissime caelo ,
 Cæsaris ad magni colloquium propera ;
 Ut tua miretur jam dicta , animumque virilem
 Romani custos maximus imperii .
 Et te jam primis venerari discat in annis
 Paullatim , donec fulserit illa dies ,
 Cum genibus minor ipse tuis , spectante senatu ,
 Procumbet sanctis oscula dans pedibus .
 Nam simul aucta suum ver dulce peregerit ætas ,
 Et te maturum fecerit illa virum ,
 Auspicio divum regno præfectus avito

Aurea Romanis tempora restitues.
 Fortunate puer ! per te felicia deget
 Otia pacatis hostibus Italia.
 Illa tibi centum ponet de marmore templa,
 Illa tibi supplex annua sacra feret.
 Hæc Venus, & puerum divinum amplexa recessit :
 Ille deæ lætus munere currit iter.

I X.

AD ANTONIUM GIBERTUM.

Doste puer, magni pulcherrima cura Giberti,
 Progenies filvis edita Pieriis,
 Te dulces oras in luminis egredientem
 Excepit tenero Calliopea sinu :
 Et capiti imposita lauri de fronde corona,
 Formosa Aoniis ora rigavit aquis.
 Cui puero favet illa, is firma ætate poetas
 Antiquos doctis versibus æquiparat :
 Ipsum admirantur populi ; juvenesque, senesque
 Attoniti pendent vatis ab ore sacro.
 Seu vexat miseras discordia flebilis urbes,
 Ille suis mulcet pectora carminibus.
 Seu gravis ira deum morbos exasperat, iras
 Condonant vati numina magna pio.
 Sic divos cithara placabat Thracius Orpheus,
 Sic hominum cultus molliit ille feros.
 Fortunate puer ! tanto dignatus honore,
 Despicio quidquid mobile vulgus amat.
 Est patruus tibi præstanti virtute Gibertus,
 Quem tellus magnæ suspicit Hesperis.
 Hoc duce relligio multos neglecta per annos
 Jam rediit : pulsa est vana superstitio.
 Ipfius pare sanctis hortatibus : ipsum,
 Care puer, magni numinis instar habe.
 Hoc duce Sirenum cantus, & pocula Circes,
 Et Veneris sævas effuge blanditias.
 Qui sequitur Venerem, fugit illum candida Musa,
 Ah miser ille puer, quem dea docta fugit !
 Blanda Venus pueros nigrum deducit ad Orcum
 Infidians ; cælo candida Musa beat.
 Incautas juvenum mentes in monstra ferarum
 Verrebat Solis filia blanditiis.
 Blanditiis captus, qui dextra vicerat Hydram,
 Hac eadem nevit Lydia pensa manu.
 Alcide infelix, ubi sunt Erymanthia monstra,
 Visæque tergemini corpora Geryonis ?

Et

Et tremefacta tua pallentia Tartara clava,
 Fultaque cum magnis sidera numinibus?
 Alcide infelix, tantis de laudibus istis,
 O pudor! exuvias una puella capit.
 Nos vero capiant Musarum gaudia sancta,
 Gaudia dis etiam cognita cælitibus:
 Quos teneræ muleent jucunda voce sorores,
 Et citharæ cantus suavis Apollinæ,
 Cum pater auratis celebrat convivia testis,
 Et dapibus mensas pulchra Juventa onerat.
 At puer Idæus niveo fuccinctus amictu
 Miscet supremo dulcia vina Jovi.
 Hunc puerum virtus tanto præfecit honori:
 Huic puerq̃ pietas munera tanta dedit.
 Ille colens centum salientem fontibus Idam,
 Sive vagas arcu sollicitaret aves,
 Sive sub umbrosa captaret frigora quercu,
 Qua fugiens liquido murmurat unda pede;
 Pieridas, Phœbumque patrem, divosque canebat,
 Qui virides silvas, qui supera alta tenent.
 Dum canit, inclusum fulvis Jovis armiger alis
 In sedes illum transtulit ætherias,
 Felices superum sedes, quas candida vestit
 Purpureo semper lumine Lætitia.
 Tu quoque Musarum veneratus numina, dignum
 Cælesti puero te, bone, sorge, puer.

X.

DE DONO BENEDICTI ACCOLTI CARD.

Hanc pateram Chio spumantem, auroque nitentem
 Accoltus vati donat habere suo.
 Ipse meri partem libo tibi, candide Liber:
 Et partem libo, pulcher Apollo, tibi.
 Vos pateram contra Musarum nestare dulci
 Implete, & large proluite ora mihi,
 Accolto dignas ut solvam carmine grates,
 Carmine, quod possit nulla abolere dies.

XI.

DE FAMA IDMONIS PERICLITANTE.

Intemerata Fides, sancti germana Pudoris,
 Tuque Honor, & nudæ simplicitatis Amor,
 Si teneris Idmon coluit vos semper ab annis,
 Et mens a turpi crimine pura nitet;

Vos

Vos juvenis famam præfenti arcete periclo,
Et facite illa magis splendeat atque magis.

XII.

DE LEUCIPPE.

Candida Leucippe, gratissimus ardor amantum,
Mille sibi matres quam cupiere nurum,
Se, dea Clara, tuis secretis sedibus addit,
Seque tibi famulam tempus in omne dicat;
Pro crinali auro, tenui circumdata velo,
Flaventesque sacra forcipe tonsa comas,
Ut quæ non casto mortales uffit amore,
Nunc casto sanctos urat amore Deos.

XIII.

DE FONTE RODULPHI PII CARDINALIS.

Deliciæ ruris fons formosissime, tuque
Spelunca irriguis frigida pumicibus,
Qui vos egregia magnus Pius arte creavit,
Hanc vobis eadem condidit arte domum.
Vos lenite æstum curarum, fessus ab urbe
In vestrum quoties fugerit ille sinum.

XIV.

DE HIERONYMO SAVONAROLA.

DUM fera flamma tuos, Hieronyme, pascitur artus,
Religio sanctas dilaniata comas
Flevit, & O, dixit, crudeles parcite flammæ.
Parcite; sunt isto viscera nostra roga.

XV.

AD STEPHANUM SAULIUM.

NE tibi sim carus, Sauli carissime, ni te
Plus amo, quam natum mater amare solet.
Et merito; quis enim te dignior alter amari?
Aut quid amore tuo dulcius esse potest?
Quærat opes alius, magnos sibi quærat honores:
Tecum dulce mihi vivere, dulce mori.

XXVI.

DE BALTHASSARE CASTILIONO .

SI truculenta ferox irrumpis in agmina , Marte
 Diceris invicto , Castilione , fatus :
 At molli cithara si condis amabile carmen ,
 Castalia natus diceris esse dea .

XXVII.

D E E O D E M .

Horrida terribilis cum tractas arma , Maronis ,
 Castilione , tui carmine digna facis :
 Idem cum molli vacuus requiescis in umbra
 Castaliæ , æterno digna Marone canis .

XXVIII.

D E J O A N N E C O T T A .

SI fas cuique sui sensus expromere cordis ,
 Hoc equidem dicam pace , Catulle , tua :
 Est tua Musa quidem dulcissima , Musa videtur
 Ipsa tamen Cotta dulcior esse mihi .

XXIX.

AD ACHILLEM PHILEROTEM BOCCHIUM .

ACHILLE , pater elegantiarum ,
 Si Marcum tibi vis suos ocellos ,
 Seu quid carius est suis ocellis ,
 Debere , ut decet optimum sodalem ,
 Noli subripere , obsecro , quod illi
 Multo carius est suis ocellis .
 Sed quid carius est suis ocellis ?

XXX.

A D P H Œ B U M,

Ut nos de Peste liberet.

EX CODICE MS.

GABRIELIS FLAMINII,

M. Ant. Fratris Filii.

Hunc tibi, Phœbe pater, lunata fronte juvenum,
 Tybris, qua undoso largius amne fluit,
 Alcimedon iactata alte post terga securi
 Mactat, & in sacros porrigit extra focos.
 Tu si lævitum est satis, & si cædis abunde est,
 Poenarum exsolvit si tibi Roma satis,
 Illuvium hanc expelle, inimicaque tela reconde,
 Et melius Turcas mitte perire feros,
 Qui cinxisse Rhodum perstant nunc fortibus armis
 Dilectam, & cives perdere classe tuos.

XXXI.

AD BEATRICEM DE COMA ABSCISSA.

Ex Codice Ms. Gabrielis Flaminii Forocorneliensis,

M. Antonii Flaminii Fratris Filii.

Quid fles abscissi toties dispendia crinis,
 Qui tibi mox circum largius ora fluat?
 Ista iterum fufos argentea colla capillos
 Accipient: reduces nec mora longa dabit.
 Interea nitidos fletu corrumpere ocellos
 Define: & aureolis, lux mea, parce genis.
 Non deerunt laquei, miseros queis perdere amantes
 Possis, & evinctos in tua jura trahas,
 Tu male nota tibi sic es fortasse, Beatrix,
 Crinibus ut tantum posse placere putes?
 Semper erit nostris cur sis prælata puellis;
 Mille adsunt causæ, mille decenter erunt.
 Ipse aderam, exuvias capitis cum stringeret ægre
 Dira manus, ferro demeteretque comam.
 Aura cæsaries terram spargebat, & ille
 Qui poterat phœbum sæpe decere nitor.

Prædix. Carm.

H

Dice.

Dicebam mecum , Tali se Juppiter imbre
 Opratum Danaes contulit in gremium .
 Tum cordis subiit , fulvo quod vertice captum
 Sævus amor densis crinibus implicuit .
 Accessi quasitum amens si forte rediret ,
 Acrius at miserum vincierant oculi .
 Cum tibi non desint tot retia , culta Beatrix ,
 Invidiam superis parce movere Deis .
 Et mecum abreptos potius tu collige crines ,
 Vernabant capiti qui modo , pulchra , tuo .
 Et venerare Deum , medicæ qui præsidet arti ,
 Castaque cum multa carmina funde prece .
 Primitiasque offer capitis : dabit ille fluentes ,
 Illudant quæ humeris , involitentque , comas .
 Ergo iterum Zephyro spargent radiantia fila ;
 Aptæ novum Solis vincere fila jubar ,
 Atque iterum accensis flavescent crinibus æquor ,
 Et capiti raptæ restituentur opes .
 Sic offensa stupet frondator vimina silvis
 Tam cito florentes explicuisse comas .
 Sufficiunt sic prata novos in ferta colores ,
 Vidimus hiberna quæ violata nive .
 Tunc lævi molles quærens in fronte capillos ,
 Vix cupies tantis non caruisse malis .
 O tibi tum quales vario de flore corollæ
 Ornabunt postes , Phœbe superbo , tuos !
 Ipse ego votivam feriam de more juvencam ,
 Et spargam viola versicolore solum :
 Atque addam incisam multo mox carmine laurum ,
 Obtendat templi quæ tibi sacra fores :
 Formosæ optatos crines quod , Phœbe , puellæ
 Restituis , laurum hanc dedicat illa tibi .
 Nos viridem interea juvet exercere Juventam ,
 Non intellecto dum fugit hora pede .



M. A N T O N I I
F L A M I N I I
C A R M I N U M
L I B E R T E R T I U S .

LUSUS PASTORALES CONTINENS .

I.

PAN pater , & Silvane senex , Faunique bicornes ,
Tuque pharetratae candida turba deæ ,
Si mea vos dulci delectat fistula cantu ,
Si semper vobis annua dona fero ,
Parcite purpureos , quæso , violare racemos ,
Neu turgent avidæ lutea pruna manus .
Hunc agrum dat habere mihi Farnesius heros :
Gratus ego hæc illi munera prima dico .

II.

CUM facies iter hac , Farnesi candide , Iolam
Ne pudeat , quæso , semper adire tuum .
Te vocat arguto viridissima silva susurro ,
Te liquidi fontis garrula lympa vocat ,
Villula pulchra , tui memorabile munus amoris ,
Jamdudum gestit ora videre tua .
Magne puer , ne parva , precor , fuge limina : sæpe
Pastorum subiit Juppiter ipse casus .

III.

HEU quid ago ? moritur mi animus , mellita Ni-
gella ,
Ni tibi quamprimum basium rapio .
At si basium rapio , vereor , tibi mecum
Ne sint æternæ post inimicitiae ,
Quæ me non morti modo dent , sed post quoque mor-
tem
Perpetuo poenis tristibus excrucient .
Sed rapiam ; immo non ; utrum , o anime , efficiam vis ?
Nescio , sed tantum sentio , quod perco .

IV.

INtonsi colles, & densæ in collibus umbræ,
 Et qui vos placida fons rigat ortus aqua,
 Si teneros umquam Fauni celastis amores,
 Si vos Nympharum dulcia furta juvant,
 Esse boni, tutasque mihi præbete latebras,
 Dum sedet in gremio cara Nigella meo.

V.

Fugit hiems, nitidis vestitur frondibus arbor,
 Jamque novos ducit candida Flora choros:
 Et cedit Boreas Zephyri genitalibus auris,
 Et victum pecori sufficit almus ager.
 Nunc, Amarylli, gregem secreta pascere silva,
 Nunc dabitur Veneris dulcia furta sequi.
 Tu venerare deam, fertisque recentibus orna,
 Illius & sanctos, imbuat agna focos,
 Jucundam ut nobis inter nos ducere vitam
 Annuat, & tuto semper amore frui.

VI.

TAM fugat humentes formosus Lucifer umbras,
 Et dulci Auroram voce salutat avis;
 Surge, Amarylli, greges niveos in pascua pelle,
 Frigida dum cano gramina rore madent.
 Ipse meas hodie nemorosa in valle capellas
 Pasco, namque hodie maximus æstus erit.
 Scis ne Menandræi fontem, & vineta Galeæ?
 Et quæ formosus rura Lycambus habet?
 Hos inter colles recubat viridissima silva,
 Quam pulcher liquido Mefulus amne secat.
 Nec gelidi fontes absunt, nec pabula lata,
 Et varios flores aura benigna parit.
 Illic te maneo solus, carissima Nympha:
 Si tibi sum carus, tu quoque sola veni.

VII.

DUM sonat argutis late vicina gryllis,
 Tu, Pholoe, dulci pressa sopore jaces.
 Ipse vago media solus de nocte, tuosque
 Ad caros postes florida ferta fero;
 Quæque teris nuda calcando limina planta
 Osculor, & lacrimis tristibus illa rigo.

Tu,

Tu, precor, aut nostri miserere, aut si tibi tantum
Displiceo, hic animam ponere dura jube.

VIII.

ET tonat, & vento ingenti nemus omne remugit,
Et cadit effusa plurimus imber aqua:
Noxque soporiferis alis circumdata, cæcam
Horrenti latebra nubis opacat humum.
Iple tamen Veneris crudeli compede victus
Ad dominæ cogor pervigilare fores.
Sævit hiems, Auster densissimus aere sævit,
Sed gravius nostro pectore sævit Amor.

IX.

Sic tibi perpetuam donet Venus alma juventam,
Nec faciem nitidam ruga senilis aret,
Post cœnam cum matre tua, dulcique Lycinna
Ad matrem, Phloe cara, venito meam.
Hic simul ad magnum læti vigilabimus ignem:
Candidior pulchra nox erit ista die.
Fabellas vetulæ referent; nos læta canemus
Carmina: castaneas parva Lycinna coquet.
Sic noctem tenerisque jocos, risuque trahemus,
Dum gravet incumbens lumina nostra sopor.

X.

Jam rapidus torret mediis Sol æstibus agros;
Ad vallem niveum duc, Ligurina, gregem:
Hic avium cantus, hic fons nitidissimus antro
Profluit, hic densis quercubus umbra cadit:
Et circum flores examina læta susurrant,
Et Zephyri blando murmurat aura sono.
Hic laudes, formosa, tuas mea fistula dicet:
Tu Dryadum calamo dulcia furta canes.

XI.

Nascitur, & nostro Vesper crudelis amori
Jam caulis saturas ducere mandat oves.
Deliciæ Ligurine meæ, te linquere cogor,
Sed tecum remanet mens, animusque meus.
Quod superest, ubi jam tenebris Aurora fugatis
In silvam croceo mane reducet oves,
Hic illas, mea vita, iterum cogamus in unum,
Hic iterum dulcis me tibi jungat amor.

XII.

ESto magna Ceres, & Pan mihi testis, amantum
 Et quæ firma facit foedera, sancta Venus;
 Nulla dies, Ligurina, tuo me solvet amore,
 Non si me Dryadum sanguinis una petat.
 Ut rupem hanc validis impellunt flatibus Euri,
 Sed nullo rupes verberare pulsa labat,
 Sic semper mea magna fides immota manebit,
 Et mea mens uni serviet usque tibi.
 Dii faciant, in amore pares vivamus, & uno
 Ambos una tegat funeris hora loco.

XIII.

QUO te venruram dixti, cum mater ad urbem
 Iverit, hoc furtim, lux mea, primus eo.
 Dumque venis, longo brevis hora videbitur anno
 Longior; ulla igitur si tibi cura mei,
 Tolle moras omnes, timor omnis & absit; amanti
 Et comes, atque viæ dux erit ipsa Venus.

XIV.

SI Ligrina meos hodie non ludit amores,
 Amplexus hodie si petit illa meos;
 Hoc tibi muscoso lætus, Citherea, sub antro,
 Aram de viridi cæspite constituam;
 Lætus ego spumante novo tria cymbia lacte,
 Et totidem fundam cymbia plena mero;
 Tum late variis halantem floribus aram
 Imbuet effuso læta cruore bidens.
 Saltabit Ligurina; tuas mea tibia laudes
 Cantabit, dulces fundere docta modos.
 Hæc tibi, sancta Venus, solemnia sacra quotannis
 Et faciam, & magno semper honore colam.
 Tu fac, diva, tuum supplex dum numen adoro,
 Currat in amplexus cara puella meos.

XV.

HOS tibi purpureos inserta nitentia flores,
 Dum Sol exoritur, Thestylis cara, lego.
 Dumque lego, crebra ingeminans suspiria dico,
 O utinam fieri vos, mea dona, queam!

XVI.

XVI.

Thestylis cara, favis Hyblæis dulcior, ecquid
Munera pulchra vides, quæ tibi ab urbe fero?
Aspice flaventem pallam, roseosque cothurnos,
Et mitram, & bullis cingula clara suis.
Hæc ego dum porto, vidit pulcherrima Phyllis,
Atque ait, Hæc dederis si mihi dona, puer,
Et Venerem, & Cereris sanctissima numina testor,
Te præter nullus Phyllida habebit amans.
Ast ego per Phœbum, & Musas, mea Thestylis, juro,
(Si fallo, semper sis inimica mihi)
Nulla puella meos te præter habebit amores:
Dum vivam, semper tu meus ardor eris.

XVII.

Thestylis, si qua tui superat tibi cara Myconis,
Crastina cum cælo fulserit orta dies,
Ad Cereris vallem niveas compelle capellas,
Nec longam pigeat te, precor, ire viam.
Inde graves æstus ubi Sol accenderit, antro
Succede, arduis quod tegit umbra comis.
Hoc ego furtivo ingrediar pede munera portans,
Quæ jampridem orat Phyllis habere sibi,
Munera vel Nymphis dignissima; si sapias ergo,
Ad dulces latebras incommitata veni.

XVIII.

Dic age, quid tecum faciebat, perfida, Thyrsis,
Sub corylo matrem dum sopor altus habet?
Ah ego te, pueri circumdare brachia collo,
Ah ego te vidi; sed pudet illa loqui.
Thestylis, te ne meo quemquam præponere amor?
Amplexus alii te ne dedisse meos?
At neque me Phyllis, nec formosissima Gorgo,
Nec movit roseis candida Nisa genis.
Ipsa mihi furtiva tulit munuscula sæpe,
Sed lacrimans semper rettulit illa domum.
At tibi cur placuit tantum puer iste? quid oro,
Quid tantum egregii possidet iste puer?
Hic domini custodit oves, ego mille capellas
Pasco, quas moriens tradidit ipse pater.
Hic Dorylæ indocto cessit cantando: peritus
Et voce, & calamis cessit Agyrta mihi.
Nec pede, nec jaculo valet hic, nec viribus, ipse
Adeo

Audeo vel magnas sollicitare feras.
 Sunt mihi flavescentes tenera lanugine malæ;
 Sunt nitidi crines, sunt rosea ora mihi.
 Ipsa meos oculos tua sidera sæpe vocasti,
 Ipse tibi quondam pulcher Adonis eram.
 Nunc ego despectus; nec te, male sana puella,
 Nescio quem præ me Thyrsin amare puder?
 Jam fugiat leporem canis, accipiterque columbam,
 Incultique ferant dulcia poma rubi.
 Jam sperent, metuantque simul miseri omnia amantes:
 Credite, nulla fidem servat amica viro.

XIX.

HUC ades, o mea Lygda; parum decede calori,
 Dum medio cæli Sol gravis orbe furit.
 Nonne vides, ut tota suas sudoribus? utque
 Jam lassæ nequeant stringere farra manus?
 Hic patulæ ramis sociant umbracula fagi,
 Quas circum irriguis Mæculus errat aquis.
 Nec salsa defunt oleæ, nec olentia cæpe,
 Nec liba, aut veteri cymbia plena mero.
 Huc ades: ardenti maneat sub Sole Nigella,
 Te molles umbræ, candida Nympha, decent.

XX.

Irrigui fontes, & fontibus addita vallis,
 Cinctæque piniferis silva cacuminibus,
 Phyllis ubi formosa dedit mihi basia prima,
 Primaque cantando parva corona mihi.
 Vivite felices, nec vobis aut gravis æstas,
 Aut noceat sævo frigore tristis hiems.
 Nec lympham quadrupes, nec silvam dura bipennis,
 Nec violet teneras hic lupus acer oves:
 Et nymphæ latis celebrent loca sancta choreis,
 Et Pan Arcadiæ præferat illa suæ.

XXI.

Rivule, frigidulis Nympharum e fontibus orte,
 Qui properas liquido per nemora alta pede,
 Si, formosæ, venis formosum ad Phyllidis hortum,
 Arentique levas aurea mala siti,
 Illa tibi centum dabit oscula, queis tua fiet
 Dulcior Hyblæis unda beata favis.

XXII.

XXII.

CUM ver purpureum tepidi fert aura Favoni,
 Ornatur variis floribus almus ager;
 Formosæ rident silvæ, sunt omnia læta,
 Et cantu volucrum dulcia rura sonant.
 At mihi tristis hiems formosior, & mihi Vere
 Lætior adveniet, si, mea Lygda, redis.

XXIII.

CUM Boreas læto silvam spoliavit honore,
 Squallet ager, mixto nix jacet alta gelu:
 Non liquidi currunt amnes, stat nubibus aer
 Obscurus, volucrum garrula turba silet.
 Tale facis ver, cara, tuo, Ligurina, recessu,
 Te sine formosum, te sine dulce nihil.

XXIV.

UT quondam nivei correpta cupidine tauri
 Mugitu resonat bucula mœsta nemus,
 Illius caros si forte abducit amores
 Pastor: non miseram gramina læta juvant,
 Non liquidi fontes; talis mea vita, paterno
 Postquam rure procul me sine, Lygda, fugis.

XXV.

UT formosa suo felix est bucula tauro,
 Nec latos querulis vocibus implet agros,
 Si dulci reditu caram solatur amantem
 Carus amans, talis candida vita mea.
 Meque prius miserum fecit Venus alma bratam,
 Ex quo restituit te, Ligurina, mihi.

XXVI.

Aspicis ut læti surgunt per gramina flores?
 Explicat ut virides arbor ubique comas?
 Ut melius fulgent soles, ut nubila cælo
 Diffugiunt? terris diffugiuntque nives?
 Hæc facies, hæc est Lygdæ ridentis imago;
 Tristitiam vultu sic fugat illa suo.

XXVII.

Vidisti nitidas per candida lilia guttas
 Ludere, cum tenui decidit imber aqua ?
 Et rorem de puniceis stillare rosetis,
 Cum spirat nascens frigora blanda dies ?
 Hæc facies, hæc est Ligurinæ flentis imago ;
 Illius lacrimis me ferus urit Amor.

XXVIII.

Hæc, Cytherea, suo dulci cum compare turtur
 Cæditur ante tuos viscina grata focos.
 Unus amor caros felici copula amantes
 Junxerat : unanimes abstulit una dies.
 Talis amor pulchram tenero cum Daphnide Nisam
 Vinciat æterno foedere, sancta, precor ;
 Et dum longa dies senio consumpserit ambos,
 Alter in alterius corpore vivat amans.

XXIX.

L Una decus cæli, astrorum regina bicornis,
 Quæ medio raptim laberis alta polo,
 Ad dominam propero, qua nec formosior umquam
 Pavit, nec pascet ulla puella gregem.
 Tu, mea ne quisquam valeat deprehendere furta,
 Conde precor lucem, candida diva, tuam.
 Sic tibi sit proprio splendescere lumine : sic par,
 Et magni radiis amula Solis eas.




M. A N T O N I I
F L A M I N I I
C A R M I N U M

LIBER QUARTUS.

RELIQUOS LUSUS PASTORALES]
CONTINENS.

I.

 Quæ venusta Sirmionis littora
Colis, Catulli candida
Musa, & beatam citri silvam doces
Pulchram sonare Lesbiam.
En nos Taburni in valle florida tibi
Aram virenti e cœspite,
Et terna melle, terna lacte ponimus
Spumante plena cymbia,
Et te vocamus voce supplici, dea,
Ad sacra parva, sed pia,
Ut nostram Hyellam fistula dulci canas;
Qua nulla rure pulchrior
Vixit, nec ulla vivet ullo tempore
Cani puella dignior.
At tu vireta amoena, & undas limpidi
Relinque Benaci libens.
Et hic Favoni lenis aura murmurat:
Et hic avium dulci sono
Mulcetur aer; prata floribus nitent;
Purique fontes vitreis
Lymphis decentes frigerant nemorum deas,
Cum fessa damarum nece,
Et ista luce fervida Solis, redit
Pudica Dianæ cohors.
Quare, o puella candida, huc aditum feras,
Nobisque versus dicito,
Per quos Hyella vivat, usque dum tua
Formosa viveret Lesbia.

II.

CAper, Capella cœlitum beatior,
Quem tam venusta, tam puella candida;
Stipante maximo capellarum grege,

H 6

Agit

Agit per alta montium cacumina,
 Cum sol recludit splendido cælum die
 Albentque læta rore cano gramina.
 At cum furentis excitatus ictibus
 Solis siticulosus ignescit calor,
 Nec antra pulchris arborum instrepat comis,
 Te ducit illa fontis ad lympham sacri,
 Qui profilit virente murmurans specu;
 Domus choreis Naidum gratissima,
 Et semicapri dulce lenimen Dei,
 Cum fessus a labore montivago redit.
 Hinc te reductis vallium cubilibus
 Sistens, tenello lassulum sinu fovet,
 Cingitque carum floreis fertis caput,
 Suadetque blandos sensim inire somnulos;
 Nunc mollicella barbulam mulceas manu,
 Nunc dulciora melle fundens carmina,
 Canente garrulo simul avium choro,
 Exin cadente Sole cum Nox extulit
 Micantibus stellis coronatum caput,
 Et prata grillis personant argutulis,
 Te bella Hyella cum tuis uxoribus
 Domum reducit mollia ad præsepia,
 Vobisque falsas frondium dapes parat.
 Cui vita capro contigit iucundior?
 Quam capripes Pan, aut potens pecorum Pales
 Benigniore vidit umquam lumine,
 Caper, Capella cælitum beator?

I I I.

Caper, capellis ire dux ad pascua
 Suetus, quid ægros ultimus trahis pedes?
 Tu primus alta montium cacumina,
 Cum Sol quadrigis aureis portat diem,
 Primus reposita vallium cubilia,
 Quo fons loquace limpidus lymphæ vocat,
 Primus petebas nocte cum prima domum
 Magnis capellas antecedens passibus:
 Nunc mœstus, æger, ultimus prodix domo.
 Caper miselle, num requiris candidam
 Hyellam? & illa absente nec thyma dulcia,
 Nec umbra dulcis, nec tibi est dulcis liquor?
 Caper miselle, Hyella bella est mortua:
 Luge, miselle, bella Hyella est mortua;
 Aliumque valle pascit Elysia gregem,
 Videtque puro lacte fontes currere,
 Auraque longe dulciore vescitur:

Neque

Neque amplius redire, si velit, huc queat,
Neque si queat, redire jam amplius velit.
At tu morere, dominamque vise trans Styga:
Aut vive posthac omnium miserrimus,
Caper miselle, omnium miserrime.

I V.

Adeste o Satyri, bonique Fauni, &
Quidquid capripedum est ubique divum,
Mecum, numina sancta, lacrimare.
Vestra mortua bella caprimulga est.
Illa candida bella caprimulga,
Quæ vobis bona liba fastitabat:
Quæ dulcem mihi caseum premebat:
Quæ tam carmina bella cantitabat.
Tecum delicias, Hyella, ruris,
Tecum gaudia ruris abstulisti.
Te formosulus hortus ille, quem tu
Lætum virginea manu rigabas;
Te fons profliens specu e virenti,
Quem illo floridulo ore basiabas,
Te lugent nemora, atque vallis, in qua
Pascebas niveas tuas capellas,
Nunc pictas Dryadis legens corollas,
Nunc dulci resonans avena in antro.
At tu, si sapias, o puella Diris,
Huic dato nitidas tuas capellas.
Hac pascente, domum tuæ capellæ
Ferent ubera tentiora: lacque
Longe dulcius effluet papillis.
Nullam rura tulere doctiorem
Aut miscere coagula, aut decoras
Molli texere fiscinas hibisco:
Aut per florida prata cum puellis
Choros ducere, obstupente pago.

V.

CUR subito, fons turbidule, tuus humor abundat,
Dic age, lucidulam quis tibi turbat aquam?
Ah miser! exstinctæ turbat te casus Hyellæ:
Ipse tuis crescis, perditæ, de lacrimis.
Infelix! non jam tanges rosea illa labella:
Candida nec liquidis membra lavabis aquis.
Non cessam, atque tuo crepitanti murmure captam,
Aspicias somnos carpere languidulos;
Dum niveas inter ludit lasciva papillas,

Et

Et simul aureolam ventilat aura comam :
 Ac leviter motans myrtos super impendentes ,
 Spargit odoratos flore cadente sinus .
 Ut fulvum nitidumque aurum nitidissimus ipse
 Ornat sidereo lumine chrysolithus :
 Ut laurum decorat croceis hedera alba corymbis ,
 Nestens formosis brachia brachiolis ;
 Sic formosa tuas lymphas decorabat imago ,
 Se vitreo quoties viderat illa lacu .
 Tunc , o frigidule , blando urebaris amore ;
 Vos liquidæ melius tunc nituistis aquæ .
 O quoties , dulci cum vos libaverat ore ,
 Facta est Hyblæis dulcior unda favis !
 O quoties vestros requievit carmine cursus ,
 Cum modulans calamis luderet imparibus ?
 Nunc te , sancta Pales ; nunc te , Latonia virgo ,
 Nunc referens laudes , Pan Tegeæ , tuas .
 Illa canit : tremula respondent voce capellæ ,
 Saltat & oblitis hædulus uberibus :
 At circum volitans pictis avium chorus alis
 Discit , & arguto gutture cuncta iterat .
 Mirantur Satyri , Nymphæ mirantur & ipsæ ,
 Et Faunus ramis abditus arbuteis .
 Ipse etiam vocemque , & formosissima mirans
 Ora , suas in se verit Amor faculas .
 Ardet Amor , pulchrisque genis , roseisque labellis
 Incubat , ut myrti floridæ avis foliis ,
 Quæ solem dulci nascentem voce salutat ,
 Et patulo rorem lucidulum ore bibit .
 Sic Amor ore haurit dulcem dominæ halitum hiulco ,
 Carmina sic avida candidus aure bibit .
 Talia populeis Minci cantabat in umbris ,
 Dum pascit niveas pulchra Amaryllis oves ;
 Talia cantabas viridi , Galatea , sub antro ,
 Formosi recubans Acidis in gremio .
 Cantabas : puer impatiens sæpe intermixtis
 Mollia rumpebat carmina basiolis .
 Ah miser ! ah male caute puer ! tua gaudia Cyclops
 In nebulas jam jam dissipat aërias .
 Ille tuæ demens correptus amore puellæ ,
 Ah miserum infando perdidit exitio !
 Fleverunt nemora , & fontes , & Oreades altis
 Montibus , & magni candida turba maris :
 Ipsa comas Galatea scidit , mæstoque ululatu
 Implevit scopulos , cærule Dori , tuos ;
 Optavitque mori subito potuisse , suisque
 Amissis lucem relinquere deliciis .
 Non illam sociæ longo post tempore Nymphæ

Vide

Viderunt lætis ferre pedem choreis ;
 Non thalamo pīsta palla procedere ; cinctam
 Candida puniceis tempora coralliis .
 Illa vel undisoni pelagi latet abdita fundo ,
 Vel repetit furtis littora nota suis .
 Hic fletum misera ingeminat , fletu omnia complet ,
 Et verti in fluidas tota cupit lacrimas .
 Hic miserum querulis compellat vocibus Acin :
 Antra sonant Acin , cæruleæ Acin aquæ .
 Tu quoque , fons miserande , tuæ post dura puellæ
 Fata , tuis numquam pone modum lacrimis .
 Quis tibi nunc textet viridanti umbracula myrto ?
 Quis sepem tremulis textet arundinibus ?
 Quis sparget niveis onerata canistra hyacinthis ,
 Pīstaque purpureis ferta papaveribus ?
 Luge igitur miser , & confracta turbidus urna
 Semper cresce novis , fons bone , lacrimulis .
 Cumque tumens ripa exieris vagus , haud pete florem
 Ridentis calthæ , puniceamve rosam ,
 Sed nigras violas , & cæruleos hyacinthos :
 Ipsa bibat mæstam mæsta cupressus aquam .
 Quod si pulchra puella lavatum hoc venerit ulla ,
 Candida seu Nais , candida sive Dryas ,
 Die lacrimans : Ne me , quæso , pulcherrima , tange ,
 Neve meis corpus commacula lacrimis .
 Hæ limphæ non sunt lymphæ , sed flebilis humor ,
 Quem caræ dominæ mittimus inferias .

V I.

SIC tibi perpetuam donet Pomona juventam ,
 Hortule , dic , tanti quæ tibi caussa mali ?
 Ille tuus decor in tennes evanuit auras ,
 Ut riget informi cum sera bruma gelu .
 Non rosa formosum calathi jam pandit honorem ,
 Non violæ ridet purpura lucidulæ .
 Aruit ille suo viridi cum gramine rivus ,
 Dædala nec dulci voce susurrat apis .
 Quæque decora albis candeat floribus , ipsa
 Ponit odoratas citria silva comas .
 Ah nivei subito cnr nigrescunt hyacinthi ?
 Atque notis implent flebilibus folia ?
 Cur vivax apium moritur , crœcumque papaver ?
 Et panace fufis roscida lacrimulis ?
 Hortule , num luges fatum infelicis Hyellæ ,
 Et piget exstinctam vivere post dominam ?
 Illa quidem fuerat vivens tibi caussa decoris :
 Illa tibi moriens abstulit omne decus .

VII.

CUM pater invitum Nisæ sociasset Iolam,
 Venissetque viri jam nova nupta domum,
 Non potuit tantos pulcherrima Hyella dolores
 Ferre, nec erepto vivere conjugio.
 Sed veluti flos virgineo decerptus ab ungue,
 Cum vita dulcis tabuit ille decor.
 Tabuit ille decor, quo nil formosius ulla
 Ætas, nil umquam vidit amabilius.
 Occidis, infelix, primo sub flore juventæ:
 Occidis, heu nullo tempore digna mori!
 Sed tua fama superstes erit; quotiesque viator
 Præteriens tumulum viderit, & titulum,
 Ille tuo læsto suspirans nomine dicet:
 Pulchrior in terris nulla puella fuit.

VIII.

CUM pulchra infelicem animam exhalaret Hyella,
 Talia cum multis dicta dedit lacrimis:
 Duritia, formosæ puer, mihi durior ipsa,
 Idem luce mihi carior, atque anima:
 Tu licet ipse meam crudeli morte juventam
 Crudelis lympham miseris ad Stygiam,
 Non tamen ulla mihi vis carum nomen Iolæ
 Obliviscenti deleat ex animo.
 Seu Cytherea meam campis lugentibus umbram
 Sistet, seu campis sistet in Elysiis,
 Semper ero memor ipsa tui, quamvis laticem omnem
 Lethæum aridulis faucibus ebiberem.
 At tu, care puer, pro tanto gratus amore,
 Transibis quoties heu miseros cineres,
 Dic lacrimans, Heu cara puella, malustibi vitam
 Abstulit, & diro funere meruit amans.
 Ah nunc saltem in morte quiescas: hoc tibi Iolæ,
 Qui potuit miseram perdere, mandat amor.

IX.

Quiscunque es, upiliove bonus, bona vel caprimulga,
 Siste gregem, & sacro munera fer cineri:
 Da violas tumulo; fundat dulcissima vina
 Cantharus, & tepido lacte madescat humus.
 Dehinc lacrimans sic fare: Cinis carissime nobis,
 Nunc cinis, ast olim candida Hyella, vale.

X. Sic

X.

SIC Pan bicornis, & Pales vitam tuam,
 Tuumque sospitent gregem,
 Parum resiste, pastor, & pictis sacrum
 Lapidem corona floribus.
 Hic est Hyella, qua nec ulla pulchrior
 Pavit capellas femina,
 Nec pastor ullus garrulam unquam fistulam
 Inflavit ore dulcius.
 Nondum misella terna lustra clauserat,
 Cum vidit ultimum diem.
 Ut flos apricus, terra quem mater suo
 Dulci educabat in sinu,
 Tunc primum hiare coeperat, cum tabuit
 Calore tactus fervido;
 Sic pulchram Hyellam flore sub primo impotens
 Amoris æstus perdidit.
 At tu, viator sic faveat Amor tibi,
 Precare terram, ut pulveri
 Sacro puellæ sit levis, dehinc floribus
 Hanc spargito, & felix abi.

XI.

PASTORES, teneras procul hinc arcete capellas,
 Et sacram nigris spargite humum violis.
 Neu veteris bacchi, neu dulcis copia lactis,
 Neu desit numeris tibia flebilibus.
 Hic bona Hyella jacet, pecoris formosa magistra
 Junctaque cum domina fida capella sua.
 Illam sævus amor nimium infelicis Iolæ
 Perdidit: hanc caræ perdit amor dominæ.
 Nam simul exhalantem animam conspexit Hyellam,
 Ipsius ante pedes concidit exanima.
 Fortunata capella! polo fulgere supremo
 Dignior, Icariz quam canis Erigones;
 Si tua magna fides dominæ comes ire sub umbras
 Audet, & ante diem reddere dulcem animam.
 At florens tua fama viget, semperque vigebit
 Exemplum sanctæ maximum amicitiz,
 Dum silva gaudebit aper, dum monte capella,
 Dum patulis ulmæ decidet umbra comis.

XII.

DELICIZ ruris cum pulchra periret Hyella,
 Cum domina periret fida capella sua.

Non

Non ipsam violenta lues, non aspera febris,
 Sed dominæ subita morte peremit amor.
 I nunc, & Pyladas, & amoris nomine Orestas,
 Et iacta fidos, Græcia, Pirithoos.

XIII.

CUM misera ante diem fida comitata capella,
 Iret ad infernas candida Hyella domos,
 Ille malus sævis redimitus colla colubris
 Cerberus, invisas qui cubat ante fores,
 Non pavidam horribili tremefecit voce puellam,
 Nec rabidis illam dentibus appetiit:
 Sed tremulo blandæ gannitu vocis adulans,
 Et lingua lambens crura pedesque fera,
 Ætherias voluisset eam remeare sub auras,
 Et tam formosæ virginis ire comes.
 Quique tot heroum magnas latraverat umbras,
 Optavit parvi nunc gregis esse canis.

XIV.

CUM nemorum decus, & culti solatia ruris
 Venit ad Elysias candida Hyella domos,
 Obstupuere omnes, fixoque in virgine vultu,
 Spectabat pro se quisque oculis avidis
 Ardentes oculos, sorasque, humerosque nitentes,
 Brachiaque, & flavas per rosea ora comas.
 Atque aliquis juratus ait: Non pulchrior umquam
 Venit ad Elysios ulla puella choros.

XV.

HAnc fistulam, hospes, quam vides pinu sacra,
 Pendere, Pani, Hyella posuit maximo,
 Cum jam misella Solis aureum jubar
 Linquens, beatos ferret ad manes suum.
 Hac illa pulchra fistula cum luderet
 Nymphas canens, & surta earum dulcia,
 Non aura lætis insonabat frondibus,
 Non murmurantes obstrepebant rivuli,
 Non pïsta garrulo avis canebat gutture.
 Quin ipse dulci carminum captus sono
 Inter greges jacebat innocens lupus,
 Himella florida, & Taburne pinifer
 Tu testis; ipse es sæpe miratus tuas
 Motare pinus horridas cacumina.
 Tunc fistula hæc beator calamis fuit,

Qui-

Quicumque labra docta pastorum terunt .
 At nunc misella fistula aut semper tacet ,
 Aut si loquaci ventus illam sibilo ,
 Inflavit , usque flebiles edit sonos ,
 Acerba dominæ fata deplorans suæ ,
 Et ore caro bastari expetens :
 Quo nulla pulchrius , neque umquam dulcius
 Puella gessit os , neque ulla umquam geret .

XVI.

QUod nulla nec formosior , nec fistulam
 Insare dulcem doctior , niveos greges
 Umquam Taburni pavit inter horrida
 Pineta , pastores tuis hunc manibus
 Dicant , Hyella , lucum opacum , & hos duos
 Fontes amœnos , qui levi cum murmure
 E rupe muscosa alter , alter e specu
 Pendente decidunt ; at in medio jacens
 Tua ossa fœtilis urna habet , opulentior
 Quam dives Hermus , undaque aurifera Tagi .
 Hanc nos quotannis , cum Favoni candida
 Fert aura ver insignes floreis comis ,
 Dulci lyæo , & lacte , & agni sanguine
 Rigabimus , tum virgines circum integræ
 Ducent choreas , & tuas laudes canent ,
 Hyella mons , Hyella vallis garrula
 Sonabit , & cum Sol diem face aurea
 Illustrat , & cum nox polum umbra condidit .
 At magnus Alcon fistula , quam capripes
 Ille dedit Pan , triste carmen ordiens
 Narrabit , ut te crinibus passis deæ
 Orcades desseverint , cum pallidum
 Videre vultum ; ut arborum tonsis comis
 Te silva mœsta luxerit , te limpidi
 Fontes , Hyella , te Taburni horridæ
 Flevere cautes : cœrula se condidit
 Sol nube , dira ne videret funera .
 Quin sævus ille lacrimis mortalium
 Gaudens Cupido flexilem arcum , & igneas
 Fregit sagittas . Quantum hiems gelus aspero
 Concreta Veri floreos cedit , rubus
 Quantum virenti acantho , agris tantum omnibus
 Tibi puellæ cesserant . Ut ramulis
 In valle myrtus avia nitentibus
 Crescit , quam amico rore fontis educant
 Nymphæ decentes ; sic amabilis tua
 Juventa surgens enitebat , nec rosa

Ruben-

Rubente mane lucidum calathi sui
 Pandens honorem est pulchrior, nec pulchrior
 Aurora, croceo cum gerit idem sinu
 Coma resurgens aurea. Quis simplices
 Mores, & artes Cypria dignas dea
 Æquare possit laudibus? seu fiscinam
 Virente hibisco texeres, formosius
 Jurabat esse nil Pales: seu duceres
 Choros sub altis arborum comantium
 Ramis, Napeæ candidæ, & Phœbi soror
 Stabant stupentes: seu levi nemorum Deqs
 Calamo canebas, silva dulci carmine
 Gaudebat, ipse Mænalus quantum sui
 Fauni sonora fistula. Salve o bona
 Hyella, salve, & montibus nostris ades.
 Tu Para maximum, & sorores Naidas
 Pastoribus, beata, concilia tuis:
 Morbosque lacrimabiles precibus piis
 Averte, lucum & vife sapius tuum.

XVII.

DUM te flebilibus numeris moriturus Iolas
 Cantat, ades vati, candida Hyella, tuo.
 Tale mea carmen moduler tibi arundine, quale
 Deficiens dulci gutture cantat olor;
 Ut tua pastorum volitet vaga fama per ora,
 Dum lætas segetes pingua rura dabunt,
 Dum flores apes, & rivos dum gramen amabit,
 Dum metuet celerem tarda capella lupum.
 Digna quidem fueras, quam maximus ille Menalcas
 Diceret argutis semper arundinibus:
 Et quam posthabita Neptunine Galatea
 Cantaret Siculi clara Thalia senis.
 Et facerent, si te natam felicibus annis
 Vidissent oculis, candida Nympha, meis.
 Te juga Parnassi resonarent, te juga Pindi:
 Notior Arcadiæ nulla puella foret.
 Per memora, & silvas incisum cortice lævi
 Mille tuum nomen viveret arboribus.
 Tu quoque par esses Amphionio Aracyntho,
 Et par Mænaliis, care Taburne, jugis.
 Magne pater, tali fortunatissime alumna,
 Tu viridi servas ossa beata sinu:
 At misera ante diem crudeli funere rapta
 Ivit ad infernas non reditura domos.
 O mihi Threiciam citharam si Musa dedisset,
 Quæ potuit silvas ducere montivagas,

Per

Per tenebras Orci, per pallida regna silentum
Quæsissem manes, cara puella, tuos:
Nec me tergemino terreret Cerberus ore,
Nec torvæ anguineis crinibus Eumenides.
Vel mecum vitæ repetisses lumina, vel me
Obrueret Strygio mors violenta lacu.
Sed citharæ si nil prodesse filæ canoræ,
Movissem fletu numina dura pio.
Vidissent umbræ tenues regemque superbum,
Tisiphonemque malis illacrimare meis.
Sit licet ille fero crudelior angue Tyrannus,
Non vacuum blandi pectus amoris habet.
Ipsam etiam, qui cuncta domat, Cythereius ales
Vicit, & invito lenia corda dedit,
Tempore quo magnæ Cereris pulcherrima nata
Ad nigras Erebi candida venit aquas.
Illa quidem caris Nymphis comitata legebat
Purpureos flores saltibus, Ætna, tuis.
Jamque parans in lucidulo se fonte lavare,
Traxerat e niveo mollia vincla pede,
Cum pavidam, & matrem queribunda voce vocantem
Abstulit infernis luridus Orcus equis.
Nec veritus natam Jovis est violare supremi,
Tantum forma potest, & violentus amor.
Cur igitur caram mihi non donaret Hyellam?
Cur lacrimis flecti nollet amantis amans?
O qui pallentes Erebi me ducat ad umbras,
Et genibus sistat me, pater Orce, tuis!
O quales tibi manarent mea lumina fletus!
Funderet o quantas lingua disertæ preces!
Me certe facerent pietasque, doctorque disertum:
Verba ministraret dulcia dulcis Amor.
Quid loquor infelix? nulla est revocabilis arte,
Cum semel extincto lumine vita fugit.
Non revocat Syringa suam Pan magnus ad auras,
Non Phoebus revocat te, Cyparisse, tuus.
Ipse foret quamvis Cybelle gratissimus Attis,
Liquerat infernas non tamen Attis aquas.
Aliquoties nato mater Berecynthia dixit,
Per lac, quod dederunt ubera nostra tibi,
Perque uteri tolerata decem fastidia meæses,
Redde oro puerum, Dis, mihi, care, meum.
Non ego, felices superum translatus in oras
Tithoni vivat sæcula longa, peto.
Auroræ liceat carum servare maritum,
Æqualemque Deis reddere cælitibus.
At mihi cum paucos Attis serviverit annos,
Ad tenebras redeat debilis umbra tuas.

Nunc

Nunc pia templa colens divis operetur, & omnes
 Per populos ritus, & mea sacra ferat.
 Dulcia purpureæ nunc carpat dona juventæ,
 Nunc decoret silvas candida forma meas.
 An magnum est, animam si de tot millibus unam
 Des matri, vitam quæ dedit ipsa tibi?
 Sic lacrimans ait: ille suis immanior umbris
 Maternas dura respuit aure preces.
 Vix licuit miseræ manes descendere ad imos,
 Atque umbræ dulci basia vana dare.
 Crudelis Pluto, nimium crudelia fata,
 Quæ vitæ nullas heu posuere moras!
 Cum silvam glacialis hiems spoliavit honore,
 Vere novo silvæ læta juventa redit:
 Occidit Oceani cum Sol demersus in undas,
 Nascitur abduſto pulchrior ille die:
 At nobis nec læta suo cum vere juventa,
 Nec mersa immitti funere vita redit.
 Ultima cum Parcæ legerunt fila severæ,
 Urget perpetuus lumina clauſa ſopor.
 Queni tamen æterno celebrarint carmine muſæ,
 Ille vel invita morte ſuperſtes erit.
 Sic vivis, viveſque æternum, pulcher Alexi;
 Et tu cum Gallo nora Lycori tuo.
 Pan nemorum decus, & Satyri, Nymphæque decentes,
 Quæ blando agreſtes uritis igne Deos,
 Si formoſa pie coluit vos ſemper Hyella,
 Si mea vos ſemper dulcis avena canit,
 Vos facite, ut longum vivant mea carmina in ævum,
 Et cum carminibus candida Hyella meis.

XVIII.

HAS lacrimas, atque hæc imo ſuſpiria corde
 Traſta gemens libo, candida Hyella, tibi.
 Hæc tibi nunc, mox vitam ipſam libabo, animamque,
 Cumque tuis miſcebo oſſibus oſſa mea.
 Quoſque maritali non junxit tæda Hymenæus,
 Funerea junget Mors violenta ſace.
 Quod ſi nupta meum conſcendit Niſa cubile;
 Non tamen umquam animum ceperat illa meum:
 Sed mea me pietas patri parere coegit
 Impia, me durus perdidit ipſe pater.
 Si falſo, haud ambo terra tumulemur in una,
 Nec tua ſit felix manibus umbra meis.

XIX.

CUR, ah cur ullo placui tibi tempore? mortis
 Si, mea vita, tibi causa futuros eram.
 Cur me tam pulchrum cari genere parentes?
 Cur calamos dono Pan dedit ipse suos?
 Quis ego formosas possem mollire puellas
 Cantando, & duris lenia corda dare.
 Quid formam queror, aut calamos nocuisse canoros?
 Perfidia periit cara puella mea.
 An ne meis potui thalamis admittere Nisam?
 Vim ne preces duri tantam habuere patris?
 Fugissem durumque patrem, patriamque, priusque
 Fudissem multo sanguine dulcem animam.
 Sed fundam, poenasque dabo tibi, candida Hyella.
 O cari manes, o, precor, este boni,
 Vos puerum vestra linquentem lumina causa
 Optatum læti suscipite in gremium,
 Et qui me nimio sponsum cupiistis amore,
 Jungite nunc dulcis gaudia conjugii.
 Sancta, veni, nostrisque fave, Proserpina, tædis;
 Fausaque purpureus carmina cantet Hymen;
 Quique olim valida conjunxit utrumque catena,
 Vivat in Elysia valle perennis amor.

XX.

PAN pater, & veneranda Pales, Faunisque valet;
 Tuque mihi quondam care Taburne vale:
 Vos mihi, vos misero, silvæ, placuistis, opacæ,
 Dum niveum in vobis pavit Hyella gregem,
 Et mecum tenera furtim ludebat in herba
 Ludere cum magno digna puella Jove.
 Tunc mihi purpureo fulserunt lumine soles,
 Tunc fuit heu nimium candida vita mea.
 Nunc nemora, & fontes, & cæli lumen, & umbræ,
 Nunc ingrata meis omnia sunt oculis.
 Mors mihi sola placet: mors o dulcissima rerum,
 Huc ades, & vitam, mors bona, redde mihi.
 Illa meam vitam rupes habet, illa sepulcro,
 Servat delicias terra beata meas;
 Pastores, illa dominæ me jungite in urna,
 Taliaque inscriptis addite verba notis:
 Formosam tuus ardor, Iola, absumpsit Hyellam,
 Te miserum leto perdidit illa suo.

XXI.

XXI.

Ingrate Sol, ortum quid approperas tuum?
 Quo lux mihi, si luce non datur frui?
 Redis ne, grex ut redeat in silvam meus?
 At hunc Hyellæ mors acerba perdidit.
 Redis, magis, magisque tabescam ut miser?
 Et te fatigem quæstibus semper novis,
 Domina revivens pulverem sacrum meæ?
 An tu quadrigas aureas tuas refers,
 Ut luminibus aliquam afferas lucem meis?
 At illa lacrimis, tenebrisque horridis
 Assueta lucem odere, nec radiis tuis
 Imbres suos siccare amant; quibus genas
 Rigant, & ora amoris usta incendio.
 Sed fulgeas licebit, & radiantibus
 Terras, maria cælumque lustres ignibus,
 Tamen omnia tenebris inhorrescunt mihi,
 Ex quo meus Sol mihi suam lucem abstulit,
 Desiitque manibus occidens eam tulit.

XXII.

Formosa myrte, roscido imminens antro,
 Antrum loquaci suave murmurans fonte;
 Fons care, fletu faste amare de nostro;
 O quam beate viximus, quoad vixit
 Hyella vestra! quoad puella formosa
 Mecum jacere ista solebat in ripa!
 Hic illa cum meo in sinu recumbēbat,
 Mihiq; in aurem ludibunda cantabat,
 Tunc, tunc beatam viximus Deum vitam:
 Tunc invadebat ipse Juppiter nobis.
 Nunc quis miserior Solis aspicit lucem?
 Quem sæviore Tartarus premit pœna?
 Seu vestit alma luce Sol agros, seu nox
 Placida rigat gratis soporibus terras,
 Numquam remittit anxius dolor, numquam
 Meos ocellos recreat quies dulcis.
 Ut pinguem olivam lentus ignis absumit,
 Sic cor misellum est cura sæva, mœrorque.
 Quo dulcis abiit, hei mihi, decore vultus?
 Quo niveus ille purpura color pictus,
 Hyella quem suo anteire jurabat?
 Jam lacrimæ exsangues genas peredere,
 Modis & ora pallor inficit miris;
 Et illa pulchrior hyacinthino flore

Inculta, squalens, hispidula coma horrescit.
 Miser, ah miser Iola, tamen mori cessas?
 Vitæ, ac dolori pone iam, miser, finem,
 Et illa vise regna, quæ colunt sancti
 Manes, ubi beata degitur vita
 Sub arborum semper virentium ramis,
 Quæis insufurrat dulce frigerans aura,
 Quam Tethyos circumfluat parit lympha;
 At ipsa passim lucidos parit flores,
 Quos lacte puro candidi educant rivi.
 Illic puellæ dulcibus jocis noctem,
 Diemque cum suis amantibus ducunt,
 Croceis amictæ carbasis, pedes nudæ,
 Omnesque ramis myrteis coronatæ;
 Semper choreis, cantibusque iucundis,
 Semper cachinnis tinnulis sonant silvæ.
 Has nec protervus Auster imbribus fœtus,
 Nec cana nix, nec æstus impotens tangit:
 Sed Ver beatas semper incolit sedes,
 Flavas corollis mollibus comas cinctum,
 Lætosque Flora cum sua choros ducit,
 Ningens rosarum suave olentibus nimbis.
 Huc te vocat puella maximis votis,
 Tuasque lentas increpat moras sæpe.
 Valet silvæ, tuque fons mihi care
 Vale, vale antrum, myrte floridula salve.
 Moritur Iolas ille notus in silvis,
 Peritus ore, fistulaque cantare;
 Moritur, suoque vos cruore respergit,
 Qui lacteo vos ante rore spargebat,
 Qui vos amœnis floribus coronabat,
 Docens Hyellam vos sonare formosam.
 At tu puella luce carior cara,
 Qua mortua misero mihi mori est dulce,
 Ades, tuisque manibus meos manes
 Amore junge, Hyella candida, æterno.

XXIII.

HOS calamos, Pan silvipotens, tibi pulcher Iolas;
 Sæpe quibus cecinit dulcia furta tua,
 Dum Cytherea potens, & cara sinebat Hyella;
 Quæ postquam dira tabe peresa jaceret,
 Pro dulci Musa, pro carminibus iucundis,
 Flebilibus complet vocibus ille nemus,
 Et dominam cupiens imas invisere ad umbras,
 Non somnos oculis, non capit ore cibum.
 At tu fortunam, pueri miseratus acerbam,
 Fracast. Carm. I Æter-

Æternos pietas si movet ulla Deos,
 Aut misero tantos aufer, bone divæ, dolores,
 Aut illum silvas transfer in Elyfias,
 Sed potius longum vivat formosus in ævum,
 Et cantet laudes semper, Hyella, tuas.
 Dignior haud ullus talem celebrare puellam,
 Ulla nec est tali dignior ore cani.

XXIV.

Hanc laurum, formosa, tibi formosus Iolas
 Sevit, & hanc madidis irrigat usque genis.
 Seu tenebras Vesper, seu lucem portat Eous,
 Et laurum lacrimis irrigat, & tumulum.
 Hinc tumulus violas, & laurus protulit umbras:
 Umbrae isdem crescunt, & violæ lacrimis.
 Cumque umbris, violisque amor infelicis Iolæ
 Crescit, cumque ipso crescit amore dolor.
 Hic dolor heu miserum leto dabit: hic, bona Hyella,
 Mox pueri apponet ossibus ossa tuis.
 Et quos, felici conjunxit fœdere quondam,
 Nunc infelici funere junget amor.

XXV.

HÆC, dulcissime Tuxriane, iusti
 Molli carmine, nec laborioso,
 Dum ver florida lætum agebat ætas
 Quam jocus decet, ac leves cachinni.
 Nunc Musas vocor ad severiores,
 Nunc rerum juvat explicare causas,
 Et cælum memorare, cælitesque,
 Et qui cælitibus præest beatis.
 O molles elegi, lyræque dulces,
 O & myrtea ferta, fistulæque,
 Faunique, Dryadesque, jam valetis,
 Et cum frondiferis, Hyella, filvis.
 At tu, Progenies Jovis supremi,
 Patris deliciæ, denique amores,
 Per quam magna canunt sacri poetæ,
 Felix Uranie, mihi benigno
 Ades numine, supplicemque tolle
 Me tho rutilante curru ad astra.

M. A N T O N I I
F L A M I N I I
C A R M I N U M
LIBER QUINTUS,
EPISTOLAS CONTINENS
AD ALEXANDRUM FARNESIUM
C A R D I N A L E M .

I.

FARNESI, pater omnium leporum,
Hos tibi lepidissimos poetas
Dono, tempora quos tulere nostra,
Fortunata nimis, nimis beata
Nostra tempora, quæ suos Catullos,
Tibullos, & Horatios, suosque
Marones genuere. Quis putasset,
Post tot sæcula tam tenebricosa,
Et tot Ausoniæ graves ruinas,
Tanta lumina tempore uno in una
Tam brevi regione Transpadana
Oriri potuisse? quæ vel ipsa
Sola, barbarie queant fugata
Suum reddere litteris Latinis
Splendorem, veteremque dignitatem.
Salvete, o decus, o perennis ævi,
Nostri gloria, candidi poetæ,
Quos novem in tenero suo sorores
Nutrivere sinu, suoque digna
Choro Castalio loqui dedere.
Vos, & carmina vestra sempiterna
Urbes Italiæ colent honore,
Vos & Gallus, Iberque bellicosus,
Et Germania docta, Sarmatæque
Mirabuntur, & ultimi Britanni;
Erit dum Latiis honor Camœnis.
Quin ultra Oceanum, alteroque in orbe
Vos discent populi, quibus redit lux
Aurora exoriente, cum nigrescit
Aer jam tenebris sub axe nostro;

Nam (mirabile dictu !) in iis quoque oris
 Nunc linguæ studium viget Latinæ .
 At tu , floscule Romuli nepotum ,
 Quem Phœbus pater , & Minerva docis
 Certatim artibus expolire gaudent ,
 Alexander , habe tibi hunc libellum
 Venustum , lepidum ; tuasque laudes ,
 Isis quæ celebrantur a poetis ,
 Æternas fore scito ; nam manebit
 Æternò aureolus libellus ævo .

I I.

AD UBALDINUM BANDINELLUM

De Liberalitate

GUIDI ASCANII SFORTIÆ CARD.

UBALDINE , tuo sodali amate ,
 Potest quantum ab amico amari amicus ,
 Munus hoc mihi da , tui ut patroni
 Divini juvenis manum osculeris
 Meo nomine , maximasque grates
 Agas , quod decumas mihi quotaannis
 Pro sua eximia benignitate
 Remittit , licet ipse nec salutem
 Eum more clientium bonorum ,
 Nec quidquam faciam , queat quod ipsum
 Admonere , meam ut velit benigna
 Mente pauperiem juvare ; nempe hoc
 Magnus Sfortiades movetur uno ,
 Quod me nec putat improbum , nec esse
 A musis alienum , amore quarum
 Ardet maximo , ut omnium est amator
 Ardentissimus elegantiarum .
 Quare cum nequeam invenire verba
 Infantissimus omnium poeta ,
 Quæ tantis meritis rependam ; amice
 Disertissime , quod supra rogavi ,
 Id quæso facito , tuique vive
 Semper Flamini memor , valeque .

I I I.

AD LÆLIUM TORELLUM.

Quod me diligis , & soles libenter
 Adjuvare tuos , Torelle , amicos ,

Quid

Quid per te cupiam impetrare, dicam.
 Est consanguineus mihi peritus
 Legum, nec senio gravis, nec idem
 Admodum juvenis, disertus autem,
 Et forma egregia: ter ille jura
 Galliz populis dedit Togatz,
 Cum prætor foret, optimamque famam
 Collegit sibi rem optime administrans.
 Quod si nunc opera tua licebit
 Ipsi dicere jus in urbe vestra,
 Et me perpetuo tibi obligaris,
 Et tua pariter benignitate
 Rem dignam facies, facillimamque
 Illam mehercule; quando consecutus
 Id virtutibus es tuis, ut amplum
 Jampridem imperium tibi regendum
 Cosmus tradiderit, decus perenne
 Cosmus Tusciæ, & omnium Italorum,
 Quo regnante fides, bonique mores,
 Et doctæ rediere Musæ ad Arnum.

I V.

AD HIERONYMUM TURRIANUM

De Morte Victoriz Columnæ.

CUR desiderio modum, & dolori
 Me vis ponere, Turriane? acerbo
 Cui Victoria fato adempta, quæ me
 Non minus quam oculos suos amabat:
 Qua nihil veniens ab ultimo Indo
 Clarius, meliusve Sol videbat:
 Cui mens candida, candidique mores,
 Virtus vivida, comitasque sancta,
 Cæleste ingenium, eruditioque
 Rara, nectare dulciora verba,
 Summa nobilitas, decora vultus
 Majestas, opulenta, sed bonorum
 Et res, & domus usque aperta ad usus.
 Illa carminibus suis poetas,
 Quotquot sæcula multa protulerunt,
 Longe vicerat; illa vincit omnes,
 Sive flebilibus modis maritum
 Exstinctum decorans sepulcro ab imo
 Summa ducit in astra, sive regi
 Cælitum, Unigenæve Regis hymnos
 Filio canit: illa vel canendo

Ventos sistere, fluminum morari
 Impetus, poteratque leniores
 Tigres reddere mitibus columbis.
 At tu, sordior Hadriæ procellis,
 Immitissima Mors, manum rapacem
 Illi es injicere ausa: Mors acerba,
 Tu Solem Italiæ suum abstulisti.
 Sed nil proficis; en meæ Columnæ
 Fama fidere clarior refulget;
 En Victoria, cælitum beata
 Vita nunc potitur, vagique Solis
 Sub se lumina cernit, ipsa Sole
 Multo splendidiorque, pulchriorque.
 Ergo flebilibus modum querelis
 Jam jam, candide Turriane, pono,
 Ne plorem mihi inique amicus illam,
 Quæ læto celebranda versu, & ipsi
 Addenda est numero beata divum.

V.

AD GREGORIUM CORTESIUM CARD.

CORTESI Venerande, si quid unquam
 Incensæ officio rogationes
 Apud te valere, ne recusa
 Gregi adscribere candido tuorum
 Robertum, unanimem meum sodalem,
 Florentem ingenio, fide, pudore,
 Et Græce optime, & optime Latine
 Scientem, juvenem pium, elegantem,
 Seu juncto pede, seu velis soluto
 Doctum scribere, tam tui colentem,
 Quam qui maxime, & omnium bonorum
 Dignum amicitia; ergo, mi patrone
 Magne, quod petimus, sine impetrare.
 Sic tibi Deus optimus senectam
 Concedat viridem, diuque lætum
 Servet; sic homines tuæ supremæ
 Virtuti tribuant pares honores.

VI.

AD STEPHANUM SAULIUM.

Candidissime Gratiarum alumne,
 Ne carus tibi sim, nec ulla figura
 Amoris mihi mutui rependas,

Ni te plus amo, quam solet tenella
 Unicam genitrix amare natam.
 Nec mirum; quid enim potest amore
 Tuo dulcius esse? vel quis ullo.
 Fuit tempore dignus æque amari?
 Honores alius sequatur, auri
 Acervum cumulet nitentis: ipse
 Sim beator omnibus beatis,
 Annuant modo cælitæ, ut una
 Tecum vivere, tecum obire possim,
 Jucundissime Sauli, honore, & auro,
 Et cara mihi carior salute.

VII.

AD ULISSEM BASSIANUM.

ULYSSE, mea Musa, dic salutem:
 Non illi, dea quem Calypso amavit,
 Sed quem Pierides amant amore,
 Quo jam tum lepidum Catullum amabant,
 Cum tenellulus Aonæ petivit
 Montes, & meditans opaco in antro
 Mentis virginei chori tenebat.
 Dic incredibili ipsius videndi
 Me desiderio peruri, acerba
 Ut non acrius intimas medullas
 Mihi febris adurat; ipse quando
 Viset languidulum? suaque dulci
 Me solabitur allocutione?
 Nec eum lupa nutriit, nec ursa,
 Sed comis pater, & puella mitis;
 Cur ergo rigida æsculo, Hadriæque
 Durior scopulis, meique morbi
 Tam securus abest? an ille nondum
 Rescivit, mea lætulo cubare
 Membra torrida? sic profecto, sic est.
 Quare dic juveni, Camœna, caro,
 Confestim veniat, fidesque secum
 Afferat; volo leniat furentem
 Febrim, ut Orpheæ belluas, & iram
 Cerberi, Eumenidasque sævientes
 Mollivisse serunt lyra canendo.

VIII.

AD GALEATIUM FLORIMONTIUM

PHILALETHEM.

HUC ades, Galatee; quid moraris?
 Est brevis via, sæpiusque dicis
 Cras ad vos veniam, boni sodales,
 Nec venis tamen: an putas licere
 Amicis dare verba? nos pudendum,
 Et contra officium, tuoque bello
 Id cognomine prorsus arbitramur
 Indignum: hoc nisi vis inepte abuti;
 Huc ades, Galatee, quid moraris?
 Remiges Ithaci vagantis olim
 Lotos detinuit Libyssa in ora,
 Ut mulstralibus hæret usque & usque
 Musca lactis amore: te, beate
 Senex, quæ retinet domi voluptas?
 Ecquid delicias tuæ Sueffæ
 Præfers deliciis meæ Casertæ?
 Deliras, Galatee; nam Sueffa
 Longe pulchrior est amœniorque.
 Campanæ regionis hic ocellus;
 Quem Joci comitata, Gratiisque
 Venus posthabita Gnido, Paphoque,
 Semper incolit, & suos amores,
 Suas delicias fatetur; ergo
 Huc ades, Galatee; quid moraris?
 Hic Sol splendidius nitet, Favoni
 Spirat mollius aura, suaviorem
 Fert rosam, & violam benigna tellus:
 Hic est dulcior uva, dulciores
 Ficus, & pepones: oliva bacas
 Non solum patriæ tuæ, sed ipsum
 Venafrum superare gaudet; ergo
 Huc ades, Galatee; quid moraris?
 Ecce caseolos tibi recentes,
 Atque hœdos geminos Hyella donat
 Formosissima caprimulga, Pani
 Non impar caprimulga, sive cantat,
 Seu levi calamo terit labellum.
 Huc ades, Galatee; quid moraris?
 En hospes meus, optimus Caserta,
 Quo Campania terra gloriatur,
 Jam desiderium tui morantis

Nequit ferre ; puellam sic amantem
 Votis , ominibusque , lacrimisque
 Absentem vocat , ah tuum Casertam
 Ne , quæso , cruciare perge ; sed jam
 Huc ades , Galatee ; quid moraris ?
 Is quidem inpatiens moræ molestæ ,
 Ad te jam properasset , ægra membra
 Ni vis debilitaret ipsa morbi :
 Et tu tam diu abesse sustinebis ?
 Qui sola potes allocutione
 Febrim pellere candido sodali .
 Huc ades , Galatee ; quid moraris ?
 Non Phoebus , mihi crede , filiusve
 Phœbi cantibus hunc levarit ; herbis
 Aut salubribus , æque ut ipse vultu
 Jucundo , & lepida dicacitate .
 Ergo si tibi cura cari amici est ,
 Huc ades , Galatee ; quid moraris ?
 Te vocat domus ipsa , quam solebas
 Joci , & salibus , facetiisque
 Tuis exhilarare : te loquaces
 Lymphæ , te vocat hortulus venustus ,
 Tuæ tam memor irrigationis ,
 Quam lactis memor est tenellus infans .
 Huc ades , Galatee ; quid moraris ?
 Non pandunt nitidæ rosæ per agrum
 Formosos calathos , hiare tardant
 Flores luteolique , cærulique , &
 Albi , & purpurei ; suos honores
 Agellus tibi scilicet reservat .
 Huc ades , Galatee ; quid moraris ?
 Si venis cito , carminum libellum
 Ostendam tibi , quem legens putabis
 Te vesci ambrosia , & tibi repleri
 Ora nectare ; sin mea procellæ
 Ferunt irrita verba , mox jambos
 Exspecta horribiles , amariores
 Felle , absinthio , & omnibus venenis ,
 Quotquot Thessala nutrit ora , quotquot
 Ponti terra creat ; sed eja age eja
 Huc ades , Galatee ; quid moraris ?

I X.

AD BERNARDINUM MAPHÆUM,
ET ANTONIUM MIRANDULAM
DE ALEXANDRO FARNESIO CARD.

GAudete, o lepidi mei sodales,
Omni jam posito timore; venit
Tandem nuntius optimus, patronum
Salvum, & incolumem redire nostrum,
Quem rumor malus Italas per urbes
Divulgaverat esse jam dolore
Confectum lateris, malaque febris,
Dum cinctus legionibus Latinis
Petit Vindelicas tremendus oras.
At tibi male sit, moleste rumor,
Qui nos sollicito diu timore
Vexasti; en cito patriam reviset.
Alexander, & omnium Quiritum
Plausus, gaudia, gratulationes
Latus excipiet, manusque caras
Nobis jam dabitur deosculari.
O pulcherrime Sol, tuo nitente
Curru fer cito moenibus Quirini
Hunc diem niveum, & nimis beatum.

X.

AD HIERONYMUM SERIPANDUM.

Commendo tibi, Seripande magne,
Gulielmum, hominem pium, eruditum,
Et candore animi parem columbæ,
Doctum præterea utriusque linguæ;
Quodque existimo pluris æstimandum,
Pauperem juvenes tamen docentem
Gratis pauperie mala gravatos.
Illum Græcia magna procreavit
Antiqua probitate, moribusque
Dignis Pythagora, virum tuaque
Dignum amicitia: idque ita esse, certo
Sciens, hunc tibi, magne amice, dono,
Virtutique tuæ dico; nec alter
Cliens aptior est tibi, nec ipse
Patronum inveniat sibi aptiorem,

XI.

XI.

AD JOANNEM CASAM.

Disertissime Casa, quem libellum
 Legendum dederas mihi, relegi
 Sæpe, ac sæpius, & tamen legendi
 Is desiderium mihi reliquit:
 Nec mirum; siquidem tuus libellus
 Tam doctus, numerosus, elegansque est,
 Ut scriptus videatur aureo illo
 Sæculo Ciceronis, atque ab ipso
 Divino Cicerone, nec profecto
 Vivet iste minus diu libellus,
 Quam libri Ciceronis; ergo, Casa
 Disertissime, perge, sæculumque
 Nostrum orna aureolis tuis libellis.

XII.

AD MATTHÆUM DANDULUM.

O Brumæ mihi Vere amœniore,
 Quibus, Dandule care, te fruebar,
 Antequam Latium petissem, & Urbem:
 Cum subit mihi candidarum imago
 Illa noctium, & ille prope ignem
 Sermo dulcis, & Attico lepore
 Conditus, lacrimæ effluunt ocellis,
 Ut rivus pluvia frequenti abundans;
 Nec quidquam mihi suave jam videtur,
 Aut videbitur, usque dum redire
 Ad carum hospitium tuum licebit,
 Quod Phœbus pater, & novem sorores,
 Et virtus celebrant, fidesque, honorque.
 At donec procul a tuis ocellis
 Me tenent superi parum faventes,
 Ne, quæso, pigeat meum dolorem
 Te jocis relevare litterarum.
 Quamquam te patriæ, imperique magni
 Cura distinet, est tamen laborum
 Quies, ingenuoque sunt (opinor)
 Isthæc seria temperanda lusu.

XIII.

AD ALOYSIUM PRIULUM.

DUM Canicula fervidis fatigat
 Vos caloribus, ipse valle opaca
 Sedens propter aquam nitentem amœni
 Mefuli, placido fruor tepore
 Veris: attamen hoc, Priule, dicam,
 Et dicam sine fraude, malim aduri
 Ardenti Libyæ, Indiæve ab æstu,
 Quam magni alloquiis carere Poli,
 Qui virtute sua, suoque miro
 Cepit sic animum meum lepore,
 Ut illo sine mella amara, Soles
 Obscuri, nivea atra, ver amœnum
 Horridum mihi sit, diēsque longo
 Anno longior; ergo sic habeto,
 Ut primum potero explicare, quæ nunc
 Me negotia disinent, redibo
 Ad vos Pegaseo ocyor volatu.
 Quod negotia si mihi facessent
 Hæc negotium, & expedire nodos
 Istos non dabitur brevi, relictis
 Nodis, atque negotiis revertar;
 Nam tanti nihil est, velim ut carere,
 Frater optime, te, meoque Polo.

XIV.

AD DONATUM RULLUM.

RULLE candidè, & omnium virorum
 Humanissime, quos abhinc trecentos
 Annos Appula terra procreavit,
 Quod me perpetuis, meosque amicos
 Invas officiis, tuæque semper
 Domus hospitium mihi est apertum,
 In hoc eximie benignitatis
 Clarum das specimen; tibi que grates
 Ago, maxime, maximas, amice,
 Tantis pro meritis, agamque semper,
 Atque habeo; referre namque, ut opto,
 Nec licet modo, nec licebit nunquam.
 At quod nuper amore nostri es ausus
 Tentare, & facere æque amanter, ac si
 Tibi filius, aut pater fuisset,

Id vero & mihi, & omnibus videtur
 Tam magnum, ut tibi debitas referre
 Non possim, aut agere, aut habere grates;
 Non si quidquid ubique gratiarum est,
 Habere, atque agere, & referre possim.

XV.

AD JACOBUM PEREGRINUM.

TUcundissime amicé, cras Tridento
 Discedam cupidus tui videndi:
 Verum ut commodius loquamur, & ne
 Interpellet amicus hic, & ille,
 In tuo volo te Povilliano
 Convenire: videbis ipse, ne quis,
 Linum præter, ibi adsit: hunc adesse
 Non solum, Peregrine, non recuso,
 Sed summe cupio; est enim modestus,
 Et doctus juvenis, mihiq; amicus
 Quam qui maxime; item cavebis illud,
 Ne convivia sint Apicianæ.
 Adsint pullus, & hædus, & recentia
 Ova, illique sales tui, quibus nil
 Usquam falsius, elegantiusve est.
 Hæc si, inquam, affuerint, tuum sodalem
 Jucunde accipies, nimisque laute:
 Nam convivia sumtuosa pejus
 Morte vito; jocos, facetiasque
 Sætor mirifice; tuasque regum
 Verbis præfero collocutiones.
 Hæc ex tempore carmina exaravi,
 Cum Morilla repente, si quid ad te
 Vellem, quæreret: at brevi, favente
 Deo, plurima seria, & jocosa
 Coram; nunc vale, & optimam sororem
 Meo nomine plurimum saluta.

XVI.

AD FERANDUM BRANCATIUM.

TU ne Flaminii putas, Ferande,
 Effluxisse animo tuum leporem,
 Carumque hospitium? ante vel propinquo
 Nabit Pausilypus mari, vel unda
 Sebethi resuens suos adibit
 Fontes, pectore quam meo recedat

Ima-

Imago tua dulcis; atra sensus
 Cum mors abstulerit mihi; manebit
 Illa infixæ animo; tuamque semper
 Virtutem meminisse me juvabit,
 Quod si vota mea audiunt benigni
 Cælites, adero brevi: nec ulla
 Jam res Flaminium hospiti benigno
 Avellet: domus una, & una mensa
 Copulabit utrumque, dum suprema
 Dies separet; interim valebis,
 Nil plane dubitans, Ferande, rebus
 Me tuum omnibus anteferre amorem.

XVII.

AD PETRUM CARNESECUM.

O Dulce hospitium, o lares beati,
 O mores faciles, o Atticorum
 Conditæ sale collocutiones,
 Quam vos ægro animo, & laborioso,
 Quantum cum lacrimis miser relinquo?
 Cur me sæva necessitas abire,
 Cur vultum, atque oculos, jocosque suaves
 Cogit linquere tam venusti amici?
 Ah reges valeant, opesque regum,
 Et quisquis potuit domos potentum
 Anteponere candidi sodalis
 Blandis alloquiis, facetiisque.
 Sed quamquam procul a tuis ocellis,
 Jucundissime Carnelese, abibo
 Regis imperium mei secutus,
 Non loci tamen ulla, temporisve
 Intervalla tuos mihi lepores,
 Non mors ipsa adimet; manebo tecum,
 Tecum semper ero, tibi que semper
 Magnam partem animæ meæ relinquam,
 Mellite, optime, mi venuste amice.

XVIII.

AD UBERTUM FOLIETAM.

I Bis ad patriæ lares beatos,
 Et desiderium tui relinques
 Maximum unanimi tuo sodali.
 Nam quo tempore nostra cara cœpta
 Est amicitia, ex eo medullis

Mihi carior es meis , erisque ,
 Sensus dum mihi erit amoris ullus ,
 Propter ingenium tuum , tuosque
 Mores , & studia artium bonarum ;
 Et stylum Cicerone pene dignum ,
 Et plane Cicerone mox futurum ,
 Vitalis modo sis , Uberte , dignum .
 Ibis tu procul , & tamen manebis
 Meo in pectore fixus , & juvabit
 Idem credere de tuo in me amore .
 Quod te per lacrimas , amice , amaras ,
 Quæ fluunt oculis tuis , meisque ,
 Per , si qua est tibi cura nostræ , id oro ,
 Cito Urbem repete , & tui miselli
 Sodalis miserere , quem relinquis
 In luctu , & tenebris tuo recessu .

XIX.

AD MARIUM BANDINUM .

Quod sum pollicitus tibi , futurum
 Me tecum cito , id exsequar diebus
 Paucis , si mihi faverint benigni
 Cælitæ : reliquum est , ut ipse in urbe
 Interim maneas , agellulumque
 Tuas delicias finas valere ,
 Usque dum veniam , tuoque dulci
 Fruar colloquio , facetiisque .
 Nec Germanicus absit , ille bellus ,
 Et doctus puer , optimoque patre
 Dignus filius : hic mihi trecentos
 Versus Mæonidæ volo Maronis
 Explanet varia locutione .
 Tu Germanica bella , Cæsarisque
 Narrabis mihi clara facta , quorum
 Ipse non quotacumque pars fuisti :
 A me carmina Davidis , Tridenti
 Expressa accipietis , & juvabit
 Hymnos dicere versibus Latinis .
 Decem continuos dies manere
 Tecum cogito ; eaque lege tantum
 Utar hospitio tuo , morari
 Ne plus quam volo , sit mihi necesse ;
 Quod jam præmoneo , satis superque
 Amoris violentiam , impetumque
 Tui cognitum habens ; sed audi , amice ,
 Quam bona hospitibus bonis Homerus

Legem fanciat : Hospitem caveto ,
 Hospes , neve manere , neve abire
 Cogas : in vitio pari est uterque ,
 Urgentem remorans , morantem adurgens .
 Hoc viros decet elegantiores
 Præceptum memori tenere mente ,
 Nec umquam violare ; tu , venuste
 Mari , dum venio , vale meoque
 Fratrem nomine candidum saluta .

XX.

AD LUDOVICUM STROZZAM :

Strozzam Flaminius suum salutat
 Benaci liquidam jacens ad undam
 Sub myrto beneolente , dum superba
 Terit limina principum misellus
 Strozza ; tu ne molesta in Urbe semper
 Inclusus , variis agri beati
 Numquam deliciis fruire ? numquam
 Ruris gaudia noveris ? miselle ,
 Rumpe obstantia claustra , rumpe lentas
 Moras , si sapias , optimumque amicum
 Vise ; hic Virgilium tuum , meumque
 Catullum vacui legemus ; hic tu
 Cultis versiculis canes amœnos
 Hortos , & vitrei lacus decentes
 Nymphas : me cithara bonum Gibertum
 Juvat dicere , cujus hic agellus
 Mihi munere partus ; hunc agellum
 Ille donat habere , quo nec alter
 Baccho , & Palladi gratior , nec alter
 Musis otia , & abditos recessus
 Præbet commodius ; modo hæc benigni
 Faxint propria dona di , talenta
 Cræsi despicio , Midæque acervos .

XXI.

AD PETRUM VICTORIUM .

Victori , tibi plurimum fatemur
 Nos debere , quibus tuo labore
 Hic Aristotelis libellos artem ,
 Et mysteria rhetorum recludens
 Explanatur ita apte , & eleganter ,
 Ut quem ægre unus , & alter cruditus

Intellexerat ante, ineruditi
 Te docente queant labore nullo
 Nunc intelligere; ergo iure cuncti
 Indocti simul, atque docti amamus
 Te de hoc munere, maximasque semper
 Labori tuo, & eruditioni,
 Rhetor maxime, gratias agemus.

XXII.

AD ANTONIUM MASSAM.

ET si Sulpiciis, Catonibusque
 Non cedis gravitate, nec patroni
 Ullius celebrat domum, periade
 Ac tuam populus, tamen caveto,
 Ne supercilio nimis severo
 Lusus molliculos meæ Camœnæ
 Spernas, optime Massa; nam Platonis,
 Quo nemo gravior fuisse fertur,
 Exstant carmina melle dulciora,
 Quæ summa faciebat is senecta,
 Non semper studiis vacans severis.
 Et noster quoque Tullius solebat
 E foro rediens laborioso
 Versus scribere delicates,
 Ut curis animum gravem levaret.
 His auctoribus, ut reor, licebit
 Nugas Flaminii legas ad ignem,
 Cum te garrula turba liberorum
 Dicendi nimio labore fessum
 Ad jocos vocat, & leves cachinnos.

XXIII.

AD CAROLUM GUALTERUTIUM.

QUas agam tibi gratias, quibusque
 Verbis, Carole? qui mei negoti,
 Duri, Juppiter! & laboriosi,
 Procurator, ad exitus secundos
 Rem tam commode, & apte, & expedite
 Duxisti, ut videare par agendis
 Rebus Mercurio Jovis ministro,
 Quem Deum ingenio, eloquentiaque
 Omnes vincere, prædicant poetæ.
 Ergo, candide amice, dum laboras
 Pro me quotidie, otio ipse dulci,

Cupitoque fruor Casertæ in agro ,
 Qui pulcherrimus omnium locorum
 Jure dicitur ; hic bonas precabor
 Musas , ut faciant tibi poema ,
 In quo nomen , honos , tuæque laudes
 Vivant innumerabiles per annos .

XXIV.

AD BASILIUM ZANCHUM.

Iudex cādidè carminum meorum ,
 Quamquam gratulor , & tibi , & faceto
 Arcellæ , quod amore juncti , & una
 Domo , vivitis optime , ac beate ;
 Tamen , si licet intimo sodali
 Verum dicere , nec tacere quidquam :
 Quod absis , doleo , tuique ferre
 Vix desiderium queo ; nec illo
 Torquetur minus optimus Priulus ;
 Nam dulcis tua Musa , comitalque
 Et rara probitas , fidesque utrumque ,
 Sic incendit amore , vita acerba
 Te sine ut videatur , olim utrique .
 Jucundissima quæ solebat esse
 Te præsentè ; quid ergo , care Zanche ,
 Agendum ? an tibi suadeam , relicto
 Arcella ut redeas ? meum ne tanti
 Commodum faciam ? & Priulum , ut illi
 Cui plus debeo pene quam Priulo ,
 Sic incommodem iniquus ? immo , amice ,
 Arcellam cole , ama , nec unguem ab ipso
 Latum , quæso , recede ; quippe inani
 Nos desiderio , tui atque amore
 Vel tabescere malo , quam carere
 Suis deliciis venustum amicum .

XXV.

AD FRANCISCUM TURRIANUM.

PER tui Ciceronis , & Terenti
 Scripta te rogo , Turriane docte ,
 Ut postridie adhuc rubente mane ,
 Cum sæcundat humum decorus almo
 Rore Lucifer , exiens Giberti
 Domo ad me venias equo citato ,
 Ne tibi igneus antevertat æstus .

Hic

Hic fontem prope vitreum sub umbra
 Formosi nemoris tibi parabo
 Prandium Jove dignum; habebis & lac
 Dulce, & caseolum recentem, & ova;
 Et suaves pepones, novaque cera
 Magis lutea pruna; delicatos
 Addam pisciculos, nitens salubri
 Quos alit mihi rivulus sub unda.
 Ad mensam vetulus canet colonus
 Jocosissima carmina, & coloni
 Quinque filiolarum simul choreas
 Plaudent virgineo pede; inde ocellos
 Ut primum sopor incubans gravabit,
 Jucundissime amice, te sub antrum
 Ducam, quod croceis secum corymbis
 Serpentes hederæ, imminensque laurus
 Suaviter foliis susurrat: at tu
 Ne febrim metuas, gravedinemve;
 Est enim locus innocens; ubi ergo
 Hic satis requieveris, legentur
 Lusus Virgilii, & Syracusani
 Vatis, quo nihil est magis venustum,
 Nihil dulcius, ut mihi videtur.
 Cum se fregerit æstus, in virenti
 Convalle spatiamur; sequetur
 Brevis cœna; redibis inde ad urbem.

XXVI.

AD ROMULUM AMASÆUM.

SIC te, Romule, copia beata
 Fandi, & omnigena eruditione
 Vincat Pompilius tuus; benignus
 Sic te sospitet inter arma, divum
 Rex, oro, mihi mitte crebriores
 Posthac litterulas; nec ullus umquam
 Tabellarius huc equis citatis
 Currat Vindelica profectus ora,
 Quin epistolium tuo sodali
 Afferat; neque tu, quid ipse Cæsar,
 Quid Germania Cæsari resistens
 Castris oppositis gerat, labora
 Mihi scribere; nec quid ipse Cæsar,
 Nec Germania quid gerat, labora
 Scire: unum hoc mihi nosse, amice, sordi est,
 Ut Farnesius inclytus laborem
 Duræ militiæ ferat; valere
 Ipsum dic; nihil amplius requiro.

XXVII.

XXVII.

AD ADAMUM FUMANUM.

CUM, Fumane, tuus, meusque nuper
 Scripsisset mihi Turrianus, omnes
 De tua medicos salute parvam
 Jam spem habere, dolor meam occupavit
 Sic mentem, ut fugeret quies ocellis,
 Nec fendi modus ullus esset; ergo
 Tam bonum mihi mors acerba amicum,
 Prima surripiet juventa? amicum
 Quo nec candidior fuit, nec alter
 Erit; cui dederat loqui rotundo
 Ore pulcher Apollo, sive Græcos
 Versus conderet ille, seu Latinos.
 Hæc, & quæ dolor improbus querenti
 Suggerebat, amice, sum locutus,
 Vix parcens superis; sed ecce læta
 Venit littera nunc, tuæ salutis
 Felix nuntia, qua meum revixit
 Cor, ut flosculus igne semivivus
 Solis, quem reficit benigna Luna
 Rore frigidulo; nec ulla mater
 Natum depositum videns deorum
 Dono restitui, magis triumphat
 Gaudio. Bone Juppiter, benigno
 Quem tu numine janua rapacis
 Nunc Orci eripuisti, eundem eodem
 Serva numine plurimos in annos.

XXVIII.

AD BONIFACIUM BIVILAQUAM.

DE ne ne male sentias, amice,
 Quod te visere proximis diebus
 Cum proclive foret facillimumque,
 Id tamen minime egerim; per agros
 Tuos, & medios quidem ambulavi
 Ad Camillum adiens meum; sed oro,
 Qua possem ratione suspicari,
 Agros esse tuos, tuamque villam,
 Quam vidi procul eminentem? amice
 Candidissime, tale si quid unquam
 In mentem mihi venit, aut venire
 Quivit, mente tua effluam, meique

Fias nominis immemor, nec umquam
 Jucunda amplius allocutione
 Digneris tenerum tuum sodalem;
 Quod foret mihi acerbius vel ipsa
 Morte, siue quid esse morte acerba
 Potest sæuius; est enim leporis
 Tanta vis tui, & intimas medullas
 Ita incendit amore, ut ardeam æque
 Totus, ac juvenis decore capta
 Virgo candida suscitantis imo
 Flammam in pectore, quam nec imber alto
 Cælo præcipitans, nec ulla jam quit
 Unda extinguere; non si amara Tethys
 Ardentem Oceani obruat procellis.

XXIX.

AD CHRISTOPHORUM LONGOLIUM.

DUM tu Naugerio, optimoque Bembo,
 Longoli, fruëris, tuique Tulli
 Laudes æquiparare tendis, ipse,
 Ubi molibus arduis ad astra
 Se tollit Genua, hortulis amœnis
 Abditus Stephani mei tuique,
 Nunc Aristotelis lego libellos,
 Cælestem sapientiam, virique
 Mirans ingenium: modo ad Catulli
 Dulces versiculos relapsus, inter
 Argutas volucres cano sub umbra
 Silvæ lauricomæ jacens: modo ipse
 Ludo carmina, qualia in Lycei
 Nigris saltibus Arcades canebant,
 Antequam fera gens profecta ab oris
 Incultæ Scythiæ præcul Menalcas,
 Tityrosque fugaret; ipse vero
 Saulius, tua dum laborat ire
 Per vestigia, Tullium urget, uno
 In illo stupet, & nimis beatum,
 Longoli, putat esse te, benignus
 Cui dat Juppiter esse tam propinquum
 Scriptori egregio. Ast ubi remisit
 Æstus, nec querulis sonant cicadis
 Arbusta amplius, igneusque jam Sol
 Abit; nos pelagi propinqui ad undam
 Imus; hic scopulo sedens uterque
 Pisces caprat arundine, & videre
 Cymbas purpureo mari volantes

Juvat. Flaminii tui, tuique
 Sauli, candide amice, vita qualis
 Sit, vides: ea si placet, venito,
 Et vitæ cumulum addito beatæ
 Tui Flaminii, tuique Sauli.

XXX.

AD DOMINICUM SAULIUM.

Quod virtus tua maxima invidorum
 Telis objicitur, dolere, Sauli,
 Numquam desino pro meo vetusto
 In te amore, tuaque perpolita
 Doctrina, & bonitate singulari:
 Idem gratulor intuens tumultu
 In tanto placidam tuam quietem,
 Dum mente intrepida impetum furentis
 Fortunæ toleras; sed ipsa tandem
 Innocentia vincet, & repulsis
 Cernes criminibus tuam micare
 Famam, ut nubibus hinc & hinc fugatis
 Sol ardet radians nitente luce.

XXXI.

AD PETRUM CARNESECUM

DE EMANUELE CHIO MEDICO.

Dî boni tua vôtâ, Carneſcece,
 Audivere, fugit ſticuloſa
 Febris, & redit ad meos ocellos
 Quies, & cibus incipit juvare,
 Et Bacchi minus eſt latex amarus;
 Et, quod lætitiâ meâs adauget,
 Me Chius medicus fricatione,
 Et viſtu tenui levat; remotis
 Omnium medicaminum venenis,
 Queis languentia membra deteruntur.
 Ipſe utrum melior, peritiorve,
 Sit plane dubites: benigniorem
 Non certe invenias, pecuniâve
 Curantem minus, & ſuis medetur
 Ægrotis ita amanter, ut parentes
 Aut nati, aut videantur eſſe fratres.
 O Chium medicum bonum, atque ſuavem,
 Et tibi, inclyte Coe, comparandum!

XXXII.

XXXII.

AD PHILIPPUM GERIUM.

Quid rerum geris, o venuste Geri?
 Num cessas? tibi nil minus profecto
 Convenit, bona quem Talia parvum
 In sinu erudit suo, deditque
 Vatum florea prata pervagantem
 Versus fingere melle dulciores.
 Quod si scribis, ut arbitror, tuumque
 Maronem celebras, ad astra iustis
 Ferens laudibus, aureosque mores,
 Virtutesque viri paras in ævum
 Æternare, facis quidem, quod est te,
 Et tua pietate dignum: at illud
 Indignum nimis, & nimis molestum,
 Quod celas, neque me, ut soles, amice,
 Oblectas lepida tua Camœna.
 Quare per tuum Apollinem, tuamque
 Musam, & Mœonidem sacrum, & Maronem
 Oro, si quid habes, bona sodali
 Mitte, nil mihi gratius, magisve
 Nostro feceris hercle amore dignum.

XXXIII.

AD OCTAVIUM

COGNOMENTO PATREM.

Octavi Pater, ad Viterbiensem
 Secessum venias, rogamus omnes;
 Polus, Parpalias, Priulus, ipse
 Tuus Flaminus; nec esse Romæ
 Tutum est, cum rapidus caniculari
 Æstu Sol furit, & Viterbi in urbe
 Jucundo fruimur tepore veris
 Æstate in media, nec ulla certe
 Est salubrior ora, nec sodales
 Tui habes, mihi crede, amantiores
 Usquam; te licet elegantiorum
 Nemo non amet unice, colatque.
 Cur ergo, Pater, huc venire cessas?
 Num te illa innumerabilis librorum
 Tenet copia curiosum? habebis
 Et hic Græca volumina, & Latina,

Qua

Quæ lassare valent decem otiosos
 Plinios ; licet usque , & usque & usque
 Noces , atque dies legas , ut hercle
 Facis , (ne dubita) tamen novorum
 Haud te deficiet librorum acervus .
 Ergo rumpe moras , Pater venuste ,
 Mellite , optime , nec tuos sodales
 Contemptos habe ; amore vinci ab ullo
 In primis tibi turpe , quem fatentur
 Exemplum memorandum amoris omnes .

XXXIV.

AD LUDOVICUM BECCATELLUM .

SI recte tibi , Ludovice care , est ,
 Gratias ago dis , at esse recte
 Qui potest ? brevis hora si quieti
 Vix unquam datur , & bonis libellis ,
 Quibus nil tibi carius , salutem
 Multam dicere cogaris , nec agri
 Licet delicias tui videre .
 Sed dic , optime amice , quis laborum
 Tandem finis erit ! vides capillum
 Jam canescere , jam senecta frontem
 Rugis incipit exarare , nec tu
 Vivere incipis ? an manum rapacem
 Dnm Mors injiciat tibi repente
 Exspectas ? miser , ah miser , fugaci
 Vitæ consule , & Urbe derelicta ,
 In tuo requiesce tandem agello .

XXXV.

AD NICOLAUM ORMANETUM .

Quid , o candide amice , semper ista
 Juvat vivere in Urbe , cursitando
 Nunc per limina principum superba ,
 Nunc subsellia judicum terendo ?
 Ormanete , fugit levis juventa
 Ventis ocyor , & subit senectus
 Curva , quam sequitur serox tenebris
 Mors operta ; nec illius furorem
 Arcet nobilium favor : clientem , &
 Patronum rapit illa ; amice , quæso ,
 Vive , dum licet , otioque dulci
 Ruris elue amara civitatis .

Si gustare mei semel quietem
 Agelli potes, & periclitari;
 Quam sit suave, tumultuosa ab Urbe
 Semotum sibi vivere, otiosa
 Numquam sit mihi vita, ni potentum
 Fortunaeque, domosque, gratiamque
 Arbitrabere vix pili aestimandas.
 Tunc dices, Nihil est profecto mirum,
 Meus Flaminius quod esse laetus
 Fortuna exigua, brevique censu
 Audet, nil populi leves honores
 Curans, nil rutilos Midarum acervos.

XXXVI.

AD RAYMUNDUM TURRIANUM

De Francisco Fratris ejus Filio.

VEnimus, bone Turriane, ad Urbem
 Salvi, & incolumes, nec ulla passi
 Vix incommoda; verum in Urbe posthac
 Salvi, & incolumes utrum futuri
 Simus, nescio; nam tremit tumultu
 Tellus Romula maximo: propinquat
 Miles barbarus, & ferox minatur
 Cadem, incendia, nec satis videmus
 Tantorum effugium periculorum.
 Sed cum multa animo meo recurrant
 Molestissima, nil ita ad dolorem
 Accidit grave, ut hic videre fratris
 Tui filium; acerba sic ne fata
 Tulisse, ut puer hic ad Urbem adiret
 Isto tempore tam periculoso?
 Me ne, quod nimis ingravat dolorem,
 Exstitisse protectionis hujus
 Auctorem? bone Juppiter, malorum,
 Quidquid huic puero imminet, redundet
 In meum caput, obsecro, quid iste
 Puer commovit? puer bonarum
 Cura Pieridum; puer Catullo
 Suo municipi futuris olim
 Par, aut major; & hunc, Apollo sancte,
 Sines ludibrium esse barbarorum?
 Huc ades, bone dive, seu fluenta
 Xanthi, seu retinent amoena Cinthi
 Te juga; huc ades, o pharetra & arcu
 Insignis; fera fata si Quirini

Frass. Carm.

K

Urbem

Urbem evertere destinant, miscellum
 Ah saltem puerum tuum, tuumque,
 Oro, Flaminium tuere; uterque
 Est tuus famulus; uterque se se
 A primis tibi dedicavit annis,

XXXVII.

AD HONORATUM FASCITELLUM.

Fascitelle, quid otio in beato
 Distavit tibi roscidis sub antris
 Musa candida? nil soles profecto
 Umquam scribere laurea corona
 Non dignum. Ipse miser tumultuosa
 Urbe detineor: tibi benignus
 Dedit Iuppiter in remoto agello
 Latentem placida frui quiete,
 Inter Socraticos libros, & inter
 Nymphas, & Satyros, nihil profani
 Curantem populi leves honores.
 Verum, siue aliquid Marone dignum
 Pangis, siue modis Horatianis
 Juvat ludere, quidquid est, sodali
 Tuo mitte, alii sibi, atque Musis
 Scribant: tu cave, carmina oculus, quæ
 Digna sunt medio legi theatro.

XXXVIII.

AD BLOSIUM PALLADIUM.

Plurimam Blofio suo salutem
 Dicit Flaminus malus poeta
 Omnium lepidissimo poetæ.
 Quæ tu carmina per jocum, atque lusum
 Scripsisti ad Jovium bonum sodalem
 Jucunde, lepide, facete, amanter,
 Non sunt Flaminio malo poeta
 Digna carmina, sed tuo Catullo,
 Quo nil falsius, elegantiusve.
 Nam nec tam similem suo gemello
 Gamellum peperit venusta Leda,
 Es tu quam similis tuo Catullo.

XXXIX.

AD JOANNEM FRANCISCUM BINUM.

Quid Horto, bone Bine, qui solebat
 Plura carmina quam rosas, & herbas
 Olim fundere, contigisse dicam?
 Cur ex garrulo, & eloquente factus
 Jam sit Harpocrates; tamen nec illi
 Defunt lilia, nec rosæ: ille grandes
 Lascucas habet, ocymumque: tortus
 Abundat cucumis, rubent ubique
 Fraga: quin & apis levi susurro
 Illum provocat ad canendum; at ipse,
 Quasi grandine verberatus esset,
 Aut sur omnia sustulisset, odit
 Jocum, & carmina; scilicet sequuntur
 Mores & domini instituta servi.
 Dom tu carmina, Bine, amasti, & Hortus
 Ipse carmina amavit, at simul tu
 Lucrum versibus esse præferendum
 Putasti, Hortus item studet lucello,
 Et se divitibus locat, merasque
 Nugas carmina, ineptiasque ducit.
 At tibi male sit, malum lucellum,
 Musæ perniciēs, malum lucellum;
 Tua certe opera bonis, facetisque
 Horti carminibus diu caremus.

X L.

AD BERNARDINUM MAPHÆUM.

Maphæe unanimis mihi sodalis,
 Si quid de domini tui, meique
 Salute est tibi nuntiatum, amabo
 Fac me participem; malamque curam,
 Quæ affixa interioribus medullis
 Noctes, atque dies edit misellum,
 Aufer. Vindeliciis enim feruntur
 Nuntii lacrimabiles ab oris
 De febris assidua, & periculosa
 Farnesi; o nimium mihi molesti
 Nuntii, mala tanta qui minantur!
 Quod si quid melius tuæ capite
 Ferent litterulæ, metumque tristi
 Absterges animo, tibi rependent

Centum versiculos meæ Camœnæ ,
 Qui testentur ubique , dum licebit
 Ipsis vivere , nil fuisse magni
 Farnesi mihi carius salute .

XLI.

AD PETRUM VIPERAM .

Fortunate senex , senex beate ,
 Quo te carmine prædicare possim ?
 Fst domus tibi parva , sed supellex
 Munda , lectulus elegans , tabellæ
 Quæ suis oculos vel erulitos
 Figuris teneant , cubiculumque
 Ornatum satis , & satis librorum
 Magna copia , qui bene , ac beate
 Docent vivere , mensa pura , victus
 Simplicissimus ; est tibi fidelis
 Minister , vetulus sodalis idem ,
 Qui cum fallere tempus , & jocari
 Soles suaviter ; est enim facetus
 Senex , blandus , amabilis , disertus .
 Hæc ad commoda tam beata magnum
 Adjungit cumulum hortulus venustus ,
 Quem vir Corycius senex agello
 Suo præferat , omniumque dicat
 Pater Nausicæ hortulorum ocellum .
 Adde , quod viridis tibi senectus ,
 Quod mens candida , candidique mores :
 Quod sestetia quinque ab Urbe missa
 Sunt satis tibi singulos per annos .
 Absit ambitio , timorque leti ,
 Et quidquid miseram facit senectam ;
 Nam Deo pietas amica , vitæ ,
 Et morti bona cuncta pollicetur .
 Fortunate senex , senex beate ,
 Quo te carmine prædicare possim ?

XLII.

AD HIERONYMUM BAGIUM ,

CUM tot sustineas , Bagi , labores ,
 Tot negotia nostri amore , quidnam
 Pro tantis meritis tibi rependam ?
 Unum hoc scilicet , elegantiarum
 Ut patrem omnium , & omnium leporum

Domi

Domi convenias, eique dicas
 Meo nomine plurimam salutem.
 Quis iste, unde, ubi sit, requiris? hic est
 Optinus Galeatius; Sueffa
 Quem ferax genuit, tenent Penates
 Nunc tuæ patriæ, & domum frequentat
 Moroni egregii; ille te benigne
 Amplexabitur ut meum sodalem:
 Id primo; ast ubi vir bonus venustos
 Et mores faciles tuos parumper
 Gustarit, geret in suis ocellis
 Tuo nomine te; nec alter illi
 Erit carior; hinc senex habebit
 Maximam mihi gratiam, ipse, quidquid
 Tibi debeo, persolutum abunde
 Arbitraberis, & simul putabis
 Me tuum insuper esse creditorem.

XLIII.

AD MARIUM GALEOTAM.

TU ne, docte Mari, tuo sodali
 Potes consulere, ut suas ineptas
 Nugas edat, & ora per virorum
 Vagari sinat? Actio ne vestro
 Me contendere vis? ego, inquam, amice,
 Postquam is carmina tam venusta, tamque
 Polita edidit, audeam libellos
 Meos edere? nonne, quæso, id esset,
 Olori obstrepere anserem? sit ergo
 Satis, si tibi, candidisque amicis
 Lusus putidulæ meæ Camœnæ
 Ostendo, nihil est mihi timendum,
 Dum sese mea continet Camœna
 Istis finibus: at venire in ora
 Si vulgi audeat, ah nimis misellum
 Tuum Flaminium / boni poetæ
 Quem Aquinum, Bavium, & sui venenum
 Sæcli, atque opprobrium esse prædicabunt.

XLIV.

AD BLOSIUM PALLADIUM.

LEporum pater & facetiarum,
 Blofi candide, cernis, ut profundum
 Tuis hendecasyllabis jocosis

Veternum excutias meæ Camœnæ ?
 Quæ jam dedidicit loqui Latine ;
 Et pedes reperire , quæis venusti
 Currunt versiculi , sonosque dulces
 Portant auribus eruditiorum .
 At tu quidquid id est ineptiarum ,
 Quod mitto tibi , per tuam Turundam ,
 Per sales , joca , tinnulos cachinnos
 Festivæ comites dicacitatis ,
 Per tuos , precor , Atticos lepores ,
 Ne prodire sinas in ora vulgi ,
 Jucunde , unanimis , venuste amice .

XLV.

AD LUDOVICUM CANOSSAM.

ROgas ut veniam , Canossa , ad agri
 Tui delicias , & eleganter
 Describis mihi prata , villam , & hortos ,
 Et fontem , & fluvium , nemusque opacum .
 Hæc sunt maxima , maximeque possint
 Quemvis allicere : at nihil profecto
 Me tuo magis allicit lepore ,
 Et tua bonitate singulari ;
 Quæis ita afficior , patrone magne ,
 Ut tunc denique vita cara , dulcis ,
 Vitalis mihi sit , tuis adesse ,
 Cum possum alloquiis , daturque tecum
 Cœnare , & legere , & deambulare .
 Ergo , si mihi Dî favent , omisiss
 Curis omnibus ad tuum volabo
 Garzianum , ubi primum amabilis lux
 Rebus reddere cœperit colorem
 Die postero ; interim valebis .

XLVI.

AD FABRITIUM BRANCUTIUM.

FAbriti optime , qui manu eleganti
 Scribis carmina , quæ Camœna distat
 Singulis mihi noctibus , quietem
 Dum terris sopor irrigat , quid ipse
 Quid pro te faciam ? Deos rogabo ,
 Ut qui carior est tuis ocellis
 Tibi Tullius , is suum in loquendo
 Leporem , ingeniumque , copiamque
 Inspiret tibi , nobilemque , & illam

Scri-

Scribendi variam optimamque formam
 Det effingere sic ut esse cunctis
 Tullius videre, Tullianus
 Qui jure omnibus esse nunc videris.

XLVII.

AD HIERONYMUM PONTANUM.

Quod, Hieronyme, patriis ab oris
 Corneliq̃ Foro procul remotus,
 Nunc urbem maris incolo Hadriani
 Reginam, modo Romuli superbas
 Arces præfero, vel venusta rura
 Casertæ, nihil est profecto, cur me
 Amantem patriæ parum arbitrere.
 Ante urbes alias, & ante me ipsum
 Illam semper amavi, & usque amabo,
 Dum sensum mihi cælites amandi
 Concedent; itaque ipsa magnitudo
 Amoris facit, ut carere malim
 Optata genitrice, quam videre
 Illam armis, odiisque sævientum
 Natorum laniatam; Acerba fata
 Cives præcipites agunt, nec ulla
 Tangit cura parentis efferatas
 Mentis; cur igitur colam paternos
 Lares? num ut videam meis ocellis
 Vias sanguine civium meorum
 Manantes, & ubique testa sævo
 Igne ardentia? quin meas ad aures
 Nefanda hæc scelera impiaque cædes
 Quando perveniunt, abire ad Indos,
 Et ultra Oceanum opto, quo nec ipsum
 Nomen dulce mihi, simulque amarum
 Corneli penetret Fori, nec ulla
 Ruentis patriæ venire possit
 Fama, quæ mihi sic acerba, sic est
 Tetra, atque horribilis, Deos ut hercle
 Noctes, atque dies rogare pergam,
 Vel servent patriam meam, vel ipsi
 Dent mihi subita perire morte.

XLVIII.

AD VINCENTIUM GERIUM.

Ergo, candide Geri, abire certum est?
 Tu ne, quem mihi luce cariorem

Pecerunt lepidi, bonique mores,
 Abibis procul, & procul manebis
 Semper? o mihi rem gravem, atque acerbam?
 Cur, ah cur, superi, meos amicos
 Aut exstinguitis, aut meis oculis
 Vivos surripitis? perire malim
 Profecto, mala quam videre tanta.
 I felix tamen, i, veniste Geri,
 Et solare tuam bonam parentem,
 Quæ desiderio tui misella
 Tabescit; nimium diu misella
 Caret deliciis suis, facitque
 Vota vix numeranda pro cupito.
 Filii reditu; Sed, o tenella
 Mater, flebilibus modum querelis
 Pone; jam venit, en venit venustus.
 Ad te filius, atque cum venustus
 Virgini sociabis, & venustam
 Videbis sobolem brevi, & juvabit
 Sæpe dicere balba verba parvis
 Anum cum pueris, puellulisque;
 Et cum venerit hora jam suprema,
 In nati gremio beatam vitam
 Finies, satis & super nepotum
 In turba numerosa adhuc superstes.

X L I X.

AD M. ANTONIUM FAITAM

De Morte Victoria Columnæ.

MARCE, cui citharam dedit canorus
 Apollo, citharam cape, aureumque
 Plestrum, & Flamini tui dolorem
 Leva, quem capit ex suæ Columnæ
 Acerbo interitu. Hei mihi, Columna,
 Omnes lætities meas ad unam
 Exstinsi moriens! Columna, morte
 Tua, reddita vita leto amaro
 Mihi tristior est; nec ulla cordi
 Jam quies datur, ex quo acerba fata
 Te mihi eripuerunt; o mearum
 Curarum requies, tuo licebat
 Dum sermone frui, tuisque sanctis
 Ægram colloquiis levare mentem!
 At tu, candide Marce, si qua nostri
 Tangit cura animum tuum, experire,

Num

Num cantu citharæ tuæ sonoræ
 Infandos animi mei dolores
 Temperare queas ; amice dulcis,
 Paullisper recrea misellum amicum :
 Sic Phoebus pater , & novem sorores
 Ament te mage quam suos ocellos :
 Sic cedat tibi magnus ille Arion ,
 Omni Nereidum choro stupente ,
 Quem pisces placido tulere ponto
 Curva ad littora Tænari canentem
 Lyra carmina eburnea , furentes
 Quæ maris requiescere procellas ,
 Et duros scopulos movere possent .

L.

AD TRIPHONEM BENTIIUM .

O Dentatior & lupis , & apris ,
 Et setosior hirco olente , & idem
 Tamen deliciæ novem dearum ,
 Quæ silvam Aoniam colunt , & idem
 Amores boni Apollinis , quot , oro ,
 Epigrammata post meum recessum
 Distarunt , bone Benti , & iste , & illæ
 Suis deliciis , amoribusque ?
 Nam quidam meus , & tuus sodalis
 Tridento veniens , ait trecenta
 Te vel plura Epigrammata incitatum
 Plusquam Pierio furore nuper
 Effudisse , quibus vel ipse cedat
 Meus Naugerius , mensque Bembus .
 Quæ si sunt mihi nuntiata vere ,
 Plurimum tibi gratulor : sed idem
 Irascor tibi non minus , quod isthæc
 Celas Flaminium ; sed heus amice
 Num reddit furor iste te superbum ? &
 Nos vates minimi videmur esse
 Indigni , quibus hæc legenda mittas ?
 Sed contra , furiose , sic habeto :
 Musarum furor haud facit superbum ,
 Sed comem , & facilem : vide ergo , Benti ,
 Ne tuus furor iste sit cerebri ,
 Qui feros facit & malos poetas .

L I.

AD HIERONYMUM FRACASTORIUM.

Fracastori venerande , cui medendi
 Usum pulcher Apollo , carminisque
 Artem donat habere , nonne cernis ,
 Tuum Flaminium perire dira
 Tabe ? non recreat cibus misellum ;
 Non grata vigiles quiete ocelli
 Teguntur ; macie vides suprema
 Corpus confici , ut umbra inanis esse
 Jam plane videar ; modisque miris
 Pallor occupat ora ; languidosque
 Artus vix traho ; nec juvare possunt
 Dulci carmine candidæ Camœnæ ,
 Nec blando alloquio boni sodales :
 Ipsa sed mihi lux amara , & atræ
 Noctis tempora sunt amariora
 Felle , & Thessaliæ malis venenis .
 At tu , candide amice , vel sodali
 Fer tuo auxilium , vel ipsa morbi
 Si vis tabifici recepta venis ,
 Humanis opibus , magistræ & arti
 Nescit cedere , carminum tuorum
 Lepore advoca Apollinem , rogaque ,
 Ne prima miserum finat juventa
 Tam crudeliter interire : cur ah
 Cultorem patitur suum sub ipso
 Flore ætatis abire mœstum ad umbras
 Pallentes Erebi ? quid ergo prodest
 Ipsi , & Aoniis suis puellis
 Cuncta posthabuisse ? quidve prædest
 Vita puriter acta ? nunc misello
 Nunc o subvenias , Apollo sancte ,
 Et preces teneri tui poetæ
 Audi dexter ; opaca sive Cynthi
 Umbra , sive Heliconii recessus .
 Te teneat nemora aureo sonantem
 Plectro carmina , quæ beata lauri
 Discit silva , ades o Deum voluptas ,
 Ades numine dextro , & imminentem
 Orcum jam capiti meo repelle ;
 Ut Fracastorius ob suum sodalem
 Salvum , & incolumem tibi rependat
 Mille carmina , te canens , tuamque
 Matrem ; & virgineos tuæ sororis

Mores ,

Mores , & studia , & pharetram , & arcum , &
 Currum noſſivagum aurea inter aſtra ,
 Quo ſe candida diva fert Olympi
 Per campos , lavis ipſe cum rubente
 Feſſas Oceano tuas quadrigas .

LII.

AD HIPPOLYTUM ATESTINUM

CARDINALEM.

CLara ſemideum propago avorum ,
 Romani decus inclytum Senatus ,
 O ſi præteritam mihi juventam
 Di magni referant , oloris inſtar
 Cum vox dulce ſonans ſuebat ore
 Gaudens Æolio ſacrare verſu
 Heroum benefaſta , non mehercle
 Indiſtas ſinerem tuas canendo
 Laudes ; te mea Muſa dulcis omnes
 Ferret per populos , tuumque nomen
 Aſtris infereret ; ſed alba utriſque
 Serpens temporibus ſeneſta cantum
 Abſtulit mihi , ſpiritumque , Phœbi
 Munus , in vacuas fugavit auras .
 Quare ne tenuem tuos honores
 Jam factus nimium malus poeta ,
 Illos ſuſpiciam , pater , ſilendo .

LIII.

AD LÆLIUM , ET HIPPOLYTUM

FRATRES CAPILUPÔS .

FRatres optimi , & optimi poetæ ,
 Nec minus boni amici , & iidem amati
 Ob mores lepidos , & elegantes
 Amicis mage , quam ſuas puellas
 Læſivi juvenes amant , quid , oro ,
 Quidnam conſilii datis ? ſolemus ,
 Ut fit , ludere verſibus , remiſſo
 Nonnumquam ſtudio ſeveriore .
 Hos verſus alii probant , eoſdem
 Improbant alii : ipſe , utris habenda
 Fides , nescio ; ſed fidele veſtrum
 Sequar conſilium , boni ſodales ,

Quos docti merito hujus eruditi
 Ævi Quintilios solent vocare.
 Ergo mitto mearum ineptiarum
 Partem: vos legite, atque utrum relinquam
 Hoc ludi genus, an sequar, monete.

M. A N T O N I I
 F L A M I N I I
 C A R M I N U M
 L I B E R S E X T U S .
 A D A L E X A N D R U M F A R N E S I U M
 C A R D I N A L E M .

I.

FARNESI inclite, forsitan videbor
 Jure stultus, ineptus, impudensque
 Ausim qui tibi semper occupato
 Meis versiculis molestus esse.
 Verum ad jugera multa, quæ dedisti
 Agri fertilis, id mihi, patrone
 Magne, addas, rogo, munus, ut pusillum
 Hoc meæ pietatis, atque amoris
 Pignus accipias; neque esse possum
 Ingratus, neque dī boni dederunt,
 Ut possem meliusve, apertiusve
 Id ostendere, quam tibi libellum
 Hunc si mitterem; id ipse ne recusa
 Boni consulere, & tuum clientem
 Perge, ut hastenus, obsecro, tueri.

II.

A D M U S A S .

UNde hic tam novus advenit
 Ardor? quove mihi mens trepidans abit?
 Jam jam moenia Romuli,
 Et costus hominum linquere gestio.

En

En dulcis Polyhymnia
 Phebeos iterum me rapit ad specus,
 Et pulsare jubet diu
 Desuetam Æolio pectine barbiton.
 Ut fontes mihi Thespios,
 Et Cirrhea libet antra revisere,
 Silvamque Aoniam, pater
 Quam Phœbus tenet, ac virgineus chorus
 Nympharum, citharæ quibus,
 Et permixta placent carmina tibiis!
 O dextro mihi numine
 Adsis, superum deliciae! haud ego
 Iram fortis Achillei,
 Vel Grajis jaculantem Hecloa puppibus
 Ignem, aut terrigenum impia
 Titanum cupio dicere praelia:
 Farnesi decus inclyti
 Alis Pindarici tollere carminis
 Ad cæli vaga sidera
 Fas sit, Pierides; tunc licet ultima
 Parcæ fila legant mihi,
 Vivet nemo mea sorte beator.

I I I.

 AD STEPHANUM SAULIUM,
 ET ULISSEM BASSIANUM.

SSAULI candide, tuque Bassiane
 Mi dulcissime, numquid, oro scitis
 Vestrum Flaminium repente factum
 Ditem, jugera magna possidere
 Agri fertilis, & domum venustam
 Divini juvenis benignitate?
 Me Farnesius inclytus beavit,
 Et musas colere otiumque dulce
 Jussit; quas igitur referre grates
 Dignas, quas agere, aut habere possim?
 Nullas scilicet; at licebit hercle
 Virtutesque tuas, tuasque laudes,
 Farnesi venerande, prædicare.
 Quod si det mihi spiritum benignus
 Pater Castalii chori, & canenti
 Vires sufficiant, profecto vives
 Semper in lepidis meis libellis,
 Dum vivent monumenta litterarum.

I V.

IV.

DE SAXIS ROMÆ NUPER REFERTIS .

HÆc saxa publicis notata litteris ,
 Quibus triumphî consulesque origine
 Ab ultima indicantur ad novissimam
 Octaviani Cæsaris diem , tibi
 Farnesius Alexander e Fori eruta
 Altis ruinis , magna Roma , dedicat ,
 Ut sint decusque , civiumque acerrima
 Ad æmulandam gloriam incitatio .

V.

DE LIBERALITATE

ALEXANDRI FARNESII CARDINALIS .

Dilectus Phœbo , & Musis , sed pauper Iolas ,
 Et semper domini pascere suetus oves ,
 Nunc dives pecoris Farnesi munere factus ,
 Factus & illius munere dives agri ,
 Divino juveni meritis pro talibus ipsam
 Et vocem , & calamos , ingeniumque dicat .

V I.

AD AGELLUM SUUM .

UMbriferæ platani , & formosæ cyparissi ,
 Antraque muscosis roscida pumicibus ,
 Non mea vos Nymphas resonare docebit avena
 Amplius : ad cantum me vocat alter amor .
 Farnesi virtus mihi dulcem in pectore flammam
 Suscitât : hunc ignem dulcis avena canet .
 Vos nomen juvenis divini discite : laudes
 Semper & illius , pulcher agelle , sona .

V I I.

AD ALEXANDRUM FARNESIUM .

Farnesi , nomenque tuum , laudesque sonabit
 Hoc nemus , & culti vallis amoena soli ,
 Dum potero meminisse , tuo quod munere dives
 Musas , & Musis otia grata colo .

VIII.

VIII.

A D E U M D E M.

HAs tibi odoratas, Farnesi magne, corollas
 Mittit ab Aonio candida Musa jugo,
 Quod carum Nymphis tua virtus ditat Iolam
 Restituens patrii dulcia rura soli.
 Hæc cape nunc, majora dehinc habiturus: Iolæ
 Tu modo præsentî numine semper ades.

IX.

A D E U M D E M.

PAuperies, hominum fera pestis, & ira deorum
 Excruciare malos nata, bonosque simul,
 Quære alias sedes; nam te Farnesius heros
 Amplius in nostra non sinit esse domo.
 Ecce venit properans pleno lætissima cornu
 Copia, quam sequitur dulcis & alma Quies.
 Illa timere famem diram vetat: altera mandat,
 Ut Phœbo, & Musis otia digna colam.
 Magnus Alexander, magna hæc qui donat habete,
 Jure mihi magni numinis instar erit.

X.

A D E U M D E M.

NE mea, Farnesi, properent ad carmina Nymphæ,
 Neve meas curet Pan Tegeæus oves,
 Si mea te præter cantabit fistula quemquam,
 Si mihi non magni numinis instar eris.
 Et merito; mihi solus enim facis otia, solus
 Tristitiam longe, pauperiemque fugas.

XI.

AD BERNARDINUM MAPHÆUM.

PONE modum, Maphæe, tuis hortatibus, & me
 Scribendi finem jam finito facere.
 Non ego sum Musis inimicus: semper amavi
 Hæc studia, & magno semper amore colam;
 Sed veluti solitus cursu prævertere ventos,
 Atque referre domum præmia fortis equus
 Deficit,

Deficit, infirmæ cum sensit damna senectæ,
 Et genua amissis viribus ægra trahit:
 Sic ego, qui doctis solitus certare poetis
 Dulcia Musarum præmia sæpe tuli.
 Nunc sessus jaceo morbo gravis, & gravis annis:
 Ad bona nec vires carmina sufficiunt.
 Hæc est ingrati iustissima causa silenti,
 Hoc, Maphæ, mihi nomine danda quies.

XII.

AD HIERONYMUM SAULIUM

Pontificem Bari.

SI quid de Stephano tuo, patrone
 Dulcis, est tibi nuntiatum, id oro
 Ne celaveris; an febris laborat
 Ille, ut rumor ait, procul paterna
 Domo, affinibus, & bonis amicis?
 O Deus mihi si quis addat alas,
 Ut volem citus ultimas ad oras
 Galliæ, quibus is jacere fertur,
 Ipsi ego omnia fratris, & parentis
 Præstarem officia; & juvaret una
 Mori & vivere; nam quid esse gratum
 Queat te sine, amice amate nobis,
 Quantum vix Pylades Orestem amavit?
 Sed quidquid metuo, ferant procellæ
 Ad Parthos, Arabasque; tuque Sauli
 Alterum Genus decus, clientem
 Bonum si quid amas, tuis iubeto,
 Quidquid de patruele nuntiatur,
 Id dicant mihi: sic superba Roma
 Jam solvat tibi debitos honores.

XIII.

AD MATTHÆUM DANDULUM.

CAre Dandule, quid moraris? æstas
 Maturare jubet propinqua: verum
 Ni fallor, tibi Paulla dulcis uxor.
 Has moras facit; heu misella! solam
 Domi te ne manere? te videbis
 Numquam Sol oriens cadensve lætam,
 Dum conjux abierit capitus; & cum
 Lassulam excipiet torus, doloris

Non

Non lenimen erit , sed usque amaris
 Ille lacrimulis tuis madescet .
 Sic flet turtur , acuta cui tenellum
 Comparem abstulit ancupis sagitta .
 Sed tu desine flere ; non maritus
 Trans alpes graditur seras , ut olim ,
 Sed Tuscum Tiberim , & beata Romæ
 Viset moenia missus a potente
 Orator patria ; hic salubre calum ,
 Hic est maxima civium suorum
 Semper copia , & hinc tribus diebus
 Ad te , si velit , is redire possit .
 Quare sis animo bono , atque eundem
 Fausto proseguere omine , & rogato
 Votis assiduïs Deum , benignus
 Ut saluum tibi conjugem , reducat .

XIV.

AD DONATUM RULLUM .

Quid , o Rulle , sodalium tuorum
 Spem ludis toties ? ego , Priulus ,
 Stella , Parpaliaque , Madiusque ,
 Omnes denique te putaveramus
 Danduli comitem esse , ut ambo eratis
 Nuper polliciti : sed ille cum te
 Non adduxerit , haud profecto scimus ,
 Plus ne lætitiæ , an doloris ejus
 Adventus ferat ; illum adesse multum
 Lætatur , sed abesse te dolemus
 Tantum , ut gaudia diluantur ipsa
 Valde tristitia ; veni ergo tandem .
 Rulle care , cupite , nosque amicos
 Mœrentes hilara tuo lepore ;
 Quodque ab officio lucratus es jam
 Cognomen tibi pluris æstimandum
 Thesauris Arabum , Indiæque gemmis ,
 Id tu si retinere vis , amice ,
 Cave , durus , & asper esse pergat .

XV.

AD ULYSSEM BASSIANUM .

Ergo , candide Bassiane , vivis ?
 O cara mihi carior salute ,
 Jucundissime Bassiane , vivis ?

Dulcis

Dulcis littera, litteris notanda
 Aureis, mihi nuntias ne vere
 Meum vivere Bassianum? at illum
 Rumor dixerat esse jam sepultum.
 Rumor pessime, poene me sepulcro
 Dedisti mala tanta nuntiando.
 O factum bene! Bassianus ille
 Phœbi deliciae, perire numquam
 Dignus, en superum benignitate
 Vivit; Flaminio tuo superstes
 Vivas o utinam, venuste amice;
 Nec de te mihi fama tale quidquam
 Posthac nuntiet; ipse vitam in istam
 Veni te prius, hinc prius recedam.
 Te spectem moriens; meos tu ocellos
 Cara claude manu; piis sepulcrum
 Humeſta lacrimis; diuque vive
 Te superſtite, Baſſiane cære,
 Non omnis moriar, meique magna
 Pars vivet, mihi crede, adhuc superſtes.

X V I.

AD JOANNEM BAPTISTAM PHILIARCUM.

Dic oro, Philiarche mi, virorum,
 Quotquot Tuscia vel tulit, feretve
 Candidissime, num domus paterna,
 Et domestica gaudia, & tuorum
 Aspectus tibi proſuere tantum,
 Ut illa affidua, & periculosa
 Destillatio ceſſerit? fuerunt
 Sæpe lætitiæ fugare morbos
 Longe fortius arte, quam ſaluber
 Phœbus inſtituiſſe, filiusque
 Phœbi dicitur; hoc tibi ſecundus
 Si Deus dedit, o nimis beatum
 Sodalem tuum, & o nimis benignum
 Tuo Flaminio Deum! proſecto
 Nil mihi poterat mage expetitum
 Votis omnibus evenire; non ſi
 Frater deliciae meæ relictus
 Sepulcro ad ſuperas rediſſet auras.

X V I I.

AD LUDOVICUM BECCATELLUM.

NE vivam, bone Ludovice, ni me
 Et mei miſerer tuique; nam quis

Deus,

Deus, vel mala fors utrumque semper;
 Captivum tenet Urbis in tumultu?
 Si nos ambitio, pecuniæve
 Augendæ premeret sitis: tacerem:
 Sed cum divitiis honoribusque
 Magnis otia præferamus, ah cur
 Romam præferimus meo Lavino,
 Albinoque tuo? O venusti agelli
 Musarum domus, & quies laborum,
 Tam longe mihi vita num manebit,
 Ut meos satiare possim ocellos
 Vestro dulci, & amabili decore?
 O tandem placida, & beata rura,
 Nos carum accipite in sinum; nec ulla
 Vis avellere possit; hic & hœdo,
 Et pomis, oleaque, pensilique
 Uva nos alite, & simul supremum
 Tempus venerit, ossa sub virenti
 Lauri condite, qua fugit per herbas
 Suavem rivulus excitans susurrum.

XVII.

AD HERCULEM SEVEROLUM.

Herculi, mea musa, fer sodali
 Hæc bono bona dicta, quod Favoni
 Jam tepor rediit, tulitque secum
 Dulcis tempora veris; urbe Roma
 Tuus Flaminius relicta agellos
 Suos visere cogitat, paterna
 Quos domus tua cernit: ipse vero
 Quid tandem facies? tumultu in isto
 Nimirum remanebis, & clientum
 Magnis agminibus premere semper.
 O tandem sapias tibi, tuæque
 Vitæ consule; non vides, ut ætas
 Labitur fluvii rapacis instar,
 Quem nives aluere? quid laboras
 Ergo divitias parare inanes?
 Cum tantum patrimonii relictum
 A tuo tibi sit parente, quantum
 Est satis; sine vulgus imperitum
 Falsa imagine ludi: at ipse, mentem
 Cui Deus dedit expolire pulchris
 Artibus, patriam revise caram,
 Fratremque unanimem, bonosque amicos:
 Et dulci fruire otio, libellis

Parvis

Parvis Virgiliique, Tulliique
Mutans magna volumina illa legum,
Quæ lassare valent feros gigantes,
Et vires adamante firmiores.

XIX.

AD FABRITIUM BRANCUTIUM.

O Diem niveum, & nimis beatum,
Quo tam suaviter, atque delicate
Simul viximus, o venisse amice,
Dum curis procul omnibus fugatis
Dulci colloquio, facetiisque
Horas fallimus? hoc modo poetæ
Ferunt Elysiis pios viretis
Ævum degere, Dî boni, ac benigni,
Vos opes aliis date atque honores:
Nobis assidue videre lucem
Hesternæ similem, est satis, superque.

XX.

AD JO. FRANCISCUM CASERTAM

De Urbis Casertæ agro.

Quid tantis precibus, Caserta, carum
Vocas Flaminium Casertæ ad agros?
Te desiderium quidem fruendi
Mei sollicitat; sed ipse tanto
Magis te cupio videre, quanto
Es me amabilior; quid? ista vestra
Tam felicia, tam venusta rura
Quem non alliciant suo lepore?
Adde quod mihi reddidere vitam,
Cum vis tabifica intimis medullis
Serpens, lurida membra devoraret.
Istic & mihi Musa tam benigno
Semper numine favit, ut canentem
Stuperent Dryades, meumque pisces
Ornarent Satyri caput corollis.
Quæ tellus igitur tuo sodali
Queat gratior esse? nulla certe.
Nec tamen venio, negotiorum
Dura compede victus: at venire
Cum primum dabitur, volabo, teque
Revisam & tua rura, amice dulcis,
Non minus cupide, suam puellam
Quam visse juvenis, locum in remotum

Quem

Quem coegerat ire vis paterna ,
Si qua forte revinctam amore mentem
Posset solvere filii furentis .

XXI.

AD SEBASTIANUM CORADUM .

Tampridem Stephanus Columna , princeps
Clarus militiæ , domique , doctum
Querit filiolis suis magistrum ,
Nec doctum modo , sed pium , & venustis
Cultum moribus ; hic labore parvo
Non parvum faciet lucrum ; quotannis
Nam fessertia quina consequetur ,
Patronumque sibi parabit auri
Magno pondere plus æstimandum .
Hunc tu si potes invenire , ad Urbem
Statim mitte ; peritus , elegansque ,
Et vir non malus ille sit , necesse est ,
Quem tu iudicio tuo polito ,
Vir doctissime & optime , approbaris .

XXII.

AD LAURENTIUM GAMMARUM .

Quod numen male amicum , amice care ,
Hanc mentem tibi misit , ut reliqua
Roma , frigore sæviente adires
Ad gentem horribilem , trucemque ? tu ne
Vates candide , cui Marone digna
Phœbus scribere donat , efferata
Ista in Barbaria morare ? quis jam
Neget sidera celsa posse Olympo
Labi Tartara in ima ? at inscientem
Ne malus male perdat error ; audi
Quid Phœbus pater , & novem Camœnæ
Prædicant tibi : Si manere pergis
Istic , ex lepido , & bono poeta
Fies Mævius , & tuos libellos
Vitabit lue pejus & veneno
Quidquid est hominum elegantiorum .

XXIII.

AD BARTHOLOMÆUM RICCIUM .

Ah jam rumpe silentium , jocosè
Olim , nunc nimium severe Ricci .

Num

Num tu sic veterum flagras amore ,
 Ut Tulli puto Cæsarisque , vivos
 Ut jam pro nihilo putes amicos ?
 At hoc Tullius improbat , iubetque
 Te sui cupidos habere caros ,
 Nec solum cupidos sui , sed omnes
 Quos virtus aliqua , probique mores
 Adjungere tibi . Sed heus , amice ,
 Quid rerum geritur ? notare pergin
 Quidquid ad proprie , eleganter , apte
 Loquendum valet ? id beare lingua
 Nos prædivite , id est Latinitati
 Suos reddere pristinos honores .
 Quare per Ciceronis , & Terenti
 Manes te rogo , perge , finibusque
 Pelle barbariem Italis , Latinæ
 Linguae te veneremur ut patronum .

X X I V.

AD PETRUM MYRTEUM .

TE consanguineum meum esse iactas ,
 Et hoc nomine gratiam aucuparis
 Per urbes Italas ; meique amici
 Dant tibi hospitium , pecuniamque ,
 Quam statim male dissipas , sed audi ,
 Mendax Myrtee , cuius & parentes
 Ignoro , & patriam , genusque ; si tu
 Vir frugi incipis esse temperansque ,
 Quin fias mihi filius , neposve
 Non recuso equidem : sed esse pergis
 Si nequam , & balatro impudens , caveo ,
 Ausis dicere te meum propinquum ,
 Ne læsa patientia furentem
 Camœnam experiare ; num ferendum est ,
 Falso nomine te propinquitatis
 Meæ ad flagitia , & dolos abuti ?

X X V.

AD ALEXANDRUM PICCOLOMINEUM .

Q Si dent mihi cælites , ut , ante
 Hora quam veniat suprema , vere
 Fiam talis , amice , qualis a te
 Pulchro carmine pingor ! esse talis
 Et certe cupio , & laboro : verum

Ad hanc usque diem meo labore
 Nihil proficio, timor, cupido,
 Cordis gaudia vana, itemque vani
 Dolores magis in dies, & horas
 Mentem sollicitant miscellam: in alto
 Sic Notus, Boreasque sava quondam
 Miscunt praelia. At ipse fluctuantem
 Tranquilla, sapientiæ serenans
 Cor meum monitis, quibus Lycei
 Magister nitidi tuum replevit
 Ob id pectus, ut ipse mente sana
 Ægrotis animis queas mederi.

XXVI.

AD AUGUSTUM COCCEJANUM.

SIC te, candide amice, nullus umquam
 Cælesti Sophiæ, patrique Phœbo
 Possit carior esse, dic amabo
 Num vere mihi dixit Hadrianus,
 Te describere, quidquid ipse ludo
 Molli carmine per jocum, atque risum?
 Hoc tu si facis, o nimis beatam
 Musam Flaminii? graves, protervi,
 Mordaces critici, venena dentis
 Vestri nil metuo; quod approbarit
 Augustus meus, id probent, necesse est,
 Et Phœbus pater, & novem Camœnz.

XXVII.

AD FERNANDUM TORREM.

Fernande optime, noster hic libellus
 Jamdudum cupit ad tuos penates
 Ire, quod soleat favere nemo,
 Ut tu, versiculis meis, eosque
 Tantis tollere laudibus: sed hercle
 Si rem iudicio tuo eleganti
 Aptam vis gerere, arrogantis hujus
 Spem falles, calami notans littura
 Severe omnia, quæ minus Latine,
 Aut garrere putabis infacete
 Musam putidulam tui sodalis,
 Qui te non minus ac suas medullas
 Propter eximium tuum leporem
 Amat; sed tamen addet huic amor

Ingentem cumulum, suum libellum
Si traſſaveris ut ſupra rogavit.

XXVIII.

AD CAMILLUM RASTELLUM.

Quis hæc carmina tam venuſta donat
Tibi ſcribere? non magiſtra certe
Ars tantum valet; & juvena molli
Vix lanugine veſtit ora. Phœbus
Ergo Phœbus, amabili lepore
Tuo captus, habere dat poetæ
Nomen, numine te, Camille, dolci
Affans; ſic Maro, ſic tuus Tibullus
Indebant poeri ſuis Camœnis
Olim carmina digna: ſic & Orpheus
Vix primam attigerat tener juventam,
Cum docta fide rivulos morantem
Viderunt Dryades, ſimulque myrtos
Formoſi pueri lyram ſequentes;
Qua poſt & rigidas agebat ornos,
Et fugam volucris tenebat Hebri.
Ergo tu quoque perge; creſcet ætas,
Phœbi creſcet amor, bonique vires
Creſcent ingenii, tuumque ſama
Nomen inſeret optimis poetis.

XXIX.

AD FRANCISCUM ROBERTELLUM.

Gratulor, tua vota liberales
Audiviſſe Deos: in urbe vives,
Qua nullam neque terra pulchriorem
Nec latum mare fert: docebis illic
Prolem nobilium, vetuſta quidquid
Servant Græca volumina, & Latina
Scriptum puriter, eleganter, apte.
At Canicula cum furit, reliſta
Urbe quam mare cingit, ad liquentem
Meſulum properabis, ut tepore
Veris perpetuo fruire. Sicus,
Elegans juvenis, domo venuſta
Te latum excipiet libens; ſed ædes
Tui Flaminii ſimul videbis,
Flens dices, Mihi carior medullis
Meis candide Marce, quid morar

Gaudes

Gaudes tam procul a domo paterna ?
 Non te nutriit hic tenella mater ?
 Non hanc ludere per viam solebas
 Puer cum pueris ; quid ergo dura
 Caute durior hinc abes tot annos ?
 Si quis te Deus huc repente sistat ,
 O quæ gaudia , qui forent utrimque
 Sermones ! age mitte jam querelas ,
 Robertelli ; aderit volens , nec a te
 Latum Flaminius recedet unguem ,
 Dum frui poterit tuo lepore .

XXX.

AD ADAMUM FUMANUM .

De obitu Violantillæ uxoris Romuli Amasæi .

INvitus tibi dico , Adame , nostri
 Romuli periit pudica conjux ,
 Tam pudica , domusque tam regendæ
 Sciens , tam sobolis ferax venustæ ,
 Quam facundus , & artium est bonarum
 Doctus , qui fuit illius maritus .
 Hoc docente bonus poeta factus ,
 Oratorque bonus , bonum magistrum
 Consoleris oportet & soluto ,
 Et juncto pede ; sic levabis ægram
 Mentem illius , & eloquentis ipse
 Et pii simul assequere nomen .

XXXI.

AD MARIUM SAVORNIANUM .

MArtis deliciæ , Minervæ amores ,
 Mari candide , pessimus poeta ,
 Sed vir sat bonus , ut reor , tuoque
 Non indignus amore , amoris ardens
 Flamma ob mirificum tuum leporem ,
 Cui cedunt reliqui omnium lepores ,
 A tua petit hoc benignitate ,
 Non parem ut tribuas amorem amanti ,
 Sed ut te patiari amari ab ipso ,
 Quanto maximo amore ab ullo amari
 Potest , qui sit amore summo amandus .

XXXII.

AD FRANCISCUM TORELLUM.

O Flos candide Gallia Togata,
 Ante annos animum gerens virilem,
 Quid, ah quid juvat Urbe abesse? qua Sol
 Nihil nobilius videbat olim,
 Nec idem videt, aut videbit umquam,
 Tota quod queat orbe comparari.
 Hæc te nutrit, hæc domo paterna
 Tibi carior esse debet; ipsa
 Nam te sola capit, tuæque gestit
 Virtuti dare debitos honores.
 Quare, si sapias, advola, & cupito
 Nos omnes hilares, Torelle, vultu.

XXXIII.

AD MARCELLUM CERVINUM,

ET FRANCISCUM SFONDRATUM

CARDINALES.

Quod Faernum, hominem bonum, atque doctum
 Amo non secus atque memetipsum,
 Ejus gaudeo commodis perinde
 Ac meis propriis: quod ergo per vos
 Summo a principe consecutus ille est
 Quidquid ad bene, commodeque agendam
 Vitam optabat, id hercule obligavit
 Me vobis ita, candidi patroni,
 Ut devinctior esse nemo possit.
 At vos qua pietate iam tueri
 Cœpistis lepidum meum sodalem,
 Eadem pietate, firma ut hæc sint
 Et perennia dona, provide.

XXXIV.

AD BERNARDINUM MAPHÆUM

CARDINALEM.

Quam gaudet amans, suæ puellæ
 Casto conjugio potitus; æger

Quan-

Quantum gessit ab imminente fato
 Ereptus subita medentis arte ;
 Tantum Flaminius cliens galero
 Gaudet purpureo , Maphæe , summa
 Quem virtus tibi tradidit ; Deumque
 Votis omnibus orat , ampliorem
 Ut tibi ferat hic honos honorem .

XXXV.

AD PETRUM CARNESECUM ,

DE MARGARITA HENRICI

Gallorum Regis Sorore .

O Felix mea ter , quaterque Musa ,
 Cujus versiculos puella Regis
 Maximi soror , utriusque linguae
 Peritissima , cantat ! hoc beato
 Nuntio super alta sustulisti
 Cæli sidera , Carneſece , carum ,
 Vetustum , unanimem tuum fodalem .
 I nunc , pessime livor , i , libellos
 Meos carpere perge ; Margarita
 Dum me iudicio suo tuetur ,
 Vos tantum & maledicta vestra curro ,
 Mordaces critici , Libyssa quantum
 Latrantis catuli læna vocem .

XXXVI.

AD ALBERTUM LINUM .

Quod petis , Line mi venuste , carmen ,
 Id feci lateris dolore pressus ;
 Non captans hominum eruditiorum
 Plausus , sed venerans Deum , eleganter
 Qui dictum putat esse , quidquid ore
 Pio dicitur ; hoc tibi sequendum
 Prudens iudicium ; at sequi superbos
 Si mavis criticos , inelegantes
 Versus , quos tibi mitto , non legendi .

XXXVII.

AD ALOYSIUM PRIULUM .

Ah cur me lacrimis tuis , Priule
 Care , conficis hoc tuo dolore

Mors mihi sit amara, quam benigno
 Deus numine donat esse dulcem.
 Una viximus arcto amore juncti,
 Qualem Sol radians ab ultimo Indo
 Vix cernebat ad ultimum Britannum:
 Nos unum studium, una nos voluntas
 Fecit unanimes; nihil placebat
 Uni, quin idem amaret alter; una
 Nos domus tenuit, alebat una
 Mensa; lætitiæ, dolor, secunda,
 Adversa unius alterum movebant;
 Ut numquam minus hic doleret illo,
 Gauderetve; sed hæc prius fuere:
 Nunc cæli vocor ad domos beatas,
 Ubi me vario labore functum
 Manent gaudia sempiterna; quare,
 Si cordi tuus est tibi sodalis,
 Pone flebilibus modum querelis,
 Et plausu æthereas euntem ad arces
 Læto prosequere, & piam labora
 Vitam vivere, mox simul futurus.

XXXVIII.

AD RANUTIUM FARNESIUM CARD.

Tu ne, Romula quem colit juvenus,
 Paulli maxima Tertii voluptas,
 Et Grajis simul, & simul Latinis
 Musis care, meam salutem amore
 Tanto amplecteris, ut periculosa
 Febris, & lateris mei dolores
 Te semper crucient? misella nato
 Sic parens timet unico, fatigans
 Fletu numina cuncta pro salute
 Dulcis filioli periclitante.
 Hoc pium officium, tuasque laudes,
 Si mors abstineat manum rapacem,
 Et Phœbus faveat, tegent tenebris
 Nulla sæcla; micabit omne in ævum
 Farnesi decus inclytum Ranuti,
 Ut pulchro radians Eous igni.

XXXIX.

AD PHILIPPUM BONUM

Pontificem Famagustæ .

O Qui nomine , mente , moribusque
 Es bonus , mihi quam venis cupitus !
 Ut te conspicio libenter ! ut me
 Morbo letifero diu gravatum
 Aspectu recreas tuo , tuisque
 Gratis alloquitis ! tenella virgo
 Sic florem aridulum imminente morte
 Liberat , gelidum irrigans liquorem :
 Sic gaudet patula viator umbra
 Aquosi nemoris , siticulosa
 Terra iter faciens Canis sub ortum .
 O quid carius est beatiusve
 Dulci amicitia ? mihi periculo
 Tanto evadere si dabunt benigni
 Cælites , erit ipsa vita cara ,
 Ut frui liceat bonis amicis .

X L.

AD HIERONYMUM TURRIANUM

De Jo. Petro Carapha Card.

Quid piæ valeant preces , benignas
 Ut Dei penetrent supremi ad aures ,
 Disce , candide Turriane ; febris ,
 Et sævus lateris dolor misellum
 Tuum Flaminium furore tanto
 Invasere , magistra ut ars medendi ,
 Et quisquis levat ægra membra succus
 Cederent ; capiti meo imminebat
 Mors nigris tenebris operata : honorem
 Supremum mihi funeris parabant ;
 Infandum veteris sui clientis
 Cum casum miseratus ille magnus
 Carapha , Italiæ decus Carapha ,
 Ad cælum geminas manus tetendit
 Multis cum lacrimis Deum salute
 Orans de mea ; & ecce acerba fugit
 Febris , & lateris dolor ; refectæ
 Vires ; & teneri mei sodales

Cantu, & lætitia graves querelas
 Mutarunt lacrimasque. Amice dulcis,
 Dic laudes superum benignitati
 Pro vita mihi restituta; & aura
 Quod vefcor placita, quod alma pulchri
 Solis lumina cerno, id omne magni
 Acceptum precibus refer Caraphæ.

XLI.

AD SODALES SUOS.

Gaudetis, teneri mei sodales,
 Me febris, & lateris dolore summo
 Emerfisse; Dei sed ipse lator
 In primis bonitate singulari,
 Qui mentem dederit mihi paratam
 Corpus linquere, ne suo rebellis
 Pugnarem imperio. Pater supreme,
 Tua incepta secunda, & usque eandem
 Da mentem mihi, nil velim, quod ipse
 Nolis; nil renuam, quod ipse mandes.
 Hoc unum, unanimes mei sodales,
 Hoc unum ex misero facit beatum.

XLII.

AD RODULPHUM PIUM CARDINALEM.

HOC est, magne Rodulphe, liberalem
 Esse; dum prope januam rapacis
 Orci demoror, & salus miselli
 Desperata jacet, benignitate
 Summa das mihi fertiles agellos,
 Ut lætus moriar, meis relinquens
 Tanta munera dulcibus propinquis,
 Non non temporis hujus ista virtus;
 Virtus Mæonio canenda, versa,
 Non meis ita deterenda iugis.

XLIII.

AD MICHAELEM SILVIUM CARDINALEM.

O Quantum tibi debeo, benigne,
 Dulcis, candide Silvi, amabilisque,
 Quantum quis pote amari! acerba cum me
 Febris ureret, & dolor sinistri

Vexa-

Vexaret lateris, meo dolore
 Dolebas: meus ignis in medullis
 Ingentem tibi suscitabat ignem.
 Nec cordi data pax misello, amara
 Pestis dum requiem mihi negavit.
 O amor, pietasque digna dici
 Tuis carminibus, poeta summe!
 Nam mihi tenuem nimis dederunt
 Musæ spiritum: at esse mente grata
 Et possum, & volo; quare in omne tempus
 Me totum tibi dedo, magne Silvi.

XLIV.

AD FRANCISCUM SFONDRATUM CARD.

CUM noster mihi Carolus referret,
 Te dolor lateris meus dolore
 Quanto affecerit; & salus deorum
 Mihi munere restituta quantum
 Rursus lætitiæ ferat; profecto
 Hæc tui manifesta signa amoris
 Tam meo cecidere grata cordi,
 Ut jam letifero fuisse morbo
 Vexatum, juvet, & recepta vita
 Sit mihi carior, esse quam solebat;
 Nam virtus tua rara, comitasque
 Et Musis animus dicatus almis,
 Nec rebus minus acer in gerendis
 Sic mentem afficiunt meosque sensus,
 Ut plane videar beatus esse,
 Si tuo videor favore dignus.

XLV.

AD NICOLAUM RODULPHUM CARD.]

ROdulphi, decus omnium bonarum;
 Artium, tibi gratias habere
 Dignas Flaminius nequirit umquam;
 Qui cum depositus jaceret, & jam
 Mortis cuncta nigrescerent tenebris,
 Agri jugera magna cum venusta
 Domo ab eximia benignitate
 Tua tam facile impetravit; ergo,
 Quod potest, tibi se suamque Musam
 Servitute, pater, dicat perenni.

XLVI.

AD ANDREAM CORNELIUM CARD.

Ecce Flaminium, tuum clientem,
 Salvum, & incolumem, perire quem tu
 Dolebas nimis intimo dolore,
 Ut jam nec lacrimas tenere posses,
 Nec dulcis tegeret quies ocellos;
 Quæ tanti facio, graves labores
 Ut non poeniteat subisse morbi.
 Nimirum tibi sic placere, laus est
 Longe maxima, quem genus superbum
 Ornat Scipiadam, probique mores,
 Et fervens amor artium bonarum, &
 Sacri purpura nobilis galeri.

XLVII.

AD NINUM AMERINUM.

Quod Musis, & Apollini venusto
 Agis carmine grâtiâs, amice,
 Pro vita mihi reddita, nec alter
 Est te lætior, haud mihi videtur
 Mirum; nam pereunte me necesse est
 Bonam partem animæ tuæ perire.

XLVIII.

AD BARTHOLOMÆUM CAVALCANTEM.

Magna pars animæ meæ, benignus
 Tibi vivere ad ultimam senectam
 Sic donet Deus, ut perire dulci
 Tuo Flaminio magis molestum
 Erat ob nimium tuum dolorem,
 Quam dulcedine vitæ: & esse mortis
 Cæco a limine restitutum ad alma
 Solis lumina, id est mihi suave
 In primis tui amore, luce cara
 Cui sum carior. Hæc, amice rerum
 Jucundissime, veri amoris expers
 Verba dixeris esse blandientis:
 At tu nil magis credis esse verum,
 Omnes qui superas amore amantes.

XLIX.

XLIX.

AD LUDOVICUM BECCATELLUM.

JAM jam desine mollibus querelis
 Fatigare Deos, amice dulcis;
 Nam visî citharæ tuæ canoræ
 Modis flebilibus mihi negatam
 Vitam restituere, quæ sub imas
 Jam terras fugiebat: ergo vincis
 Docta Calliope satum, misellam
 Qui frustra Euridicem profundo ab Orco
 Ad cæli placidas vocavit oras;
 Quamvis & volucres teneret Euros
 Canendo, Eumenidasque mitiores
 Posset reddere bimulis puellis.

L.

AD DAMIANUM DAMIANIUM.

O Lux Trinacriæ feracis, ægros
 Qui jam depositos rapacis Orci
 Eripis manibus, dinque sanos
 Jubes vivere, si mihi dedisset
 Musa, pro meritis tuas canendo
 Laudes dicere, me beatiorem
 Nullum Roma videret; & recepta
 Tuo munere vita cara, longe
 Mihi carior esset: at merenti
 Cum dignas nequeam referre grates,
 Quod unum superest, Deum rojabo,
 Ut sicut tibi prorogare vitam
 Humano generi, unica est voluptas,
 Sic te conjuge cum bonâ valentem
 Sinat vivere plurimos in annos.

L I.

AD EMANUELEM CHIUM.

NEC te, candide Chie, præteribo,
 Qui rursus mihi das habere vitam
 Arte Pæonia, salubribusque
 Succis, officioque singulari.
 Ut Pastor rabidi lupi cruento
 Agnum deripit ore, sic voracis

L 5

Orci

Orci faucibus extrahis misellum
 Tuum Flaminium Deo juvante.
 Quare dum mihi vita, quam dedisti,
 Suppetet, nihilo minori amore
 Te colam, optimus optimum parentem
 Quam natus colit; & suprema quando
 Rursus venerit hora, quamquam amara
 Potem oblivia, non tamen licebit
 Tux non memorem esse comitatis.

L I I.

AD FEDERICUM DONATUM.

Q UOD spiro, Federice, quod tueri
 Datur lumina cara cæli, id omne
 Haud parte ex minima tibi libenter
 Acceptum refero; febris furebat;
 Necabat lateris dolor: supremam
 Horam jam mihi cuncta nuntiabant,
 Cum tu, quam dedit ipse Phœbus, arte
 Morbum letiferum fugas, ut acer
 Spiritus Boreæ tenebricosa
 Cælo nimbila pellit: ergo vitam,
 Quam mihi superum benignitate
 Donasti, tibi dono, meque totum
 Grata mente dico, meosque ad unum
 Omnes, qui pereunte me perissent.

L I I I.

AD HIERONYMUM PONTANUM.

Q UO te nomine dicam, amice care?
 An senex juvenem vocem parentem?
 Qui febri, & lateris dolore pressum
 Numquam deseris, assidens jacenti,
 Ut pullis avis: an vocem salubris
 Phœbi sanguinem? ab imminente fato
 Qui me surripis. & valere donas.
 Sis quocumque tibi placet, virorum
 Humanissime, nomine; esse nullum
 In terris modo iudices parentem,
 Qui plus filiolum sibi suprema
 Natum diligit unicum senecta,
 Quam te Flaminius suæ salutis
 Patrem diligit: hoc, amice dulcis
 Non verum minus est, nitere Solis

Quam

Quam lucem, aut tenebris diem fugari,
Cum Nox cæruleo revesa curru
Ocellis hominum irrigat soporem.

LIV.

AD JULIUM SAULIUM.

Quantum gemui, venuste Juli,
Cum febris tua membra pasceretur,
Nec finem faceret, diem supremum
Intentans media tibi juventa!
Me tui miserebat & parentis
Caræ, qua mulier nec ulla vivit,
Nec vivit melior: Misella quantos
Angores tulit audiens jacere
Natum depositum! Sed ecce vestram
Dum vicem doleo, dolor finistrum
Invasit latus, & siticulosa
Febris incubuit mihi per artus
Furens, ut fera flamma cum vetustam
Silvam corripuit semel, vagatur
Vorans omnia; nec tamen perichum
Sic me perculerat meum, pericli
Quin tui meminissem; acerbus ergo
Me dolor geminatus enecasset,
Ni Deus miserans utrumque leto
Præsenti eripuisset; ille nobis
Donat vivere: nos patri benigno
Vitam, & omnia nostra consecremus.

L V.

AD FEDERICUM ELEPHANTUTIUM.

Quod solet; Federice docte, fama
Mali nuncia latius vagari,
Illam suspicor ad tuas tulisse
Aures Flaminium jacere febri
Confectum & lateris dolore, nec jam
Ullam spem reliquam saluti esse;
Quo tuo mage nil acerbum amor
Posset accidere; ergo, mens misella
Ut omnem abjiciat metum, sodali
De tuo accipe nuntium, quod optas:
Et vivo, & valeo bene, profundo
Leti a limine restitutus, & jam
Meas delicias Bononienses

Paro visere, scilicet Lavinum,
 Amœnum, nitidum, salubrem agellum;
 Ubi te fruar, & diu cupito
 Tuo dulci, & amabili lepore,
 Quo sic afficior, beatus esse
 Ut plane videar; videre caros
 Cum vultus datur, & tua morantes
 Soles condere colloctione.
 Quare mi hospitium para diebus
 Paucis, & simul osculationes
 Centum, quæ mihi erunt suaviore,
 Quam matri teneræ puella pulchra
 Quæ dat suavia, cum remota ab urbe,
 In qua nupta fuit, suos revisit.

L V I.

AD FRANCISCUM BOLOGNETUM.

I, Quæso, mea Musa dulcis, agrum
 Citis cursibus ad Bononiensem,
 Nuntiumque feras bonum, ac beatum
 Unî ex unanimis meis amicis
 Francisco lepidissimo poetæ,
 Quem dolor lateris meus dolore
 Tanto conficit, ut cibum misellus
 Non possit capere, aut soporem ocellis:
 Sed semper jaciat graves querelas
 In Deos, medicosque. Dic, dolore
 Pulso lerifero, suum valere
 Carum Flaminium, ergo & ipse iustu
 Tradat Æoliis Notis ferendum
 Trans alpes, Hadrianve: tum benignis
 Qui vitam mihi reddidere, divis,
 Dic, laudes cithara canat Etrusca;
 Landes, quas stupeat gens amica
 Illi Tuscia plurimos in annos.

L V I I.

AD JACOBUM PACTUM.

PAste, candidus ille Bassianus,
 Qui te diligit ut bonum parentem,
 Rettulit mihi, te dolore tanto
 Affectum ob lateris meum dolorem,
 Ut, si vel tibi filius, paterve
 Forem, non gravius dolere posses:

Hæc dulcissimus ille Bassianus
 Cum narraret, amoris excitavit
 Tantum ignem mihi in intimis medullis,
 Ut qui te prius unice colebam
 Propter ingenium bonum, bonosque
 Mores, addiderim meo huic amor
 Ingentem cumulum, velut pusillus
 Ignis cum excidit alto in æsculeto
 Passori, frutices, rubosque primum
 Pascitur, fera deinde flamma crescit
 Vagans arboribus, perosa donec
 Silva magna resedit in favillas.
 Ergo tum probitate me licebit
 Vincas, tum varia eruditione;
 At vero superare amando, amice,
 Profecto tibi non licebit unquam.

LVIII.

AD MARIANUM VICTORIUM.

SI qua te, Mariane, cura tangit
 Tui dulcis amiculi, fidele
 Da mi consilium; cavebis autem,
 Ne te fallat amor mei videndi:
 Ecquid tu veniendum ab Urbe censes
 Istuc Flaminio? hic habemus hædos;
 Pullos, optima vina, habemus umbras
 Hortorum, & medicos bonos, meique
 Amantes: domus hic salubris, ampla,
 Et est hic hominum elegantiorum
 Valde copia magna, qui libenter
 Me visant male firmum, adhuc atrocis
 Morbi reliquiis gravatum; amice
 Hac tu commoda compares, necesse est,
 Cum vestris: mihi deinde, quid gerendum,
 Præscribes, maneam ne in Urbe, ubi ægre,
 Nec satis bene convalesco; præstet
 An vestras latebras adire, qua vix
 Humano pede semitam esse tritam
 Affirmant aliqui, tamen quod ipse
 Ad me scripseris, id putabo vatis
 Ore veridici fuisse dictum.

LIX.

AD VINCENTIUM PARPALIAM.

CRAS, o Parpalia, ut soles, parabis
 Elegans mihi prandium, tuisque

Con-

Conditum salibus, facetiisque;
 Nam quo tempore me febris, malusque
 Tentavit lateris dolor, misello
 Nil primoribus ex eo labellis
 Fas fuit tetigisse, quod palato
 Gratumve accideret, foretve alendis
 Aptum viribus: hinc eas, & ipsum
 Corpus perdidit, & umbra inanis esse
 Jam mei videor; tuo labore
 Si tamen dabitur frui, tuisque
 Interesse epulis frequenter, æstas
 Antequam veniat propinqua, fiam
 Ex macro, invalidoque fortis, atque
 Turdo obefior, uva quem voracem
 Diu nutrit, aut oliva pinguis.

L X.

AD DAMIANUM DAMIANIUM.

O Vinum tenue, aureum, suave
 Instar nectaris! o merum deorum,
 Vitæ præsidium meæ fugacis!
 Cedant Pœonii tibi liquores,
 Et quidquid remedii salubrioris
 Ostendit medicæ repertor artis.
 Jacebant lateris dolore membra
 Semimortua; febris æstuat,
 Ut fornacibus ignis; ipse plantas
 Leti limina dura transferebam;
 Cum tu languidulos fluens in artus,
 Cælestis liquor, & levas dolorem,
 Et vitam mihi reddis; ergo, docte
 Damiane, tuum merum, tuamque
 Vineam aureoli mei parentem
 Dulci carmine concinam, recepta
 Vita dum superat mihi; & rogabo
 Votis assiduis Deum quotannis,
 Ne venti, pluviae, siccitasve,
 Aut vis grandinis, improbe fures
 Lædant aureoli mei parentem.

L X I.

AD SUAVISSIMUM SODALEM SUUM.

TU ne versiculos tuos sepulcro
 Meo scalpere, amice, cogitabas?

Me

Me vivum potius vorent rapaces
 Lupi, quam mea mortui graventur
 Tuis versibus ossa; non Typhœum
 Sic vastum Inarime premit, nec Ætna
 Furem Enceladum, mei miselli
 Manes ut premerentur a tuarum
 Pondere intolerando ineptiarum.
 Quare dis ago gratias, dederunt
 Qui, vita mihi reddita, periculo
 Tanto evadere; teque per vetustum
 Nostri fœdus amoris oro, amice,
 Si quid acciderit mihi, priusquam
 Ipse mortem obeas, tuis molestis
 Nugis pestiferisque, putidisque
 Ne vexes miserum meum sepulcrum

LXII.

AD BASILIUM ZANCHUM.

Judex candide carminum meorum,
 Alterum tibi mitto nunc libellum,
 Lectum nemini adhuc: sed ipse amorem
 Per nostrum veterem rogatus illum
 Et leges, relegesque diligenter,
 Notans quidquid inesse judicabis
 Aut dictum illepide, aut parum Latine.
 Quin igni dabis omnia, igne digna
 Si lusisse putabimur; nec illa
 Vel assis facio, tibi videntur
 Si delenda; nec ulla criticorum
 Formido maledicta, si probantur
 Tuo judicio; vides, sodalis
 Bonus quam tibi fidat: ipse contra
 Verba singula ponderabis; idque
 Non solum mei amore, sed quod error
 Quisquis commacularit hunc libellum,
 Famam æque violabit utriusque
 Judex candide carminum meorum.

LXIII.

AD SOMNUM.

HUC ades, o bone Somne: veni dulcissime Somne,
 Et mea furtiva lumina claude manu.
 Somne, veni; en volucres tibi dulcia carmina dicunt;
 Invitat placido te vaga lympa sono:

Te

Te violæ , & lilia pulchra , tuumque papaver ,
 Teque vocant plenis Cressia vina cadis .
 Nec tamen ipse venis ; quidnam , mitissime rerum ,
 Jam surdum precibus te facit esse meis ?
 Non ego vel sædo maculavi crimine vitam ,
 Vel populi mores , & malefacta sequor .
 Si nescis , ego sum Musarum , somne , sacerdos ;
 Nutriit in tenero me pia Musa sinu ,
 Et citharam dedit ; hos dulces tibi condere versus
 Jam meditor ; propere tu modo , Somne , veni .
 Ni properas , leti sopor ingruit , & mea sævus
 Lumina perpetua fundere nocte parat .
 Ergo age , Somne , gradum celera , ne fama vagetur ;
 Immeritum culpa me periisse tua .
 Nam si nulla meæ tangit te cura salutis ,
 At parcas famæ , si sapias , ipse tuæ .

LXIV.

AD MARCUM QUEMDAM .

TAM luculenta , Marce , pecunia
 Tumultuosum per mare cursitans
 Quam comparasti , disce tandem
 Disce , precor , sapienter uti .
 Nam congruendis divitiis modus
 Hic esse debet , pauperiem ut tibi
 Tuisque liberis repellens ,
 Lætus agas superest quod ævi .
 Ergo relinquitis navibus & mari
 Ad tuta ruris te refer otia :
 Insanientis & procellæ
 Dirum alii paveant furorē .
 Quis non benignæ culta nitentia
 Terræ minaci præferat Hadriæ ?
 Quis candido gregi catervas
 Comparet horribiles natantum ?
 Quod si lucellum te capit ; & sua
 Sunt lucra gnavis agricolis ; pecus ,
 Saltusque , & arva diligenti
 Sunt domino bene fructuosa .
 Nam terra mater reddere diligit
 Magno colenti semina scœnore ,
 Ni tu recusas illam aratro
 Assiduisque juvare rastris .
 Est hic agellus , villaque collibus
 Fundata amœnis , quam liquidi ambiunt
 Fontes , & arcens umbra opaca
 Silva Canis orientis æstus .

His tu coemtis incipe tempora
 Post longa tandem vivere, conjugis
 In dulcis amplexu daturus
 Latam animam veniente leto.

LXV.

AD STEPHANUM SAULIUM.

NE tu beatum dixeris, optime
 Sauli, superbo limine civium
 Qui prodit hinc, & hinc caterva
 Nobilium comitante cinctus;
 Non si feracis occupet Africæ
 Quidquid præaltis conditur horreis,
 Gemmasque lucentes, & auri
 Possideat rutilos acervos.
 Nec ille felix, qui valet omnium
 Causas latentes cernere, sidera
 Notare doctus, & profundas
 Ingenio penetrare terras.
 Sed tu beatum jure vocaveris,
 Qui mente pura rite Deum colit,
 Ejusque jussa ducit amplis
 Divitiis pretiosiora.
 Non ille vulgi gaudet honoribus,
 Sed carus ipsi Numinis est honos;
 Pro quo tuendo non recusat
 Dedecorum genus omne ferre.
 Quin & relictis cœtibus urbium
 Mens ejus altum transvolat æthera,
 Deique summi, calitumque
 Colloquio fruitur beato.
 Cælestis ergo jam sapientiæ
 Plenus, periculis altior omnibus
 Quiescit in Deo, furentum
 Despiciens hominum tumultus.
 Sic præliantes æquore turgido
 Ventos reducto montis in angulo
 Miratur, & gaudet procella
 Terribili procul esse pastor.

LXVI.

AD DONATUM RULLUM.

Quis cuncta possit, Rulle, pericula
 Motusque mentis dicere turbidos,

Qui

Qui favientis instar undæ
 Nos variis agitant procellis ?
 Hinc præliatur sollicitus timor ,
 Hinc spes bonorum credula : gaudium
 Nunc tollit alte , nunc doloris
 Dejicimur furibundo ab æstu .
 Non sic benignus cælicolum pater
 Humana finxit corda ; sed insolens
 Nos fastus ad tumultuosa
 Hæc freta præcipites adegit .
 Cum vita nullis ante laboribus
 Turbata cunctis afflueret bonis ,
 Nec mortis occurrens imago
 Cor trepido quateret tumultu .
 Quod ergo tantis auxilium est malis ?
 Ecquid Platonis docta volumina ,
 Cultrique præceptor Lycei
 Sollicitam recreare mentem ,
 Modumque curis figere tristibus
 Possunt ? vel auri perpetuo fluens
 Rivus ? vel in sublime tollens
 Per titulos popularis aura ?
 Fomenta sunt hæc prorsus inania ,
 Luduntque falsa vulgus imagine ,
 Vulgique primores , acuti
 Viribus ingenii tumentes .
 At tu , beatam ducere si cupis
 Vitam periculis liber ab omnibus ,
 Adhæreas Deo , piaque
 Mente sacrum venerare Numen .
 Hinc hauries veram & sapientiam ,
 Verumque honorem , & divitias , ferus
 Quas nec tyrannus , nec tremendi
 Vis rapiat troculenta belli .
 Quidquid bonorum cernitur uspiam
 Hoc fonte manat ; quo sine , quis , licet
 Terrasque , cælitumque regna
 Possideat , miser usque vivet .

DE DAVIDE JUDÆORUM REGE .

ERam paterna abiectus in domo puer ,
 Cunctisque fratribus meis
 Minor pusillum in monte pascēbam gregem .
 Hic ego sub umbris arborum ,
 Dum lata tondet gramina pecus , maximi
 Laudes canebam Numinis ,

Sonora tangens flûa citharæ, quam meæ
 Parvæ laborarant manus.
 At ille sanctus cœlitum rex, & pater,
 Qui summa tangit fulmine
 Corusco; humoque gaudet ima tollere,
 Suum repente nuntium
 Ad parva misit testâ, qui meum sacro
 Liniret unguento caput.
 Abjecit ille viribus præstantia
 Fratrum meorum corpora:
 Nec forma quidquam profuit, nec asperis
 Spectata virtus præliis.
 At ego pusilli parvulus custos gregis
 Ad regium decus efforor.

M. A N T O N I I
 F L A M I N I I
 C A R M I N U M
 L I B E R S E P T I M U S
 C O N T I N E N S P A R A P H R A S I M
 I N T R I G I N T A P S A L M O S,
In quibus Hebræorum numerationem sequitur.
 A D A L E X A N D R U M F A R N E S I U M
 C A R D I N A L E M.

DUM nigra jucundos per languida membra so-
 pores
 Nox irrigat mortalium,
 Tu mecum tacitis Hymnos meditare sub umbris
 Cantu Latino, barbire
 Jesseo quondam Heroi modulate; tyranno
 Qui sive pulsus a fero
 Montibus in solis erraret, sive reversus
 In patriam ditissimas
 Urbes, & latos populos ditione teneret,
 Nostes, diesque maximo

Cælicolam regi laudes cantare solebat.

At vos, beati cælites,
Est tutela quibus vatum commissa piorum,
Adeste, quæso, dexteri;
Et quæcumque Syros docuit rex optimus olim,
Per Italas urbes lyra
Dum memorare juvat, facilem concedite cantum,
Rebusque dignum maximis.

ARGUMENTUM PSALMI PRIMI.

Docet, pios, ac legum divinarum studiosos & amantes beatos existere; contraque omnes improbos, & Dei contemtores miseros esse.

PSALMUS I.

BEatus ille, qui nec audit impios,
Nec perseverat improbus
Peccare, nec lætatur irrisoribus
Se pessimis adjungere.
Sed mente pura diligit leges Dei,
Illasque semper cogitat,
Seu nox sopore amabili, seu lumine
Sol candido terram irrigat.
Qualis perennes orta propter rivulos
Arbor feraces ramulos
Ornat quotannis fructuum lætissima
Pulcherrimorum copia,
Suumque honorem servat omni tempore
Densis amicta frondibus;
Talis piorum est vita, talis omnium
Colentium leges Dei.
Hi quidquid umquam molientur, exitus
Illo favente prosperos
Habebit; haud sic improbi, sed pulverem
Ut turbo late disjicit,
Sic jactat illos impetus libidinum,
Nulloque consistunt loco.
Ergo supremi judicis cum venerint
Tribunal ad justissimum,
Causa cadentes, a bonorum candida
Turba procul, miserrimi
Trudentur ima in Tartara; quoniam Deus
Mores piorum diligit:
At turpiter qui vitam agit, cruciatibus
Hunc sempiternis afficit.

ARG.

ARG. PSALMI III.

*Queritur de rebellione populi ; & spe divini auxilii
animum suum confirmat .*

Pater beate ; quid esse causæ existimem ,
Cur impio bello furens
Me persequatur immerentem civitas ?
Meam salutem perditam ,
Et derelictam populus a tua , pater ,
Benignitate prædicat .
Sed quisque quod lubet loquatur , tu decus
Certumque præsidium meum es .
Numquam fidem tuam pia invoco prece ,
Quin vocibus dexter meis
Aures benignas præbeas , & supplici
Optata dones omnia .
Ergo quieta mente utramvis dormiam
In aurem , & hostium minas
Ridebo vanas : nullus ullo tempore
Belli tumultus , aut ferrox
Me præliorum territabit impetus ;
Non si trecentis militum
Me vallet hostis millibus , & undique
Mortem minentur omnia .
Exsurge , vindex scelerum , & hostium feram
Compesce vim crudelium ,
Qui sæpe sæpiusque me gravissimis
Jam liberaisti casibus .
Tu perdidisti Saulem , & omnes impios ,
Qui belluarum immanium
Instar , salutem , & sanguinem meum hiantibus
Sævi appetebant faucibus .
Solus salutem , solus , o dulcissime
Pater , bona omnia sufficis :
Solus colentibus pie numen tuum
Æterna donas gaudia .

ARG. PSALMI VI.

*Existimant , Davidem fecisse hos versus , cum in
morbum , & gravissimas calamitates incidisset ob
suprum Bersabæe illatum , & maritum ejus cru-
deliter interemptum .*

NE , quæso , Domine , me tuus furor opprimat ,
Neve ira sæviat tua :

Sed

ARGUM. PSALMI XII.

Queritur de moribus sæculi sui depravatis ; Deo supplicat pro salute piorum , qui ab improbis vexantur , ipsum Deum inducit loquentem , & opem suam pollicentem .

Benigne cælitum pater , ferva , obsecro ,
 Opemque fer ; paucissimi
 Nam sunt , quibus confidere , ac possim meam
 Tuto salutem credere .
 Mendacio jam pulsa turpi veritas
 Recessit alma ab urbibus ,
 Fidesque , sanctusque pudor , & soror illius
 Sinceritas amabilis .
 Quod si quis umquam blandiatur , & omnia
 Loquatur ore dulcia ,
 Tu vero ab illo tibi potissimum cave ,
 Te , lingua blanda , ab improbo
 Avellat ore præpotens rerum Deus :
 Tu , magna qui semper loqui
 Gaudes , eum iratum , tuæque vindicem
 Linguae protervæ sentias ;
 Tu qui furore percitus , Lingua mea
 Opes mihi , & potentiam ,
 Dicis , parabo ; liberum os gero , & geram
 Semper ; quis imperat mihi ?
 At hæc nefandus dum nefaria evomit ,
 Cælestium rex maximus
 Orationis impiæ superbia
 Commotus , Exsurgo jam , ait ,
 Exsurgo , jamque opem salutarem affero
 Benignus assidis : mihi ,
 Qui vexat illos , impius pœnas dabit .
 Sincera verba Numinis ,
 Atroque puriora sunt purissimo ,
 Quod igne sæpe ac sæpius
 Purgavit artifex , monile regio
 Sponso laborans nobile .
 Tu gente nos ab impia , rex optime ,
 Servabis , & clementiæ
 Scuto tuæ firmissimo tela hostium
 Longe repelles omnia .
 Tuti vagantur improbi , & bonis malam
 Pestem , dolosque comparant ,
 Contaminata mente cum vir urbibus ,
 Servire dignus , imperat .

ARGUM. PSALMI XIII.

Vir sanctus magnis ac diuturnis calamitatibus vexatus vicem suam miseratur, & auxilium Dei queribundus implorat.

Quouſque, Domine, linquor in tantis malis?

O columen, & ſalus mea,

Quouſque pergis eſſe non memor mei?

Dic, oro, quamdiu dies,

Noſteſque lacrimis madebo, & anxius

Deliberando diſtrahar?

Quouſque ſupplicem tæ clementiæ

Crudelis hoſtis opprimet?

Aures tuæ ſatis diu, pater, a meis

Abhorrere queſtibus?

Satis ſuperque vultus averſus tuus

Omnem mihi lucem abſtulit.

Jam, quaſo, jam candorem luminis ſacri

Meas tenebras diſſipa,

Ne forte durus mortis obrepat ſopor,

Dum nulla donatur quies.

Ne, quaſo, ne amplius in mala inſultans mea

Triumphet hoſtis gaudio.

Sed quamquam ab omnibus miſera ſalus mea

Projeſta ſit mortalibus,

Bonam tamen ſpem non ego abjiciam, tuæ

Niteus opis fiducia.

Pater beate, maximas tibi gratias

Ago, tuum qui ſupplicem

Tam dexter audis, & malorum fluſtibus

Tantis benignus eripis.

Jam jam querelas flebiles, ſuſpiria

Jam pono lætus triſtia,

Et fonte quidquid carminis fluet meo,

Pater, tibi omne conſecro.

ARGUM. PSALMI XV.

Præcipit genti ſuæ, quam vivendi rationem ſequi debeant, ut Deo cari ſint, & ſublato omni exterrorum metu in finibus patriæ ſecuri conquieſcant.

Pater ſupreme, quis tuum templum incolet? David

Dic, oro, monte quis acquieſcet in tuo?

Qui purus omni a labe juſticiam colit,

Deus

Qui diligenter curat, ut mentem mala

Præcaſt. Carmin.

M

A co-

A cogitatione servet integram ,
 Nec immerentes ore vexat improbo ,
 Nec alteri nocere solummodo cavet ;
 Sed si quis ullum lædat , auxilio venit ,
 Injuriamque prohibet ; hic malum , licet
 Ditissimum , licet potentem , negligit ;
 At quos amantes viderit Deum , colit ,
 Veretur , observat , loco quamquam infimo
 Jacere cernat rerum egentes omnium .
 Nec , si quid umquam juret , umquam pejerat .
 Non ille scœnori pecuniam daret ,
 Illamve reciperet , licet pauperrimus ,
 Ut innocentes opprimat , vel maximam .
 Qui servat hæc , immobilis semper manet ,
 Deoque carus vivit , & mortalibus .

ARGUM. PSALMI XXIII.

Gloriatur , se , ac sua omnia Deo curæ esse : & demonstrat , quam beati sint ii , qui iuste cum fide , ac pietate vitam degunt , & sese in servitutum Deo dicant .

Rex cœlitum est pastor meus ;
 Nihil boni deerit mihi ,
 Uberrimus in pascuis ,
 Amœna propter flumina
 Me spiritus sanctissimi
 Aura beata recreat ,
 Dulcique mentem pabula
 Nutrit suæ scientiæ .
 Miserrimus animus meus
 Dum longius abit a Deo ,
 Erraverat procul a via ,
 Quæ ducit ad cœlestium
 Oras beatas ; at Deus
 Meæ misertus miseriæ ,
 Benignitate maxima
 Quæsiuit illum ultro , & sui
 Reduxit ad caulas gregis .
 Si sola solus per loca
 Inermis eam , ubi plurima
 Imago mortis territat ,
 Interritus perrexero ,
 Custode securus Deo .
 Me virga , pastor optime ,
 Coercet errantem tua :
 Ne gravius offendar cadens ,

Tuo bacillo fulcior .
 Me mensa roborat tua ,
 Me dulcis exhilarat calix
 Tuus : oleo foveor tuo .
 Nec me , pater dulcissime ,
 Per has inexplicabiles
 Vias euntem deseres
 Unquam , sed ad tuam domum
 Duces , ubi vita fruatur
 Et sempiterno gaudio .

ARGUM. PSALMI XXX.

Gratias agit Deo , gravissimo morbo liberatus .

TE semper efferam , pater sanctissime ,
 Cantu meorum carminum ,
 Qui me tenebris inferorum , & horrida
 Leti extulisti janua .
 Tua benignitate perfectum est , meis
 Ne risus hostibus forem .
 Domine , pia prece invocatus tabido
 Morbum expulisti corpore .
 Jam jam sub imas ire terras coeperat
 Moerens anima , jam nexibus
 Soluta cari corporis dulcissimas
 Linquebat oras ætheris ;
 Cum restituta vivere , & iussa est frui
 Lucis cupito munere .
 Adeste , castæ virgines , homines pii ,
 Adeste , mecum laudibus ,
 Deum benignum tollite , agite gratias ,
 Quantas potestis maximas ,
 Incomparabili illius elementis .
 Ut vere nimbus uvido
 Vix ortus evanescit , Aquilonis feri
 Si spiritus supervenit ;
 Sic ira sancti Numinis brevissima est :
 At illius benignitas
 Semper salutem , semper hominibus piis
 Sincera præbet gaudia .
 Quod si quid umquam incommodi intervenerit ,
 Deo favente celeriter
 Multiplicatis commodis rependitur .
 Verum ipse victis hostibus ,
 Et constituta pace , cum mihi omnia
 Feliciter succederent ,
 Demens ad hunc modum loquebar : Nulla vis
 Me , nulla jam potentia

Dejicere poterit hoc statu rerum optimo.
 Tu scilicet regnum meum,
 Measque fortunas ita stabiliveras,
 Ut montis instar omnibus
 Habere visa sint, at hoc nulla mihi
 Virtute contigerat mea,
 Sed liberalitate maxima tua:
 Quod ne mihi ignotum foret,
 Illamque stultam opinionem ut ponerem,
 Paullisper averfus mihi
 Memet reliquisti, Domine; suntque illico
 Mutata, versaue omnia.
 Tum lacrimans, vocesque lamentabiles
 Fundens, Quid, inquam, maxime
 Rex cælitum, quid vita proficiet mea
 Restincta morte tam cita?
 Ecquid sepulcro lingua condita poterit
 Cantare nominis tui
 Laudes? tibiye docta dextra psallere?
 Ne, quæso, supplicis tui
 Novissimo in casu precem contemptam habe,
 Sed pestilentem corpore
 Depelle morbum de meo. Sic lacrimans
 Orabam: at ipse tristibus
 Aurem querelis admovens; pro lugubri
 Mœrore læta gaudia,
 Pro fœditate vestium squalentium
 Vestem dedisti candidam.
 Itaque tibi ingenium meum; & studia mea,
 Meamque vocem consecro:
 Semper tibi laudes cithara dicet mea,
 Semper tuam clementiam
 Cantabo, semper gratias tibi maximas
 Agam, pater sanctissime.

ARGUM. PSALMI XLII.

*Exponit, in quanta sollicitudine, ac dolore esset,
 cum Hierosolymis ejectus a Saule, neque templum
 augustissimum cum reliquis civibus celebrare, ne-
 que sacrificiis sollempnibus interesse posset.*

UT cerva fontem anhela quærit anxie,
 Quam vis canum sagacium
 Vexavit, urit arva dum Sol igneus;
 Sic te, pater dulcissime,
 Desiderat anima mea, cor meum tuam
 Sic expetit præsentiam.

O si nivea lux illa fulgeat mihi ,
Cum liceat ad templum Dei .
Adire , & hymnos Numini augustissimo
Cum gente sancta dicere !
Noctes , diesque lacrimæ tristissimæ
Fuere pro cibo mihi ,
Dum continenter sciscitantur impiæ
Gentes , Deus meus ubi sit .
Cur ille , dicunt , exsulem servum suum
Tantis relinquit in malis ?
Jam fracta virtus ponderi succumberet
Rerum asperarum , nisi bona
Fulciret illam spes ; & animum reficeret
Jucunda cogitatio ,
Nimirum adhuc tempus fore , cum ad amabilem
Redibo lætus patriam .
Tunc me meorum multitudo civium
Immensa gratulantium
Templum Dei deducet ad sanctissimum :
Tunc civitas clamoribus
Fauissimis sonabit , omnia tinnulis
Late sonabunt plausibus .
Ergo bona tibi tanta , o anima mea , a tuo
Promissa cum scias Deo ,
Cur non dolori jam modum figis ? mihi
Cur omne tollis gaudium ?
Committe jam , committe præsentissimo
Tuam salutem Numini ;
Nam liberari ab omnibus malis adhuc
Agenus illi gratias .
Hæc sæpe mecum colloquor : sed intimis
Resurgit in præcordiis
Quandoque tanta vis doloris anxii ,
Vix ut queam resistere .
Quapropter ad tui memoriam nominis
Amabilem sæpissime
Recurram , o unica spes mea , o lux , & salus ,
Carumque solamen meum ;
Dulcescet illa amaror omnis ; & animo
Illa eluet curas meo .
Quamquam paterna sum fugatus a domo ,
Vastasque solitudines
Jordanis , aviosque saltus Hermonî ,
Inhospitalem & Mizarum
Exsul peragro , rerum egenus omnium :
Numquam tamen tui , pater ,
Non meminero , numquam effluet animo meo
Dulcissimum nomen tuum .

Eheu dolorem urget dolor, neque ulla fit
 Laboris intermissio.
 Ut densus imber, visque sæva grandinis
 Ingente glomerati agmine
 Cum turbulento decidunt ex æthere,
 Magnis & omne motibus
 Cælum quatit tonitruum horrifonus fragor,
 Sternuntur agri, sternitur
 Seges virescens, rura plenis omnia
 Natate fossis rusticus
 Miratur; heu tali, pater, miserum agmine
 Gravium malorum usque obruis.
 Sed tu ferena placidus intueberis
 Me fronte tandem, & candida
 Lux pellet horridas tenebras: interim
 Manente nocte desinam
 Laudes tibi nunquam canere, numen tuum
 Nunquam precari desinam.
 Dicam tibi sens, O salus, o lux mea,
 Cur tamdiu immemor es mei?
 Cur lacrimis, dolore, luctu maceror,
 Dum vexat hostis barbarus?
 In frustra corpus omne concidunt meum,
 Et me miserrime enecant,
 Dum continenter sciscitantur impia
 Gentes, Deus meus ubi sit.
 Cur tristis es, anima mea? cur nunquam mihi
 Per te licet quiescere?
 Committe jam, committe præsentissimo
 Tuam salutem Numini;
 Nam liberati ab omnibus malis adhuc
 Agemus illi gratias.

• ARGUM. PSALMI C.

*Hortatur omnes mortales, & præcipue Judæos, ut
 memores sint beneficiorum Dei, qui nos creavit,
 regit, ac suetur; ut nunquam intermistenda sint
 gratiarum actiones.*

URbes, & agri, cantibus
 Sonate, læta maximo
 Servite mente Numini:
 Lætis adite plausibus
 Ad atria ejus aurea.
 Ipse, ipse verus est Deus,
 Terræ, polique conditor;
 At ceterarum gentium

Non

Non dii, sed aurum, & marmora,
 Tu nos, pater sanctissime,
 Tua benignus dextera
 Finxisti: oviculæ nos tuæ
 Sumus tuæ scientiæ
 Dulcissimo nos pabulo,
 O pastor optime, nutrient
 Æterna donas sæcula
 Vitam beatam ducere.
 Ergo Deum canamus, o
 Viri, & pudicæ feminæ:
 Viri, & pudicæ feminæ,
 Adite sancti januas
 Templi sonantes dulcia
 Carmina; sonent late omnia
 Nomen Dei sanctissimum;
 Nam dulcis, & rerum omnium
 Amabilissimus est Deus,
 Absumet ignis sidera,
 Tellus peribit; at Dei
 Mirabilis clementia,
 Et veritas semper manent.

ARGUM. PSALMI CXIII.

Hortatur ad hymnos canendos Deo, prædicans ejus potentiam, & providentiam misericordiæ plenam.

Adeste, castæ virgines, pueri integri,
 Adeste, mecum laudibus
 Efferte nomen Numinis sanctissimi.
 Dum Sol per oras ætheris
 Cursu volubili rotabitur, diem
 Ægris ferens mortalibus;
 Minora dum micabit inter sidera
 Luna occidente jam die,
 Ab Indo ad ultima Britanni littora
 Illustre sit nomen Dei.
 Non universis ille tantum gentibus
 Sua imperat potentia;
 Sed cælites, cælique supra maximum
 Se tollit altus verticem.
 Hinc pater acuto cuncta lustrat lumine:
 Non stellifer quidquam polus;
 Non alma quidquam terra continet, neque
 Pontus cam circumvagus,
 Nil pandit aer liquidus, occultat nihil
 Crassa inferorum obscuritas,

Mortalis ullus denique nihil pectore
 Servat profundo conditum ,
 Quod ille rector maximus cœlestium
 Non cernat omni tempore ,
 Ipse & potentes , mente inani lucida
 Ferambulantes sidera ,
 Vindex ad imos usque trudit inferos ;
 Et pauperes in infimo
 Gradu jacentes principum in solio locat
 Sua benignus dextera ;
 Iple & pudicam liberorum garrulo
 Hilarat puellam examine ,
 Quæ prole sine dulci diu in tristissimo
 Mœrore vitam traxerat .

ARGUM. PSALMI CXIV.

*Hymnus est elegantissimus , in quo celebrat prodigia
 quæ Deus edidit , cum Hebræos ab Ægypto tradu-
 ceret in regna Cananæorum .*

CUM liberata servitute barbara
 Judæa gens Ægyptiorum finibus
 Exiret , illamque Deus ipse duceret ,
 Fugere fluctus æquoris perterriti ,
 Jordanis unda retro fugit ; & stupens
 Gens illa vidit exsilire maximos
 Montes ut agni prata per virentia
 Saliunt novelli , lacte dulci ebrii .
 Quid accidit , mare , tibi , cur perterritum
 Fugeres ? ocelle fluminum , quid accidit ,
 Cur pavidus ad fontem recurreres tuum ?
 Vos , quæso , montes maximi , quid impulit
 Inusitatis exsilire motibus ?
 Sensere magni Numinis præsentiam
 Montes , & unda fluminis , & altum mare ;
 Sensere dura saxa solitudinum ,
 Cum bis ea fontes verteret in uberes .

DE INSCRIPTIONE

QUINDECIM HYMNORUM,

Qui sequuntur .

TEr quinque , qui sequuntur , Hymni , Cantica
 Graduujn vocantur ; istiusque nominis
 Quæ vis in isto sit loco , jam plurimi

Inter-

Interpretantes protulere plurima ;
 Sed illa sic incerta , fabulosaque ,
 Ut ipse malim confiteri libere ,
 Nescire me , quod nescio ; tu , candida
 Lector , quod istis continetur Canticis ,
 Dum diligenter explicamus , obsecro ,
 Attentum animum adhibe , tamen si inscriptio
 Quid ipsa sibi velit , explicare non datur .
 Nam totque tantaque poteris cognoscere
 In his poetæ versibus sanctissimi ,
 Vitam beatam maxime attingentia ,
 Ut curiosus sis licet , animo tamen
 Æquo ferendum sit , quod unum hoc nescias .

ARGUM. PSALMI CXX.

*Queritur vir sanctus , se patria pulsum inter homi-
 nes improbos , & fraudulentos vitam agere .*

O^ppugnat hostis impius caput meum ,
 Measque fortunas : ego
 Contra piarum me tegam scuto precum ;
 Nam vocibus dexter meis
 Aureas amicas admovent semper Deus ,
 Ut filio dulcis pater .
 A viperino dente , acerbo a vulnere
 Oris dolosi , Domine , me
 Defende , sæva lingua ne vitam mihi
 Suis venenis auferat .
 Dolosa lingua quem tibi fructum feret ?
 Quid turpibus mendaciis
 Lucrabere præter odium Dei , miser ,
 Et omnium mortalium ?
 Qualis sagitta milite a fortissimo
 Contorta , qualis ignea
 Nutrita vis juniperi olentis caudice ,
 Talis venenata impii
 Lingua est . Miser , miser ego jam nimium diu
 Cum gente vivo barbara .
 Me pax juvat , & mutui concordia
 Amoris ardens ignibus :
 At ista gens , de pace cum loquor , nihil
 Crepat nisi necem , & sanguinem .

ARGUM. PSALMI CXXI.

Docet, in periculis ad misericordiam Dei confugiendum esse, qui solus & possit, & velit nos incolentes conservare, & omnibus bonis augere, & cumulare.

DUM me cruentus urget hostis, lumina
Montes ad altos sustuli,
Unde ille rerum præpotens pater omnium,
Terræ, polique conditor,
Frustratus hostem barbarum, mittet mihi
Opem benigno numine.
Numquam ille sævis impiorum incurfibus
Tuam finet constantiam
Labare visam, dormiet numquam tuæ
Salutis ille negligens:
Qui civitati præsidet sanctissimæ,
Numquam profecto dormiet:
Hærebit ille semper ad dextrum latus
Fidissimus comes tuum,
Umbraculique tecum amabilis vice
Fungetur optimus pater,
Ne fervidus te tangat aut Sol, aut gravi
Luna insalubris lumine.
Quodcumque ages, ubicumque eris, domi, foris,
In urbe, in agro, tecum erit
Semper beatus cælitum rex, & pater,
Fortunet ut tibi omnia.
Suasque tandem ducet ad domos, ubi
Æterna vives sæcula.

ARGUM. PSALMI CXXII.

Solebant omnes tribus Hierosolyma convenire ter in singulis annis ad agendos dies festos, & solemnes: inducit igitur homines pios gratulantes, venisse tempus ejusmodi conventus, & urbem sanctam laudibus celebrantes, illique omnia bona precantes:

O Quale cepi gaudium,
Cum dicerent, Adibimus
Templum Dei sanctissimum!
Te, magna, visam, civitas,
Testis, viis, & mœnibus,
Et civium concordia
Florentem, & almi Numinis

Tutela ; agris ex omnibus ,
 Et oppidis gens plurima
 In te piorum singulis
 Annis ter ad festos dies ,
 Et sacra sancta convenit ;
 Ut legibus mandat suis
 Rector supremus cœlitum .
 Tu jura claris urbibus
 Legesque das ; tu maximos
 Reges alis ; te Davidis
 Proles frequentat inclyta ,
 Stipata semper nobili
 Turba ducum ; precamini ,
 Cives boni ; bona omnia
 Huic civitati ; sit bene ,
 Feliciterque amantibus
 Te , mater alma ; nec tuis
 Umquam recedat finibus
 Pax , & beata Faustitas .
 Salus meorum civium
 Tua salute nititur ;
 Templum Dei sanctissimum
 Te reddit omnibus piis
 Amabilem ; igitur usque dum
 Ego vixero , semper tibi
 Bona precabor omnia .

ARGUM. PSALM. CXXIII.

*Homines pii ab impiis oppressi misericordiam
 Domini implorant .*

AD te , beatas qui beatus incolis
 Oras nitentis ætheris ,
 Attollo lumina lacrimis manantia ,
 Vitæ meæ spes unica .
 Injuriosa verberatus ut manu
 Manus heriles aspicit
 Flens servus , implorans opem domini sui ;
 Ut serva servi dextera
 Pulsata , dominæ dexteram aspicit suæ ;
 Sic te , pater sanctissime ,
 Nos intuemur maxima fiducia ,
 Donec querelis tristibus
 Auris benignas applicans adsis tuo
 Nobis secundo numine .
 Jam , quæso , jam tuere supplices tuos
 Vultu sereno ; ista quoniam

Abominata gens sua superbia
Nos enecat miserrime ;
Miserrime nos enecat gens impia
Irrisione , & jurgiis .

ARGUM. PSALMI CXXIV.

*Gens sancta præsentis periculo liberata gratias
agit Deo .*

Nisi nos benigni Numinis
Tutela servasset , piæ
Nunc dicar urbis incola ,
Nisi nos benigni Numinis
Tutela servasset , feri
Invaderent cum barbari ,
Instar leonum , hianibus
Nos devorassent faucibus .
Cum gens veniret impia
Furens , minasque , & sanguinem
Spirans , malorum altissimo
Nos obruisset gurgite .
Torrens malorum maximus
Agros , & urbem , & omnia
Jam perdidisset funditus .
Supreme cælitum pater ,
Te sempiternis laudibus
Servata tollet civitas ,
Quam noluisse immanibus
Patere prædam bellis .
Ut implicata vinculo
Fudica turtur , aucupis
Cruclis effugit manem ,
Si forte laqueus frangitur ;
Sic impiorum e dextera
Spem præter ipsi evasimus .
In posterum anxius timor
Nostris facessat finibus ,
Quando omnium rerum potens ,
Terre , polique conditor
Suo benigno numine
Nostræ salutis consulit .

ARGUM. PSALMI CXXV.

Describit securitatem eorum, qui omnes suas spes collocant in Deo.

Quicumque vere spes suas locat in Deo,
 Immobilis semper manet,
 Sionis instar, nulla quem suo potest
 Mutare vis umquam loco.
 Ut sancta vallo montium circumdata
 Est undecumque civitas,
 Sic ipse rector cælitum dextro pios
 Vallabit usque numine,
 Illosque nullis improborum viribus
 Premi diutius sinet;
 Ne forte virtus fracta rebus asperis
 Deo recedat a suo.
 Fac affluenter manet ad bonos tua,
 Quæso, benignitas, pater:
 At qui, secutus impiorum pessima
 Consilia, deserit viam
 Legum tuarum perditus, illum, precor,
 Ultrice puni dextera,
 Utinam Quies, & alma Pax nostros agros,
 Nostros & urbes incolat.

ARGUM. PSALMI CXXVI.

Describit lætitiâ gentis Hebrææ e Babylone domum redeuntis.

CUM liberati barbaræ gentis jugo
 Dulcem rediremus domum,
 Se somniare quisque, non vero frui
 Existimabat gaudio.
 O quæ voluptas, quanta nobis commoda
 Tuo favente numine
 Tum contingere, cælitum rex maxime!
 Tum barbarus mirans ait,
 En quanta pro salute gentis istius
 Pater decorum conficit!
 Et magna certa fecit; haud injuria
 Tanto exilium gaudio.
 Ut Auster udus imbrum vim maximam
 Fundens, jugisque collium
 Nivem albicantium liquans, suas super
 Ripas alit torrentia

Flu-

Flumina ; vagantur illa , lateque omnia
 Tenent ; ita , pater optime ,
 Fac , ut tuorum multitudo civium
 Plenis viis ad Patriæ
 Dulces fluat agros , omniaque passim occupet ,
 Lateque plausu repleat .
 Ut glareoso tristis arvo semina
 Mandans colonus , uberem
 Si sorte messem percipit , gaudet magis ,
 Quam cultor agri fertilis ;
 Sic nos per annos septies denos gravem
 Et servitutem , & cetera
 Passi mala omnia , cum lares amabilia
 Reviseremus patriæ ,
 Cunctis vicissim gaudiis incessimus ;
 Tuæque , rex sanctissime ,
 Benignitati gratias semper agimus ,
 Semperque habemus maximas ,

ARGUM. PSALMI CXXVII.

*Docet , & domus , & familie , & ipse civitatis
 salutem , & custodiam in unius Dei providentis
 constitutam esse , & ab eodem victum , & cultum
 omnibus suppeditari .*

Nisi conjugem Deus bonam , & agrum fertilem ,
 Dulcesque donet liberos ,
 Frustra laborat , si quis hæc studio suo
 Sese paraturum putat .
 Nisi civitatem & civium concordiam
 Defendat optimus pater ,
 Et civitatem , & civium concordiam
 Frustra tuentur principes .
 Frustra ad labores ante lucem surgitis ;
 Frustra laboratis diem
 Totum , labores nisi Deus vestros suo
 Fortunet ipse numine .
 Ipse & parabilem facit victum , & piis
 Præbet quietem civibus :
 Ipse & frequentat liberis domum , & ipse
 Uxor pudica munere
 Contingit , ac decora , & optimis simul
 Ornata proles moribus ,
 Talisque robore , qualis a fortissimo
 Sagitta torta milite .
 Beatus ille , qui pharetram talibus
 Implet sagittis ! non ei

Erit

Erit timendum, si quod umquam evenerit
 Certamen: illum iudices,
 Et cuncta civitas, suis cum filiis
 Bonum, & beatum prædicant.

ARGUM. PSALMI CXXVIII.

*Prædicat, in summa rerum prosperitate vitam afflu-
 rum quicumque Deum pie, sanctoque coluerit.*

BEatus ille, qui piam sese Deo
 In servitutem dedicat,
 Semper paratus exsequi, sanctissimis
 Quod ille verbis imperat.
 Non is paterna rura inaniter colit:
 Sed quæ feraci semina
 Sino recepit fundus, illa maximo
 Reddit colenti fœnore.
 Uxor pudica bene regit domum, & optimis
 Exornat ipsam liberis,
 Fœcunda vitis instar, apta diligens
 Quam curat arte vinitor.
 Proles novella crescit, ut virentibus
 Oliva pulchra ramulis;
 Et mensa turba garrula circumdata
 Cumulat parentes gaudio.
 Hæc est piorum vita; eosque talibus
 Remuneratur præmiis
 Summi benignitas patris, quem si coles
 Urbis sacratæ commodis
 Lætus frueris; usquedum vivas, tuæ
 Prolis beatæ liberos
 Florere cernes; patriis felicitas
 Regnabit alma finibus.

ARGUM. PSALMI CXXIX.

*Gratias agit Deo, quod populum suum ab impiis
 semper oppugnatum, salvum, incolumemque
 semper conservaverit.*

ME barbarorum sæpe vexavit furor,
 Nunc sancta dicat civitas;
 Me barbarorum sæpe vexavit furor
 Ab ultima usque origine;
 Sed nulla vis, nec ullus hostium dolus
 Me quivit umquam extinguere.
 Aravit hæc mea terga longis verberum

Sulcis

Sulcis nefandus barbarus ;
 Laboribus me , vinculisque asperrimis ,
 Duraque vexavit fame :
 Sed vincla rupit ferrea , & tandem mihi
 Dulcem quietem præbuit ,
 Uberrimoque me locavit in solo
 Cælestium summus pater .
 Qui civitatem Numinis sanctissimi
 Vult perditam , pereat male .
 Ut herba testis orta summis ædium
 Humore vitali caret ,
 Nec quit profundiore radices humo
 Agere ; itaque ante exaruit
 Percussa sole servido , quam dextera
 Vellatur alicujus ; neque
 Manum replevit ea metens , suum neque
 Sinum , manipulos colligens ;
 Nec qui viator præterit , verbis ei
 Bene precatur optimis ;
 Talis sit impius hostis , & quisquis pios
 Odit , Deus quos diligit .

ARGUM. PSALMI CXXX.

Precatio est hominis conscientia peccatorum gravissima cruciati , seque misericordie divine fiducia consolantis .

Malis profundis obrutus
 Tuam , pater , fidem invoco .
 Ne , quæso , supplicis tui
 Audire vocem respue .
 Si vindicaris omnia
 Peccata , cunctaque exigas .
 Quæ jure debentur tibi ,
 Quis sustinebit , o pater ,
 Quis tam pie , tam puriter
 Vitam colit , quin sit tibi
 Poenas daturus maximas !
 Incomparabilis tua
 Certe benignitas facit ,
 Ut numen a mortalibus
 Tuum colatur ; hac ego
 Confisus , auxilium tuum
 Exspecto certum : animus meus
 Et lenitate tua , & tua
 Promissione nititur .
 Non sic morantem languidus

Exspectat Auroram vigil,
 Qui nocte tota sedulus
 Ambivit urbis micenia,
 Votis ut omnibus expeto
 Ego te morantem, o refugium
 Meæ salutis unicum,
 Judæa gens, Deo tuo
 Confide; nam Deus tuus
 Benignus & placabilis
 Et promptus est ignoscere,
 Tua ipse peccata omnia
 Delebit, & maculas sua
 Absterget omnes dextera.

ARGUM. PSALMI CXXXI.

*Monet nos exemplo suo, fugiendam esse superbiam,
 & importunitatem, atque in sola miseri-
 cordia spem ponendam esse.*

Supreme rector cælitum,
 Non ipse regium ob decus
 Instatus efferror, neque
 Perambulans sublimia
 Mentis superbæ somniis,
 Majora viribus meis
 Tribuo, tribuere quam decet
 Hominem caducum, inanis &
 Imaginis simillimum.
 Si non modestiam colo,
 Si sumo magnos spiritus
 Turpissimæ arrogantia,
 Poenas gravissimas luam.
 Qualis pusillus est puer,
 Quem lacte dulci blandula
 Vix alere desit parens;
 Talis animus, & mens mea est.
 Ut ille totus optima
 Matre acquiescit in sua,
 Sic ipse toto pectore
 Ex caritate pendeo
 Cælestis optimi patris.
 O te beatum, quisquis es,
 Qui spem tuam in Deo locas!

ARGUM. PSALMI CXXXII.

Describit studium Davidis in parando loco, ubi templum edificaret. Inducitur etiam Deus loquens ac promissens, familiam Davidis sempiterno regno posituram; quod quidem perfectum est CHRISTO rege calitum, atque hominum constituto.

SIS memor usque pii, Rex maxime, Davidis, & quam Cives in omnes mitis exstiterit suos.

Ille tui sancto incensus juravit amore,

Votumque lingua nuncupavit hoc modo:

Ne tibi sim carus, vita mihi carior ipsa,

Neu verba posthac supplicantis audias,

Ante meæ si cara domus ad limina adibo,

Oculosve somnus ante clausurit meos,

Quam præclara tuo fuerit, pater optime, templo,

Tuisque dedicata sacris area.

Sic ait, & parvo post tempore dedicat illam,

Qua se beatis silva campis porrigit,

Cum tu clara prius Bethleemi signa dedisses,

Tuam introibimus, pater, domum, tua

Perpetuo castis venerantes numina sacris.

Tu mansionem dexter ad certam veni,

Mysticaque arca vagans stabili jam sede quiescat:

Fac, ut sacerdos mente pura te colat,

Et sua cuique pio da gaudia, neve tueri

Omitte prolem Davidis tui inclytam,

Quam patris aurato in solio tu, sancte, locasti.

Juravit ille, pejerare qui nequit.

Omnipotens dulci affatus sic Davidem amore:

Tua sedebunt sede liberi tui;

Qui si constantes in religione manebunt,

Quam Mosis ore sanximus, neque inclyta

Fœderis antiqui violarint jura, nepotum

Serie propago nobilis longissima

Dulci pace fruens solio regnabit avito.

Sionis arcem præfero cunctis locis.

Hic ego longa libenti animo per sæcula degam:

Hic supplicantium preces ego civium

Audiam, & optanti mea sancta oracula pandam.

Florebit agris fructuum lætissima

Omnigenum ubertas, atque hinc procul omne fugata

Per ævum egestas exsulabit horrida.

Casti sacerdotes ornabit vita, colentque

Domos piorum pura semper gaudia.

Ac veluti lauro pulchræ densissima silva

Radice

Radice ab ima pullulat, sic Davidi
 Candida succrescet proles, quæ splendida facta
 Parentis augeat optimi: neque hostium
 Ulla domum poterit vis hanc evertere, non si
 Conjuret omnis impiarum gentium
 Barbaries latas per terras didita: cunctis
 Optatus ille piis fuit ab origine
 Ista, qui populos omnes, & maxima ponti
 Æquora, globosque siderum micantium,
 Et divos supra cæli convexa morantes
 Mecum gubernet sempiterna ad sæcula.

ARGUM. PSALMI CXXXIII.

*Commendat concordiam, & sanctam animorum
 inter se conjunctionem.*

O Quam beatum est pacis insolubili
 Fratres ligari vinculo!
 O qualia bona, & quanta secum gaudia
 Apportat alma Caritas!
 Quales odores spirat unguenti liquor
 Stillans Aaronis sacro
 E vertice aureas ad oras vestium:
 Tales odores candida
 Pax, atque amoris mutui concordia
 Afflant piorum mentibus.
 Ut ros Sionis decidens jugum, & avia
 Hermonis alti pascua
 Fœcundat; ita quas incolit domos pia
 Pax, ditat omnibus bonis.
 Nam degit ubi Pax, & beata Caritas,
 Ibi cœlitum degit pater.

ARGUM. PSALMI CXXXIV.

*Hortatur Levitas, & alios viros religiosos, qui no-
 ctu vigilias agebant in templo, ut precibus, at-
 que hymnis Deum venerentur.*

DUM nox favet, suoque nos silentio
 Invitat, agite laudibus
 Deum efferamus, ædis o sanctissimæ
 Casti, beatique incolæ.
 Tollamus agite supplices simul manus,
 Adytisque in intimis Deum
 Aures amicas applicantem plurima
 Prece invocemus, ut sua

Ope sospitet cives, bonaque det omnia
Larga benignus dextera.

ARGUM. PSALMI CXXXVII.

*Gens Hebræa in Babylonem abducta commemorat hoc
dulcissimo carmine luctum, & maerorem suum, &
prædicit excisionem imperii Chædeorum.*

DUM nos ferarum gentium crudelitas
Desideratæ patriæ duki solo
Exterminatos detinet, juvat procul
A civitatis barbara frequentia
Sedere solos sola propter littora
Euphratis; hic comantium nostras lyras
Suspendimus ramo salicum, & uberrimam
Vim lacrimarum fundimus, tui, Sion
Dulcis, recordantes, tuamque, maxime
Pex calitum, orantes opem ore supplici.
At interim adiens pastor errantis gregis
Cantate nobis, ait, aliqua de canticis
Vestris: quid istæ pendulæ tacent lyræ?
Qui nos queamus, obsecro, animum inducere,
Ut canticum sanctissimum nostri Dei
Cantemus istis exsultantes in locis?
Si oblitus nunquam fuero, sancta civitas,
Tui, mea quoque oblita dextra psallere
Amabiles nunquam lyra eliciat sonos.
Adhæreat lingua mea faucibus meis,
Ne canere possim, nisi ego meminero tui,
Nisi cuncta acerba erunt mihi, & amarissimo
Amariora felle, donec moenia,
Tuumque templum restituta videro.
At tu, nefanda facta qui mortalium
Ultrice punis dextera, teterrimi
Idumæorum sceleris usque sis memor;
Qui, dum periret civitas tua, impies
Hosles furentes vocibus nefariis
Sic incitabant: Pergite agendum, & omnia
Vastate; ferro, & igne cuncta evertite.
Babylon superba, & omnium miserissima,
Beatus is, qui talibus pro injuriis
Te digna solvet præmia, atque idem tibi
Large reponet, parvulos a pectore
Natos revelleus matrum, & illos aspera
Ad saxa frangens, teque funditus cruens.

ARGUM. PSALMI CXLIV.

*Gratias agit Deo, cujus benignitate hostes bello
superare soleat, & ipsius auxilium implorat
adversus impias nationes.*

ATerne mundi Domine, quas grates tuæ
Clementiæ possim agere? vel tuum quibus
Efferre nomen laudibus sanctissimum?
Tu præliari dexteram meam doces,
Et omnium discriminum fidissimus
Comes per hostes obvios, & horrida
Per arma tutum ruere, & incolumen facis.
Tu civitates subjicis mihi,
Latisque dones imperare gentibus.
Domine, quid est homo, quod honore maximo
Dignaris illum, & tam benigne amplecteris?
Homo est imago vana, & umbræ somnium
Inanis, ipsa inanitate inanior.
Descende cælo, & irruentes hostium
Acies coerce fulminante dextera:
Illos procellis, igne, grandine dissipa,
Illos sagittis perime; nosque jam obrutos
His nationum barbararum fluctibus
Tuere, summe Rex, tuas laudes ego
Cantabo semper; tibi cithara semper mea
Hymnos sonabit; tu salutem regibus
Donare gaudes; Davidem tu maximis
Periculorum liberaſti casibus.
Tu nunc furores impiarum gentium
Compesce, quas nefanda semper dicere
Juvat, nefanda semper agere; fac, pius
Miles triumphum nobilem referat domum;
Fac, alma pax, quiesque nostris finibus
Regnent tumultu barbarorum liberæ.
Proles novella crescat agris omnibus,
Ut valle myrtus avia nitentibus
Se ramulis subjicit, amica limpidi
Rigata fontis lymphula: sint virgines
Nostræ decoro corpore spectabiles:
Sint plena semper horrea bonis frugibus,
Plenis redundet cella semper doliis,
Redundet oleo, melle, pomis dulcibus.
Sint prata gregibus testæ fecundissimis,
Fortes juvenci plaustra onusta ducere,
Fortes feracem glebam aratro findere:
Neu sævus hostis nostra rumpat moenia,

Neu

Neu patriæ jucundæ amabiles agros
 Abducta gens relinquat, aut civilibus
 Sonent plateæ jurgiis. Ter & amplius
 Beata gens, quæ talibus fruitur bonis!
 Beata gens, quam maximus cælestium
 Pater suo præfens tuetur numine!

PARAPHRASIS IN CARMEN DAVIDIS

*De Morte Saulis Judæorum Regis, & Jonathæ
 ejus Filii.*

URbes, & agri, fundite
 Lamenta, tristes sidera
 Ad alta voces tollite:
 Nostrum decus gens impia
 Exstinxit; altis montibus
 Gens clara bello, procidit.
 Ne, quæso, fama, compitis
 Hæc Ascalonis, aut Gethi
 Perfer; puellas hostium
 Ne tanta clades ad choros,
 Cantusque lætos excitet.
 Abominata Gelboe,
 Nec ros, nec imber educet
 Herbam tuam, neque in tuis
 Jucunda vitis, aut seges
 Pubescat umquam montibus.
 Hic heu relictis parmulis
 Phalanx piorum militum
 Fugata turpiter cadit:
 Hic dux cruento in pulvere
 Procumbit, ac si non foret
 Gentis patræ rex inclytus.
 Sagitta numquam Jonathæ,
 Cum sæva obiret prælia,
 Ictus ferebat irritos,
 Sagitta velox, fortium
 Potare docta sanguinem;
 Nec hostis umquam vel pede,
 Vel equo tulit sese obvius.
 Impune, cum Saules manu
 Ensem rotaret impigra.
 Saules parens, & Jonatha
 Parentis inclyti decus;
 Jucundi, atque amabiles,
 Vos non diremit impiæ
 Vis dura mortis, copula
 Quos vita dulci junxerat.

Non

Non fortior vobis leo
 Errat Libyffis vallibus,
 Regina non avium ocyor
 Vobis, fugacem præpete
 Penna columbam persequens:
 Vos, o decoræ virgines,
 Quas induebat coccina
 Rex veste, quas monilibus
 Ornabat aureis, date
 Vestro, misellæ, lacrimas
 Regi; misellæ, tristibus
 Sonent querelis omnia.
 Ut militum ferocium
 Infraſta virtus concidit!
 Ut Jonatha fortiffime,
 In montibus tuis jaces
 Confoffus alto vulnere!
 Has fundo lacrimas tibi
 Et hæc ab imo pectore
 Suspiria, frater mihi
 O luce cara dulcior,
 Amate Jonatha mihi,
 Quantum nec ardens candidam
 Amans puellam deperit,
 Quantum nec unicam parens
 Tenella natam diligit:
 Ut militum ferocium
 Infraſta virtus concidit!
 Ut Jonathas acerrimus
 Parente cum fortiffimo
 In montibus cæſus jacet!

AD LECTOREM.

HÆC noſtra, lector Chriſtiane, carmina
 Sic temperavimus favente numine
 Divino, ut ipſa enim legas, ſit idem fere,
 Ac ſi poetæ Davidis ſanctiffimi
 Hymnos legas; tametſi enim neque reddita
 Fuere verbis verba, neque nobis fuit
 Religio, multa addere, bonam, & certam tamen.
 Spem habemus, additum nihil, quod ab ipſius
 Abhorreat ſententia vatis, nihil,
 Obscura quod non monſtret inſtar luminis,
 Aut pulchritudini poematis aliquid
 Decoris addat, virgini pulcherrimæ
 Quale decus addunt arte purpureæ roſæ,
 Violæque flavis crinibus circumdatæ.

Quod

Quod si labores hos meos perspexero
 Fuisse gratos, & legentium favor
 Scribentis adjuverit, ut æquum, industriam,
 Ultra recipio, & tibi meam adstringo fidem,
 Curam mihi hanc unam fore antiquissimam,
 Ut quæ reliqua sunt Davidis poemata,
 Oratione pura, & arte musica
 Ornata possint mox Latinis auribus
 Intelligi; hoc ego ut queam cito exsequi,
 Utinam optimi foveat benignitas Dei;
 Quod oro, votisque omnibus equidem expeto,
 Non in me, sed in ipsius spem gloriæ.

AD ALEXANDRUM FARNESIUM

CARDINALEM AMPLISSIMUM.

DUM se alii mediæ per amica silentia noctis
 Dulci sopore recreant,
 Hæc ego Jessidæ citharæ magis dulcia somno
 Meditans canebar, dum dies
 Clara superveniens taciturnas pelleret umbras,
 Carissimas umbras mihi;
 Quæ me senserunt noctes vigilare beatas,
 Dum primus ipse mystica
 Davidis ad Latias deduco carmina Musas,
 Piisque grata concino;
 Non Jovis insani referens male sanus amores,
 Non ebriosa Liberi
 Orgia, non ludos Phœbi, execrandave sacra,
 Sed maximi laudes Dei,
 Tergeminum quem cælicolæ venerantur & unum;
 Qui siderum vagantium
 Multiplices cursus, qui magnum temperat æquor,
 Et omnium mortalium
 Omnia facta videns sua iustis præmia reddit,
 Suasque poenas improbis
 Irrogat, & cunctas animalia cuncta per oras
 Alit benigno numine.
 O utinam hæc discant pueri, castæque puellæ,
 Mentisque sanctioribus
 Formentur studiis, dum parva, & mobilis ætas,
 Quid, o parentes, quid juvat
 Futilibus nugis, & turpi carmine vestros
 Contaminare liberos?
 Cum liceat sanctos illis versare poetas,
 Scientiæque pabulo
 Divinæ teneros animos nutrire, veneno
 Dulci relicto, quo malo

Nullum aliud magis esse nocens puerilibus annis
 Videre prisca sæcula,
 Quamvis illa forent caligine confusa, nec dum
 Perfusa vero lumine.
 At tu prudentem juvenili ætate senectam,
 O patriæ decus inclytæ
 Farnesi, æquiparans, post magna negotia, quando
 Audire fessus nobiles
 Regum Legatos summis de rebus; amœnos
 Mirandula doctissimo,
 Maphæoque tuo comitatus te abdis in hortos,
 Et otio dulci juvat
 Mollibus & studiis duros finire labores,
 Tunc nostra, quæso, carmina
 Perlege, nec tu Flamini magis illa putato,
 Quam regis illustrissimi,
 Qui bello insignis, pietate insignior, hostes
 Inter, ferociaque agmina,
 Seu positis armis tranquilla pace quierat,
 Amore sancto percitus
 Eterni regis laudes, & maxima facta
 Tali canebat carmine.

IN LAUDEM

M. ANTONII FLAMINII

EPIGRAMMATA

Ab aliquibus BASILIO ZANCHO tributa.

I.

Sæva Syram canit ad citharam quæ carmina David,
 Ad citharam hæc recinit Flaminius Latiam.
 Utraque, doctæ, legens dices, in utroque reluces
 Par lingue candor, par pietas animi.
 Creditur ille quidem sancto cecinisse furore
 Percitus: hic eodem digna furore canit.
 Lectori esse rudi poterit, sed carior est quo
 Clarior obscuro Davide Flaminius.
 Magno magna Deo debetur gratia, cujus
 Præclarum hoc magno numine surgit opus.

II.

Sancta Palestino quæ sunt tibi condita versu,
 Edidit hæc doctus carmina Flaminius.
 Fracast. Carm. N Hoc

*Hoc duce sacra colent Musæ jam templa Latinae,
 Hæstentus a templis quæ procul absuerant,
 Errare in silvis assuetæ, ac montibus altis,
 Turpis eas vaturn quo furor impulerat.
 Quam decet hæc castas ornari veste puellas!
 Quamque decent sanctas carmina nostra deas!
 Ausus erit dein quisquis eas violare profanus,
 Obsceno maculans ora pudica sono,
 Sentiet iratas merito sævire Camænas,
 Flagitiiq; feret præmia digna sui.
 At tibi Pierides sanctæ, divine Poetæ,
 Munera dent magna pro pietate tua;
 Largius ut manans divina hæc vena salubres
 Davidis e puro flumine fundat aquas.*

I I I.

Cygnea Flaminii fuit hæc vox morte sub ipsa,
 Quam sanctus vates fudit ab ore pio.
 Non hos versiculos mendax huic Musa, sed almi
 Diffudit verax Spiritus, osque Dei.
 Ut nihil illa canit nisi falsum, ita nil nisi verum
 Divinus novit Spiritus iste loqui.
 Hauserit hunc quisquis, demanasse putabit
 Ex celo verum nectar, & ambrosiam;
 Versiculos tuncque hos longe superasse Maronis
 Sentiet, & docti carmina Mæonidæ,
 Et quæ Flaminii celebras nunc Roma poetæ
 Carmina vel priscis æmula carminibus;
 Ille sibi valde doluit quæ scripta fuisse,
 Sanctus cum postquam Spiritus hic monuit.



M. A N T O N I I
F L A M I N I I

CARMINUM SACRORUM

LIBELLUS, QUI ET OCTAVUS,
A D M A R G A R I T A M
HENRICI GALLORUM REGIS SOROREM.

I.

PUDICA virgo, regiae
stirpis propago nobilis,
Ornata sanctis moribus,
Et litteris & ingenii
Decore fulgens, scripsimus
Hæc, insideret aridis
Cum longa febris artubus;
Iis addituri plurima,
Ni mens gravata corporis
Laboribus languesceret.
Sed tu, puella candida,
Cælestis ardens ignibus
Amoris, ut mens augurat,
Libentius hunc perleges
Parvum libellum, sed piæ,
Quam prisca vatæ carmina
Nugis referta inanibus.

II.

PRECATIO MATUTINA.

IAM noctis umbras Lucifer
Almæ diei nuntius
Terra poloque dimovet,
Simulque nos cubilibus
Monet relictis, pectore
Preces ab imo fundere
Ad templæ summa cælitum.
Oremus ergo supplices
Fontem perennem luminis,
Ut sicut omnes aeris

N 2

Ille-

Illustrat oras, vivido
 Sic nostra corda repleat
 Fulgore Sancti Spiritus,
 Qui nos per hæc contagia
 Puros ab omni crimine
 Traducat ad cælestium
 Sedes beatas; illius
 Nutu gerantur omnia,
 Cibumque sive sumimus,
 Seu quid negotii foris
 Tractamus, aut domi, intima
 Seu mente quid revolvimus,
 Id omne semper gloriam
 Spectet beati Numinis.
 Rector supreme cælitum,
 Qui mente tota poscimus,
 Hæc omnibus concedito
 Qui corde puro te colunt,
 Et unicum Natum tuum,
 Cum sempiterno Spiritu.

III.

PRECATIO MERIDIANA.

TAM Sol citato fidere
 Suprema cæli culmina
 Percurrit; alma fervidis
 Tellus calefcit ignibus:
 At tu beato lumine
 Accende corda frigida,
 Pater benigne, & omnibus
 Tantos piorum sensibus
 Ignis amoris excita,
 Ut quidquid orbis continet,
 Præ te, sit illis sordidum;
 Nec ulla vis hunc fervidum
 Amoris æstum temperet,
 Sed usque crescens omnia
 Convexa cæli transvolet,
 Summoque Patri vinculo
 Nos jungat insolubili.
 Has nos ab imo pectore
 Precationes mittimus
 Tuas ad aures, maxime
 Terræ polique conditor.
 Tu vota nostra numine
 Dextro secunda, idque ad tuam
 Concede nobis gloriam.

IV.

PRECATIO VESPERTINA.

TAM Vesper ortus incipit
 Diem tenebris condere :
 At nos parentem luminis
 Sancti precemur , ne finat
 Noctem suorum mentibus
 Caliginosam irrepere ;
 Seu dulcis alma recreat
 Sopor quiete languida ,
 Seu linquit ille lumina ,
 Numquam recedat a piis
 Lux sempiterna cordibus ;
 Ut semper in dies magis
 Magisque detur maximi
 Benignitatem Numinis
 Videre mente lucida ,
 Et hinc amoris optimi
 Ardere semper ignibus .
 Supreme cœlitum Pater ,
 Votis tuorum supplicum
 Aures benignas admove ,
 Ut sensa cordis omnia ,
 Et dicta factaque ad tuam
 Sic dirigamus gloriam .

V.

OPEM CHRISTI IN MAGNA ANIMI ÆGRITUDE
 CONSTITUTUS IMPLORAT .

IESU benigne , servidas
 Precationes , & mea
 Ne , quæso , vota despice .
 Ut terra Solis ignibus
 Hiulca , sic animus meus
 Afflictus , æger , aridus
 Dulcissimum rorem tuum
 Exspectat ; o salus mea ,
 Refrigerera mentem meam :
 Metus , dolores , lacrimas
 Muta perenni gaudio ;
 Ut hæ querelæ flebiles
 Mutentur in laudes tuas ,
 Et vox agendis gratiis

Noctes diesque personet .
 Ne , quæso , more judicis
 Quid egerim , quid dixerim ,
 Quid cogitarim , pondera ;
 Peccata sed mea omnia
 Tuo cruore deleas .
 Me vulnere sanet dolor
 Tuorum : amara mors tua
 Cordi meo dulcedinem
 Insillet , ut meam crucem
 Et fortis , & libens seram .

V I.

QUAM SINT BEATI QUI SUMTA SUA CRUCE
 CHRISTUM SEQUUNTUR .

BEatus ille qui suam
 Tollit crucem quotidie ,
 Magnisque JESUM passibus
 Sæstat ! illum maximus
 Cælestium Pater sibi
 Adoptat ultro filium ,
 Eique donat Spiritum
 Peccata delentem omnia ,
 Hereditatis inclytæ
 Pignus beatum : is intimo
 In corde miros excitat
 Patris amores optimi ;
 Hinc ille temens omnia
 Quæcumque tellus , & maris
 Arena dives continet ,
 Latatur unico Deo :
 Hunc spem , salutem , gloriam
 Suam , suumque gaudium ,
 Patrem , magistrum nominat ;
 Latusque semper dexterum
 Sibi regentem conspicit ,
 Per hujus ut vitæ vias
 Formidolosas ambulet
 Securus , & cari Patris
 Benignitatem sentiat .
 Ergo nec illum territat
 Humana vis , nec inferum
 Furor tremendus ; maximis
 Periculorum casibus ,
 Ut dura rupes turgidi
 Tunsa procellis Hadriæ ,

Immobilis semper manet :
 Nec cessat ullo tempore
 Hostes , amicos , patriam
 Juvare , negligens sui .
 Sic ille vitam cœlitum
 Colens , perenni gaudio
 Triumphat ; implus , licet
 Terræ marisque sit potens ,
 Pulchrumque nomen occupet
 Felicis , est semper miser .

V I I.

COMPARAT ANIMUM SUUM FLORI.

UT Flos tenellus in sinu
 Telluris almæ lucidam
 Formosus explicat comam ,
 Si ros , & imber educat
 Illum ; tenella mens mea
 Sic floret , almi Spiritus
 Dum rore dulci pascitur .
 Hoc illa si caret , statim
 Languescit , ut flos arida
 Tellure natus , eum nisi
 Et ros , & imber educat .

V I I I.

EOS TANTUM BEATOS ESSÉ AFFIRMAT ,
 QUI CETERIS OMNIBUS RELICTIS
 CHRISTO ADHÆRENT .

Quousque vana fomina ,
 Falsasque rerum imagines ,
 O cæci , amare pergitis ?
 Non forma vincens Nireæ ,
 Non dives usus purpuræ ,
 Non mens peragrans sidera ,
 Camposque latos aeris ,
 Marisque , terrasque infimas ,
 Reddunt beatos . Unica
 Felicitatis est via
 JESUS , benignus omnium
 Dator bonorum ; currite
 Omnes ad illum , currite
 Fidenter . Ille deferens
 Amore nostri cœlitum

Sedes beatas, pertulit
 Famem, sitimque, & vulnera,
 Mortemque diram: neminem
 Fastidit ille; perditos,
 Ægros, malorum pondere
 Pressos juvare diligit.
 Non sic & optimum & unicum
 Amant parentes filium,
 Ut ille nos. O centies
 Beatus ille, maxime
 JESU, relictis omnibus,
 Qui mente tota se tibi
 In servitutem dedicat.

I X.

PRÆDICAT BENEFICIA A CHRISTO IN SE,
 ET CETEROS MORTALES COLLATA.

JESU beate, Numinis
 Æterna proles maximi,
 Quibus tuam clementiam
 Efferre possim laudibus?
 Tu pulchra linquens sidera
 Formata dextera tua,
 Mortale corpus induis,
 Ut ipse terram deferens
 Suprema cæli culmina
 Conscendam; acerba vulnera,
 Crucisque dira sustines
 Tormenta, ut ipse callidi
 Serpentis ore saucius
 Mortisque certus, gaudeam
 Vita potitus cælitum,
 Tuoque factus munere
 Tuus coheres; fac precor,
 JESU benigne, cogitem
 Hac semper, ut semper tibi
 Summoque Patri gratias
 Agam, pieque vos colam,
 Totaque mente diligam.

X.

QUID SERVANDUM SIT AMATORIBUS CHRISTI.

Quicumque JESUM diligit,
 Humana discat omnia

Nil æstimare . Diligens
 Opes , honores , gloriam ,
 Amare JESUM puriter
 Nequit : relinque cetera ,
 Unumque JESUM posside ;¹
 Nam quidquid est usque boni ,
 Sic possidebis : lacrimas ,
 Metus , dolores pectore
 Tuo fugabit ; dulcia
 Semper morantur gaudia ,
 Ubi moratur candidus
 JESUS ; voluptas unica
 Est ille amantium sui .
 Quin mater & pater tuus
 Te derelinquent ; optimus
 A dextera numquam tua
 JESUS recedet , omnium
 Fidus comes discriminum ;
 Et cum suprema venerit
 Tibi dies , te transferet
 In sancta regna cœlitum ,
 Fruaris ut vita simul ,
 Et sempiterno gaudio .

X I.

 EXPRIMIT ARDOREM AMORIS SUI
 ERGA CHRISTUM .

TE , Sancte JESU , mens mea
 Amoris ista vulnere
 Suspirat . O salus mea ,
 Me solve tandem vinculis
 Istis , ut evolem tuam
 Beatus ad præsentiam .
 Fac interim magis magis
 Amore totus ardeam ;
 Ut pura mens a corporis
 Contagione , amplexibus
 Evadat aptior tuis .
 Tu spes , voluptas , unicum
 Cordis mei sis gaudium ,
 Benigne JESU , da , precor ,
 Humana cuncta spernere
 Te propter ; omnia fac mihi
 Te præter unum fordeant .
 Seu pulcher oras ætheris
 Sol lustrat almo lumine ,

Seu nox benigno languida
 Rigat sopore corpora ,
 Domi , forisque mens mea
 Te quærat , invocet , canat ,
 Solumque felix in tuo
 Dulci acquiescat nomine .

XII.

HYMNUS IN CHRISTUM .

JESUM pudicæ virgines ,
 JESUM juvenus integra ,
 JESUM viri , senes , anus
 Cantemus , in cujus fide
 Lætamur esse , patrio
 Qui nos amore diligit ,
 Fovetque ; summi Numinis
 Æterne Fili , siderum ,
 Terræ , marisque conditor ,
 Nil vasta cæli immensitas ,
 Nil magnus orbis continet ,
 Non dextera factum tua .
 Tu Patris in sinu sedens ,
 Alis , gubernas omnia ;
 Tu caritate maxima
 Nostræ miserris miseris ,
 Mortale corpus induis ,
 Diræque affixus cruci ,
 Nos morte vindicas tua
 A sempiternis ignibus :
 Tu morte victa regiam
 Reversus ad tuam , simul
 Tui colentes aurea
 In parte cæli collocas .
 Te cœtus omnis cœlitum
 Nostes diesque concinir :
 Te sempiternus Spiritus
 Salutis auctorem unicum
 Testatur esse : tu quies ,
 Lumen , voluptas mentium ,
 Tu pastor , agnus omnia
 Peccata tollens , Pontifex
 Æternus iram maximi
 Sedare præsens Numinis .
 Clemens , suavis , optime
 JESUS , tuorum prospera
 Cursum benignus , ut soles ,

Piasque laudes fuscipe,
Quas ore puro fundimus.

XIII.

CHRISTUM INVOCAT

Magnitudine morbi se jam opprimi sentiens.

TAM quinta Lunæ cornua
Se luce complent, horrida
Cum febre membra tabida
Depasceor, ossa frigore
Tremor furente concutit,
Dein æstus acer intimas
Urit medullas, ut faces
Absumit ignis aridas.
Jam corpus amisi, mei
Vix umbra jam superat; levis
Ut flos gravatus imbribus
Caput tenellum dejicit;
Sic mens misella perdita
Cedit malorum ponderi.
JESU benigne, respice
Meos labores, dextera
Tua cadentem subleva.
Non illud ipse jam precor
Meo recedat corpore
Hæc pestis; unum id omnibus
Votis requiro, & obsecro,
Ut robur, & constantiam
Mihi ministres; languidos
Artus, medullas, omnia
Hic ignis ossa devoret,
Dum mens refecta vivida,
Tuoque fortis spiritu
Resistat, & semper tibi
Jucunda laudes concinat.
JESUS benignus, optimus,
Horrenda passus vulnera,
Dolentibus succurrere
Est promptus; ægrimoniam,
Metus, querelas abjice
Fidenter, o anima mea:
Quiesce, nomen invoca
Dulcissimum regis tui;
Est ille munitissima
Arx invocantibus eum.

XIV.

DOLET SE JAM SENEM FIERI , NEQUE
TAMEN ADHUC CŒPISSE DEO
EX ANIMO SERVIRE .

Eheu senecta crinibus
Jam sparsa canet , labitur
Ætas , ut unda fluminis ,
Auremque vellens pallida
Mors admonet , Miser , ah miser ,
Quousque pergis somnia ,
Umbrasque vanas persequi ?
Jam jam supremi judicis
Tribunal ad justissimum
Sistere , cordis intima
Qui sensa , qui dicta omnium ,
Qui facta novit omnia .
Hæc vera certa judicat
Mens , & relictis omnibus
Summo beato Numini
Servire totis viribus
Exoptat , ardet , nititur ;
Sed heu misella fordidæ
Affixa terræ , inaniter
Laborat . Eja age subveni ,
JESU benigne , subveni ,
Tuamque dextram porrige ,
Tu morte mortuum tua
Olim evocasti ex inferis :
Nunc vita me vivum tua
Perire ne rursus sinas .
Humana fac spernam omnia ,
Nudumque te nudus sequar ,
Et ponderosi corporis
Me solve tandem nexibus ;
Ut pura mens & integra
Ævo potita cælitum ,
Te , sancte , & optimum Patrem ,
Et sempiternum Spiritum
Laudare numquam desinat .
JESUS suorum supplicum
Tutela , portus , gaudium ,
Quæ mente tota deprecor ,
Concedat : ipse gratias
Agam benigno Numini ,
Fjusque laudes pectore
Latante semper concinam .

X V.

QUAM SIT DULCIS, ET SALUTARIS VULNERUM
ET TORMENTORUM CHRISTI
ASSIDUA MEDITATIO.

JESU, tuorum vulnerum
Cruore sancto pascere
Me, quæso, numquam desinas,
Me sanguis iste roborat,
Dulcique replet gaudio.
Hoc est amoris poculum
Cælestis, omnes sordidos
Pellens amores: ebria
Hac potione mens, sui,
Et omnium fit immemor
Quæcumque mundus continet;
Deumque solum cogitat,
Tuumque amorem: fervide,
Immense, nulli effabilis
Amor, beatis sedibus
Tu maximi Natum Dei
Deducis, ipsique induis
Mortale corpus; asperam
Dein tollis illud in crucem.
Amabilis, dulcissime
Amor, meis in sensibus
Tantas amoris excita
Flammas, ut ustis nexibus
His ponderosi corporis,
Alis tuis ad optimum
JESUM beatus advolem.

X V I.

ORAT UT CHRISTI BENIGNITATE SIBI LICEAT
PIE SANCTEQUE VITAM AGERE.

Tutela præsens omnium
Qui mente pura te colunt,
Da, quæso, nil ut cogitem,
Agam, loquar quod Numini
Tuo placere non queat:
Comis, benignus in bonos
Malosque sim, ne degener
Sim natus optimi Patris;

Qui

Qui Solis almo lumine
 Illustrat omnes, omnibus
 Potum cibumque sufficit.
 Legum tuarum per vias
 Me contingenter dirige,
 Bonique quidquid egero,
 Id esse totum muneris
 Tui sciamque & prædicem.
 Seu febris artus pascitur,
 Seu miles urit impius
 Domum paternam, dicere
 Laudes tibi ne desinam;
 Sed cuncta Numinis tui
 Nutu regi nil ambigens,
 Vivam quietus; filios
 Dei secunda & aspera
 Juvent oportet. Gloriam
 Tuam Patrisque maximi
 Meæ saluti præferam;
 Nec ulla res optatior
 Queat mihi contingere,
 Quam contumelias pati
 Te propter; ipsa carior
 Sit luce mors, ut corpore
 Exutus ad tui volem
 Regni beata gaudia.

XVII.

GRATIAS AGIT CHRISTO, CUJUS BENEFICIO
 E MAXIMIS PERICULIS SIT EREPTUS, ET
 AD VIAM SALUTIS REVOCATUS.

O Lux beata cælitum,
 Mortalium fidiſſima
 Tutela, quas agam tibi,
 JESU benigne, gratias?
 Ut olim aberrans aggere
 Ovis miſella, ſaltibus
 Formidoſiſis delitet,
 Voranda mox rapacibus
 Feris; miſerrimus impium
 Sic ipſe per mala omnia
 Cæcus ruebam; candida
 Cum lux beati Spiritus
 Tui refulſit, & viam
 Quæ ducit ad feliciū
 Æterna regna cælitum

Monstravit ; ista lux meæ
 Mentis tenebras dispulit :
 Cordi meo dulcissimi
 Faces amoris ista lux
 Infixit : illo ex tempore
 Te , sancte ; totus ardeo ,
 Te quero amore faucius :
 Videre vultum candidum ,
 Tuis frui complexibus
 Mens ardet ; ipsa jam nihil
 Te præter unum , cogitat .
 Non sic decentem virginem
 Furens amator deperit ;
 Non sic tenellum filium
 Parens uterque diligit .
 Amoris æstu liquitur
 Cor molle , ut olim servidis
 Percussa cera solibus .
 O flamma mentem frigerans ,
 Omnesque labes excoquens
 Me semper in dies magis
 Incende , perge adurere ,
 Consume , totum verteris
 Me donec in faces tuas .

XVIII.

QUERITUR , MAGNAM HOMINUM PARTEM
 RELICTO CHRISTO REBUS INANIBUS
 STUDERE .

JESU beate , si tuo
 Amore sancto perfrui
 Quam dulce sit cognoscerent ,
 Qui res inanes diligunt ,
 O quam suæ dementiæ
 Tæderet ipsos ! Vulnera
 Acerba corporis tui
 Tanta fluunt dulcedine ,
 Ut quisquis illa suxerit ,
 Opes , honores , omnia
 Amata jam fastidiat ,
 Deique sola gloria
 Lætetur oblitus sui .
 Sed cæca gens his fontibus
 Præfert lacunas putidas
 Et pestilentes . Gratia
 Magna tibi , JESU maxime ,

Qui

Qui me tuo purissimo
Lavas, alisque sanguine.

XIX.

PRÆDICAT, SE SINE TUTELA CHRISTI IN
MALA OMNIA PRÆCIPITEM RUERE.

TE Sancte JESU, supplici
Adoro corde, cor tibi
Meamque mentem dedico,
Ut bimulus puer sua
Custode si caret, sibi
Magna creat pericula;
Sic ipse, si desit tui
Tutela præsens Spiritus,
In cuncta præcipitem mala.
Dulcis, benigne Spiritus,
Me, quæso, totum posside,
Tuaque flamma incendito
Amore cor; illumina
Mentis tenebras; excoque
Quodcumque inhæret noxii.
Fac, semper in te gaudeam;
Opes, honores sordeant,
Summique Patris gloria
Sit luce carior mihi.
Seu pascit hortus lumina
Florum colore gemmeo,
Seu fons susurrans vitreis
Delectat undis, illico
Vox surgat in laudes Dei.
Sol, Luna, fulgor siderum,
Lapsus perennes amnium,
Formosa silva, frugibus
Ager redundans, omnia
Quæcumque cerno, maximam
Sancti beati Numinis
Benignitatem cernere,
Manuque tractare faciant.
Hinc ipse discam comiter
Omnes juvare, nemini
Nocere; purus, integer
Deoque carus exigam
Quod restat ævi; transvolans
Dein summa cæli sidera
Fruar perenni gaudio.

X X.

DE ARDENTI AMORE SUO ERGA CHRISTUM.

A More totus languéo ,
 Nec ulla jam datur quies .
 JESU benigne , jam meam
 Solare mentem , candidos
 Ostende vultus , lumine
 Tuo beata lumina
 Fac mea , nec osculum , precor ,
 Amans , amanti denega .
 Tu sponsus es animæ meæ ,
 Te quærit illa lacrimis ,
 Te continenter invocat :
 Tu , sancte , mortis e manu
 Tuo redemptam sanguine ,
 Unique amore fauciam ,
 Odisse certe non potes .
 Ergo misella cur tuæ
 Dulcedinem præsentis
 Non sentit ? ah cur supplices
 Venti querelas dissipant ?
 Sed tu licebit anxio
 Amantem amore torqueas ,
 Non illa amare desinit .
 JESU , tui tabescere
 Amore res dulcissima est .

X X I.

COMMENDAT ANIMUM SUUM DEO

Magnitudine morbi in extremum vitæ periculum
 adductus .

R Ector beate cælitum ,
 Qui sic amas mortalium
 Salutem , ut almi filii
 Cruore sancto laveris
 Peccata eorum ; suscipe
 Servi precantis spiritum ,
 Qui fretus unica tua
 Benignitate , languidos
 Artus libenter deserit ,
 Ut alta cæli sidera
 Petens fruatur , optime

Pater, tua præsentia,
Et sempiterno gaudio.

XXII.

AD CHRISTUM.

Alme puer, sanctis quem Virgo amplectitur ulnis
Virgo cælesti Numine facta parens,
Cernis, ut exiles febris mihi pascitur artus?
Cernis, quam sævus concutit ossa tremor?
Quem sequitur miseræ exurens flamma medullas,
Urit ut arentes lucida pruna faces.
Tu puer, æternus cui dat Pater omnia posse;
Tutela humani, sancte puer, generis,
Si labefacta gravi sub pondere tota recumbit
In te uno famuli spesque salusque tui,
Aut morbum pelle, aut vires mihi suffice, tanta
Queis possim læto pectore ferre mala.



Cur te non sanant formosæ basia divæ,
Et de nectareis oscula sumta labris?

VI.

DE JULIÆ OCELLIS.

IN me cum dulces convertit Julia ocellos,
Tunc vivum, tunc me dixeris esse aliquid:
A me cum dulces avertit Julia ocellos,
Tunc morior, tunc me dixeris esse nihil.

VII.

DE MOLSA, QUEM MORTUUM PUTABAT.

QUOD te defunctum fierim, falsoque sepultum
Crediderim, hæc nostri signa doloris erant.
Ast modo, quod vivas, mihi gaudeo, gratulor orbi:
Sic Pyllos, vivas, Euboicosque dies.
Tu, puer, i, & templo pictam suspendo tabellam:
Pensa hanc pro Molsa sospite & incolumi.

VIII.

DE EODEM.

Rumor erat periisse frequens te, quisque & ademptum
Credidit: hinc questus, hinc lacrimæ, hinc
gemitus.
Et quis non fieret Molsam, quo sospite tantum
Etrusca, & Graja, & lingua Latina valet?
Gratia magna Jovi, quod vivas: maxima Phœbo,
Quem timui, ah, vatem deseruisse suum.
Perlege, nec pudeat de te quodcumque notabam
Credulus: hoc nostri pignus amoris habe.

IX.

NON vivam sine te, mi Brute, exterrita dixit
Porcia; & ardentes forbuit ore faces.
Davale, te extincto, dixit Victoria, vivam,
Perpetuo mœstos sic dolitura dies.
Utraque Romana est, sed in hoc Victoria major;
Nulla dolere potest mortua, viva dolet.

M. Antonii Flamini Carminum Finis.



S E L E C T A
ILLUSTRIMUM PORTARUM
DE M. ANTONIO
FLAMINIO
TESTIMONIA

JO. ANTONIUS FLAMINIUS PATER.

NATE, decus patriæ, generis laus ampla, tuique
Certa quidem spes, & gloria summa Patris,
Accipe qua debes, & qua pietate parentis,
Es solitus semper dicta verenda tui.
Pene puer Romam es genitore volente profectus,
Idque tibi felix, & mihi cessit iter.
Sic tamen, ut, postquam Decimo data nostra Leoni
Et tua cum nostris munera juncta forent,
Unicus ad carum mea per mandata parentem
Speratam votis ingrederere viam:
Dis aliter visum: nec poenitet isse, nec umquam
Ægre, quidquid erit, mens feret illud iter.
Magna tibi parta est Italum jam fama per orbem,
Inque dies nomen crescit ubique tuum.
Ergo quod cupiam, quando sic fata tulerunt,
Non longum est, nec te vota paterna latent.
Ne tua mutetur vivendi formula, sitque
Præteritæ similis vita futura, face.
Sic decus augebis, sic gloria cœpta virescet,
Fama nec extremum sentiet ista diem.

I D E M.

Scripta tibi libro duplici jam plurima sunt, quæ
Silvarum titulo conveniente vocas:
Juncta meis Decimo quæ per te missa LEONI
Perpetuum nobis jam peperere decus.
Nam Pater ipse Patrum magna nos laude secutus
Extulit ingenti vocis honore suæ.
Famaque per Latium passim jam fusa perennis
Viribus exemptum mortis utrumque facit.

Quid

Quid potuit majus nostris contingere votis ?
 Gratia quæ studiis major habenda fuit ?
 Præmia sunt nullis intermoritura diebus ,
 Tollere quæ ferrum , nec queat ignis edax .
 Hæc pluris , fili , tibi sunt & divitis Hermi ,
 Quam quod & auriferi versat arena Tagi .
 Sic igitur vivent , sic parta laude virebunt ,
 Nomina nec Stygiis nostra prementur aquis .

JO. ANTONIUS VULPIUS COMENSIS ,

*De M. Antonio Flaminio , qui putabatur mortuus ,
 ad Franciscum Taurellum .*

T Aurelle , optime mi patrone , & idem
 Olim in Urbe sodalium meorum
 Prime , FLAMINIUS tuus , meusque ,
 Quem cuncti modo , mortuum putantes ,
 Luxerunt juvenes , bonum ut parentem ,
 Luxeruntque senes , bonum ut sodalem ,
 Vivit , atque valet , Deo favente ;
 Quem sancte coluit , pieque semper .
 Sic est . FLAMINIUM meum , tuumque
 Viventem alloquor , audio loquentem
 Illa nestare dulciora verba ,
 Dicentemque gravedini salutem
 Viræ dicere quam antea parabat .
 Verum , ne auxilio medentum , & arte ,
 Aut labore pates eum retentum
 In vita ; jam animus solutus arto
 Nexu corporis incolebat astra ,
 Nil mortale videns , nihil caducum :
 Sed nobis fuit ille restitutus
 Votis & precibus mei Priuli .
 Namque adferre solent Deo supremo
 Vim vota , atque hominum preces piorum .

BASILIUS ZANCHUS .

Imparibus ludit numeris dum carmina doctus
 FLAMINIUS , Lyricis solvit & ora modis ;
 Obsupuere undæ Libethrides : audiit ipse
 Pieridum rector , Pieridumque chorus :
 Et dixit : Mea progenies , mea munera , & artes
 Do tibi : Musarum sceptrâ secunda geres .

IDEM.

I D E M.

Miraris quicumque mei nova carmina lector
 Flamini, & Phœbo digna canente putas,
 Quid faceres, si nota tibi probitasque pudorque,
 Qualis Saturno regna tenente fuit?
 Hunc resonat Romana cavis e collibus Echo,
 Et Vaticani Numinis aura foveat.

ACHILLES PHIL. BOCCHIUS

*Respondet Epigrammati XXIX. libri II. Carminum
 M. Antonii Flamini.*

Nostri floscule sæculi, decusque
 Vatum, & deliciarum ocellus, Marce,
 Si Achillem tibi vis suos ocellos,
 Seu quid carius est suis ocellis,
 Debere, unanimum ut decet sodalem,
 Noli conqueri, amabo, nec putare hunc
 Vecordem usque adeo, ut tuos amores
 Lucejæ insidiis laceſſat umquam;
 Namque hoc unanimum haud decet sodalem,
 Sed nec te unanimum decet sodalem
 Non confidere tam bono sodali,
 Qui te plus oculis suis amavit
 Semper, plusquam oculis suis amabit,
 Donec spiritus hos amabit artus.

I D E M.

Salve, o prime sodalium meorum,
 Jucundissime MARCE, Marce tantum
 Exspectate mihi, omnibusque amicis,
 Venisti ne tuum revisam Achillem,
 Penatesque suos, suumque patrem?
 Venisti, o ter & amplius beatam,
 O dignam niveo diem lapillo!
 Te ne ego aspicio, alloquorque? an ista
 Per somnum video? quid ajo demens?
 Immo te aspicio, alloquorque præſens
 Præſentem. En cape tamdiu negatos
 Amplexus veteris tui sodalis.

JOANNES PLAZZONUS.

Flebat adhuc cari Benacus morte Catulli,
 Crudeles referens per vada mœſta deos;
 Cum

Cam tandem undisonæ cantantem margine ripæ

Sensit suaviloquo carmine FLAMINIUM.

Ac Deus hæc: Jam flete nimis vale, amice Catulle,
Non mors, sed rapuit te mihi FLAMINIUS.

BERNARDINUS PARTHENIUS.

Pendentem propere lyram

De clavo, pueri, tollite eburneam.

Informem ut nimium situ

Turpavit caries, & latebras sibi

Intus duxit aranea!

Nam ex quo me juvenum surripui choris,

Nec convivia virginum,

Nam rixæ faciles, aut teneri amplius

Oblestant animum joci,

Ex illo Pholoe mi excidit, æstuans

Venisque intepuit calor.

Nam primum memini, seu raperet diem

Nigris Cynthia cornibus,

Seu Phoebus nitida luce reviseret

Terras Tethyos e sinu,

Cantando Pholoen (ah nimium ignibus

Ingratam Pholoen meis!)

Frondentis platani condere nescios

Ramis sub patulis dies:

Nunc in gramineo cespite, garrulo

Qua Lymphæ trepidant pede,

Lymphæ Flaminii numine, quis vagos

Immensi æquoris in sinus

Tectus non Athesis populeis comis,

Tauri fronte superbiens,

Aut umbrosa secans glauca liquentium

Splendor Mincius amnium

Urnæ nobilior fuderit auream.

Salve, Mefule, ter, pater,

Sertis cæsariem nectæ virentibus,

Incurvaque canens lyra

Hic mecum e thalamis instrepe vitreis:

Dicamus merita fide,

Rupes quæ aeræ, quæ liquidi lacus,

Argutæque procul nigris

Innatæ resonent montibus ilices.

Dum valles, quibus emori

Optavit, repetit Flaminius sacras,

Nympharumque cubilia,

Et secreta deorum penetralia

Agrestum, imperia ex quibus

Non

Non regum, aut nitido marmore lucidæ
 Aulæ, non tremulæ infulæ
 Pendentes bifido e vertice, non amor
 Nullum non rapiens amor
 Ardentis Tyrio murice purpuræ
 Divellant; amet hic, latens
 Nympharum in gremio, puniceas rosas
 Inter degere, ubi specus
 Umbrosi, & gelidis fontibus instrepat
 Lympha argentea, roscidum
 Qua gramen, sitiens dum Canis excoquit
 Sole ardente alibi sata,
 Non rores teneros, non rigulas aquas,
 Non cælum pluvium invocat.
 At rident scatebris usque recentia
 Vivis mollia pabula,
 Nec ponunt violæ urente meridie
 Tutæ purpureas comas.

Festos auricomæ hic tibi
 Lustrant in numerum Naiades choros:
 Hic tenes Zephyri tibi
 Impellunt solito blandius arbutos,
 Vates, Pieridum decus.
 Umbras quis gelidas Palladis, antraq hæc
 Muscosa, hos latices sacros,
 Hos lucos, tenera hæc gramina nescia
 Curarum, laquearibus
 Permutare velit Pontificum aureis?

SALMONIUS MACRINUS.

NON mirabilibus caruere hæc tempora monstris,
 Te pariunt hominem namque ea tergentinum
 Flaccus, Aristoteles, Cicero sunt, Marce, renati,
 Qua primum enixa est te tua luce parens.

FRANCISCUS VINTHA.

ET Grajæ, & Latia pariter periire Camœnæ,
 Ipsarum extincto lumine FLAMINIO.
 Proh dolor! & secum probitas, pietasque recumbunt,
 Tot bona quare uno funere mors rapnit?

FRANCISCUS ARSILLUS SENO-GALLIENSIS.

EST & Flaminus nimium sibi durus, & atrox;
 Cujus avena potest scribere quidquid aver.
Evocaß. Carm. O JOAN-

J O A N N E S C A S A

Ad manes Flamini.

Flamini Manes, instar mihi numinis, umbra
 Flamini, hæc campis cernis ab Elysiis?
 An tibi, quæ nostri fuerat tam fervida cura,
 Cocytus nigris eluit amnis aquis?
 Tu solitus Priulique ausus compescere inanes,
 Et molli versus frangere voce truces.
 At nunc ille malo Galateum carmine vexat,
 Et sanctum nobis pellit ab Urbe virum.
 Tu ne ausus, Priuli, Galateum pelleri ab Urbe;
 Aspera que in dulcem dicere verba senem?
 Tu ne auctor, Romæ montani ut munera vici,
 Fumosi ut curam præferat ille laris,
 Aureus ille senex, vitæ cui licia Parcæ,
 Intacta ducunt candidiora nive?
 Qui nec principibus, Urbi nec scilicet ægræ
 Formidet medicas adplicuisse manus;
 Quemque adeo nemorum custos, pecorisque magister
 Mandarit sacro summus adesse gregi;
 Hinc eat, & fuscas ignoti ad flumina Melphæ
 Pascere cum vili conjuge pergat oves?
 Quid si animis juvenumque senumque est illius æque
 Dulcior Hybleis alba senecta favis?
 Quid si illum retinent quicumque Amaryllida curant
 Hujus ad exemplum peccet ut illa minus?
 Uxorem hunc tamen ad vetulamque humilemque re-
 leges,
 Frigida ut in viduo ne cubet illa toro?
 Quæ puras pridem didicit perducere noctes,
 Et monitis casta est, & proba facta viri.
 Sed tu, FLAMINII potius jam nobilis umbra,
 Et multum insigni conspicienda lyra:
 Ni te cæca hujus cepere oblivio lucis,
 Cum tibi Mors avidas intulit atra manus;
 Huc ades, & Priulum compescas; nam male nobis
 Jamdudum insolito versus in ore sonat.

JO. BAPTISTA PIGNA FERRARIENSIS.

Nympharum decus, o Flamine, Apollinis,
 Cursum qui rapidi carmine Tybridis,
 Spirantemque morari Boream potes,
 Nec non præcipitem Notum;
 Qui lenis cithara, sine licet aspera,

Tigres,

Tigres , atque ferarum genus omnium :
 Latinoque movens pectine barbiton ,
 Mulces corda virum impia .
 Si sic dum canis , & sistere flumina
 Possis perpetuo , & nubila tergere
 Cum venti celeres undique perstrepunt ,
 Et sedare animos probe ,
 Plestro tange lyram ; dicque modos , quibus
 Crudelis nimium sævaque Lygida
 Sic aures modo amicas satis applicet ,
 Ut jam sit mihi lenior .
 Nam si feceris id , te mage redditum
 Cognosces celebrem , teque magis piam ,
 Quam si versiculis , arteque barbiti
 Placasses rabiem maris ,

IDEM AD BARTHOLOMÆUM RICCIUM ,

De M. Antonio Flaminio Defuncto .

RICCI , quid , o quid fletibus irrigas
 Vultum molestis , funera FLAMINI
 Acerba cogitans fuisse ,
 Et nimium lacrimosa cunctis ?
 Cur tot modum nullum gemitus habent ,
 Unquam nec absunt , sed tibi maxime
 Surgentibus surgunt tenebris ,
 Et redeunt redeunte Phœbo ?
 Casum parentis Tantalides fleant :
 Manetque semper Lapithum genas
 Humor , nec umquam sint quieti ,
 Sed Phlegyam Tityonque plorent .
 Se maceret cari nece filii
 Rex asper in ventos dominus ; suis
 Mors imperatoris molesta
 Militibus sitientis aurum .
 Hos namque vexant Tartara perditos :
 Solum videntes hi Strygias faces ,
 Doloribus certis premuntur ,
 Suppliciis cruciantur omnes .
 Terrena linquens Flaminus loca
 Ad calites e carcere noxio
 Volavit ; & sedes beatus
 Sidereas petiisse gaudet :
 Gaudet , suum se cernere Davidem ,
 Qui libat illi basia nestare ,
 Vultu sereno , dulciora ,
 Ambrosiæ madefacta succo :

Gaudet , suum se tangere barbiton ,
 Ad quod Latino carmina pestine
 Canens , Palæstinos solebat
 Ingenio penetrare versus .
 Rex monstrat illi , quæ superum loca ,
 Quæ fixa cælo sidera , motibus
 Quæ pulsa , quæ dicenda voce ,
 Quæ citharæ celebranda chordis .
 Ambo Deum sic tollere laudibus
 Docti , sonoris & fidibus lyræ ;
 Hunc rite concinunt , & ipsi .
 Ante Patrem spatiantur ambo .
 Quod si supremis hic fruitur Dei
 Templis , in illo vivus , & aspicit
 Quæ noverat ; si lætus hinc est ,
 Hinc fugiens procul esse tandem :
 Cur ista , Ricci , te exanimat dies
 Mens tristis omnes nescia ponere
 Tot mollibus modum querelis ?
 Cur socium periisse ploras ?

IDEM IN OBITUM M. ANTONII FLAMINII .

HIC hic Flaminius jacet , viator .
 Ille Flaminius decus Latinum ;
 Dulci qui ad citharam sono canebat
 Non lusus Veneris , Cupidinisque ,
 Non contra Superos minas Gigantum ,
 Sed faces animi beatiores ,
 Sed mentes hominum Deo sacratas ,
 Hic hic est tamen ille morte pressus :
 I nunc , & pia tura da , viator ,
 Si bonis eadem malisque Clotho .

ADRIANUS CRIBELLUS MEDIOLANENSIS

Ad Lectores de M. Antonio Flaminio , & Pub.
 Francisco Spinula .

QUI merito Cæll Regem flagrantis honore
 Tollere , & in laudes labra aperire suas ,
 Definite Iliados pugnæ , eversaque regna ,
 Pergamaque Argolicis discere adusta focis :
 Nil juvat his celeres insumere vatibus horas ,
 Somnia nil præter perniciofa canunt .
 Præstat , adornatum regali Davida ferto
 Audire hymnisona mira referre lyra ,
 Ut varium stellis opifex perfecit axem ,

Ut steterint jussu cuncta elementa suo,
 Ut liceat letum fugere, & nigri atria Ditis,
 Elysioque, choris Cælicolumque frui.
 Flaminius lyrico cuncta hæc modulamine profert,
 Spinulaque; Aonii lumen uterque chori:
 At fuit amborum quoniam mens una canendi,
 Una sit amborum gloria, & unus honor.

A. CALEMERUS PLANTINIDA

Ad M. ANTONIUM FLAMINIUM.

Fatum dolebam, FLAMINI vates, tuum,
 Nostramque jacturam omnium gravissimam,
 Quod cœpta non exegeris promissaque;
 Ut omnis audiret Latina ora integrum
 Quiritium plectro canentem Davidem,
 Quod ipse Flaccus nec valeret eloqui,
 Si Christianæ deditus Musæ foret.
 Sed jam Deum benignitate desino
 Dolere, qui humanum genus sic temperant,
 Ut quod nequiveris per obscuras feræ
 Mortis tibi injectas manus absolvere,
 Id Spinulæ suo imperarunt, FLAMINI,
 Ad hoc creato, ut perficiat opus tuum;
 Ut quæ reliqua sunt Davidis poemata,
 Per Italas urbes tua canat lyra:
 Quæ Publius præstaret ut feliciter,
 Communicarunt spiritum Dii cum hoc tuum.
 Qua de re ego ingenti triumpho gaudio,
 Triumphat omnis civitas Insubrium.
 Triumphat Europa; & tui manes simul
 Cum illis triumphent & cinis; quandoquidem
 Per Spinulam novis nitentem floribus,
 In gratiam sui, & sacrosancti gregis,
 In Numinisque gloriam augustissimi,
 Voti tui fecere te Dii compotem.

JO. MATTHÆUS TOSCANUS.

Puram FLAMINIUS Latinitatem
 Ter quinis prope sæculis sepultam
 Excitavit ab Inferis, & arte
 Mira restituit suo nitore
 Eidem, quem prius obtinebat illo
 Sæculo Ciceronis, & Maronis.
 Gaude, Roma nitens, beata, gaude,
 An quidquam poterat tibi obtigisse

Insperatus hoc, beatusve?
 Nam quod fata tibi dedere avara
 Olim permodicos fruendum in annos,
 Post commercia foeda barbarorum,
 Tot incendia, totque post ruinas,
 Linguae munditias politioris,
 Et flores nitidae tibi loquelae,
 Felix FLAMINII reduxit ardor:
 Qui sacris studiis parem dicavit
 Curam; ut nec magis hoc pius poeta,
 Nec mystes fuerit magis disertus.

GABRIEL FLAMINIUS FOROCORNELIENSIS

In obitum

M. ANTONII FLAMINII PATRUI SUI.

TE gemit extinctum formosi mater Amoris,
 FLAMINI, & extinctum Musa Latina gemit;
 Illa suos uni dederat tibi dicere lusus,
 Ausoniae dederat hæc decus esse lyrae.

I D E M

AD M. ANTONIUM TURRIANUM

DE M. ANTONIO FLAMINIO

Patrui suo mortuo.

Flebile nil quamvis resonent nisi carmina nostra,
 Et mens innumeris æstuet ista malis,
 Postquam sæva deæ torquentes flamina Parcae
 Diripere meum, Pieridumque decus:
 Postquam pallidos ducens mors impia questus,
 FLAMINIUM campos misit in Elyfios;
 Attamen & virtus, & vivida fama suorum
 Languentis minuit mœstittias animi;
 Et suadet dulces Musarum expromere cantus,
 Paullisperque undas tangere Castalias.
 Scilicet affictos, misero & squallore jacentes
 Aspiciunt placidis numina luminibus.

FRANCISCUS DENALIUS.

Quid facis, Gabriel, quid in beato
 Ocio facis? an Thalia dicat

Quid

Quid inter Satyros tibi petulcos,
 Inter & Dryades cavis in antris
 Dignum FLAMINIO tuo? jocosū
 Cujus Hendecasyllabi, & disertī,
 Cujus & simul Attici lepores
 Vivent, dum tenui rigabit herbas
 Rore Memnonis alma mater, & dum
 Piscis flexivagus revolvēt undas.

JOANNES CARGA.

FLAMINI lepidissime, expolita
 Tua carmina sæpius relegi,
 Et si quid potui videre, vidi
 In ipsis (me ita ament dii) beatum
 Candorem PATRUI tui, & leporem,
 Et venam omnigenam, & sales repositos,
 Et rerum ordinem, & elocutionem,
 Et quæ maximus omnium Poeta
 Præferet PATRUUS tuus. . . .

F I N I S.



JOANNIS COTTÆ

VERONENSIS

CARMINA.

I.

AD LYCORIM.

AMO, quod fateor, meam Lycorim,
Ut pulchras juvenes amant puellas.
Amat me mea, quod reor, Lycoris,
Ut bonæ juvenes amant puellæ.
Huic ego, ut semel hanc videre visus
Se se ostendere fixiore ocello,
Quando, inquam, mea lux, mei laboris
Das mi præniolum? meique cordis.
Tot incendia mitigas, Lycori?
Hic illa erubuit, simulque risit.
Ridebat simul, & simul pudebat.
Dumque molliculos colens amores
Colit virgineum simul pudorem,
Quid negem tibi, dixit? & capillum,
Qui pendens levibus vibratur auris,
Et formosa vagus per ora ludit,
Hunc secans trepida, implicantque in auro,
Hæc fila aurea, & aureum capillum
Pignus, inquit, habe æmeique amoris,
Meique ipsius: hoc tuum puellæ
Tux pignore lenias calorem.
Eheu quid facis? hei mihi, Lycori,
Hæc sunt flammea texta, non capilli:
Sunt hæc ignea vincla; ni relaxes,
Qui tanto valeam valere ab æstu?
Anne ignem juvat ignibus perire?
Comæ flammeolæ, subite flammæ:
Crines igneoli, venite in ignes;
Sat me, flammea vincla, nexuistis:
Nunc vos solvimini, & subite flammæ;
Ussistis nimis, ignei capilli,
Nunc vos urimini, & valetate in ignes.
Hos meos age lætus ignis ignes
Perge extinguere, tuque flamma, flammam

Exc.

Exedas , mea corda quæ exedebat .
 At tu , sic reliqui tui capilli
 Vernent perpetuum tibi , Lycori :
 Quod tuos ferus offerim capillos ,
 Parce : nam volo amare , non peruri .

I I .

A D L Y C O R I M .

O Faustum lacrimabile , atque acerbum !
 Nunc certe lacrimaberis , Lycori :
 Digna res lacrimis , tuoque luctu .
 Namque lumina nostra , lumina illa ,
 Illa lumina , quæ , Lycori , amabas ,
 Quæ tuis solita anteferre ocellis ,
 Non sunt , o mea lux , amanda ut ante ;
 Non sunt lumina , sed malæ tenebræ .
 Illa , ut impia fata te , Lycori ,
 Abstulere mihi , tuoque longe
 Me a vultu voluere abesse caro ,
 In rivos abiere lacrimarum :
 Quodque amarius , atque præter omnem
 Lacrimabile cogitationem ,
 Quantumcumque habuere lacrimarum ,
 Jam pridem evomere : nunc ad ipsum
 Ventum est sanguinem , ab intimoque cordis
 Ducto flumine turgidi , horridique
 Sanguinem lacrimant miselli ocelli ,
 Et cum sanguine amata diffuit lux ;
 Ac sic enecueri seque , meque ,
 Dum meum miseri igneum furorem
 Quærunt diluere , & rigare mentem ,
 Heu mentem , Enceladi , Typhoeique
 Æstuosa anima æstuosior .

I I I .

E P I T A P H I U M Q U I N T E R I I .

ME longe effigie venustior
 Narcissi , vel Apollinis comati
 Parcarum Lachesis nimis severa
 Isti Quinterium dedit sepulcro .
 Cur non foscus exeam , requiris ,
 Quum tantum fuerim puer decorus ?
 Tellus est nimis arida , o viator ,
 Nostri facta perustione amoris :

O ;

Sed si

Sed si lacrimulis tuis madescet ,
 Forsan flos novus ibit e sepulcro .

I V.

AD NAUGERIUM , ET JO. BAPTISTAM
 TURRIANUM .

TAM valete , boni mei sodales ,
 NAUGERI optime , tuque , amice TURRI ,
 Vere candidi , & optimi sodales ,
 Quos nunquam sat amaverim , licet vos
 Quam fratres mage , quamque me ipsum amarim .
 Quibus perpetuum frui per ævum ,
 Vota si mea Dii audiant benigni ,
 Sit una ampla animi mei voluptas .
 Quod quanto cumulatus futurum est ,
 Una si liceat mihi beatis
 Vestri colloquiis adesse BEMBI !
 Verum dura necessitas repugnat ,
 Invitumque alias adire terras
 Cogit , atque alios parare amicos .
 Vos ergo memores meo esse vestri
 Fixam in pectore imaginem , bonamque
 Vobis partem animæ meæ relinqui ,
 Jam valete , boni mei sedales .

V.

AD GEVARAS FRATRES .

Ridete , o lepidi mei GEVARÆ ,
 Et vestri facinus probate COTTÆ .
 Dum suæ Anyfius mihi puellæ
 Partem pernegat , hunc ego a puella
 Huc in exilium ad Caloris amnem
 Traxi blanditiis , bonisque verbis ,
 Quasi ad delicias novas vocarem .
 Hic hunc molliculum , atque delicatum
 Probe testibus , arbitrisque vobis
 Apici volo macerare in æstu ,
 Usque ut ore , peraridoque vultu
 Reversum teneret horreat puella .
 Sic evenit Anyfio , quod ajunt ,
 Tota perdere , tota qui requirunt .

VI.

V I .

A D A N Y S I U M ,

A Mbo dulcia (ne verere) & iidem
 Salsa scribimus ambo , docte ANYSI .
 Scis quæ , uti sumus uno amore juncti ,
 Uno carmina scribimus libello :
 Scis cervum quoque , quem sibi educarunt ,
 Suum ut Silvia delicata virgo ,
 Nostri filiolarum boni Gevaræ ;
 Ille tam cupide illa devoravit ,
 Ut omni sale falsiora , & omni
 Posses noscere dulciora melle .
 O testem lepidum , bonique ANYSI
 Raram carminis approbationem !

V I I .

A D C A L O R E M F L U V I U M .

O Celle fluminum , CALOR , CALOR pulcher ,
 CALOR bonarum cura , amorque Nympharum ,
 Quem cæculum fovens caput sinu blando
 Montella secum amore vincit æterno ;
 Dic o mihi amnis conscie , anne nunc forte
 Pulchra ille , simplexque adeo , & omnibus felix
 Soluta curis mea Rubella per ripas
 Tuas oberrat ? & vel ex odoratis
 Pingit corollas floribus , vel in densa
 Silva sibi suavi sopore blanditur ?
 Anne potius cum æqualium choro ludit ,
 Qua primum oriris ipse , quaque miscetur
 Nitens nitenti Balnius Politinæ ,
 Tuosque læti confluunt in amplexus ?
 Argenteumque pedem , atque nuda formosos
 Artus per undam , & aureum lavit crinem ?
 Sic est : ibi illa membra eburnea , atque ipsas
 Papillulas beatæ frigeras lymphæ :
 Atque inde flammeo calore concepto
 Hucusque flammæ in mea ossa transmittis :
 Dum te subinde candidæ memor Nymphæ ,
 Quæ jam recepta Samnii tumes unda ,
 Samnii & vetustas limpidus rigas urbes ,
 Exsul , miser , suspiciosus inviso .
 At tu , CALOR , sic olim amœnus auratis
 Dicare cornibus , arduusque Vulturno

Ferare viſo, illique jam auferas nomen,
 Fontem ad tuum recurre, dic meæ luci,
 Meo te ab igne poſſe ſæpe ſiccari,
 Meo niſi de ſtetu identidem ereſcas.
 Dic, me amplius nequire tanta celare,
 Nequire ferre vulnera, ac mori ſemper.
 Tum, ſi ipſa prorſus haud ſit immemor noſtri,
 Si fors amara illi mea, & fides grata;
 Dic, me libenter ferre quidquid eſt duri.

V I I I.

DE VICTORIA LIVIANI.

O Quæ alma grato carmine fortium
 Mori, Thalia, facta veras viſum,
 Nunc & per ora LIVIANUM
 Omnium, & omne ſeras per ævum.
 Dic, ut ſuperbæ contuderit minas
 Germaniæ, atque a Cæſare barbaro
 Feſſæ tot annos imminentem
 Auſoniæ arcuerit ruinam.
 Nam quis malorum cheu veterum memor
 Non expavebat? quum populos truces
 In nos remotis uſque ab oris,
 Qua glacie riget Amphitrite,
 Audiret armari: aſperaſque Alpium
 Jam vincere altis cum nivibus juga
 Feris inacceſſa, atque fines
 Undique iam populare noſtros?
 At LIVIANUS in trepidis docens
 Audere rebus, qua violentior
 Viſ hoſtium ingruît, citatis
 Obvius agminibus cucurrit,
 Duſtore tandem hoc ſcilicet Italas
 Videre montes inſoliti manus:
 Tormenta, atque equos, & arma
 Alpicolæ ſtupere Fauni.
 Tandemque noſtra impune nimis diu
 Bacchati in arva Theutones horridi
 Senſere in antiquumque robur,
 Inque novum Marium incidiffe:
 Quum cæſa, pubis ſos Alemanicæ,
 Repente in alta valle Cadubrii
 Phalanx nives cruore tinxit
 Purpureo, rapidumque Plavem,
 Arx & recepta eſt; peſtora militum
 Quum ſæva noſtrorum ardua non via,

Nor

Non saxa , non arcere muris
 Terrifici potuere nimbi ,
 Cadente athena fulminis in modum
 Contorta ab igni sulphureo pila ,
 Qua terra subfulrat , nigerque
 Cum sonitu ferit astra fumus ;
 Dirum repertum : & ingenium male
 Sagax , sacrumque , quo truculentius
 Nil invenire atrox Megæra ,
 Sæva nec ira potest Deorum .
 Sed cuncta præsens horrida temnere
 Dux acer urget , hunc sequitur cohors
 Secura ; præsentemque mortem
 Magnanimo Duce freta vincit .
 Diis cura nostri est , & Venetus pater
 Probe Latinæ consuluit rei ,
 Quam jus tibi omne copiarum ,
 LIVIADES , tribuit suarum ;
 CORNELIUMQUE mox socinm dedit
 Magno e Senatu , cui sapientia
 Insignis , ac fortuna avorum
 Scipiadum reparant honores .
 Non Imperatorem ille queat sibi
 Optare , Mavors quæm mage diligat :
 Non tu Senatorem ferendis
 Consiliis animosiores .
 Vos nuper hostium unanimes feram
 Fregistis audaciam , ac pavidos patres
 Firmastis , ac suam attulistis
 Semianimis populis quietem .
 Vos jam timebit barbarus , ac suis
 Pedem cavebit tollere finibus ,
 Ni læva mens est , Diique nostros
 Accumulare volunt triumphos .

I X.

EPITAPHIUM CANIS .

CAPARION ego sum , quem vivum maxime amavit
 LIVIADES , tumulum post dedit & titulum .
 Plura cani ingenuæ de se sibi non licet : at mi
 Nunc audita meo accipe de Domino .
 Latrantem me forte phalanx Germana per umbras
 Ut vidit , de more affore herum timuit ,
 Et fugit trepida : at ridens ait una Dearum ,
 Quæ ante Jovis solium ferrea pensa trahunt :
 Ne trepidate ; semel satis est timuisse : neque illum ,
 Quem

Quem fugitis, prius huc fata venire sinent,
 Quam Gallos male foedifragos demiserit Orco.
 Et quisquis vexat barbarus Italiam.
 Quisquis ades, Domino hæc referas, precor; hæc
 quoque pauca
 Addito: amat te etiam trans Styga Caparion.

X.

IN LAURENTEM,

Pro libertate Patriæ Tyrannicidam,

Temporibus Patriæ, LAURENS, tua maxima virtus
 Adfuit, & facinus fortiter ausa pium est.
 Et si libertas non illi est inde secuta,
 Quod causam cives deseruere suam;
 At tibi magna tamen debetur gratia facti
 Egregii, atque alti pectoris atque animi.
 Quod tua crudelem confecit dextra Tyrannum:
 Idque erit ut numquam obliteret ulla dies,
 Despiciet Fesulas dum silviger Apenninus,
 Dumque Arni Fesulis despicientur aquæ,

XI.

AD VERONAM.

VERONA, qui te viderit,
 Et non amarit protinus,
 Amore perditissimo,
 Is, credo, se ipsum non amat,
 Caretque amandi sensibus,
 Et odit omnes gratias,

Joannis Cottæ Carminum Finis.

ILLUSTRIUM ALIQUOT POETARUM
DE JOANNE COTTA
VERONENSI
CARMINA

ACTII SYNCERI.

*S*perabas tibi docta novum Verona Catullum :
Experta es duros his viduata Deos .
Nulla animum posthac res erigat : optima quando
Prima rapit celeri Parca inimica manu .
Quæ tamen ut vidit morientis frigida COTTÆ
Ora , suum fassa est crimen , & erubuit .

JO. MATTHÆI TOSCANI.

*C*OTTAM ad sidera dum meis vocare
Pararem numeris , nec invenuisti ,
Quidam de trivio scholæ magister
Consuetus miseras juvenculorum
Nates scindere sibilante flagro ,
Me supercilio truci notavit .
Ecquid COTTA tuus leparis , inquit ,
Quod non surpueris prius Catullo ,
Præfert ? furta putas honore digna ?
Illi contra ego pauca : Sic habeto ,
Hircosissime carnifex juventæ ,
Primum in non modica Catullianos
Poni laude , dein suum Catullum
COTTAM sic imitavisti , Catulli
Proclive ut minus æmulum æmulari
Sit , ipsum quam imitavisti Catullum .

EJUSDEM TOSCANI.

*Q*UI Musas , Veneras ,
Vis cœtu socias videre in unius aule
Hunc unum aureolum legas Libellum ,
Quo Musæ neque sunt poliores ,
Ipsa nec Venus est magis venusta ,
Nec grææ Charites magis , quod ulli
Si fortasse secus videretur , ille
Iratus sibi noverit misello
Camænas , Veneremque , Gratiasque .

JACO.

JACOBI BONFADII

VERONENSIS

CARMINA.

I.

GAZANUM VICUM DESCRIBIT.

MÆNIA quum Saloi, & Benaci litora linquo,
 Dextra iter ingressum per opaca, & florida rura
 Me brevis, & facile acclivis via ducit apricum
 In collem, Cereri placitum, patrique Lyæo,
 Et placitum Altrici semper frondentis olivæ.
 Planities jacet in summo cultissima; primo
 Huius in ingressu oppidulum est. Salaminius olim
 FADIUS egressus patria, Patavique secutus
 Fundatorem urbis, posuisse in littore sedem
 Dicitur; atque plagæ mox acri incensus amore
 Hunc optasse locum GAZÆ, quam dives avito
 Thesauro secum extulerat: tum nomine ab illo
 GAZANUM dixisse; propinquis collibus arces,
 Claraque magnanimum stabant monimenta virorum.
 Sed rerum absumptrix, retroque abstrusa vetustas
 Obruta in obscuris secum omnia condidit umbris.
 Hinc aciem procul in campos, terrasque jacentes,
 Lataque Benaci protendere in æquora possum.
 Vicini montes Boreæ de parte, reducit
 Et qua Sol radios, quaque altas abdit in undas,
 Circumstant; facies spectanti celsa theatri
 Formam offert; sæpe indigenæ videre sedentem
 Pana Deum Arcadiæ, calamos quum inflaret in altis
 Rupibus; & Nymphas per sibila læta vocaret,
 Nymphas, quæ plexis redimitæ tempora fertis,
 Pastorum loca sola petunt, silvasque pererrant.
 Omnia complentes lapsu de rupibus imis;
 Naiades aut Hesperium præpingui e valle volutus
 Flestit iter rapido, atque sonanti flumine Clisis:
 Quem dulces aurarum animæ comitantur, & alis
 Per placidum levibus volitantes æra circum,
 Omnem divinis miscent afflatibus oram.
 Dilecta ora mihi, Italiæ ridentis ocellæ,
 Naturæ latentis opus, sancta ora Deorum,

Quam

Quam lætus gelidos fontes , flexusque tuarum
 Lympharum , Tempeque soli , cælumque reviso !
 Quamque libens vix ipse mihi credo æquoris undam
 Tyrrheni , & Calabrum saltus liquisse nivales ,
 Inque tuò incolumis gremio residere virenti !
 Salve , altrix antiqua , boni salвете recessus ,
 Et gaudete : Genique loci tu candide fidi ,
 Vosque Lares , placidi vestro cum numine amico
 Esse mihi ; & nostrum tandem lenite laborem .
 Te vero , & moneo , & quantum me diligis , ALCON ,
 Oro , care Alcon ; quamquam tua rura reliqui
 Invitus , partemque sui mens ægra requirit ;
 Ne mihi commemorares Athesim , neu testa venustæ
 Alta Coloniolæ ; juvat hic consumere totum
 Sextilem , & dulces invisere sæpe sodales :
 Qui lateri nostro se se agglomerare solebant
 Olim , quum primis colludebamus in annis .
 Horum in complexu vis prisca emergit amoris ,
 Ut satis æquo animo non me divellere possim .
 Sed ; quum se primum decrescens frugerit ætas ,
 Ridebit placido quum Villia Doris inantro ,
 Me feret aurifluo vaga gurgite cymba repostas
 FLAMINII ad sedes , ripæ ulterioris in arvis .
 Hac occurrere mihi : simul ad tibi grata vireta
 Formelii , & lætos Amathuntidis ibimus agros .
 RODULPHO interea , qui se cælestibus æquans
 Divis , purpureo , atque ardenti in murice fulget ;
 Quemque viam monstrantem æqui , magnum inclyta
 patrem
 Roma colit ; statuam patriis in montibus aras .

I I.

DE VILLA COLONIOLA .

EST collis , geminas recto qui limite valles
 Scindit , & hinc Suavum prospicit , hinc Latios .
 Accessu in primo sunt formosissima Tempe ,
 Culta peregrinæ rura COLONIOLÆ .
 Huc me Verona digressum duxerat ALCON ,
 Magne ALCON silvis cognitus Hesperiaë :
 Nympharum castos qui sacra per otia fontes ,
 Vestraque , Pierides , Numina sancta colit .
 Frondosi hic nemoris dorso dum foræ vagarer ,
 Et leni omne nemus perstreperet Zephyro ;
 Ad Corylos Phyllis contexens fraga sedebat ,
 Perdito amore nimis Phyllis amata mihi .

Talis

Talis in excultis visa est Cytherea viretis ,
 Neſceret in ſertum quum tibi , Adoni , roſas .
 O Sol , o mihi Sol radiis fulgentibus orſe !
 O mihi felices inter habenda dies !
 Nam quæ furtivum olim abſcondebat amorem ,
 Quæque fugax ſemper , ſi obviuſ inciderem ,
 Se ſe alio avertens , tacito pede reſeſcebat ,
 Luſtrina tum facilis torſit amica mihi .
 Acceſſi ; atque errans , incertus corpore toto ,
 Protinuſ optatum proſilui in gremium .
 Illi Amor aureolis ſpargebat floribus ora ,
 Quos e maternis extulerat calathis .
 Hi mihi (vos Coryli , teſtes , ſanctæque latebræ)
 Dum capio miſtum ſuaviolum ambroſia ,
 Se ſe anima ipſa in labra ejecit ; meque reſiſto
 Ad ſibi dilectam Phyllida tranſiliit .
 Illa , ubi me aſpexit moribundum , amplexa ſovere
 Cœpit , ſuaviolum dulcius ingeminans .
 Tum , mea dum inſueto perſundit labra liquore ,
 Ore fovens , ſenſim tranſiit ad me anima .
 Nunc vivo , & vita eſt multo mihi carior , in me
 Quum memini , de quo venerit illa loco .
 Salve , o terra beata mihi gratiſſima terra
 Diis Superis : ſalve , dia COLONIOLA .
 Nomien fama tuum immortalibus in monumentis
 Protendat ; nec te deruat ulla dies .
 Hæc lingua ante meis hærebit faucibus , ante
 Hæc dextra attractis concidet articulis :
 Quam memori ex animo , & noſtro de peſtore migret
 Sæpe vocanda mihi cara COLONIOLA .
 Et vos o Coryli , quarum ſub mollibus umbris
 Hæc inſperanti ſunt mihi nata bona ,
 Sitis felices ; non veſtros Eurus honores ,
 Non æſtus , non vos frigida tentet hiems .
 Quum ſitiunt ſilvæ , veniant pede Naïdes udo ,
 Atque humore vagæ roſcido Hamadryades ;
 Vos & alant ſibi delicias , ſeu gramine molli ,
 Sive velint ramis ludere ab umbriferis .
 Phyllis amet Corylos ; illas ſi Phyllis amabit ,
 Una mihi Corylus maxima ſemper erit .

III.

AD CARD. RODULPHUM PIUM ,

CARPENSEM.

BEnaci in ripis , agitur nunc tertiuſ annuſ ,
 Pro noſtris poſita eſt viribus ara tibi .

Hic

Hic ego tum cœpi non infelicibus ausis
Te canere , & sacris urere tura focis .
Gaudebat Geniusque loci , nostrique nitentem ;
In lucem lati se explicuere lares .
At postquam gelidis illa est insepssa pruinis ,
Et deserta tuo numine sola fuit ,
Ipsi etiam montes deploravere querelam
Nostram , Benacus sensit & ipse pater ;
Et ferruginea sparsit caligine ripas :
Omniaque ex illo tristitia visa mihi .
Magne Pater , veluti æthereus præsentia fulgor
Qui late ardenti tempora luce replet ,
Aureus e gelidis Titan jam flexibus anni
Vertit ad æstivum lumina clara diem .
Tu quoque jam propior factus , converte benignos
Ad me iterum aspectus , lumina amica tui .
Non erimus dono indecores , quod si tibi cura
Pulsa mei , nec jam te ratio ista movet ;
At moveat natura tua incluta : quique sub alto
Antiquæ laudis pectore vivit amor .
Et placidæ excellens moveat præstantia mentis
Illa tuæ , quæ Diis te facit esse parem .
Tu Princeps , tu sacrum oraculum : hic munera nobis
Et mens , & manus , & vox tua pollicita est .
Ne , quæso , ne destituas , neu temne dicari
Meque , laresque meos , & mea sacra tibi .
Interea ardentis semper te mentis habebunt
Templa meæ : tibi in his uram animum , atque
animam .
Sentiri nequit hinc odor , & si possit , odores
Vincat Panchæos , vincat & Assyrios .

F I N I S .

ILLUSTRIUM ALIQUOT POETARUM
DE JACOBO BONFADIO

VERONENSI

CARMINA.

PAULI MANUTII

Ad eos, qui pro salute BONFADII laborarunt.

*D*ILECTÆ Musis anima, Jovis unica cura,
In quibus & rectum, & longos exstincta per
annos

Nunc demum exorients virtus antiqua relucet;
Et tu, qui docti dux inclytus agminis anteis,
Magnanime o juvenis GRIMO ALDE: quis ille, quis esse
Tam culto ingenio possit, tam divite vana,
Officium vestrum qui versibus exprimat aptis?
Lapsus erat miser in culpam BONFADIUS: index
Detulerat patribus; nec inani teste probarat.
Quid facerent legum custodes? legibus uti
Coguntur, dignum est; servantur legibus urbes.
Continuo infelix in carcere conditur atro:
Nuntius interea tristis percusserat aures
Omnium amicorum; vestris dolor hastis acerbis
Mentibus: afflicti prope concurritis omnes.
O pietas, o prisca fides! vos crimine duro
Oppressum, & multis invisum, non tamen ipsi
Pendentem extremo casu liquistis amicum.
Pugnastis precibus, fletu pugnastis amaro,
Si possent flecti sensus, mentesque severæ.
Est etiam minime dubio sermone velatum,
Argento, atque auro multos cupiisse redemptum.
Docta cohors, quid agis? turbas navigat Euris
Spes tua: vana peris, portuque salutis aberras.
Ne lacrimas, ne funde ultra: desiste precari.
Suscipis ingratum studium, sterilemque laborem.
Fixa manet duris sententia legibus atrox.
Si fecis, pereat: factum patet, ergo peribit.
Horrendum carmen, tamen immutabile: quod non
Frangere vis hominum, non flectere gratia possit.
Exprimitur tandem hoc invito a iudice, vivus
Ne comburatur, crepitans deditus igni.
Tum se carnifici sæva BONFADIUS ultro,

Mem-

Mente Deum spectans, animo imperterritus, offert.
 Ille ministerio prope functurus iniquo,
 Terribilis rigidam suspendit ad alta securim.
 Quem feris ab, scelerata manus? quam nobile collum
 Percutis, ignoras & quo te sanguine tingis?
 Hic, qui prostratus jugulum tibi porrigit, a te
 Fortiter expectans extremi vulneris ictum,
 Dulcibus & numeris, & molli doctus avena,
 Quum caneres versus Musis, & Apolline dignos,
 Aërios sacras descendere monte Camœnas,
 Atque habitare tuo, Benace, in littore iussit.
 Hic & Romano eloquio, & præcellit Etrusco,
 Mansuetus, facilis, dulci sermone disertus.
 Hæc tu non audis; sed inanibus irrita ventis
 Mandantur, quæcumque loquor; tu parcere nescis.
 Eximios, humilesque feris discrimine nullo.
 Sic visum est Superis; mutari fata nequibant.
 Fixum erat, ut damnatus, & acri iudice victus,
 BONFADI, ante diem Ligurum morereris in Urbe.
 Urbs præclara viris, Urbs classe insignis, & armis,
 Barbaricæ gentis magnis decorata trophæis,
 Cur veterem a nobis, cur fidum avellis amicum?
 Non tamen obscurus perit, aut inglorius; exstant
 Scripta Viri, quæ posteritas mirabitur omnis.
 Tu quoque in Historiis seros memorata per annos,
 Genua, florebis viridi cum laude, & ab illo,
 Quem tu exstinxisti, tibi lucida gloria surget.
 At tu, cui miser extrema BONFADIUS hora
 Aspersam lacrimis misit per scripta salutem;
 Flos Ligurum, GRIMOALDE, tuæ decus Urbis
 & Orbis,

Et vos o Phœbo sacri, studiisque decoris,
 Egregii Juvenes, mœstum lenite dolorem.
 Jam sat honorifico celebrastis funera fletu:
 Jam satis officio, satis & tribuistis amor:
 Nec vestrum studium, pietas nec vestra latebit:
 Sed clarorum hominum semper notescet ab ore.
 Et quas ille cruci correptus morte nequivit
 Officio, studioque pares persolvere grates,
 Has qui perpetua vobis cum laude rependat,
 Forsitan alter erit, vel jam est; multique sequentur.
 Vive diu, studiosa manus; doctamque Minervam
 Excole: quæ vestras divino nectare mentes
 Pascet, & extremum tribuet per secula nomen.

JOANNIS MATTHÆI TOSCANI.

NON minus intumuit nuper Benacis alumni
 BONFADII, ac Musis, doctæ Catulle, tuis.
 Bis

*Bis tamen infelix : rapuit nam Roma Catullum :
 BONFADIUM leto das , scelerate Ligur .
 Historia æternum cuius , fera Genua , vivis ,
 Immeritum sæva lege necare potes ?
 Mitius est , quod te spumanti vortice marmor
 Tundit , & es scopulis durior ipsa tuis .*

A D A M I F U M A N I

VERONENSIS

C A R M I N A .

I.

S U B E F F I G I E

A T H I L Æ H U N N I .

IAX Orbis ille , incendium , pallor , pavor ,
 Europa monstrum quem novum genuit parens ,
 Matris ferus quod carnifex foret suæ ,
 Qui barbaro superbus ipse spiritu ,
 Dei Flagellum , nomen indidit sibi ;
 Terris furens satelles irati Jovis ,
 Per quem fuere secla facta ferrea
 Quum quaque mores usque fudit barbaros ,
 Quo se ore vivens ferre suesset ATHILA ,
 Tabella JOVII hæc indicat planissime .

II.

S U B E F F I G I E T O T I L Æ .

Immanis ille , pestis Urbis , barbarus
 Quæ barbararum gentium terror , sui
 Ad Ortum ab Occidente fines Imperi
 Olim feroci Marte dilataverat ;
 Qui nostra vastitate cuncta perculit
 Vicos , agrosque , civitates , oppida
 Ritu procellæ , turbinisque acerrimi ,
 Deo atque hominibus abominatus TOTILA ,
 Hac in tabella pictus , hospes , an vides
 Ut sævus , importunus , impotens , adhuc
 Stragem minetur ore , cædem , sanguinem .

III.

III.

S U B E F F I G I E

M A R T I N I T U R R I A N I .

Ruebat ECCELINUS acer Italus
 Fretus tremenda militum ferocia
 Tremendus ipse diritate barbara,
 Urbem superbam, maximam, perlucidum
 Sidus togatæ ut perdomaret Galliæ:
 Tyrannus ECCELINUS ille pessimus,
 Illud Deo atque hominibus infestum caput,
 Quotquot fuere, quotque sunt, quotque umquam erunt
 Longe Tyrannus omnium teterrimus:
 Ab corde cujus exfularat funditus
 Fas, jus, pium, rectum, pudorque, æquum, &
 bonum:

Qui tenera membra parvulorum ab ubere
 Matrum revulsa, diffecare per scelus
 Mucrone duro suetus ipse durior:
 Quin (proh nefas!) & mulierum prægnantium
 Exenterare amabat (o dirum nefas!)
 Exenterare amabat alvos impius
 Horrente scalpro: te nihil, mater, verens,
 Lucina, justis quæ vocata partibus
 Nitentium audis pia lacrimosas preces:
 Quæ sæpe sæpiusque repetitæ, illius
 Numquam feroces spiritus, numquam seri
 Durissimum mollire pectus quiverunt.
 Et hoc Patavii novit alma civitas,
 Vicinaque illi fertilis Vicetia,
 Tuque urbs frequens, vetusta, magna, nobilis,
 Verona, mater urbium pulcherrima,
 Novisti, & ante tu beata Brixia,
 Tum facta ab illo urbs omnium miserrima.
 Ruebat ECCELINUS acer Italus,
 Qualis sonantis vis corusca fulminis:
 Quum TURRIANUS ecce vir fortissimus
 MARTINUS, indignatus, ut spumans aper
 Lucanus, aut Sabellus, aut Libys leo,
 Getula pubes quem verota perpulit
 Exire notis saltuum recessibus,
 Clamora pubes, & Numidicorum canum
 Animosa vis latratibus sævis ferit,
 Quum colla & armos vestientibus iubeis
 Caudæ flagello identidem graves sibi

Vib

Villosa terga verberans iras ciet .
 Secumque cæco murmure dubitat ferus ,
 Quæ prima mordens obterat venabula :
 Sic ille , acerbæ ut servitutis imminens
 A civibus propelleret jugum suis ,
 Formidoloso & ipse cinctus agmine ,
 Virtute fretus exsilit mirabili
 Seni incitatus obviam acerrimo ,
 Primaque pugna vulnerat , vivum capit ,
 Asportat , inque claustra cæci carceris
 Contrudit ; ubi post dirus is , diris modis
 Squalloreque ac pudore tetro , pessimis
 Suis sceleribus debitas pœnas luit .
 Quo pervagante tam beato nuntio
 Late per agros Italum , perque oppida ,
 Passim puellæ virgines ductis choris
 Lætæ canebant voce tinnula simul ,
MARTINE TURRIANE , MARTINE inclite ,
 Tu liberator urbium , tu patriæ
 Servator exististi , & omnes omnium
 Laudes tulisti : nempe nostra tu omnibus
 Nobis dedisti habenda , quum nefarios
 Latronis ausus contudisti , & omnibus
 Mentem addidisti civibus trepidis tuis :
 Tibi & mariti conjuges , & conjuges
 Debent maritos , atque utrique liberos ,
 Debent parentes liberi tibi quoque :
 Tibi nos pudicitiam , tibi decus , tibi
 Nostram incolumitatem , tibi jam denique
 Nos nostraque en debemus hæc tibi omnia .

I V.

SUB IMAGINE CANIS SCALIGERI .

SCALIGER , anne tua isthæc , **CANIS** inclyte ,
 imago est ?

O cari capitis cara mihi effigies .

Illene tu , profngis quondam qui vatibus unus
 Portus eras , arx , spes , præsidium , columnen ?
 Gaude , heros redive , heros bellicque domique
 Illustris , juncto viribus ingenio .

Ecce tibi ut veteres **JOVIUS** renovavit honores ,
 En te ut honoratis juxxit imaginibus !
 Mæste , tuum tersa nitidum rubigine nomen
 Factum , jam poterit nulla abolere dies .

V.

DE FRANCISCO CARMAGNOLA .

Sedula apis veluti maturis advolat uvis ,
 Ut liquido vacuas distendat nestare cellas ;
 Ad te sic mea se celeri tulit impete Musa ,
 Bellica quem ad magnos virtus evexit honores ,
 FRANCISCE , æternum Pietas per secula nomen
 Cui peperit , cuncto procerum quum adstante senatu,
 Ac magnis una tecum de rebus agente ,
 Ad scabrum haud veritus confestim exire parentem es ,
 Fortiaque infirmo circumdare brachia collo .
 Scilicet hoc unum malit , quam mille referre
 Gesta tua præclara , & victo ex hoste trophæa ,
 Magnorum decus Insuorum , Dux inclyte , tandem
 Orta licet subito fractum te adtriverit ingens
 Tempestas , Caurique , importunæque procellæ ;
 Ne dubita , tua te pietas , tua maxima virtus
 Venturo meritis cumulabit honoribus ævo .

VI.

IN IMAGINEM

ANDRÆ GRITTI

VENETORUM PRINCIPIS .

UT vigili doctoque ratis simul astra magistro est ,
 Undique ut aerii verrant freta cærulea venti ,
 Nec ventos , validasve timet secura procellas ;
 Credere sed pelago , ac magnis se fluctibus audet :
 Sic Duce te Urbs prognata mari , sic Principe ,
 GRITTE ,
 Bellorum ut sciret magnos instare tumultus ,
 Bellorum metuit nullos interrita casus ;
 Sed Martis dare se magnis cita motibus ausa est ,
 Ut ratis illa eadem docto si cassâ magistro est ,
 Ut nulli nusquam turbent freta cærulea venti ;
 Et ventos validasque horret male firma procellas ,
 Credere nec pelago , aut ullis se fluctibus audet :
 Sic duce te Urbs , bone GRITTE , eadem sic Prin-
 cipe cassâ ,
 Bellorum ut videat nullos instare tumultus ,
 Bellorum metuit cunctos exterrita casus ;
 Nec dubiis dare se Martis cita moribus audet .

Fracast. Carm.

P

Ut

Ut gregibus tauri, turres ut mœnibus altis
 Sunt decori, ut pelago naves cingentibus undis,
 Sidera uti radiis inter nitet aurea Phœbe;
 Sic tu, sic Venetum imperii dum sceptrâ gerebas,
 Notus eras proceres inter, bone GRITTE, superbos
 Corporis eximia specie, virtute, animisque.
 Nostratum o salve Heroum ter maxime; tu nunc
 Et nostra posthac semper celebrabere Musa.

V I I.

ADVENTANTE SENECTUTE,
SE TOTUM DEO DICAT.

TAM cana rugis asperat
 Frontem senectâ: corporis
 Jam membra facta languida
 Sensim recedens in dies
 Vitalis ignis deficit.
 Sed hoc quid ad me, fervida
 Patris supremi caritas
 Me continenter si suis
 Fovere pergit ignibus?
 Ergo, o beata vivida
 Cœlestis ignis flammula,
 Magis magis me tu in dies
 Fovere perge singulos.
 Perge, o beata, perge dum
 Mihi usque perge amburere
 Mihi usque perge absumere
 Cor, ossa, nervos, viscera,
 Venas, medullas, sanguinem,
 Ipsamque mentem ac spiritum,
 Ut totus ardeam tibi:
 Ut atra quum mors frigidâ
 Afferre mihi volet manus,
 Sic flamma totus flammeis
 Alis Amoris lucidi
 Hinc expeditus, ætheris
 Altas ad oras subvolem:
 Cognata ubi inter sidera
 Non jam amplius memor mei,
 Unum te amem, ac tua omnia,
 Immo ardeam perenniter
 Factus tui ter maximi
 Scintilla parva incendii.

F I N I S.

N I.

NICOLAI ARCHII

COMITIS

CARMINA.

I.

AD SUOS OCULOS.

QUID tot, procaces, lacrimis signis frustra
 Rigatis, oculi? quid cruore manatis?
 Hoc est, quod inquit, sapere Phrygas sero.
 Tum lacrimari, tum dolere oportebat,
 Quum vos, scelesti, meque perditum iretis,
 Quoties rogavi, dicite, quoties supplex
 Per me obsecravi, per measque fortunas,
 Ut hæc rosetis æqua labra Pæstaniis,
 Vultumque cerni lubricum caveretis.
 Nil me, scelesti, miseret, aut piget vestri:
 Cordis dolet solius, quod modis miris
 Poenas furoris innocuum luit vestri.

II.

PEDIBUS SUI.

AMabo, quo me, lassuli pedes, fertis,
 Vix sustinentes semimortuum corpus?
 An ad cruentum limen, ad fores illas,
 Ubi hanc miselli pene liquimus vitam?
 Quid ah, quid ultro convolatis ad mortem?
 Quid sponte in acres ponitis manum flammæ?
 Ni vos (sed olim viderit fator Divum)
 Tot ejulatus, lacrimasque pertæsi,
 Utcumque tantis quæritis malis finem.

III.

IN TUMULO

M. ANTONII TURRIANI.

ANte annos scivisse nocet: nam maxima Virtus
 Persuasit Morti, crederet esse senem.

I V.

I M I T A T I O A R E O S T I .

Dulces lacrimulæ meæ puellæ,
 Quas desiderium pium movebat;
 Quæ vultus modo candidos rigabant
 Guttatim; & roseis genis fluebant:
 Hac si rivulus irrigaret unda
 Flores purpureosque candidosque,
 Hac per mollia prata laberetur.
 Tam suavi in pluvia nitens Cupido.
 Insidebat, uti solet volucris
 Ramo, vere novo, ad novos tepores,
 Post solem accipere ætheris liquorem,
 Gestire & pluvix ore blandiendo.
 Has inter lacrimas, & hunc dolorem
 Quassabat geminas faces Cupido,
 Exire ut faceret novas favillas.

V.

A D C O R N E L I U M R U F U M .

CORNELI, tibi quis scelus hoc persuasit, amici
 Ut scripta amata perderes?
 Scripta mei numquam satis admirata Triphonis,
 Labore lecta maximo,
 Fulvo auro pretiosa magis, viridique smaragdo,
 Qualem æquor Indicum tulit.
 Scilicet ut scombris tunicas, (*) barroque parares,
 Dareſque caſeo togam?
 Hæc promiſſa fides, hæc ſunt mandata, tibi quæ
 Dedi, rogans, & obſecrans?
 Ut gemmas inter ſervares, digna pereanni
 Cedro, vel arca eburnea.
 Gratia nil Fortunati, nil fama Triphonis
 His, impudice, profuit.
 Infelix ergo qui te manet exitus? in te
 Atrox Jambus irruet.
 Inviſusque tibi, laqueo vitam, improbe, claudes,
 Vel igne dilues notam.
 Aut ſi non homines curant tua facta nefanda,
 Dii non inulta liquerint.

DE

(*) Vox corrupta, ut videtur.

DE NICOLAÏ ARCHII COMITE .

Julii Cæsaris Scaligeri .

Ille decus Latii , patriæ mellitus alumnus ,
 Cujus honorata est Roma superba chely :
 Calliopæ in gremio numerosa voce relicta ,
 Quæque novos superat , quæque laceffit avos :
 Dum TURRII laudes effusis ambit habenis ,
 Est factus Genio grandior ipse suo .
 Crescere qui potuit sanctus ? res mira ; putetur ,
 Quem caneret , factus plenior esse Deo .

JOANNIS MATTHÆI TOSCANI .

Italica ora tuis , Benace , feracius undis
 Nil habet , in geminum qua patet illa fretura .
 Utque oleas flectam , vineta , & citria ripis
 Imposita , & placido quod natat amne pecus ;
 Oppida quot , liquida quæ aspergine lambis aquarum ,
 Omnigena excultos arte tulere viros ?
 Quos inter Dominus præcelsi internitet ARCHI ,
 Exseris ipse caput , quo modulante , vadis .
 Cujus longa dies abolabit carpina , quum tu
 Flammivomo amissas fidere flebis aquas .

F I N I S .

P E T R I · B E M B I

C A R M I N A.

B E N A C U S.

TE, Giberte, cano, purus dum templa sacerdos
Ingreditur, cupioque tuas attingere laudes.

Sit modo non impar tanto sub pondere, quæ me
Musa vocat, nec eam ventura redargnat ætas
Obscuræ carmen claro tibi condere famæ,
Et magnum brevibus voluisse intexere chartis.

Nuntius ut vitreas Benaci vectus ad undas
Muscoso subter pendentia fornice recta,
Atque Dei lætis implevit vocibus aures,
Advenisse diem, quo formosissima terræ
Ausonia Verona sacris, templisque regendis
Demissum cælo, & magnis virtutibus auctum
Acciperet juvenem, qualem vix ipsa petebat:
Forte pater gelido in luco silvaque virenti
Fontibus, & rivis cubito subnixus & urnæ
Jura dabat, cui carbasei mollissima fili
Stamina pingebant fūco, vestemque parabant
Cæruleam, innumera nodis, ac retibus aureis
Collectos compræ crines tempusque decorum,
Incinctæque auro surasque sinusque fluentes
Vestibulo in thalami natæ, niveosque lacertos
Nudabant operi, quo pulchro ex agmine Sirme
Docta lyraë digitis percurrere fila canebat
Carmen: quod totidem numeris Gardeque Saloque
Reddebant, Sol æstivos circumvagus orbes
Axe terens medio currum librabat Olympo.
Ergo avidis allata Deus postquam auribus hausit,
Promissosque olim satis sibi lætus honores
Agnovit; tangens hærentem uligine barbam,
Demulcensque manu jussit vicina vocari
Flumina; dein sese placidum convexa sub alta
Speluncæ senior solitaque in sede recepit.
Postera jam cælo stellas noctemque fugarat,
Urebatque dies multo terrasque fretumque
Lumine, cum nigris venit Ticinus in undis,
Piscosusque altas involvens Lambrus arenas:
Vénit & indigenis foecundans Ollius arva
Deductus rivis; cultos & Abdua campos

Amne

Amne secans, fulvo ripasque interlitus auro.
 Nec rapidus fluvioque Athesis spectandus amœno
 Defuit; aut Patavi circumque intraque pererrans
 Mœnia Medoacus triplici circumdata muro:
 Mœnia, quæ positor pugnas & bella perosus
 Musarum Iliacus studiis Phœboque sacra vit:
 Populiferve Padus genitor, qui flumina centum
 Ipse suo accipiens vasto latissimus alveo
 Libera terrarum cursu per pingua lapsus
 Portat, seque mari septenis amnibus infert.
 Quos tunc atque alios velatus harundine cœcæ
 Mincius excēpit venientes limine primo
 Obvius, atque in testâ parentis saxeâ duxit
 Lætifico cordis non celans gaudia vultu.
 Qui simulac udos posuere sedilibus artus
 Crystallo rigida sultis & Jaspide glauca;
 Continuo Nymphæ mensas ante ora Deorum
 Speluncæ in medio niveis mantilibus alte
 Consternunt, dapibusque onerant, Distæaque plena
 Vina ferunt, referuntque manu, calicesque madentes
 Præcingunt myrto, atque implexis flore coronis
 Purpureoque rosæ Medorumque arboris albo,
 Medorum quondam; sed quæ nunc plurima lætas
 Benaci vestit ripas, non illa caduca
 Fronde virens, suavique auras permulcet odore.
 Post ubi prima quies epulis; Deus ipse magister
 Undosique lacus domitor præsentia circum
 Numina respiciens his vocibus ora resolvit.

Quod votis toties nequicquam optavimus unum
 Vobiscum Divi, fausto modo fidere lucas,
 Volventes lucas fatorum orbisque ministræ,
 Advexere, vehit pleno bona copia cornu;
 Largaque pomifera prætendit munera dextra.
 Quare vos primo longævi a semine mundi
 In mare cæruleum prono labentia cursu
 Volvite majores, vaga flumina, volvite lymphas.
 Flos etenim juvenum, longa formidine sæcla
 Perdita qui solvat, quique agglomerata malorum
 Agmina tot bellicue faces, quas vidimus ipsi,
 Bæstra ultra Thylenque ultra Scythiamque releget:
 Quique urbes, quique arva colat; Jove missus ab ipso est.
 Volvite majores, vaga flumina, volvite lymphas.

Hic primum miseris viduatas civibus urbes
 Accipiens, vacuosque suis cultoribus agros
 Replebit numerum exæquans augensque priorem:
 Oppidaque ingenti multum quassata ruina,
 Prostratisque solo late mœrentia testis,
 Restituet; pulchroque dabit splendescere vultu.

Volvite majores, vaga flumina, volvite lymphas.

Magno namque pii juvenis devinctus amore
 Erruscus pater, excelsas qui Tybridis arces
 Possidet, & nutu Romanum temperat orbem;
 Illius eximias virtutes, claraque docti
 Ingenii monumenta, & sancti pectoris artes
 Suspiciens, obitosque invicto corde labores,
 Hoc dedit, has illi rerum permisit habenas.

Volvite majores, vaga flumina, volvite lymphas.

Quid memorem ut tener & primæ sub flore juventæ
 Ingentem ad ludum properaverit auspiciis Dis;
 Indole dein quanta nixus, quam fortibus ausis;
 Robore ceu firmo ventorum flamina quercus,
 Aut scopulus fluctus saxo excurrente marinos.
 Sic undas rerum excipiens, & plena pericli
 Multa diu, casus victor superaverit omnes.

Volvite majores, vaga flumina, volvite lymphas.

Sæpe illum abruptis in vallibus Apennini
 Versantem, luctantis equi cum frangeret armos,
 Præcipitansque viam obstrueret torrentibus imber:
 Pœninas vel per fauces tractusque volentem
 Aërios summo miseratæ e vertice Nymphæ
 Optavere graves cohiberent nubila nimbos.

Volvite majores, vaga flumina, volvite lymphas.

Sæpe illi ad magnos reges mandata ferenti
 Astitit unigena proles Jovis, ut bona mater,
 Ut mater bona, quæ caro timet omnia nato,
 Et cupit in duros comitem sese addere casus:
 Tum pueri mirata oculos & verba loquentis
 Ipse meas artes jam nunc tibi dixit habeto.

Volvite majores, vaga flumina, volvite lymphas.

Testis adest triplices magnas discreta per oras,
 Fluviorum nemorumque ferax, pecudumque, virum-
 que

Gallia, non auri, pictæ non indiga vestis,
 Diversosque jugo ad ventos interque cadentem
 Surgentemque diem longo protenta Pyrene;
 Altis quæ geminas despectat cornibus undas:
 Tum dictis factisque potens illa inclyta bello
 Lataque & in latas Hispania diffusa terras.

Volvite majores, vaga flumina, volvite lymphas.

Hæ nam te insolita orantem, averasque suorum
 Flestantem regum mentes, Giberte, videbant;
 Acceptos conversa sonos cum vocis imago
 Redderet, & dociles iterarent nomina ripæ.

Volvite majores, vaga flumina, volvite lymphas.

Testis & Adriacus, parvo qui flumine Rhenus
 Lambit humum, testis Thuscis haud maximus undis

Ma-

Major prole virum, & divinos Arnus honores
 Promeritus, cælum Divisque recentibus augens
 Pulchros qui colles pulchramque interfecat urbem
 Gens quorum imperio dispar nec legibus æqua
 Illius in studiis jamdudum, & amore quiescit.
 Volvite majores, vaga flumina, volvite lymphas.

Tu vero tu Roma tui genus ecquod alumni
 Jam non curarum, non commemorare laborum
 Una potes? tolle egregium per secula nomen,
 Tolle decus, daque alta virum volitare per ora.
 Volvite majores, vaga flumina, volvite lymphas.

Quantum Trinacriæ vertex se sustulit Ætnæ,
 Aut cinctus stellis Atlas, aut Caucasus ingens;
 Tantum clara virum Romæ se nomina tollunt.
 Illa novos tibi cælestium concessit honores
 Antiquis cumulans, at tu præsentia sæcla
 Firmabis, veterumque abolebis damna malorum.
 Volvite majores, vaga flumina, volvite lymphas.

Ecce tibi læto vestit se gramine tellus,
 Et tibi silva comas nutrit, tibi pabula surgunt,
 Fœcundus mites implet tibi pampinus uvas,
 Palladis & nigrum tibi ducit bacca colorem:
 Tum spisso quem rete trahas vel arundine longa,
 Flexivagus nostris crescit tibi piscis in undis.
 Volvite majores, vaga flumina, volvite lymphas.

Accipe, quæ tibi Parnasi de colle sorores
 Dona ferunt, sacram lauri de fronde coronam,
 Et plestrum, & citharam, scriptasque ab Apolline
 chartas,

Æternum quas ediscant celebrentque minores.
 Volvite majores, vaga flumina, volvite lymphas.

Ut Phœbo, utque Jovi confectis Græcia lustris
 Sacra olim & pleno posuit certamina campo:
 Sacra tibi, ludosque tibi sic Italia tellus
 Instituet; sic illa tuo de nomine dicet.

Volvite majores, vaga flumina, volvite lymphas.
 Accipe, quæ calathis porgunt tibi munera Nymphæ,
 Lateolum calthæ florem, castamque virentem,
 Liliaque, violasque & purpureos hyacinthos;
 Haud porxisse prius poterant, bella, impia bella
 Pertulimus; dulces & deformavimus agros.
 Volvite majores, vaga flumina, volvite lymphas.

Ut cum letiferos accendit Syrius ignes,
 Rivus aquas, hortus flores, pratum invidet herbas:
 Pallet humi nullo facies depicta colore:
 Ipsa suos sitiens foetus non educat arbos:
 Intereunt fruges siliqua labente perusta,
 Arva colit nemo siccis arentia glebis,

Vomeris & durum non admittentia dentem ,
 Cuncta jacent nimio cæli contusa calore ,
 Tristia sic nostris aderant prius omnia terris .
 Volvite majores , vaga flumina , volvite lymphas .

At postquam lætos effudit Juppiter imbres ,
 Rivus aquas , hortus flores , pratum explicat herbas ;
 Ipsa viret tellus , ripæ collesque nitescent :
 Dant segetem sulci , nemus altas sufficit umbras ;
 Poma suos curvant crescentia pondere ramos :
 Ruris turba Deam venerata ligonibus udam
 Vertit humum , & putres exercet vomere campos :
 Cuncta vigent cæli sæcundis roribus aucta :
 Nostras sic jucunda manent nunc omnia terras .
 Volvite majores , vaga flumina , volvite lymphas .

At vos in septem discreti culmina montes :
 Tuque , Pater Tyberine , tuum qui flumen Olympo
 Devehis ; hunc olim vobis multosque per annos
 Sit satis obtinuisse , meam mihi jam date partem :
 Ipse dabo multis , ne sint mea gaudia sola :
 Et tandem nostris juvenem concedite terris .

HYMNUS

AD DIVUM STEPHANUM.

NAM quæ te culpæ , & sceleris tam dira cupido ,
 Infelix Solyme & sæclis damnanda futuris
 Corripuit ? tantas aut quis furor egit in iras ?
 Ut juvenem patris ætherci præcepta canentem
 Dicta tibi , & veterum referantem oracula vatum
 Præstanti eloquio , teque ad meliora vocantem
 Compita per mediasque vias e mœnibus urbis
 Illusum expuleris , tum cæca perdita mente
 Concurfu pressum ingenti , saxisque petitem
 Nudatos artus ; ceu quondam grandine densa
 Juppiter ingeminans terram quatit æthere ab alto ;
 Crudelis leto dederis nil tale merentem ?
 Ille quidem placido sustollens lumina vultu
 Instrabatque oculis cælum , intrepidusque pericli
 Laudabat Superos , & spe sua damna levabat :
 Cui se , quantus erat , manifesta in luce videndum
 Ipse pater Divum dederat cum compare nato
 Sublimis , medioque illi fulgebat Olympo .
 Quin etiam extremo cum jam sub fine laborum
 Disiectus duro frontem , & cava tempora nimbo
 Iret iter propius leti ; tamen hostibus ipsis
 Pro scelere immuni moriens , pro talibus ausis
 Ah veniam Superos anima fugiente rogabat :

Pla-

Placabat superos hosti jam frigida lingua.
 Salve his senis lætus parere magistro
 Macte animo puer egregio, & mansuetissimæ aulæ,
 Macte nece, & veris magnam teris antro Divæ.
 Tu princeps ignominiam, plagisque cunctis,
 Et longum memoranda ætatis ætate fatis
 Magnanimi post heros, quem sancta matris
 Callicolû regi testis sub pectore natus
 Non ullam venerem, nullæ experta torquentis
 Ediderat patrii flavae Jovis ad intus;
 Testis ades facti, sacro ex primis is ille
 Sanguine palmifera terram conspersit humos.
 Et pulchræ insolitis decerpens laudis honores
 Purpurea gaudes frontem circumfusa corona.
 Unde tibi grati nomen dñe minores.
 Te colimus: certo tibi ætæ sacra queramus
 Rite damus; & chora tuis immortibus arc.
 Quid si ulla votisque hominum præsentibus ac monumentis
 Numina; nec cunctis ades fac penitente Divæ
 Ausoniam, populosque latæ, nomenque Latium,
 Atque malis prope jam confecta morosa Troia.
 Sancte veni; cunctisque tuis, nunque aures templis,
 Læti quæ festa velamus fronde per arces.
 Dexter adi, placidisque animis Cassere assito:
 Ac primum miseris bellorum, & casis annos
 Da pater exere, & tercentum nitens et annos
 Tigrimque, Tanaimque altera: & post ferre quiescent
 Sollicitos populi fasces, adhaesque regno
 Regna super, validoque militaria milite castis:
 Et pacem venerari, & mænia sentire sacra
 Dein pestes scelerum tantorum, atque agmine longæ
 Multa odii concreta morbis mala semina sisto,
 Infectasque diu labe, & cruenta purga
 Heu solito graviora, itaque ætate Divæ.

PRO GORITIO VOTUM AD DIVAM.

QUIBUS ÆDICULAM EXÆDIFICAVIT.

SANCTA, quibus propriam poluit Cælestis aram,
 Numina, perpetuæque ara lætæque minores,
 Humani columen generis divæ pietas,
 Ipse sibi legit summi quam sedem Olympi;
 Et tu divinæ genitrix angusta precis
 Felix sorte tua; felix nata, æque secunda;
 Æthereique puer magnam patris incrementum;
 Arte boni quos egregia caloque labori
 Spectari Pario & spirare in marmore læte;

Vomeris & durum non admittentia dentem ,
 Cuncta jacent nimio cæli contusa calore ,
 Tristia sic nostris aderant prius omnia terris .
 Volvite majores , vaga flumina , volvite lymphas .

At postquam lætos effudit Juppiter imbres ,
 Rivus aquas , hortus flores , pratum explicat herbas ;
 Ipsa viret tellus , ripæ collesque nitefcunt :
 Dant segetem sulci , nemus altas sufficit umbras ;
 Poma suos curvant crescentia pondere ramos :
 Ruris turba Deam venerata ligonibus udam
 Vertit humum , & putres exercet vomere campos :
 Cuncta vigent cæli fecundis roribus aucta :
 Nostras sic jucunda manent nunc omnia terras .
 Volvite majores , vaga flumina , volvite lymphas .

At vos in septem discreti culmina montes :
 Tuque , Pater Tyberine , tuum qui flumen Olympo
 Devehis ; hunc olim vobis multosque per annos
 Sit satis obtinuisse , meam mihi jam date partem :
 Ipse dabo multis , ne sint mea gaudia sola :
 Et tandem nostris juvenem concedite terris .

H Y M N U S :

A D D I V U M S T E P H A N U M .

NAM quæ te culpæ , & sceleris tam dira cupido ,
 Infelix Solyme & sæclis damnanda futuris
 Corripuit ? tantas aut quis furor egit in iras ?
 Ut juvenem patris ætherei præcepta canentem
 Didia tibi , & veterum referantem oracula vatum
 Præstanti eloquio , teque ad meliora vocantem
 Compira per mediasque vias e mœnibus urbis
 Illusum expuleris , tum cæca perdita mente
 Concurfu pressum ingenti , saxisque petitem
 Nudatos artus ; ceu quondam grandine densa
 Juppiter ingeminans terram quatit æthere ab alto ;
 Crudelis leto dederis nil tale merentem ?
 Ille quidem placido sustollens lumina vultu
 Lustrabatque oculis cælum , intrepidusque pericli
 Laudabat Superos , & spe sua damna levabat :
 Cui se , quantus erat , manifesta in luce videndum
 Ipse pater Divum dederat cum compare nato
 Sublimis , medioque illi fulgebat Olympo .
 Quin etiam extremo cum jam sub fine laborum
 Disiectus duro frontem , & cava tempora nimbo
 Iret iter propius leti ; tamen hostibus ipsis
 Pro scelere immuni moriens , pro talibus ausis
 Ah veniam Superos anima fugiente rogabat :

Pla-

Placabat superos hosti jam frigida lingua.
 Salve his senis lectus parere magistris
 Maeste animo puer egregio, & præstantibus ausis,
 Maeste nece, & veris magnum decus addite Divis.
 Tu princeps ignominiam, plagasque cruentas,
 Et longum memoranda nepotibus aspera fata
 Magnanimi post herois, quem candida partu
 Cælicolùm regi testò sub paupere nympha
 Non ullam venerem, nullos experta hymenæos
 Ediderat patrii flavas Jordanis ad undas;
 Testis ades facti, sacro tu primus ab illis
 Sanguine palmiferæ terram conspergis Idumes.
 Et pulchræ insolitos decerpens laudis honores
 Purpurea gaudes frontem cinxisse corona:
 Unde tibi grati nomen dixere minores.
 Te colimus: certo tibi tempore sacra quotannis
 Rite damus; & thura tuis imponimus aris.
 Quod si ulla votisque hominum precibusque moventur
 Numina; nec cunctis adeo stat perdere Divis
 Ausoniam, populosque Italos, nomenque Latinum,
 Atque malis prope jam confectæ mœnia Romæ,
 Sancte veni; cœtusque tuos, tuaque aurea templa,
 Læti quæ festa velamus fronde per urbes,
 Dexter adi, placidusque animis illabere nostris:
 Ac primum miseris bellorum, & cædis amorem
 Da pater exuere, & tercentum mittere in annos
 Tigrimque, Tanaimque ultra; & post ferre quietem
 Sollicitos populi fasces, adjectaque regnis
 Regna super, validoque undantia milite castra:
 Et pacem venerari, & mitia vertere duris:
 Dein pestes scelerum tantorum, atque agmine longo
 Multa odii concreta modis mala semina diris,
 Infectasque diu labes, & crimina purga
 Heu solito graviora, irasque averte Deorum.

PRO GORITIO VOTUM AD DEOS,

QUIBUS ÆDICULAM EXÆDIFICAVERAT.

Sancta, quibus propriam posuit Goritius aram,
 Numina, perpetuosque aræ sacra vit honores,
 Humani column generis divina puella,
 Ipse sibi legit summi quam rector Olympi;
 Et tu divinæ genitrix augusta puellæ
 Felix sorte tua; felix nata, atque nepote;
 Æthereique puer magnum patris incrementum;
 Arte boni quos egregia cæloque Savini
 Spectari Pario & spirare in marmore fecit;

Hæc vos pro pietate illi , pro munere tali
 Reddite , si sacrorum umquam pia carmina vatum ,
 Et castæ movere preces cælestia corda .

Reddite , quæ posco , mea nec sint irrita vota :
 Ut quos longa dies miseris mortalibus olim
 Adveſtat varios ſenio veniente labores ,
 Ægrum animum , & ſegnes effœto in corpore ſenſus :
 Inque ſolum pronos vultus , nixiſque bacillum
 Poplitibus , tardosque gradus , tremebundaque membra :
 Tum crebras lacrimis cauſas , & dura ſuorum
 Funera , & everſos mutata ſorte penates ;
 Quæque alia ex aliis paſſim mala conſernatas
 Implerunt terras cupidi poſt ſorta Promethei ;
 Horum ille immunis totos centum expleat annos
 Auſpiciis , Superi , veſtris , & numine veſtro
 Integer , ut nunc eſt ; nec longæ damna ſeneſcæ
 Sentiat : & charus patriæ , jucundus amicis ,
 Dives opum Roma incolumi Latioque fruatur .

JULII SECUNDI

PONTIFICATUS MAXIMUS.

Illa Piis populis , mundoque accepta recenti ,
 Sub Jove cum nondum ferreus orbis erat ,
 Nec proſciſſa graves vertebant arva juvenci ,
 Vineæ nec lacrimas falce reſecta dabat :
 Mella ſed aeris ſudabant roſcida ſilvæ ,
 Et lac pro gelida flumen habebat aqua ;
 Nunc o nunc redit ad primos bona quercus honores ;
 Quos habuit , mundi cum tener orbis erat ;
 Quercus glande ſua quæ quondam heroas alebat ,
 Cura Deum quercus ſancta , piſumque nemus ,
 Dignaue , Cecropiæ pinguis cui ſilva Minervæ
 Cedat , & Herculeis populus apta comis :
 Cedat & ipſa ſuo laurus Phœbeja luo ,
 Inflexaque pedem Bacchica ſerta hederæ :
 Vel myrti Veneris , vel Silvani cypariſſi ,
 Vel quæ capripedi pinus amata Deo eſt .
 Namque boni mores noſtro rediere ſub ævo ;
 Ut primum poſito conſtitit illa ſitu ;
 Simplicitaſque inculta comam , relique cupido ,
 Et lex , & probitas , & ſine labe fides :
 Nec redit ad primos tantum bona quercus honores ,
 Quos habuit ; mundi cum tener orbis erat :
 Sed proceſſa ſolo nitidis caput inſerit aſtris ,
 Quantum homines aluit , tantum alitura Deos .

G A L A T E A .

PANA Deum Siculi per iniquas litoris undas
 Eludit tarda dum Galatea fuga ;
 Seque adeo spe provectus , studioque sequendi
 Plus medium infido tingeret ille mari .
 Quo fugis o Galatea ? mane mane o Galatea ,
 Non ego sum , dixit , non ego Nympha Cyclops :
 Qui flavum avulsis jaculatus rupibus Acin
 Sævitiæ liquit tristia signa suæ .
 Pastorum , pecorisque Deus , cui garrula cera
 Prima dedit varios fistula iuncta modos :
 Quena gelidi frondosa colunt pineta Lycæi ,
 Lætaque Mænalis Parrhæsis ora jugo :
 Unam de cunctis te diligo Neptuninis ,
 O Galatea mane , o jam Galatea mane .
 Ille loquebatur : fundo declive maligno
 Litus erat : gressum non tenere pedes :
 Sed pelagi dum cæca urget male cautus , & instat ,
 Qua refugit pendens , subtrahiturque solum ,
 Labitur ; & summas dorso convertit arenas ;
 Labentem intortis obruit unda fretis :
 Utque Deam Galatea iterans Galatea vocabat ,
 Implere tenues ora vocantis aquæ .
 Tum primum latices epotavisse marinos
 Pana ferunt , ponti nec latuisse Deum ;
 Sed quia Nereïdas ibat vexare puellas ,
 Offensum fluctus non tenuisse suos .
 Ergo illum nandi insuetum , glauca excipit alto
 Unda sinu , exultant irrequieta vada :
 Marmora ter superare manu conatus amara ,
 Ter circumfusus est revolutus aquis .
 Nympha Dei lapsum cupidis spectarat ocellis ,
 Gravior & pulchro risus in ore fuit .
 Spectarant , sparsi ut steterant per litora , Fauni :
 Pan comites Fauni , grataque turba tua :
 Et mixtus Faunis , cordi cui semper amores
 Nympharum , & querulo tibia rauca sono .
 Incubus ; & satyri , & coniferæ Sylvanus
 Arboris agresti cinctus honore caput :
 Qui simul atque ipsum gentis videre parentem
 Pana sub intpuris mergier æquoribus ,
 Nympha redi , Galatea redi : neu desere amantem ,
 Ingeminant omnes : candida Nympha redi :
 Ah tantum ne admisse tuis sit dedecus undis :
 Quod taceant nulli post Galatea dies :
 Ingeminant Divi , clamoribus ista resultat :

Arida

Arida pumiceum qua lavit Ætna pedem .
 Illa metum fallax simulare , & tendere in altum ,
 Et vanas surda rejicere aure preces :
 Quo magis ii tristes mœsti versare querelas :
 Et pelagi expertes dicere amore Deos .
 Pectora pars pulsare manu , pars currere in undas :
 Cedit , & argutos tardat arena pedes .
 Omnia quæ obliquo , lente nans , respicit ore ,
 Unaque tot gaudet fallere nympha Deos .
 Utque satis lusit , certe sat lusimus , inquit ;
 Successuque mei non caruere doli .
 Atque ita jactatis relegit freta versa lacertis ,
 Pronaque non longum vincere tendit iter .
 Summa secant pulsæ fluctu saliente papillæ :
 Spumea sub niveo murmurat unda pede .
 Tum summo apprensū cornu sustollit : at illi
 Clauserāt insolitus lumina viſta sopor .
 Ut rediit cum luce animus , quo percitus æstro
 Conjugium affectas , dixit , inepte , meum ?
 Perque ausus vada falsa sequi , regna invia vobis ,
 Invitam pergis sollicitare Deam ?
 Numen aquæ gaudet tumidarum numine aquarum :
 Conveniunt votis vota propinqua meis :
 Tu pete montivagas , quarum es de gente , capellas
 Parte tui ; & nostros linque proterve toros .

A D M E L I N U M .

Quid Dominam assiduis vexas Meline querelis ?
 Frangitur injusto læsa timore fides .
 Simplicitas magis ipsa juvat , cum lege soluti
 Jungitur in tacito foemina virque toro .
 Mitem animum dedit infirmis natura puellis ,
 Fecit & ad blandas mollia corda preces .
 Culpam in amore suæ qui nullam agnoscit amicæ ,
 Novit , qua melius arte perennet amor .
 Mulciber æternos Venerem tenuisset in annos ,
 Usa minus duro si foret illa viro .
 Ah pereat , quicumque suæ peccata puellæ
 Objicit , & fentem sustinuisse potest .
 Ipse ego si videam , nollem vidisse fateri ,
 Gaudia ne fiendo dissipet illa mea .
 Tu quoque , quod holles fieri , desiste vereri ;
 Non erit ; innocuos ipse tuetur Amor .

FAUNUS AD NYMPHAS.

Dicite cur nostros, Nymphæ, fugatis amores :
 Quid Faunus, quo sic despiciatur, habet ?
 Cornua si mihi sunt ; sunt & sua cornua Baccho :
 Inque sinus vocat hunc Cressa puella suos .
 Ignea si frons est ; an non frons ignea Phæbo est ?
 Hoc tamen est Clymene facta parente parens .
 Barba riget suffusa genis : dedit improbe sæpe
 Oscula barbato Dejanira viro .
 Intonso, densoque tegor præcordia villo ,
 Nil ideo Marti est Ilia quæstæ suo .
 Capripedem arguitis ; quid claudio turpius ? at tu
 Nupisti claudio Cypria pulchra Deo .
 Denique siqua meæ pars est non bella figuræ ,
 Exemplum a cælo, quod capiatis, habet :
 Sed vos nimirum mortalia facta sequutæ
 (Omnis quando auro conciliatur amor)
 Pastorum, & pecoris tenui custode repulso ,
 Quæritis a magnis munera magna Deis .

IOLAS AD FAUNUM.

Mollibus Alcippe vernantia ferta genistis
 Collis ab usque jugo fert tibi, Faune, sui .
 Ut vidi, huc amens summo de monte cucurri :
 Aspice, perculso quam tibi corde loquor .
 Nunc adeo, si sæpe tuos cantavimus ignes ,
 Affer opem flammæ tu quoque, Dive, meæ .
 Formosi cum te floris velabit honore ;
 Hæc illi dicas ; ut tua verba, precor .
 Alcippe, miserum fastu quæ perdis Iolam ,
 Teque simul tacito fallis inepta dolo ;
 Munera quæ portas, bene si tibi nota fuissent ,
 Damni te poterant admonuisse tui :
 Nec reflorescunt, quæ jam cecidere, genistæ :
 Nec redeunt, qui jam præteriere, dies :
 Quod si nulla mei tangit te cura poetæ ,
 Ah saltem formæ parce puella tuæ .

LONGOLII EPITAPHIUM.

TE juvenem rapuere Deæ fatalia nentes
 Stamina ; cum scirent moriturum tempore nullo
 Longoli, tibi si canos, seniumque dedissent .

LEONICI EPITAPHIUM .

Naturæ siquid rerum te forte latebat ,
Id legis in magno nunc Leonice Deo .

JACOBI SYNCERI SANNAZARII
EPITAPHIUM .

DA sacro cineri flores : hic ille Maroni
Syncerus mæsa proximus , ut tumulo .



ANDREÆ NAUGERII

PATRITII VENETI

L U S U S.

ASPICE magna Ceres tibi quos semente peracta
 Ducimus agrestes, rustica turba, choros.
 Tu face, ne nimio semen putrescat ab imbre,
 Neq. fulcos rapido frigore rumpat, hiems.
 Neq. sterilis surgat silva infelicitis avenæ,
 Et quæcumque bonis frugibus herba nocet:
 Neq. terræ prostrata animosi flatibus Euri
 Decidat, aut densa grandine læsa seges:
 Neq. direpta avidæ rapiant frumenta volucres:
 Monstrave, quæ terræ plurima sæpe ferunt.
 Sed quæ credidimus bene cultis semina campis,
 Uberius largo sænore reddat ager.
 Sic erit; interea nivei carchesia lactis
 Fundite, & annoso mella liquata mero.
 Terque satas circum felix eat hostia fruges:
 Cæsaque mox sanctos corruat ante focos.
 Nunc satis hæc; post messem alii reddentur honores:
 Et sacras cingent spicea ferta comas.

AURÆ, quæ levibus percurrit æra pennis,
 Et strepitis blando per nemora alta sono:
 Serta dat hæc vobis; vobis hæc rusticus Idmon
 Spargit odorato plena canistra croco.
 Vos lenite æstum, & paleas sejungite inanes,
 Dum medio fruges ventilat ille die.

ILLE tuus Pan montivages venator Iolas
 Suetus in audaces cominus ire feras:
 A quo & adhuc risusque suum, exuviasque Iconum
 Sacra tibi agrestis munera pinus habet:
 Nunc iam annis gravis hæc devisti cornua cervi
 Dedicat, imbelli congrua dona seni.
 Cum tamen Herculeæ facta inter fortia clavæ
 Is quoque sit laudem visus habere labor:
 Tu Dive hæc inter viridis decora illa juventutis
 Suicipe, neve illis esse minora puta.

HANC vitem, multa quæ semper fertilis uva
 Haud umquam domini fallere vota solet:
 Hunc etiam large florentem, consecrat ipse
 Vineti-cultor Damis Jacche tibi.

Tu

Tu face Divę , tua hæc spes non frustretur : & huic
Exemplo fructum vinca tota ferat .

Longius a pecore errantem per devia taurarum
Dum sequitur nemorum per juga longa Lycon ;
Errantem scopulo capream conspexit ab alto :
Continuo certo dejicit hanc jaculo .
Mox etiam catulos sola sub rupe jacentes
Invenit : hos Crocali donat habere suæ .
E caprea in viridi statuit convivia luo :
Addidit & veteris pocula multa meri .
Quod reliquum est , Pan semicaper cum cornibus ipsis
Suspensum e pinu hac tu tibi tergus habe .

Quod tulit optata tandem de Leucade Thyrsis
Fructum aliquem ; has violas dat tibi sancta Venus .
Post sepe hanc sensim obrepens , tria basia sumpsi :
Nil ultra potui : nam prope mater erat .
Nunc violas ; sed plena feram si vota , dicabo
Inscriptam hoc myrtum carmine Diva tibi .
Hanc Veneri myrtum Thyrsis , quod amore potitus ,
Dedicat , atque una seque suosque greges .

Et quercum , & silvam hæc ante omnia Thyrsis
amabit ,
Et certo feret his annua vota die :
Dum poterit memor esse , quod hac primum ille sub
umbra
Ultima de cara Leucade vota tulit .

Venator celerem mœrens Augona Melampus
Consoffum rapido dente ferocis apri ,
Hac illi in ripa tumultum frondente sub umbra
Erigit : hoc ipso concidit ille loco .
Non impune quidem prædo sceleratus abivit :
Præcubuit jaculis cæsus & ore canum .
Tu tamen e cunctis canibus præstantior Augon
Fide Augon , filvis qui modo terror eras :
Tu dilecte jaces ; sed ab alta hac fascia pinu
Millusque , & nullo vincula juncta suo :
Quin decisa feri cervix tibi pendeat hostis :
Sintque una ex animo signa dolentis heri .

Et gelidus fons est : & nulla salubrior unda :
Et molli circum gramine terra viret :
Et ramis arcent Soles frondentibus alni :
Et levis in nullo gratior aura loco est :
Et medio Titan nunc ardentissimus ære est :

Exu.

Exustusque gravi fidere fervet ager.
 Sis te viator iter: nimio jam torridus æstu es,
 Jam nequeunt lassī longius ire pedes;
 Accubitu languorem, æstum aura, umbraque virenti,
 Perspicuo poteris fonte levare sitim.

ANTE canes omnes pastori carus Amyntæ
 Nuper ab Illyrico litore missus Hylax,
 Dum solitas agit excubias, & septa tnetur:
 Nec vigilant socii cetera turba canes:
 Qua rapidus sese media inter saxa Timavus
 Mergit, & inde iterum profluit amne novo:
 Ille quidem saxa vitulos tutatus ab ursa est:
 Ipse sed ingenti vulnere cæsus, obit.
 Constituit viridi tumulum de cespite Amyntas:
 Hæc voluit raram præmia habere fidem.
 Mæsta gemunt armenta: mali furesque, lupique
 Extincto hoc sibi jam cuncta licere putant.

DAT Cereri has Telepho spicas, hæc ferta Lyæo,
 Hæc nivei lactis pocula bina, Pali.
 Pro quibus arva Ceres, vites fecundet Iacchus:
 Sufficiat pecori pabula, læta Pales.

CUM primum clauso pecus emittetur oviss,
 Urbs mea Leucippe cras adeunda mihi est.
 Huc ego venalemque agnum, centumque Chariclo
 Ipsa mihi mater quæ dedit, ova fero.
 Afferri tibi vis croceos niveosque corthurnos?
 An ne colum, qualem nata Lyconis habet?
 Ipse feram quæ grata tibi; tu basia junge:
 Gaudia Leucippe nec mihi grata nega.
 Cras, ubi nox aderit, otiosæ elabere matri:
 Hæcque inter corymbos ad tua dona veni.

ILLI in amore pares, vicini cultor agelli
 Thyrsis, cumque suo Thyrside fida Nape,
 Ponimus hos tibi Cypri immortales amaranthos:
 Liliaque in sacras ferta parata comas
 Scilicet exemplo hoc, nullo debilis ævo
 Floreat æternum sac Dea noster amor.
 Sit purus, talisque utriusque in pectore candor
 In foliis qualem lilia cana ferunt.
 Utque duo hi flores serito nectuntur in uno,
 Sic animos nectat una catena duos.

Candida Niconoe viduæ spes una Terillæ
 Montivagas jaculo figere certa feras.

Hunc.

Hunc tibi silvipotens arcum Latonia ponit :
 Atque hæc in pharetra condita tela sua .
 Illam cara parens tenero sociavit Icasto :
 Ignotique jubet jura subire tori .
 Tu Dea , si silvis ægre discedit ab altis ,
 Si lacrimans coetus deferit illa tuos :
 Tu bona sis , felixque illi : tu numine dextro
 Optata lætam fac Dea prole domum .

QUÆ duo fert collis fecundi vinitor Acmon
 Expressi primum cymbia plena meri :
 Hæc avidis musti satyris , mustique parenti
 Dat jucunde tibi vitis Jacche fator ,
 Illi illæsa suis linquant vineta rapinis :
 Tu tua fac largis auctibus uva fluat .

HAS Vulcane dicat silvas tibi villicus Acmon :
 Tu sacris illas ignibus ure pater .
 Crescebant ducta e Stati propagine silvis :
 Jamque erat ipsa bonis frugibus umbra nocens .
 Ure simul silvas : terra simul igne soluta
 Fertilior largo fœnore messis eat .
 Ure istas , Phrygio nuper mihi confita colle
 Fac pater a flammis tuta sit illa tuis .

TAM telas , calathosque , omnesque perosa labores ,
 Quos vitæ quæstus pauperioris habet :
 Palladio radium cum templo appenderet Eufro :
 Jamque sequi Venerem constituisset : ait ,
 Hastenus o mihi culta vale Dea : & hac tua multi
 Instrumenta tibi plena laboris habe ;
 Jam tua perpeffam dudum mala , lenis habebit ,
 Adjungetque suo me Cytherea choro .
 Nec mirum , quam prætulerit Phryx arbiter : a me
 Si prælata tibi nunc quoque Cypris erit .

DUM furit Alcippes formosa Nonacrius Almo :
 Crudeli demum tabe peresus obit .
 Almo capripedi non impar arundine Pani ,
 Quo nullus nymphis gratior Arcas erat .
 Spargite odorato pastores flore sepulcrum :
 Et simul infusum lacque merumque fluat .
 Non jacet ille sub hac (ut vos male creditis) ulmo :
 In nemus Idalium transtulit alma Venus .
 Hic Veneris pascitque greges , cantatque , canentis
 Una astant Charites versibus : astat Amor .
 Quin etiam hunc Paphii Nymphæ non ultima coetus
 Doperit : & parilis fervor utrumque tenet .

Nimirum felix Almo : modo perfida virgo
 Aspera sævitizæ det documenta suæ .
 Pastoris pereat succensa informis amore ;
 Respuat assiduas surdior ille preces .
 Præbeat hinc sævis tam dura exempla puellis ;
 Formosa ut fastus discat habere modum .

A C O N .

Candida nympha olim , & Pani dilecta Lycæo ,
 Crinibus , & culto conspicienda sinu :
 Nunc vox , flebilibus quæ semper mœsta querelis
 Desertos scopulos , deviaque antra colis :
 Salve Echo officiosa , tibi sub rupe cayata
 Ipse ego lanigeri ductor Acon pecoris
 Constituam umbrosum frondenti ex ilice lucum ;
 Molliæque ex hedera ferta virente feram .
 Tu levibus allecta modis silvestris avenæ
 Excipis e summo carmina nostra iugo :
 Tu quoties querimur , duos miserata dolores
 Nescio quid tristi flebile voce gemis .
 Nec mirum , quod tu lacrimis movearis amantum ;
 Perdidit , infelix , te quoque durus Amor .
 Ah misera , ipsa quidem & strophio subnectis olenti ,
 Et longa molles excolis arte comas .
 Ipse puer cultus , ipse omnes odit amores ;
 Insequiturque vagas per iuga summa feras .
 Quia humiles addis voces , & verba precantis
 Effugit , atque omnes negligit ille preces .
 Siste gradum , immitis , non te violenta læna ,
 Non curvo sequitur dente timendus aper ;
 Sed quæ candenti facie , niveisque papillis
 Vel magno possit Nympha placere Jovi .
 Hæc agit & celeres tecum per saxa lacœnas ,
 Æque suis tendet retia rara plagis .
 Siste gradum , immitis , & quas nunc tendis ad undas ,
 Effuge ; caussa tuæ fons erit ille necis .
 Heu miserande puer , tales ten' solvere pœnas ?
 Ten' decuit tam crudelia fata pati ?
 Magna parens , quæ cuncta leves producis in auras ,
 Totaque diverso germine picta nites ;
 Quæ passim arboribus , passim surgentibus herbis
 Sufficis omnifero larga alimenta sinu ;
 Excipe languentem puerum , moribundaque membra ,
 Æternumque tua fac Dea vivat ope ;
 Vivet , & illa vetus zephyro redeunte quotannis
 In niveo candor flore perennis erit .
 Tu mecum socias Echo conjunge querelas .

Et

Et percussa novis fletibus antra sonent.
 Crudelis Telayra, meos quid spernis amores,
 Quid miseræ surda despicias aure preces?
 Hei mihi nulla ovium tangit me cura mearum,
 Ex quo me iste tuus perfida torret amor.
 It miserum pecus, & feri sub vespere umbras
 Per se ipsi redeunt in sua testæ greges.
 Nec mihi jam niveo complent mûstralia lacte;
 Denſaque promiſſo vellere terga gerunt.
 Quia etiam aucupii ſtudio, quo clarus habebam
 Languenti penitus excidit ex animo.
 Ite leves paſſim ſilvis impune volucres,
 Cuncta novus noſtra e mente fugavit amor.
 Ocia agunt pedicæ, & lento lita vimina viſco
 In tenebris amites, nexaque lina jacent.

D A M O N.

VOS mecum e vitreis nymphæ Naucelides antris,
 Vos mecum viridi paulum conſedite in herba:
 Atque hoc, quem canimus, dignum concedite carmen.
 Sic vobis patrias circum vernantia ripas
 Prata, neque hybernis nivibus viduata neque æſtu,
 Sufficiant varios in ſerta nitentia flores.
 Quis dolor o ſilvæ, quæ vos o prata tenebat
 Mœſtities? quanto ſqualebant omnia luſtu?
 Cum ſeris & gelidis deſcenderet alpiſbus hoſtis
 Aſſidue, & latias in prædam verteret oras:
 Tum (reor) invita creverunt pabula terra:
 Invitæ e denſis ceciderunt frondibus umbræ.
 Quippe abigi raptas pecudes, paſſimque videbant
 Paſtorum rapidos teſtis involvier ignes.
 Ipſi etiam hircipedes fauni, ſatyrique bicornes,
 Ipſæ etiam in ſolos nymphæ fugere reſceſſus:
 Et ſeſe ignotis occultavere latebris.
 Et furor is fines prope jam pervaserat omnes,
 Jamque fugæ deerat nobis locus: undique ſævos
 Cernere erat latis hoſtes diſcurrere campis.
 Nulla uſquam tam ſecretis luſtra abdita ſilvis,
 Nulla aditu eſt tam difficili, tamque invia rupes,
 Quo non ſæpe greges ſubitis incurſibus acti
 Feſſa reclinarint in nudo corpora ſaxo.
 Et tamen hinc etiam crebri ejecere tumultus:
 Inſuetæque maris pecudes (miſerabile viſu)
 Qua pelagi mediis iter intercluditur undis,
 Adriacos videre ſinus: & litore curvo,
 Pro viridi cytiſo, pro molli graminis herba,
 Et ſpinis paliuri, & acuta carice paſta

Pota-

Potarunt falfas nitidis pro fontibus undas :
 Et fæpe irati timuerunt mœurmura ponti .
 Quod fi non novus ex alto demiffus Olympo
 Hanc cladem noftris Dens avertiffet ab oris ,
 Aufoniis effet nullus jam paffor in agris .
 Nos miferi patria extorres , rerum omnium egeni ,
 Ah dolor , externas longe erraremus ad urbes .
 Hic nobis dulces faltus , hic pascuâ nota
 Reffituit : tutique , inquit , jam pascite taurros :
 Jam folitas tuti collo fuspendite avenas :
 Et defueta diu refponfent carmina colles .
 Ergo omnes , veluti & Phœbo , Panique quotannis
 Paffores certis ftatnent tibi fâcra diebus ,
 Magne pater , noftrifque diu cantabere filvis .
 Te rupes , te fâxa , cavæ te maxime Juli
 Convalles , nemorumque frequens iterabit imago .
 At vero noftris quæcumque in faltibus ufquam
 Quercus erit : ut quæque fuos dant tempora flores :
 Semper erit variis ramos innexa coronis ,
 Inſcriptumque geret felici nomine truncum .
 Tum quoties paſtum expellet , paſtaſve reducet
 Noſtrum aliquis pecudes : toties id mente revolvens
 Ut liceat factum eſſe tuo , pater optime , duſtu ,
 Nullus erit , qui non libet tibi lacte recenti ,
 Nullus erit qui non teneros tibi nutriat agnos .
 Quin audire preces niſi dedignabere agreſtes ,
 Tu noſtra ante Deos in vota vocaberis omnes .
 Ipſe ego bina tibi ſolemni altaria ritu ,
 Et geminos ſâcra e quercu , lauroque virenti
 Vicino lucos Nauceli in litore ponam .
 Hic ripa paſſim in molli viridante ſub umbra
 Vere novo , dum floret ager , dum germinat arbos :
 Dam vario reſonant volucrum nemora avia cantu ,
 Annua conſtituam feſtis convivia ludis :
 Duſtores pecudum hic omnes , rurifque coloni
 Contendent jaculo , & rapidi certamine curſus ,
 Horridaque agreſti nudabunt membra palæſtra .
 Ipſe pecu , & tenero viſtor donabitur hædo .
 Præterea dulci cantabit arundine Damon
 Carmina , quæ puerum docuit Sebethius Œgon :
 Olim cum procul hinc illis habitaret in oris .
 Scilicet ut quondam Aſſyrii paſtoris amore
 Capta dea & cælum , & fulgentia ſidera linquens
 Omnibus his cari præferret Adonidis ignes .
 Fortunate puer tecum formoſa Dione ,
 Una tondet oves , una ad mulætralia ducit ,
 Atque immunda premit cæleſtibus ubera palmis :
 Dum te complexu teneat , non illa recuſat ,
Tecum

Tecum inter pecudes vili requiescere culmo :
 At Mars ipse Deæ cura tabescit inani .
 Fortunatè puer , mediis pecus errat in agris ;
 Tu viridi dejectus in umbra aut carmina cantas ,
 Aut posita in Veneris gremio cervice recumbis :
 Illa tibi amplexus molles , illa oscula jungit :
 Caraque odoratis exornat tempora fertis .
 Sed tu nimirum , sed felix tu quoque Damon ,
 Cui licuit toties Ægonem audire canentem ,
 Divinique senis sacros ediscere cantus .
 Quod mihi , magne pater divum , si fata dedissent ,
 O quales tibi cantaret mea fistula laudes .
 Et quodcumque tamen felix concedet Apollo ,
 Hoc te unum canet , hoc uni tibi serviet omne .
 Nec quicquam magis optarim , quam digna triumphis
 Posse tuis : videorque canens tua maxima facta ,
 Inferior nullo , non ipso Ægone futurus .
 Ipse suo certet mecum si carmine Daphnis ,
 Ipse suo Daphnis cum carmine victus abibit .
 Interea agrestis dignatus sibila cannæ
 Dexter ades nobis ; & quæ facis , ocia serva .

FLorentes dum forte vagans mea Hyella per hortes
 Texit odoratis lilia cana rosis :
 Ecce rosas inter latitantem invenit Amorem ;
 Et simul annexis floribus implicuit .
 Lustratur primo : & contra nitentibus alis
 Indomitus tentat solvere vincla puer ;
 Mox ubi læticolæ , & dignas matre papillas
 Vidit , & ora ipsos nata movere Deos ;
 Impositosque comæ ambrosios ut sensit odores :
 Quosque legit diti melle beatus Arabs ;
 I , dixit , mea quære novum tibi mater Amorem ,
 Imperio sedes hæc erit apta meo .

NOX bona , quæ tacitis terras amplexa tenebris
 Dulcia jucundæ furta regis Veneris .
 Dum propero in caræ amplexus , & mollia Hyellæ
 Oscula : tu nostræ sis comes una viæ .
 Neque aliquis nostros possit deprendere amores ,
 Aera coge atras densius in nebulas .
 Gaudia qui credit cuiquam sua , dignus , ut unquam
 Dicier illius nulla puella velit .
 Non sola occultanda cavis sunt orgia cistis :
 Solave Eleusinæ sacra silenda Deæ .
 Ipse etiam sua celari vult furta Cupido :
 Sæpius & poenas garrula lingua dedit .
 Una meos , quos & miserata est , noyit amores

Officiis nutrix cognita fida suis :

Hæc quæ me foribus vigilans exspectat in ipsis ,

Inque sinum dominæ sedula ducit anus .

Hanc præter , tu sancta , latent qua cuncta , silentque ,

Tu Dea sis flammæ conscia sola meæ :

Quæque libens astat nostrorum testis amorum

Nobiscum tota nocte lucerna vigil .

Oppositæ obstabant nostris prius auctibus ædes :

Nec nos cælum ulla , Solve iuvabat ope :

Disiectis herus his Solemque admisit , & aura

Concessit nobis liberiore frui :

Hinc nos in tenues certatim tollimur auras :

Ornamurque novæ frondis honore caput .

At tibi , cui sacris musarum & Apollinis umbris

Exstructas libuit posthabuisse domos :

Perpetuo similes nostris sint frondibus anni :

Nobiscum augeant & tibi cuncta bona .

QUEM toties vixisse anima redeunte renatum

Mutato fama est corpore Pythagoram :

Cerne iterum ut dosi cælo generatus Asylæ

Vivat , ut antiquum servet in ore decus .

Dignum aliquid certe voluit : sic fronte severa est :

Sic in se magno pectore totus abit .

Possent & ille altos animi depromere sensus :

Sed veteri obstrictus religione , silet .

TAM tristi canos glacie concreta capillos

Afflatu tepidi fugit hyems zephyri .

Jam nitidum os Ver molle auras in haminis audet

Proferre , & teneros ferre per arva pedes :

Tempora diversis tollens halantia fertis

Purpureo matris Chloridos e gremio ,

Summittit varios tellus sæcunda colores :

Convertit molles quo puer ipse gradus ,

Et passim , quacumque vagos deflectit ocellos ,

Diffugiunt toto nubila cuncta polo .

It prope , & incutiens blandas in pectore flammæ ,

Omnia iucundo accendit amore Venus ,

Quam circum vario texunt e flore coronas

Perfusa Aslyrio rore comam Charites .

Hinc atque hinc mille aligeri pueri assultantes

Conjiciunt certa spicula acuta manu .

Concipiunt dulces animalia cuncta calores ;

Perfultantque vagi pabula læta greges :

Ipse suam de colle canens Amaryllida pastor

Pascentes tenui crimine mulcet oves ;

Fracast. Carm.

Q

Per-

Percussæque nova dulcedine corda volucres
 Dant lætos passim per nemora alta sonos .
 Sola gemit , ramoque sedens miserabilis alto
 Absumptum mater Thracia plorat Itym .
 Di bene , quod nostræ tam longe a finibus ora
 Exactum hoc dira est in regione scelus .
 Heu puer infelix , matri dum brachia tendit
 Assueto cupiens se implicuisse sinu ;
 Illa ferox animi , cæcoque agitata furore
 Avulsum duro ditipit ense caput .
 Quid facis ah demens ? ferro quem perdis iniquo ,
 Is lac dulce tuis hausit ab uberibus .
 Huic tu longinquam votis optare senectam ,
 Huic solita es teneras dicere blanditias .
 Heu miserum genitor nati , infelixque sepulcrum ,
 Ut tibi tunc toto pectore sensus abit :
 Infandæ nosti cum conjugis impia facta ,
 Atque epulas mensis tristibus appositas :
 Nempe furis ; stridoque ruis violentior ense .
 Sed sublata alis effugit illa novis .
 Perpetuum flet , ut meritâ est ; longisque querelis
 Antiqui poenas persolvat sceleris .
 Nos , Turri , dum florifero Vere omnia rident ,
 Spirat & e summis gratior aura jugis :
 Nos hic , qua nitida pellucens rivulus unda
 Labitur , & levi murmure dulçe sonat :
 Cantemus molles formosæ Amathusidos ignes ,
 Quidque ferox arcu , quid face possit Amor .
 Armenias domat hic tigres , sævasque lænas ;
 Eripit hic summo , cum libet , arma Jovi .
 Hoc duce pallentes umbras Œagrius Orpheus ,
 Tristiaque horrendi limina regis adit ;
 Nec timuit , sævæve Hecates immania monstra ,
 Armatasve atris Eumenidas facibus .
 Hoc cogente , omni cum pectore consègnatus
 Abrupto nollet vivere conjugio :
 Paullatim Eurydices , veterumque oblitus amorum
 In Calain tota mente Boreiadem
 Exarsit , penitusque insano perditus igne
 Sensit ferventes intima ad ossa faces .
 Formosæ o Calai pulchræ genus Orythiæ
 Te virides silvæ , te cava faxa sonant .
 In te suspirat , solum te cogitat Orpheus :
 Per te sollicito nulla quies animo est .

DUM te blanda tenent æstivas rura per umbras ,
 Delitiis nigrum rura beata tuis :
 Ecqua tui mea lux tangit te cura poetæ ,

An meus e toto pectore cessit amor ?
 Cessit amor certe : soliti cessere calores ,
 Absentis meminit nulla puella viri :
 Non ita concussa versantur in arbore frondes ,
 Cum gravis adversum verberat aura nemus :
 Quam facile instabilem permutat foemina mentem ,
 Exclusus queritur , qui modo carus erat .
 Non sic Penelope ; non sic Capneja conjux
 Antiqui meruit temporis esse decus .
 Altera defuncti mœrens ad busta mariti ,
 Noluit abrepto vivere sola viro .
 Altera bis denos potuit durare per annos ,
 Dum cupidos cauta detinet arte procos .
 Foemina nunc varias tantum connectere fraudes
 Novit , & in nulla certa manere fide .
 Quid queror hæc demens ? duræ procul ite querelæ :
 Ite , decent tristes tristia verba viros .
 Lætus ego ; hos neque enim sequitur mea Gellia mores ,
 Mutare incertos nec solet illa toros ,
 Quin & mansit amor , soliti mansere calores ,
 Absentis meminit nostra puella viri .
 Multa tamen timeo ; tu multa ignosce timenti :
 Hei mihi ! pars nostro nulla timore vacat .
 Ah quoties vereor , dum piæta per arva vagaris ,
 Dum rutilæ tæxis florida ferta comæ ;
 Ne ruat e summis in te Saturnius astris ,
 Sive alii cuivis grata rapina Deo .
 Pressit Amimonem mediis Neptunus in arvis ,
 Dum premeret summum virginis urnæ caput .
 In mediis lo campis perpeffa Tonantem est ,
 Horridaque hirsuta cornua fronte tulit .
 Hinc quoque tartareo raptam Deoida curru
 Abstulit infernus in sua regna pater .
 Sidonis errabat nitidos Europa per agros ,
 Cum medium fisto per mare vèsta bove est .
 Non tamen hos tantum causantur prata timores :
 Hei mihi quam multos dat quoque silva metus .
 Hic habitant satyrique , & agrestia numina Panes ,
 Et timor errantum Faunus Hamadryadum .
 Hic versa in virides Daphne Penceja frondes ;
 Hic fera mutato Parrhasis ore fuit .
 Hic & semicaper spreta Nonacrius Ægla
 Arcadicæ forma virginis incaluit .
 Quod si tecum iisdem pariter versarer in arvis ,
 Et domus nnanimes clauderet una duos :
 Non ego cælicolùm fraudes , non furta timerem ;
 Undique me socio Gellia tuta fores .
 Si versa est Daphne ; Sicala Proserpina ab Ætna

Si vesta est Stygiis in nova regna rotis ;
 Quid mirum ? facile est deceptas fraude puellas
 Fallere , nullius quas tucatur Amor .
 Ipse ego perpetuo tecum mea vita manerem ;
 Sic possem nullos extinuisse Deos .
 Sæpe pererrabat tacitos Atalanta recessus ;
 Tuta tamen fido Mimalione fuit .
 Cingeret obsessos seu curva indagine colles ;
 Seu cuperet sævas cominus ire feras ;
 Hærebat lateri semper comes ille ; nec unquam
 A domina lato longius ungue fuit .
 Ergo huic non summi fraudes nocuere Tonantis :
 Inque suo nullos sensit amorē dolos .
 Sic ego per silvas tecum , & per prata vagarer :
 Grata essent sine te gaudia nulla mihi :
 Nunc pariter nitida recubare iuaret in umbra ;
 Et capere in viridi somnia grata toro :
 Nunc pariter nuda fontes invadere fura ;
 Torrida dum siccus finderet arva canis .
 Sæpius in silvis lepores captare fugaces :
 Et volucres fiftis fallere carminibus .
 Sæpius in denso convivia ducere luco ;
 Et niadidas verno flore ligare comas .
 Sæpius umbroso choreas ductare sub antro ,
 Cum daret agrestres tibia pulsa sonos ,
 Ah quoties tales inter mea Gellia lusus
 Injicerem cupidas in tua colla manus ;
 Dulciæque e roseis furarer basia labris ,
 Basia mi cunctis anteferenda bonis .
 O niveam , si qua hæc referet mihi gaudia , lucem :
 Grator optatis non erit ulla meis :
 Semper Erythræis signabitur illa lapillis :
 Semper erit sacros inter habenda dies .
 Nunc , quoniam tecum me non licet esse , caveto
 Mutuus extincto ne cadat igne calor .

J O L A S .

Pascite , oves , teneras herbas per pabula læta ,
 Pascite ; nec plenis ignavæ parcite campis :
 Quantum vos tota minuētis luce , refectam
 Fœcundo tantum per noctem rore resurget :
 Hinc dulci distenta tumescēt ubera lacte ,
 Sufficientque simul fiscellæ , & mollibus agnis ,
 Tu vero vigil , atque canum fortissime Teucon ,
 Dum pascent illæ late per prata , luporum
 Incurfus subitos , sævasque averte rapinas .
 Interea hic ego muscoso prostratus in antro ,

Ipse

Ipse meos solus mecum meditabor amores ,
 Atque animi curas dulci solabor avena .
 O formosa Amarylli , nihil te absente videtur
 Dulce mihi ; nunc & nitido vere omnia rident :
 Et vario resonant volucrum nemora avia cantu .
 Exultim virides ludunt armenta per herbas ;
 Lascivique agni , infirmisque artubus hædi
 Cornigeras matres per florida prata sequuntur .
 Non tamen ista magis sine te mihi læta videntur ,
 Quam si tristis hyems , nimbisque rigentibus horrens
 Agglomeret gelido cañas aquilone pruinas .
 Dulce apibus flores , rivi sitientibus herbis ,
 Gramen ovi , capræ cytisus , Amaryllis Iolæ .
 Non ego opes mihi , non cursu prævertere ventos
 Optarim magis , aut pecoris quodcumque per orbem est ,
 Quam te Amarylli meis vinctam retinere lacertis ;
 Et tecum has inter vitam deducere silvas .
 Est mihi præruptis ingens sub rupibus antrum ,
 Quod croceis hederæ circum sparsere corymbis ,
 Vestibulumque ipsum silvestris obumbrat oliva :
 Hanc prope fons ; lapide effusus qui defilit alto ,
 Desertur rauco per levia saxa susurro ;
 Hinc late licet immensi vasta æquora prænti
 Despicere , & longe venientes cernere fluctus .
 Hoc mecum simul incoleres Amarylli ; simulque
 Mecum ageres primo pecudes in pascua sole ;
 Mecum abeunte die pecudes cava in antra vocares .
 Sæpe etiam denso in nemore , aut convalle virenti ,
 Dum tenuæ arguta modularer arundine carmen ,
 Tu mecum ipsa esses simul , astaresque canenti :
 Quin & nunc pariter caneres : nunc dulcia nostro
 Bassique , & Veneris misceres gaudia cantu .
 O solum hoc superi misero concedite amanti ;
 Tum licet & rapiantur oves , rapiantur & agni ,
 Ipse tamen Cræso mihi ditior esse videbor .
 Mollibus in pratis Lycidæ post Daphnidis hortos ,
 Purpureos flores texenda in ferta legebas ,
 Cum te succincta tunica , fasisque capillis
 Et vidi simul , & totis simul ossibus arsi .
 Pone sequebatur Gorge soror , & tamen audax
 Accessi ; sumque ipse meos tibi fassus amores .
 Risisti , & sertum , nitida quod fronte gerebas ,
 Tamquam ex se cecidisset humi , jecisti , abiensque
 Liquisti , advertens collegi protinus ipse ;
 Servavique & adhuc tamquam tua munera servo .
 Et quamvis dudum foliis languentibus aret ,
 Non tamen est ferta quicquam mihi carius illo .
 Ex illo , semperque sui tibi deditus uni ,

Pulchraque nulla meis oculis te præter habetur.
 Sæpe mihi Alcippe vicina & munera misit :
 Et dixit, formosæ puer, quæ munera mittit,
 Mittit & ipsum animum : tu & munera suscipe,
 & illum.

Sed potius, Amarylli, alio quam tangar amore,
 Sudabunt humiles flaventia mella genistæ ;
 Et molles violæ dura nascentur in orno,
 Incultique ferent candentia lilia vepres,
 Et moestis ululæ ceder philomela querelis :
 Quantum ver formosum hyemæ est jucundius atra,
 Quantum mite pirum sorbis est dulcius ipsis,
 Quantum hirsuta capella suo fetosior hædo,
 Quantum nocturnis obscuri vesperis umbris
 Puniceo exurgens aurora nitentior ortu est ;
 Tantum Amarylli aliis mihi carior ipsa puellis .
 Hæ testes mihi sunt silvæ, vicinaque silvis
 Populus hæc : cujus tale est in cortice carmen :
 VELLERA cum fetis aries mutarit, & hircus
 Velleribus setas ; Amaryllida linquet Iolas .
 Sed nos dum longum canimus, jam roscida Luna
 Apparet cælo ; & rapidus deferbuit ardor .
 Demerso jam Sole, tamen miser ardet Iolas .
 Nimirum nostros nequeunt lenire calores,
 Nec quæcumque rigent Rhyphæo in monte pruinæ,
 Nec quæcumque simul gelido durantur in Hebro :
 Fors tamen hos illa ipsa : potest quæ sola, levabit
 Sperando interea duos solabimur ignes .
 At vos, ne sero dum nox insurgit Olympo,
 Præsidio umbrarum fretus malus ingruat hostis,
 Jam passi secura greges in ovilia abite .

Quam tibi nunc Jani donamus Hyella calendis,
 Exprimit hæc vultus parva tabella meos ;
 Nulla fuit cuiquam similis mage, pallet imago,
 Assiduus nostro pallor in ore sedet .
 Est excors, sine corde & ego, quod pectore nostro
 Ipse amor ereptum sub tua jura dedit .
 Non loquitur, mihi sic tua cum datur ora tueri,
 Torpet nescio quo lingua retenta metu .
 Unum dissimile est nobis ; felicior uno est ;
 Tam sæva quod non uritur illa face .
 Quod si etiam uretur, tuo enim sub lumine quicquam
 Illæsum flammis non licet ire tuis ;
 Non ut ego assiduo infelix torrebatur igne :
 In cinerem primo corruet illa foco .

BEate somne, nocte qui hesternā mihi
 Tot attulisti gaudia;
 Utinam deorum rector ille cœlitum
 Te e cœtu eorum miserit,
 Quæ sæpius mortalibus vera assolent
 Mitti futuri nuntia.
 Tu, quæ furenti sardior freto meas
 Superba contemnit preces,
 Facilem Nearam præbuiſti; quin mihi
 Mille obtulit sponte oscula;
 Oscula, quæ Hymeti dulciora sint favis,
 Quæ suaviora nectare.
 Vere beate somne, quod si sæpius
 His; Dive, me afficias bonis,
 Felicior cœlestibus Deis ero,
 Summo nec inferior Jove.
 At tu proterva quo libet fuge, eripe
 Complexibus te te meis:
 Si somnus iste me frequens reviserit,
 Tenebo te, invitam licet.
 Quin dura sis, sis quamlibet ferox; eris
 Et mitis, & facilis tamen.

CANALE optime, tuque Bembe, nostri
 Amantissimi utrique, amati utrique
 A me non minus atque utrique ocelli,
 Quid rerum geritis? valetis? atque
 Absentis memores sodalis estis?
 Quid vestræ faciunt bonæ Camœnæ?
 Scripserunt ne aliquid novi meum post
 Discessum? puto namque quicquid oci
 Per vestras datur occupationes,
 Id vos in studiis bonis locatur.
 Ad me mittite si quid edidistis,
 Oro; nec socium bonum negate
 Vestri participem leporis esse.
 Sed qui cum Venere ipsa, amoribusque
 Quam vobis bene convenit? caletis?
 Amatistne? Dei, Deæque faxint
 Et feliciter, & bene ipsi ametis:
 Quamque ego leviusque, leniusque.
 Heu heu me miserum mei sodales
 Quam sævo teneor furore: quam mi
 Totus quam gravius incubat Cupido.
 Non quod non amor: intimis medullis
 Ardet mea Hyella, perditæque
 Quantum quid pote perditissimum esse:

Verum hoc me excruciat magis : potiri
 Mea nam veritum mihi puella .
 Quod si quando licet , nihil levatur ,
 Sed ferus magis excitatur ardor .
 Nam cum nec saturum recedat inde
 Cor mi : nec furor expleatur umquam
 Caris basiolis , papillulisque ,
 Atque his , qui miserum necant , ocellis ;
 Angescit magis , & magis , quid heu heu
 Adverso paterer Deo , atque iniquo :
 Si hæc incommoda sunt secundo amore ?

QUamvis te peream æque Hyella totam :
 Nec pars sit mea lux tui ulla , quæ me
 Sævo non penitus perurat igne :
 Fulgentes tamen illi , amabilesque
 Illi , sideribus pares ocelli
 Nostri maxima causa sunt furoris .
 O cari nimis , o benigni ocelli ,
 O dolci mihi melle dulciores ,
 Quando vos misero mihi licebit
 Usque ad millia millies trecenti ,
 Aut ultra hæc etiam , suaviari ?
 Dî concedite mi hoc misello amanti :
 Dein nil grave perpeti recusor :
 Quin & si peream , lubens peribo .

Dispeream nisi tu vita mihi carior ipsa ,
 Atque anima , atque oculis es mea Hyella meis .
 Dispeream nisi ego vita tibi carior ipsa ,
 Atque anima , atque oculis sum mea Hyella tuis .
 Nec satis hoc : vellem pote quicquam his esset haberi
 Carius , ut posses carior esse mihi .
 Tu quoque idem velles , pote quicquam his esset haberi
 Carius , ut possem carior esse tibi .
 Dî facite , hæc longos concordia duret in annos ,
 Tamque bonos mutent sæcula nullam animos .

TAM cæli referat fores
 Aurato e thalamo exiens
 Mater Memnonis , & diem
 Læto provocat ore .
 Nos te maxime maximi
 Minister canimus patris :
 Quo nullus qui hominum genus
 Tam præfons juvet , usquam est .
 Tu nostras celer ad preces ,
 Aures protinus ad Deum has

Defers : nec tenues finis
Evanescere in auras .

Tu , dum fers nova nuntia
Virgini ætherio patri
Dilectæ , quibus indicas
Magni vota Tonantis :
Nobis fers nova nuntia :
Queis e faucibus impii
Erepti hostis , in aurea
Cæli templa vocamur .
Adsis o bone : & in dies
Semper nos propius juva :
Nec patrocínio tuo
Umquam mitte tueri .

URbs , quam vetusto vœsus ab Illo
Post fata Troum tristitia , post graves
Tot patriæ exhaustos iniquo
Tempore , tot pelago labores ,
Ducente demum Pallade , qua rapax
Cultos per agros Medoacus fuit ,
Diis fretus Antenor secundis
Condedit , Euganeis in oris .
Tu nuper & flos , & decus urbium ,
Quascunque tellus Itala continet :
Maguas tot artes , tot virorum
Ingenia , & studia una alebas .
Te septicornis Danubii accola ,
Te sulva potant flumina qui Tagi ,
Longeque semoti Britanni
Cultum animi ad capiendum adibant .
At nunc , acerbi heu sæva necessitas
Fati , severas ut pateris vices :
Ut te ipse vastatam vel hosti
Conspicio miserandam iniquo .
Quid culta tot pomaria conquerar ?
Tot pulchra flammis hausta suburbia ?
Quid glande deturbata athena
Mœnia ? præcipitemque sævi
Mavortis iram , bellaque persequar
Horrenda ? squammis ille adamantinis ,
Ferroque confertam rigenti
Induerat chlamydem trilecem :
Fremensque , & atrum letifera manu
Telum coruscans secum odia , & necis
Contemptum , & insanos tumultus ,
Secum animos , rabiemque agebat .

Q 5

Ille

Ille urbe ab imis sedibus eruta
 Impleffet omnes funeribus domos :
 Non ille vel sexu , vel ullo
 Efferus abstinnisset ævo .

QUI modo ingentes animo parabam ,
 Bembe , bellorum strepitusque , & arma
 Scribere , hoc vix exiguo male audax
 Carmine serpo .

Nempe Amor magnos violentus ausus
 Fregit iratus : velut hic Tonantem
 Cogit & fulmen trifidum rubenti
 ponere dextra .

Sic eat , fors & sua laus sequetur
 Candidæ vultus Lalages canentem , &
 Purius claro radiantis astro
 frontis honores .

Nota Lesbæ lyra blanda Sapphus ;
 Notus Alcæi Lycus , altiori
 Scripserit quamvis animosum Homerus
 pestine Achillem .

DIA Tithoni senioris uxor ,
 Quæ diem vultu radiante pandis ,
 Cum genas effers roseas rubenti
 prævia Soli .

Roscidos ut nunc per agros vagari
 Sub tuo adventu iuvat , & recentes ,
 Quæ tuos semper comitantur axes ,
 excipere auras .

Sicca jam sævus calor uret arva ,
 Jam vagi aurarum levium fiescent
 spiritus , jam Sol rapidus furentes
 exeret ignes .

Dum licet , læti simul ite amantes ,
 Cum licet , molles pariter puellæ
 Ite , flaventes vario capillos
 nescite ferto .

Nunc simul telis positis amores
 Matris hærentes lateri , & decentes
 Gratæ plenos referant refecto
 flore quasillos .

Per feros saltus , per iniqua lustra
 Undique occultas agitans latebras
 Fertur , & silvas varia ferarum
 strage cruentat

Clara Latonæ soboles , nitenti
 Huic comæ in nodum religantur auro ,

Pendet aurata ex humeris pharetra ,
pendet & arcus .

Circum eunt nymphæ simul , illa cursu
Gaudet effusos agitare cervos ,
Hanc juvat certis jaculis fugaces
figere lyucas .

Nunc ab umbroso simul æsculeto
Daulias late queritur , querclas
Consonum circa nemus , & jocosa
reddit imago .

NIL tecum mihi jam Phœbe est , nil Nox mihi
tecum ,

A vobis non est noxve , diesve mihi .

Quantum ad me , ut libet auricommo Sol igneus axe
Exeat Eoæ Tethyos e gremio ,

Ut libet , inducat tacitas Nox atra tenebras :
Fert mihi noctem oculis , fert mihi Hyella diem .

Nam quoties a me nitidos avertit ocellos ,
Ipsa in luce etiam nox tenebrosa premit .

At quoties in me nitidos convertit ocellos ,
Candida & in media sit mihi nocte dies .

Diva , quæ has cæli generatim in auras
Cuncta producis , cupidumque amorem
Undique infundens facis , ut perenne
sæcla propagent :

Qua nihil lætum sine , amabile est nil ,
Nilque jucundum , sine qua nec ipsæ
Gratæ erunt cuiquam Charites , nec ipsa
blanda voluptas :

Dum tibi lætus reparatur orbis ,
Dum per herbosos pecus omne campos
Vim tuam sentit , tibi plaudit omnis
Diva volucris :

Dum nihil , quamvis rigidum , feroxque est ,
Offibus quod non penitus sub imis
Sit tua tactum face , quod tuos non
sentiât ignes .

Una erit flammæ , & amoris expers ?
Una secura his Lalage resistet ?
Tange age ultrici Dea , pertinacem
tange flagello .

Quod si ita tanges , fera ut obstinatum
Applicet nostris animum querelis ,
Nec preces ultra miseras , superba
negligat aure .

Conferam lætam tibi Diva myrtum ,

Vancius qua se rosifer revolvit,
Hanc mero supplex, niveo & rigabo
lacte quot annis.

Hanc & immistæ pueris puellæ
Circum agent lætas pariter choreas:
Teque prima unani, simul ultima unam
voce canent te.

Te canent unam, volucremque natum,
Qui ferox, duro & similis parenti,
Acer & flamma est, & agente certum
cuspide vulnus.

Spargam odoratas violas, rosasque
Ipse ego votique reus secabo
Grata torquata ante tuas columbæ
guttura flammæ.

QUID magis adversum bello est? bellicque tumultu
Quam Venus? ad teneros aptior illa jocos:
Et tamen armatam hanc magni pinxere Lacones,
Imbellicque data est bellica parma Deæ.
Quippe erat id signum forti Lacedæmone natum
Sæpe & fæmineum bella decere genus.
Sic quoque non quod sim pugna versatus in ulla,
Hæc humeris pictor induit arma meis.
Verum hoc quod bello, hoc patriæ quod tempore
iniquo
Ferre vel imbellem quemlibet arma decet.

Borgetus lepidus catellus ille,
Cujus blanditias proterviores,
Et lusus herus ipse tantum amabat,
Quantum tale aliquid potest amari.
Nec mirum, dominum suum ipse norat,
Caram bimam velut puella matrem,
Et nunc illius in sinu latebat,
Nunc blande affliebat huc & illuc
Ludens, atque avido appetebat ore,
Erectis modo cruribus, bipesque,
Mensæ astabat herili: heroque ab ipso
Latratu tenero cibum petebat.
Nunc raptus rapido, maloque fato
Ad manes abiit tenebricosos;
Mifelle o canis, o miser catelle
Nigras parvulus ut timebis umbras:
Ut sæpe & dominum tuum requires;
Cui pro delitiis, jocisque longum
Heu desiderium tui relinquis.

VOS mihi nunc magnos partus , ortusque beatos
 Felicis pueri , quo pingua culta vetusti
 Naonis exultant , quo Carneâ tota superbit ,
 Dicite Pierides , vos illum e matre cadentem
 Excepistis sinu : & vestris fovistis in ulnis ,
 Et teneram molli cinxistis baccare frontem .
 Nec vero vos tantum has accessistis ad oras ,
 Nec solæ venistis ad hæc vos munera Musæ ,
 Affuit ipsa etiam pariter , spargensque salubres
 Pyxidos arcanae succos , partusque dolores
 Leniit , & matrem foetu Lucina levavit :
 Affuit Idalio veniens e colle Dione ,
 Nestare odorato crines persusa fluentes ,
 Assuetæque leves Charites dustare choreas .
 Hæ simul ambrosia puerum lavere liquenti ,
 Et parvas tenui cunas stravere ligustro .
 Venit & undis suis properans Naucelus ab antris ,
 Quem prope cærulæo e fluctu formosa Metune
 Ibat , eos circum violasque rosasque rubentes
 Vimineis nymphae calathis & ferta ferebant
 Purpureo e narcisso , eque auricomis chrysantho .
 Quæ postquam totas passim sparsere per ædes ,
 Jucundoque domus late fragravit odore ,
 Protinus ecce Jovis magni de limine Parcæ ,
 Antiquæ Parcæ , niveo queis corpora amictu ,
 Canaque Chaonia velantur tempora quercu .
 Hæ postquam & matrem complexa , & fronte serena
 Oscula junxerunt parvo felicia nato ,
 Candida versato torquentes vellera fuso ,
 Fatidico tales fuderunt pectore voces .
 O fausto nimium cælo , Divisque benignis ,
 Nate puer , cresce , & dulces solare parentes ,
 Et satis lætare tuis , tuque optima mater ,
 Tuque boni genitor pueri , quos omine dextro
 Castus hymen quondam thalamo sociavit in uno ,
 Accipite hæc lætis animis , neu posse moveri
 Credite , quæ vero concordēs ore canemus .
 Qualis in aprico se tollit amaracus horto ,
 Quam studio solers omni formosa puella
 Ipsa suos alit in lusus , & lenibus undis
 Irrigat : illa leves paulatim surgit in auras
 Pulchrior , & dulcem late diffundit odorem .
 Sic puer augefcens primo se tollet in ævo ,
 Nec se quisquam illi formoso conferet ore .
 Mox ubi jam validus teneris excesserit annis ,
 Tunc illum sacras artes , doctæque docebunt
 Aonides , princepsque chori formosus Apollo ,

SAlve , cura deum , mundi felicior ora ,
Formosæ Veneris dulces salvet recessus ,
Ut vos post tantos animi , mentisque labores
Aspicio , lustroque libens , ut munere vestro
Sollicitas toto depello e pectore curas .
Non aliis Charites perfundunt candida lymphis
Corpora , non alios contextunt fecta per agros .

Desunt nonnulla , quæ erant in litura .



BALTHASSARIS CASTILIONII

C. A. R. M. I. N. U. M

L I B E R .

A L C O N .

REPTUM fatis primo sub flore juventæ
Alconem nemorum decus, & solatia amantum,
 Quem toties Fauni, & Dryades sensere canentem,
 Quem toties Pan est, toties miratus Apollo;
 Flebant pastores; ante omnes carus Iolas,
 Tristia perfundens lacrimis manantibus ora,
 Crudeles superos, crudeliaque astra vocabat,
 Ut gemit amissos foetus Philomela sub umbris,
 Aut qualis socia viduatus compare turtur,
 Quam procul incautam quercu speculatus ab alta
 Immitis calamo pastor dejecit acuto;
 Non viridi sedit ramo, non granine lato,
 Non vitrei dulcem libavit fluminis undam:
 Sed gemitu amissos tantum testatus amores,
 Languidulus mœstis complet nemora alta querelis.
 Nulla dies miserum lacrimis sine vidit Iolam,
 Nec cum Sol oritur, nec cum se condit in undas.
 Non illi pecudes, non pingues pascere tauros
 Cura erat, aut pastos ad flumina ducere potum,
 Hædorumve gregem, aut vitulos includere septis.
 Tantum inter silvas, aut sole in litore secum
 Perditus, & seræ oblitus decedere nocti,
 Rupibus hæc frustra, & sordis iactabat arenis.
 Alcon deliciæ Musarum, & Apollinis, Alcon
 Pars animæ, cordis pars Alcon maxima nostri,
 Et dolor, his lacrimas oculis habitare perennes,
 Quis Deus, aut quis te casus, miser, abstulit? ergo
 Optima quæque rapit dari inclementia fati?
 Ergo bonis tantum est aliquod male numen avaricum?
 Non metit ante diem lactentes messor aristas,
 Immatura rudis non carpit poma colonus;
 At fera te ante diem mors nigro immergit Averno,
 Injecitque manus rapidas crescentibus annis.
 Heu miserande puer! tecum solatia ruris,
 Tecum amor, & Charites periire, & gaudia nostra;
 Arboribus cecidere comæ, spoliataque honore est
 Silva

Silva suo ; solitasque negat pastoribus umbras ;
 Prata suum amifere decus , morientibus herbis
 Arida , sunt sicci fontes , & flumina sicca .
 Infœcunda carent promissis frugibus arva :
 Et mala crescentes rubigo exedit aristas .
 Squallor tristis habet pecudes , pecudumque magistros :
 Impastus stabulis sævit lupo , ubere raptos
 Dilaniatque serus miseris cum matribus agnos :
 Perque canes prædam impavidus pastoribus aufert ;
 Nil nisi triste sonant & silvæ , & pascua , & amnes ,
 Et liquidi fontes ; tua tristia funera ferunt
 Et liquidi fontes , & silvæ , & pascua , & amnes .
 Heu miserande puer ! tangunt tua funera Divos .
 Per nemora agricolæ stantes videre Napæas ,
 Panaque , Silvanumque , & capripedes Satyriscos .
 Sed neque jam lacrimis , aut questu fata moventur
 Impia , nec nostras audit mors furda querelas .
 Vomeribus succisa suis moriuntur in arvis :
 Gramina : deinde iterum viridi de cespite surgunt :
 Rupta semel non deinde annectunt flamina Parcæ .
 Aspice , decedens jam Sol declivis Olympo
 Occidit , & moriens accendit sidera cælo ;
 Sed tamen occiduo cum laverit æquore currus ,
 Idem iterum terras orienti luce reviset .
 Ast ubi nigra semel duræ nos flumina mortis
 Lavere , & clausa est immitis janua regni ,
 Nulla umquam ad superos ducit via ; lumina somnus
 Urget perpetuus , tenebrisque involvit amaris ;
 Tunc lacrimæ incassum , tunc irrita vota , precesque
 Funduntur ; fert vota Notus , lacrimasque , precesque .
 Heu miserande puer fatis surrepte malignis !
 Non ego te posthac , pastorum adstante corona ,
 Victorem aspiciam volucris certare sagitta ,
 Aut jaculo , aut dura socios superare palæstra ;
 Non tecum posthac molli resupinus in umbra
 Effugiam longos æstivo tempore Soles ;
 Non tua vicinos mulcebit fistula montes ,
 Docta nec umbrosæ resonabunt carmina valles :
 Non tua corticibus toties inscripta Lycoris ,
 Atque ignis Galatea meus non jam simul ambos
 Audierint ambæ nostros cantare furores ;
 Nos etenim a teneris simul usque huc viximus annis ;
 Frigora , pertulimusque æstus , noctesque diesque ,
 Communique simul sunt parta armenta labore ;
 Rura mea hæc tecum communia : viximus una ;
 Te moriente igitur cur jam mihi vita relicta est ?
 Heu male me ira Deum patriis abduxit ab oris ,
 Ne manibus premerem morientia lumina amicis ,
Aut

Aut abeuntis adhuc supremum animæ halitum in auras
 Exciperem ore meo, gelidis atque oscula labris.
 Invideo Leucippe tibi suprema dolenti
 Deficiens mandata bonus tibi præbuit Alcon;
 Spectavitque tuos morienti lumine vultus,
 Frigida tu mœsto imposuisti membra pharetro,
 Sparsisti & lacrimis bustum ingratumque sepulcrum.
 Inde ubi defietum faris est, & iusta peracta,
 Alconem ad manes felix comes usque secutus,
 Amisso vitam socio non passus inertem es,
 Et nunc Elysia lætus spatiaris in umbra,
 Alcone & frueris dulci, æternumque frueris:
 Atque aliquis forsan pastor pius ossa sepulcro
 Uno eodemque simul florentis margine ripæ
 Amborum sacro manes veneratus honore
 Composuit, lacrimasque ambobus fudit easdem;
 Ast ego nec tristes lacrimas in funere fudi,
 Debita nec misero persolvi iustā sodali:
 Quin etiam fortis duræ, ignarusque malorum
 Vanæ mihi incassum fingebam somnia demens.
 Hæc ego rura colam celeberrima, tum meus Alcon
 Huc veniet linquens colles, & inhospita saxa,
 Infectasque undas, & pabula dira veneno;
 Molliæque inviset prata hæc, fluviosque salubres.
 Occurram longe, & venientem primus amicum
 Agnoscam, primus caris complexibus oræ
 Impediam: excutient hilares nova gaudia fletus:
 Sic tandem optato læti sermone fruemur,
 Ærumnasque graves, olim & transacta vicissim
 Damna referre simul, rursusque audire juvabit.
 Tum veteres sensim fando repetemus amores,
 Delitiasque inter pastorum, & dulcia ruris
 Ocia, securæ peragemus tempora vitæ.
 Hæc amat arva Ceres, juga Bacchus, pascua Apollo,
 Ipsa Pales herbas pecori, lac sufficit agnis;
 Montibus his passim teneræ assuevere Napææ
 Sæpe feras agitare, & sæpe agitare choreas.
 Hic redolens sacros primevæ gentis honores,
 Perluxit antiquas Tyberis decora alta ruinas;
 Hic umbræ nemorum, hic fontes, hic frigida Tempe;
 Formosum hic pastor Corydon cantavit Alexin.
 Ergo ades, o dilecte puer: te pascua, & amnes
 Exspectant; tibi jam contextunt florea ferta,
 Adventuque tuo testantur gaudia Nymphæ;
 Summittitque novæ tellus tibi Dædala flores.
 Hæc ego fingebam miser, ah spe ductus inani,
 Nescius omne nefas morti fatisque licere.
 At postquam frustrata leves abiere per auras

Vota

Vota mea, & vivos Alconis cernere vultus
 Non licuit, vivasque audire & reddere voces,
 Hoc saltem, o saltem umbra levi per inania lapsa
 Advolet, & nostros tandem miserata dolores
 Accipiat lacrimas, imo & suspiria corde
 Erata, quasque cava hæc responfant antra querelas.
 Ipse meis manibus ripa hac Anienis inanem
 Constituam tumulum, nostri solatia luctus,
 Atque addam pia thura focis, manesque ciebo;
 Vos mecum o pueri bene olentes spargite flores,
 Narcissum, atque rosas, & suave rubentem Hyacin-
 thum,
 Atque umbras hedera, lauroque inducite opacas:
 Nec desint casæ, permixtaque cinnama amomo,
 Excitet ut dulces aspirans ventus odores.
 Nos Alcon dilexit multum, & dignus amari
 Ipse fuit nobis, & tali dignus honore.
 Interea violas intertextent Amaranthis,
 Et tumulo spargent flores, & ferra Napææ;
 Et tumulo mœstæ inscribent miserabile carmen:
 ALCONEM postquam rapuerunt impia fata,
 Collacrimant duri montes, & confusus atra est
 Nocte dies: sunt candida nigra, & dulcia amara.

CLEOPATRA.

MArmore quisquis in hoc sævis admorfa colubris
 Brachia, & æterna torpentia lumina nocte
 Aspicias, invitam ne crede occumbere leto.
 Victores vetuere diu me abrumpere vitam,
 Regina ut veheret celebri captiva triumpho
 Scilicet, & nurbus parerem serva Latinis;
 Illa ego progenies tot ducta ab origine regum,
 Quam Pharii coluit gens fortunata Canopi,
 Delitiis fovitque suis Ægyptia tellus,
 Atque oriens omnis Divum dignatus honore est.
 Sed virtus, pulchræque necis generosa cupido
 Vicit vitæ ignominiam, infidiasque tyranni;
 Libertas nam parta nece est, nec vincula sensit,
 Umbraque tartareas descendi libera ad undas;
 Quod licuisse mihi indignatus perfidus hostis,
 Sævitiæ insanis stimulis exarsit, & ira,
 Namque triumphali investus Capitolia curru
 Insignes inter titulos, gentesque subastas,
 Exinctæ infelix simulacrum duxit, & amens
 Spectaculo explevit crudelia lumina inani.
 Neu longæva vetustas facti famam aboleret,
 Aut seris mea fors ignota nepotibus eiser,

Erfi.

Effigiem exendi spiranti e marmore iussit,
 Testari & casus fatum miserabile nostri.
 Quam deinde, ingenium artificis miratus Julius
 Egregium, celebri visenda sede locavit,
 Signa inter veterum Heroum, saxoque perennes
 Supposuit lacrimas, agræ solatia mentis;
 Optatæ non ut deslerem gaudia mortis,
 (Nam mihi nec lacrimas lethali vipera morfu
 Excussit, nec mors ullum intulit ipsa timorem)
 Sed caro ut cineri, & dilecti conjugis umbræ
 Æternas lacrimas æterni pignus amoris
 Mœsta darem, inferiasque inopes, & tristia dona.
 Has etiam tamen insensu rapuere Quirites.
 At tu Magne LEO Divum genus, aurea sub quo
 Sæcula, & antiquæ redierunt laudis honores,
 Si te præsidium miseris mortalibus ipse
 Omnipotens Pater ætherio demisit Olympo;
 Et tua si immensæ virtuti est æqua potestas,
 Munificaque manu dispensas dona Deorum,
 Annue supplicibus votis, nec vana precari
 Me sine, parva peto; lacrimas, Pater optime, reddi:
 Redde, oro, fletum, fletus mihi muneris instar,
 Improba quando aliud nil jam Fortuna reliquit.
 At Niobe ausa Deos scelerata incessere lingua,
 Induerit licet in durum præcordia marmor,
 Flet tamen, assiduusque liquor de marmore manat.
 Vita mihi dispar, vixi sine crimine, si non
 („ Induerim licet in durum præcordia marmor “)
 Crimen amare vocas, fletus solamen amantum est.
 Adde, quod afflictis nostræ jucunda voluptas
 Sunt lacrimæ, dulcesque invitant murmure somnos.
 Et cum exusta siti Icarius canis arva perurit,
 Huc potum veniunt volucres, circumque, supraque
 Frondibus insultant; tenero tum gramine lata
 Terra viret, rutilantque suis poma aurea ramis;
 Hic ubi odoratum surgens densa nemus umbra
 Hesperidum dites truncos non invidet hortis.

PROSOPOPŒJA LUDOVICI PICI

MIRANDULANI.

CRedite mortales, animæ post fata supersunt,
 Diraque mors nostri nil nisi corpus habet.
 Fabula nec manes vana est exire sepulcris
 Per noctem, tenebris & volitare vagos.
 Nam modo, dum nostro Mirandula milite cincta est,
 Vidi ego vera quidem, sed caritura fide.

Nox

Nox erat, & noctem superans candore nivali
Clara repercussio lumine Luna magis.
Ipse ego sub muris fossa defensus opaca
Scrutabar, tutum qua magis esset iter.
Assitit hic subito manifestus mœnibus ipsis,
Ante oculos PICUS visus adesse meos.
Tristis erat facies, atroque inspersa cruore,
Et lacerum ambusso tunc quoque crine caput.
Obstupui, gelidusque tremor per membra cucurrit,
Et subito arrepta est hirta timore conia.
Ille autem torvum despectans castra, repente
Infremuit, gemitu solvit & ora gravi.
O Pater, o pastor populorum, o maxime mundi
Arbiter, humanum qui genus omne regis,
Iustitiæ, pacisque dator, placidæque quietis,
Credita cui soli est vita salusque hominum;
Quem Deus ipse Erebi fecit, cælique potentem,
Ut nutu pateant utraque regna tuo;
Quid potui tantum infelix committere? culpa
Aut mea quænam in te tam gravis esse potest?
Ut patriam, natumque meum, uxoremque laresque
Perdere, & excidio vertere cuncta velis?
Certè ego te propter caput obiectare periclis,
Nec timui toties velle subire necem,
Felsina cum imperium jam detrectaret, & in te
Tristitia civilis sumeret arma furor.
Hæc mea dextra tuos armis compescuit hostes,
Et leto multos sanguinolenta dedit.
Denique, dum innumeris cupio te ornare triumphis,
Sanguinis ipse mei prodigus occubui.
Vulnera testantur nostros hæc sæva labores,
Implorantque tuam nomen inane fidem.
Flens tener in cunis vagitu natus amaro
Pollicitis queritur pondus abesse tuis.
Tot perpeffa graves conjux miseranda labores
Supplicibus veniam mœsta petit lacrimis.
Stant miseri squallore patres, trepidæque puellæ,
Et matrum passis flet pia turba comis.
Omnes in te animum jam convertere, rogantque,
Ut tua det fessis dextera rebus opem.
Aspice captivis vacuos cultoribus agros,
Abductas pecudes, agricolæque boves,
Disjectasque domos passim, populataque raptis
Arboribus late, & frugibus arva tuis.
Tu vero ulterius lacrimis dulcissima conjux
Et gemitu manes lædere parce meos.
Postquam nulla potest mitis clementia diræ
Consilium mentis flectere, nec pietas;

Effuge., quodque unum est nostri tibi pignus amoris,
 Dulce onus hinc ulnis fer puerum ipsa tuis.
 Nec mea discedens saxo hic clausa ossa relinque
 Condita, sed charo tecum habeas gremio,
 Ne rabie immani, tumulto sint eruta avito,
 Et jaceant media semisepulta via.
 Hæc speranda mihi, postquam festatur & umbram,
 Sæviti & in cineres mens male grata meos;
 Nec finit inferias nostro te ferre sepulcro,
 Annuaque extincto reddere iusta viro.
 Sed tamen & Superi cernunt mortalia, habetque
 Justitiæ ultorem dextra minax gladium;
 Inque malos, sit lenta licet, certa ira Deorum est,
 Pœnaque tam gravior, quam mage fera venit.
 Nec longum nostro lætabitur impius hostis
 Sanguine: fata illum non leviora manent.
 Hæc ille, & plura his; sed verba extrema loquentis
 Terribilis nostra rupit in aure sonus.
 Nam subito, ingenti tormenta impulsa ruina
 Increpuere, gravi terra tremit sonitu.
 Fulminei ingeminant ictus, volat impete diro
 Ferrea sulphureo concita ab igne pila.
 Mœnia tum nutant labefacta: at tristis imago
 In tenebras querulo mœsta abiit gemitu.

DE ELISABELLA GONZAGA

CANENTE.

Dulces exuviae, dum fata Deusque sinebant,
 Dum canit, & querulum pollice tangit ebur,
 Formosa e cælo deducit Elisa Tonantem,
 Et trahit immites ad pia verba feras.
 Auritæ veniunt ad dulcia carmina silvæ,
 Decurrunt altis undique saxa jugis:
 Stant sine mormure aquæ, taciti sine flamine venti,
 Et cohibent cursus sidera prona suos.
 Atque aliquis tali captus dulcedine sentit
 Elabi ex imo pectore sensum animam.
 Flebile nescio quid tacite in præcordia serpit,
 Cogit & invitos illacrimare oculos.
 Fleste ratem male grate hospes, neu desere amantem.
 Ah misera ah mortem est jam prope, fleste ratem.
 Quod si tam dulces nequeunt fera corda querelæ
 Flestere, nec gemitu hoc mens labefacta tua est.
 Non tibi Diva parens, generis nec Dardanus auctor,
 Persæde, sed duris cautibus es genitus.

Sur-

Sordior ab scopulis, dulces fugis improbe terras,
 Deliciisque olim litora cara tuis.
 Illa autem extremo tandem devicta dolore,
 Irrita nil postquam verba, precesque valent,
 Sanguine sancta suo temerati iura pudoris
 Ulta est, ipsa suæ sava ministra necis;
 Quemque torum toties tecum male prefferat olim,
 Infelix etiam nunc premit exanimis.
 Respice, funereæ sunt illi incendia flammæ,
 Et miseranda illis ardet Elisa rogis:
 Ardet Elisa tuam sæve indelebile crimen,
 Olim quod terris fama loquatur anus.
 At tua præcípites fugientia carbasa venti
 Cæruleum profuga per mare classe ferunt.
 Obrue devotam pater o Neptune carinam:
 Ah nimis insidum sustinet illa caput.
 Illa virum portat, quem non perjuria tangunt,
 Quem non sancta fides, fasve, piomve movet;
 Quem neque dulcis amor miseræ morientis Elisæ
 Flectere, nec lacrimæ, nec potuere preces.
 Ah serus est, quicumque animo non mitis agresti
 Audiit & siccis hæc pia verba oculis.
 Quod tamen hæc moveant, quod sint tam dulcia verba,
 Non faciunt verba hæc, sed nova Elisa canens.
 Et certe non est hæc uxor Elisa Sichæi,
 Nec quemquam hæc Phrygium novit Elisa virum.
 Altera Elisa hæc est Superis gratissima, qualem
 Nec tulit ulla umquam, nec feret ulla dies.
 Audiat Æneas hanc si tam dulce querentem,
 Flens ultro ad litus vela dabit Libycum.
 Quod si dura nimis, blandisque immota querelis
 Mens fera propositum non remoretur iter,
 Invitam ad litus portabunt æquora classem,
 Flaminaque ad fœtus officiosa pios;
 Excidet atque animo regnum dotale, nec umquam
 Dardanius Latium nāvita classe pœtet.
 Nam nimium validas facies habet ista cætenas,
 Et validum nimis hæc luminā carcer habent.
 Hæc formosa Deas superat forma Heroine,
 Pace tua, Venus, o pace, Minerva, tua.
 Quicquid agit, pariter certant componere furtim
 Et decor, & Charites, & pudor ingenuns.
 His lætos Natura oculis afflavit honores,
 Et quiddam majus conditione hominum.
 Ambrosiam rosea spirant cervice capilli;
 Et patet egregio vera decore Dea.
 Quacumque ingreditur, læta undique pabula vernant;
 Signaque dat tellus nunc æ adesse aliquod.

Cer-

Arrident silvæ passim, tangique beato
 Certatim gestit qualibet herba pede.
 O centum æquoreæ formosa Doride natæ,
 Et quascumque maris contigit esse Deas.
 Huic date, quicquid habent gemmarum litora rubra
 Oceani, & quicquid dives arena vehit.
 Quosque habet alma Thetis, quos & Galatea lapillos.
 Nerine in oculis candida nympha suis:
 Quicquid odoratæ Messis Pancaja tellus
 Protulit, huic felix munera portet Arabs.
 Huic uni Seres Tyrio satianda colore
 Arboribus pectant vellera chara suis.
 Hæc una est nostri rarissima gloria sæcli,
 Digna suas cui det maximus orbis opes.
 Vos quoque cælicolæ hanc merito celebretis honore:
 Non erit hæc vobis dissimulanda Dea.

BALTHASSARIS CASTILIONII

E L E G I A

Qua fingit Hippolyten suam ad se ipsum scribentem.

HIPPOLYTE mittit mandata hæc Castilioni;
 Addideram imprudens, hei mihi, pene suo.
 Te tua Roma tenet, mihi quam narrare solebas,
 Unam delicias esse hominum atque Deum.
 Hoc quoque nunc major, quod magno est aucta
 LEONE,

Tam bene pacati qui imperium orbis habet.
 Hic tibi nec defunt celeberrima turba sodales,
 Apti oculos etiam multa tenere tuos,
 Nam modo tot priscæ spectas miracula gentis,
 Heroum & titulis clara trophæa suis:
 Nunc Vaticani surgentia marmore templa,
 Et quæ porticibus aurea testa nitent:
 Irriguos fontes, hortosque, & amœna vireta,
 Plurima quæ umbroso margine Tybris habet.
 Utque ferunt, coetu convivia læta frequenti,
 At celebras lentis otia mista jocis.
 Aut cithara æstivum attenuas cantuque calorem,
 Hei mihi quam dispar nunc mea vita tuæ est!
 Nec mihi displiceant, quæ sunt tibi grata, sed ipsa est
 Te sine lux oculis pene inimica meis.
 Non auro, aut gemma caput exornare nitenti
 Me juvat, aut Arabæ spargere odore comas.
 Non celebres ludos festis spectare diebus,
 Cum populi complet densa corona forum;

Fracast. Carmo.

R

Et

Et ferus in media exultat gladiator arena ,
Hasta concurrit vel cataphraetus eques .
Sola tuos vultus referens , Raphaelis imago
Picta manu curas allevat usque meas .
Huic ego delicias facio , arrideoque , jocoque ,
Alloquor & , tamquam reddere verba queat .
Assensu nutuque mihi sæpe illa videtur
Dicere velle aliquid , & tua verba loqui .
Agnoscit , balboque patrem puer ore salutat .
Hoc solor longos decipioque dies .
At quicumque istinc ad nos accesserit hospes ,
Hunc ego quid dicas , quid faciasve , rogo .
Cuncta mihi de te incutiant audita timorem ,
Vano etiam absentes sæpe timore pavent .
Sed mihi nescio quis narravit sæpe tumultus ,
Miscerique neces per fora , perque vias ,
Cum populi pars hæc Ursum , pars illa Columnam
Invocat , & trepida corripit arma manu .
Ne tu , ne quæso , tantis te immitte periclis ,
Sat tibi sit , tuto posse redire domum .
Romæ etiam fama est , cultas habitare puellas ,
Sed quæ lascivo turpiter igne calent .
Illis venalis forma est , corpusque , pudorque :
His tu blanditiis ne capiare , cave .
Sed nisi jam captum blanda hæc te vincla tenerent ,
Tam longas absens non paterere moras .
Nam memini , cum te vivum jurare solebas
Non me , si cupias , posse carere diu .
Vivis Castilion , vivasque beatius , opto ;
Nec tibi jam durum est me caruisse diu .
Cur tua mutata est igitur mens ? cur prior ille ,
Ille tuo nostri corde refrixit amor ?
Cur tibi nunc videor vilis ? nec , ut ante solebam ,
Digna , tori sociam quam patiare tui ?
Scilicet in ventos promissa abiere , fidesque ,
A nostris simul ac vestri abiere oculi .
Et tibi nunc forsân subeunt fastidia nostri ,
Et grave jam Hippolytes nomen in aure tua est .
„ Me tibi , teque mihi fors , & Deus ipse dedere : “
„ Quodnam igitur nobis dissidium esse potest ? “
Verum ut me fugias , patriam fugis , improbe ? nec te
Chara parens , nati nec pia cura tenet ?
Quid queror ? en tua scribenti mihi epistola venit ,
Grata quidem , dictis si modo certa fides ;
Te nostri desiderio languere , pedemque
Quamprimum ad patrios velle referre lares ,
Torquerique mora , sed Magni iussa LEONIS
Jamdudum reditus detinuisse tuos .

His ego perleſtis . ſic ad tua verba revixi ,
Surgere ut æſtivis imbris herba ſolet .
Quæ licet ex toto non auſim vera fateri ,
Qualiacumque tamen credulitate juvant .
Credam ego , quod fieri cupio , votisque favebo
Ipsa meis : vera hæc quis vetet eſſe tamen ?
Nec tibi ſunt præcordia ferrea , nec tibi dura ,
Ubera in Alpinis cautibus uſa dedit .
Nec culpanda tua eſt mora , nam præcepta Deorum
Non fas , nec tutum eſt ſpernere velle homini .
Eſſe tamen fertur clementia tanta LEONIS ,
Ut facili humanas audiat ore preces .
Tu modo & illius numen veneratus adora ,
Pronaque ſacratis oſcula da pedibus .
Cumque tua attuleris ſupplex vota , adjice noſtra ,
Atque meo largas nomine funde preces .
Aut jubeat te jam properare ad moenia Mantus ,
Aut me Romanas tecum habitare domos .
Namque ego ſum ſine te , veluti ſpoliata magiſtro
Cymba , procelloſi quam rapit unda maris .
Et data cum tibi ſim utroque orba puella parente ,
Solus tu mihi vir , ſolus uterque parens .
Nunc nimis ingrata eſt vita hæc mihi ; namque ego
tantum
Tecum vivere amem , tecum obeamque libens .
Præſtabit veniam mitis Deus ille roganti ,
Aſpiciſque bonis , & bene , dicet , eas .
Ocyus huc celeres mannos conſcende viator ,
Atque moras omnes rumpe , viamque vora .
Te læta excipiet , feſtiſque ornata coronis ,
Et domini adventum ſentiet ipſa domus .
Vota ego perſolvam templo , inſcribamque tabellæ ;
Hippolyte , ſalvi conjugis ob reditum .

AD PUELLAM IN LITORE

AMBULANTEM.

AD mare ne accedas propius , mea vita ; protervos
Nimirum , & turpes continet unda Deos .
Hi rapiunt , ſi quam incantam aſpexere puellam ,
Securos bibulo litore ferre gradus .
Quin etiam in ſiccum exiliunt ſæpe agmine faſto ,
Atque abigunt captos ad ſua regna homines .
Tum ſi qua eſt inter prædam formoſa puella ,
Tantum hæc non ſubito piſcibus eſca datur :

Sed miseram foedis male habent complexibus omnes ;
 Invitamque jubent hispida monstra pati .
 Os informe illis , rictus , oculique minaces ,
 Asperaue anguino cortice membra rigent ;
 Barba impexa , ingens , alga limoque virenti
 Oblita , oletque gravi lurida odore coma .
 Hos tu seu pisces , seu monstra obscœna vocare ,
 Sive Deos mavis ; si sapias , ipsa cave .
 Nec tibi sit tanti , pictos legisse capillos ,
 Ut pereas magno , vita , dolore meo .
 Quin potius diversi abeamus ; respice , ut antrum
 Ad dextram viridi protegit umbra solo .
 Decurrit rivus gelidis argenteus undis ,
 Pistaque odorato flore renidet humus .
 Imminet & fonti multa nemus ilice densum ,
 Et volucres liquido gutture dulce canunt .
 Hic poteris tuto molli requiescere in herba
 Propter aquam , & niveos amne lavare pedes .
 Tu mihi ferta tuis contexta coloribus , ipse
 Texta meis contra mox tibi ferta legam .
 Floribus , & roseis crinem redimita corollis ,
 Et compto incedes conspicienda sinu .
 Poplite deinde tenus succincta imitabere nymphas :
 Obvia marmoreum detegit aura latus .
 Silvicolas , mea vita , Deos torquebis amore .
 Ignibus urentur flumina & ipsa meis .
 Inde domum formosa mæge , & mæge culta redibis ,
 Rumpetur tacita tum Hippolyte invidia .
 Sed sensim subsistas , ne te forte puellarum
 Æqualis versam cernat abire chorus .
 Nesciat hoc quisquam , nam si nos turba sequatur ,
 Antra ingrata tibi , ingrata & erunt nemora .
 Has fatuas rapiant Pelagi , sine , monstra puellas :
 Nos cœptum hac furtim diffimulemus iter .
 Quod si qua interea audieris per litora murmur
 Lux mea , te in nostro protinus abde sinu .

A D E A M D E M .

TU ne iterum , demens , hesterni oblita pericli ,
 Litora festino pergis adire gradu ?
 Nonne audis mea lux fremitum , & fera murmura Ponti ?
 Jam jam exire freto monstra marina parant .
 Me miserum , his ne genis roseis , roseisque labellis
 Oscula tam immundo congeret ore fera ?
 Lascivum hoc corpus squammis teret , utque libebit ,
 Impli-

Implicitum cupidis nexibus impedit ?
 Mox lanians pectus tenerum, vescaſque papillas,
 Explebit diram mordicus ingluviem ?
 Mortales hæc monſtra omnes odere : ramen ſunt.
 Si neſcis, pulchris longe inimica magis.
 Anditti ne olim Hippolyti crudelia fata ?
 Diſce alieno, ut ſis cautior ipſa, malo.
 Theſide Hippolyto præſtanti corpore forma
 Rara quidem, decor at rarior oris erat.
 Sparſerat aurata jam tum lanugine malas,
 Fulgebat ſed adhuc virgineum ore decus.
 Multæ illi tæda jungi optavere puellæ,
 Multæ etiam proprios deſtituiſſe viros.
 Quin illum infano dilexit perdita amore,
 Plus anima, atque oculis ipſa noverca ſuis.
 Ille tamen ſpretiſque aliis, ſpretaque noverca,
 Venator tantum devia luſtra colit.
 Et caſibus, jaculoque feras, arcuque fatigat,
 Et juga nexilibus claudit iniqua plagis.
 Nunc viridi ſtrophio faciem defendit ab æſtu,
 Oraque fontano ſicca lavat latice.
 Sæpe fugacis equi curſu prævertitur Euros,
 Sæpe altum gaudet per nemus ire pedes.
 Sed tum forte legens extremi litoris oram
 Imprudens curru veſtus erat biſjugo ;
 Bellua cum ſubito cornuta expellitur undis,
 Sublatæque maris naribus efflat aquas.
 Mox vicina truces oculos ad litora vertens,
 Hippolytum reſto tranſite ſæva petit.
 Quadrupedes retro pavidi ceſſere, citato &
 Per ſcopulos curſu corripuere fugam.
 Hippolytus lentas luſtari tendere habenas
 Nequicquam, & vana ducere frena manu.
 Currus inaccessas per rupes, ſaxaque raptus
 Frangitur, ejeſtis & cadit axe rotis.
 At miſer implicitus loris puer inque peditus
 Diſtrahitur, membris membra revulſa crepant :
 Fundere non potuit lacrimas, non verba dolentis ;
 Tam cito diſcerpto corpore vita abiit.
 In tennes, dulcis decor ille evanuit auras,
 Ut ſolia heſternæ cum cecidere roſæ.
 Flava coma hamatis dumis annexa pependit,
 Et lacera hæſerunt viſcera ſtipitibus.
 Fleverunt nemora, & ſaltus, fontesque, lacuſque,
 Naiades, & Panes, & Satyri, & Dryades.
 Quid loquar Andromeden, matris quam pendere formæ
 Poſcebant pœnas imoia monſtra maris ?
 Pendebat ſcopulo infelix ſuſpenſa catena,

Marmoreas tergum pone revincta manus .
 Horrifco Pistris strepitu maria alta secabat ;
 Ignem oculis , spumam sanguineam ore vomens .
 Forte leves Perseus nixus talaribus auras
 Carpebat , pelagi litora despiciens .
 Affixam ut vidit dura sub caute puellam ,
 Flexit iter , pennas sustinuitque suas .
 Mox propior teneros artus , & virginis ora ,
 Et formam aspiciens corporis obstupuit .
 Singula dum laudat , sortem miseratus acerbam ,
 Illabi dulcem sentit amorem animo :
 Atque ait : o duro nimium damnata puella ,
 Judice ; quæ tanto est culpa luenda malo ?
 Exercet te certe aliquis Deus ultor amantum ,
 Nam si crimen habes , crimen amoris habes .
 Ille loquebatur ; planxerunt litora fluitus ,
 Respicit ; exitium bellua dirum aderat .
 Quam simul ac rictu properantem vidit aperto
 Andromede , & se jam jam propiusque peti ,
 Vulnificos visa est sensisse in corpore morsus ,
 Et sua letifero viscera dente trahi .
 Atque ita deficiens sine sanguine , voce , animoque ,
 Horrui , & gelido saxea fasti metu est .
 Crede mihi ; juveni tantum sua cara puella est ,
 Spectatamque fidem solus amator habet .
 Astabant trepidi lugubri veste parentes ,
 Et natæ lacrimas irrita dona dabant .
 Lava heros clipeum capiens , dextra impiger ensen ,
 Mittite , ait , lacrimas : hac ope tempus eget .
 Nec mora , delatus volucris super æquora planta ,
 Terga feræ valido cominus ense ferit :
 Ingeminansque ictus condit sub gutture ferrum ,
 Mox celer insultans ilia transfadigit .
 Dentibus infrendens vacuas fera sævit in auras ,
 Et sanie immisto sanguine tingit aquas .
 Ille iterum dextram attollit ; tum denique monstrum
 Effugit , & stridens æquoris ima petit .
 At juvenis medio sublimis in aere pendet ,
 Exserat exspectans qua fera parte caput .
 Emergit tandem resupinum turpe cadaver ,
 Jactaturque maris fluctibus exanimum .
 Clamorem attollunt lætum per litora vulgus ,
 Et plausu resonant concava saxa novo .
 Cassiope , Cepheusque adimunt vincla aspera natæ .
 Ad sua tunc lætus præmia victor adest .
 Et dextram injiciens dextræ , colloque sinistram ,
 Nympha meo , dixit , parta labore , mea es .
 Illa , valet , inquit , duri , & sine amore parentes ,
Hic

Hic pater, hic conjux, hic mihi mater erit.
 Vos me vestra avido exposuistis viscera monstro:
 Hic me Orci e mediis faucibus eripuit.
 Hunc ego, si thalamio me non dignabitur, ultro
 Serva lubens dominum, qua volet, usque sequar.
 Dixit, & ingressa est Persei nova nupta Penates,
 Nec patriam posthac intulit illa pedem.
 Sed maria, & Scopulos semper litusque perosa
 Incoluit summis oppida celsa jugis.
 Præteritique memor monitis parebat amantis,
 Unde Polo stellis nunc Dea sulca micat.
 At tu non assis facis, irridesque monentem;
 Ulteriusque amens coeptum iter ire paras.
 Quin etiam plantas tingis male sana marino
 Fluctu; ah nunc tantos ne incute sæva metus.
 Forsitán apricos colles, & consita opacis
 Arboribus sub aqua prata virere putas.
 Atria vel cerni Phrygiis suffulta columnis,
 Auratasque trabes, marmoreumque solum.
 Nil nisi ventorum fremitus, tristesque procellas
 Impulsas rapido turbine pontus habet.
 Putris arena jacet cœnoso sordida fundo,
 Et congesta altis æstuat aggeribus.
 Ne dum aliud, conchas non illic versicolores
 Invenies: tantum has litoris ora tenet.
 Tum sese attollunt pelago passim ardua saxa:
 Quædam etiam insano gurgite cæca latent.
 Hic sua desolatis posuere cubilia subter
 Cautibus, & liquidos monstra marina lares.
 Hic secunda intus cunctantur, & ocia dicunt,
 Cum furit hybernus ventus & unda minis.
 Hic etiam e speculis procul adventare carinas;
 Utque sua labi sub ditione vident,
 Disponunt furtim insidias, latitantque cavernis,
 Dum subeat testos nautica turba dolos.
 Qualis, ubi aspexit venientem ad retia cervum,
 Venator tacito gaudia corde premit.
 Sæpe etiam fundo morsu subfixa tenaci
 Detinet invitam vipera parva ratem.
 Illa immota manet, medio licet incita cursu,
 Intendantque leves linthea plena Noti.
 Tum subito e latebris prodit gens lubrica ponti,
 Atque acie instructa prædam inimica petit.
 Obice pars munit fauces, aditusque malignos,
 Obsidet, ulla fugæ pervia ne via sit.
 Pars dorso connixa, ratem subvertere tentat,
 Pars clavum, remos, & tabulata rapit:
 At laterum laxa tandem compage dehiscit,

Æquoreaſque bibit naufraga puppis aquas .
 Interea nautas nequicquam multa parantes
 Infelix vaſſis obruit unda vadis .
 At rabida infido graſſantur in æquore monſtra ,
 Per mediaſque atra clade feruntur aquas .
 Semineces rapiunt , prenoſosque volumine caudæ
 Affigunt faxis terque quaterque ſuis .
 Dilaniant artus , & adhuc trepidantia mandunt
 Viſcera , & in miſero ſanguine roſtra lavant .
 Fraſta minutatim crepitant ſub dentibus oſſa ,
 Et ſemeſa undis membra cruenta natant .
 Sæpe etiam vivos intra ſtabula abdita ſervant ,
 Ut quos Divum aris paſtor alit vitulos .
 Nam ſua cum certis ſollemnia ſacra diebus ,
 Et celebrant lætis annua feſta choris ;
 Rauca tonans ſcopulis horrendum buccina torvi
 Tritonis , madidum cogit in antra pecus .
 Tum pelagi excitum fundo genus omne ferarum
 Apparet , liquidis & glomerantur aquis .
 At malus ille ſenex Protheus paſtor maris anteit ,
 Et (mirum !) in varias ſe induit ipſe feras .
 Nam modo ſit ſerpens , modo ſus , modo torva læna ,
 Horrida nunc tigris , nunc ſonitum ignis habet .
 Hic paſſim armenta exultantia fuſſe coercet
 Increpitans , magnum & per maria agmen agit .
 Noſ tot habent ſilvæ frondes , tot liſus arenas ,
 Quot varia in tenero marmore monſtra natant .
 Nec ſolum informeſque orcæ , atque immania Cete ,
 Quæque mare undiſonum tantum habitare ſolent ,
 Sed tauri , vulpeſque avidæ , fulvique dracones ,
 Raptoresque lupi , ſævaque turba canes .
 Nam quaſcumque feras antris , & montibus altiſ
 Terra alit , haſ vaſto gurgite pontus habet .
 Bellua præterea (veteres dixere Charybdim)
 Sublatum pelago fert truculenta caput .
 Hæc miſeras avido puppes abſorbet hiatu ;
 Tantum illi harathrum , & gutturis antra patent .
 Parte alia ſe inſert timor , atque infamia ponti ,
 Semiſero ingrediens corpore Scylla rapax .
 Fronſ illi præfert formoſæ virginis ora ,
 Atque infida procul lumina dulce micant .
 Inguinibus latrant rabido centum ore moloſſi ;
 Sicca fame impaſſa guttura ſemper hiant .
 Talia monſtra mari coeunt , ludosque frequentes
 Inſtaurant , epulis & ſua feſta colunt ;
 Infandaſque dapes menſis , & ſercula dira
 Apponunt , tabo pallida fraſta hominum ;
 Colla humeris avulſa , manus , truncosque lacertos ,
 Atque

Atque ora effossis tristia luminibus .
 Corpora suat hominum illis esca , & pocula sanguis ;
 Hostibus hæc nostris prandia dent Superi .
 Hæc te , si fueris deprensa in litore , Cete
 Impositam dorso protinus arripiunt .
 Ah scelus indignum , ah misera , ah male cauta puella ,
 Quid tibi tunc animi , quid tibi mentis erit ?
 Clamabis , montesque procul , litusque relictum
 Respiciens , frustra flebis , opemque petes .
 Astabunt facies torvæ , & flenti increpitabunt .
 Quam cupies nobis tunc habuisse fidem !
 Tunc nostri nemoris frustra memor , & memor antri ,
 Atque tui frustra Castilionis eris .
 Ipse aliam pro te forma præstante puellam
 Inveniam , & quæ mi sit mage morigera .
 Illi ego deliciasque tuas donabo , & amores ,
 I nunc , argutas , i , sequere Halcyonas .

DE MORTE RAPHAELIS PICTORIS.

QUOD lacerum corpus medica sanaverit arte ,
 Hippolitum Stygiis & revocarit aquis ,
 Ad Stygias ipse est raptus Epidaurius undas ;
 Sic pretium vitæ mors fuit artificii .
 Tu quoque dum toto laniatam corpore Romam
 Componis miro , Raphael , ingenio :
 Atque urbis lacerum ferro , igni , annisque cadaver
 Ad vitam , antiquum jam revocasque decus ;
 Movisti Superum invidiam ; indignataque mors est ,
 Te dudum extinctis reddere posse animam ;
 Et quod longa dies paulatim aboleverat , hoc te
 Mortali spreta lege parare iterum .
 Sic miser heu prima cadis intercepte juventa ;
 Deberi & morti nostraque nosque mones .

DE PAULO CANENTE.

Dulcia dum pulcher modulatur carmina PAULLUS ,
 Demulcet colles , & , mea Roma , tuos ;
 Adcurrere simul Dryades , Faunisque bicornes ,
 Ora imnota truces & tenuere feræ .
 Tybris arundineo glaucum caput extulit alveo ,
 Et stupefacta novo resistit unda sono .
 Tum vocem , numerumque , inquit , miratus Apollo ,
 R Or-

Orpheus Elyſia valle meus rediit .
 Sed faciem ut vidit pueri , ſacrumque decorem ,
 Certe , ait , hic proles eſt , Cytherea , tua .
 Sæve puer , tentas me vincere voce , lyraque ?
 An viciffe arcu , eſt gloria viſa levis ?

DE VIRAGINE .

Semlanimem in muris mater Piſana puellam
 Dum fovet , & tenero peſtore vulnus hiat ,
 Nata ; tibi has , dixit , tædas , atque hos Hymenæos
 Hæc deſenſa tuo mœnia marte dabunt ?
 Cui virgo : haud alias tædas , aliſve Hymenæos
 Debuit hæc nobis grata rependere humus .
 Hanc ego ſola meo ſervavi ſanguine terram :
 Hæc ſervata meos terra tegat cineres .
 Quod ſi iterum ad muros accedet Gallicus hoſtis ,
 Pro patria arma iterum hæc oſſa cinisſque ferent .

AD AMICAM .

ME miſerum quiſnam hæc tam bella labella mo-
 mordit ?
 Improbus , & vere ruſticus ille fuit .
 Non aliter leporem canis , accipiterve columbam
 Mandit ; adhuc fluit en turgidulo ore cruor .
 Quid neſtis , maleſana , dolos ? quid , perfida , juras ?
 Lividam ab impreſſo agnoſco ego dente notam .
 Atque utinam non ulteriora etiam malus ille
 Sumpſerit , heu duras rerum in amore vices .

EPITAPHIUM GRATIÆ PUELLÆ .

SIſTE , viator , ni properas ; hoc aſpice marmor ,
 Et lege : ni ploras , tu quoque marmor eris .
 Gratia (namque Deas etiam mors ſæva profanat)
 Mortua , & hoc duro eſt condita ſub tumulo .
 Abſtulit hæc moriens geminas miſeranda ſorores ;
 Sic Charites uno tres periire obitu .

INSIGNIUM DOMUS CASTILIONIÆ

D E S C R I P T I O .

EST Leo magnanimus, clemens, princepsque ferarum :

Vindicat & rubrum sibi martis cura colorem :

Indicat & nobis securam Arx alta quietem :

Turris & antiquæ fert signum nobilitatis .

CASTILIONA Domus nobis hæc omnia præstat .

HIPPOLYTÆ TAURELLÆ CONJUGIS

E P I T A P H I U M .

NON ego nunc vivo, conjux dulcissima : vitam
 Corpore namque tuo fata meam abstulerunt :
 Sed vivam, tumulo cum tecum condar in isto,
 Jungenturque tuis ossibus ossa mea .

E X C O R Y C I A N I S .

Laudabunt alii Divum spirantia signa,
 Molliter & Pario ductos de marmore vultus,
 Corycii aut clarum tollent super æthera nomen,
 Insignem & virtute animum, magno ore canentes
 Ut veras Superum effigies sacraverit aris,
 Utque sui cordis penetralia fecerit aras
 Sinceræ Pietati, almæ & Fidei, ipse sacerdos
 Integer, innocuus, culpa semotus ab omni.
 Ast ego (nam vires nostris Musa abnuït ausis,
 Ne possim egregias laudes æquare canendo)
 Tantum Corycio meritas testantia grates
 Vota feram Nato, & Matri, Matrisque Parenti,
 Vos igitur mecum, o pueri, innuptæque puellæ,
 Romanæque nurus, cumulate altaria donis
 Suppliciter; flexoque genu numenque rogate
 Dextrum Corycio, & flammis date tura faventes.
 Virginis Anna parens, & Virgo Mater, & ipse
 Virgineo Matre intacta Puer edite partu,
 Corycium servate senem, si recta voluntas,
 Et Pietas vobis grata est, probitasque, pudorque :

Quod si olim coluit qui hortos & rura, solebat
 Primus vere rosam, atque autumnos carpere poma,
 Quenam digna satis dabitis vos præmia vestro
 Cultori? lætam annuite viridemque senectam.
 Corycio aspiret pleno bona Copia cornu;
 Compleat alma Ceres campos, atque horrea messe
 Et Bromius dulci redolentes nectare cellas.
 Ipse autem caris semper stipatus amicis,
 Inter odoratum citrii nemus, inter & hortos,
 Suspiciens sacras Capitoli in colle ruinas
 In medio vaturn felices exigit annos.

IN CUPIDINEM PRAXITELIS.

HIC Amor Herculeæ sopitus pelle quiescit:
 Pulvinum capiti subdita clava facit.
 Has nunc exuvias præfert, magno Hercule victo:
 Pro pelle, & clava nunc gerit ille colum.
 At puerum Veneris somno, & sudore madentem
 Praxiteles Parium transtulit in lapidem.
 Tu vero, hospes, abi, aut leni dic verba susurro.
 Ne somnum excussum forte queratur Amor.
 Ille quidem abiecitque facem, abiecitque pharetram:
 Pro face, pro pharetra, clava timenda tibi est.

DE JULIO CÆSARE.

BELLA foris, Indosque domi exercebat & ipse
 Cæsar; magni etenim est utraque cura animi.

DE AMORE.

QUID speculas caræ fugio, quid testa puellæ;
 Quod sint Harpyæ perditæ amoris aves?
 Quid vito faciem, & cælestia lumina ocellos:
 Demens, quod validæ sint in amore faces?
 Congressumque omnem, & verborum mollia vincla?
 Quod misero miri sint in amore lupi;
 Ceteraque heu nimium quod sint ursique, lezque,
 Menalique canes, Armeniæque tigres?
 Sic quoque dum fugio, cœcis licet abditus antris,
 His ipsis mediis queis latco in tenebris,

Inqu-

Innumeras Ætnas, patior, Scyllasque, Charybdesque,
 Et quæ durus amor præterea omnia habet.
 Quare agite, in lucem vigiles procedite curæ,
 Et qui mi pallor plurimus ore sedet.
 Huc lacrimæ, medio ducta huc suspiria corde,
 Huc qui me æterni conficitis gemitus,
 Ite agite huc mecum; dominaque sub ora protervæ,
 Sub sævos oculos nos periisse juvet.
 Quandoquidem fiet spectando mollius omne id,
 Et vita demum suavius hac misera.
 Nam si etiam solum hæc monstra omnia circumval-
 lant,
 Testis io saltem sit necis illa meæ.
 Illa, graves Nemesis quæ vel tum forsitan iras,
 Ultioresque timens in sua fata deos,
 Hic vere, posito jam fastu, dicet, amabat:
 Et dabit in cineres ultima dona meos.
 Protinus hæc manes tum fama sequetur ad imos,
 Ac me jam campis liberum in Elysiis,
 (Stultitiæ ah tantum est fatuo hoc in amore) juvabit
 Illud nescio quod munus inane regi.





ILLUSTRIUM ALIQUOT POETARUM

C A R M I N A

AD CASTILIONIUM

VEL DE CASTILIONIO.

BENEDICTUS LAMPRIDIUS,

BALTHASSARI CASTILIONIO.

QUID cessas ? age dum cingere Cypria
Myrto & tu nidas , CASTALIO , comas ,
Et paulum abjice magnas
Curas rege super tuo .
Non semper madidis Iuppiter imbribus
Terras & trisidis fulminibus petit :
Nec lux permanet alma ,
Sed noctis vice pellitur .
Si Mellina nihil te domus afficit ,
Et fontes possis ordine Medicis
Pomis , & specula , omnem
Unde urbem licet aestimes :
At Tyrrhena , brevi fronte , oculis nigris ,
Nigro crine , parat quæ tibi dulcia
Doffis carmina chordis ,
Et vocis liquida sonos ,
Tangat ; te cyathis en vocat Angelus
Ter ternis , juvenum nobilium decus :
Non contemnere Musas
Te vatem decet impares ,
Vates incolumis maxime sæculi :
Te fas ante alios ducere Liberum :
Ingenti Ennius ore
Dicturus grave prælium ,
Victos & populos , imbuerat prius
Se vino ; duplicem potus Ulyssæum , &
Troja funera Homerus
Divinis cecinit modis ,

JO. ANTONIUS FLAMINIUS
FOROCORNELIENSIS

Epigrammatum lib. III.

AD ILLUSTREM BALTHASSAREM
CASTILIONEM

Nebulariæ Comitem.

Inclyte magnorum cœtu numerande virorum,
Quos præsens ætas non tacitura videt,
BALTHASAR ingenuis præfulgens arcibus, & quem
Illustrem populis utraque lingua facit
Dicere te vellem, nostrisque sacrare libellis,
Cresceret, ut famæ jam tibi partus honor:
Sed labat ingenium; gravitate est ponderis impar
Materiæ cœptum fertilioris opus:
Dotibus insignem dum tot videt, ac simul optat,
Obstupet, ac numerum dicere Musa nequit.
His Rex commotus Gallorum te colit, atque
Vulgata illustrem per loca laude facit,
Rex quoque te simili complexus amore Britannus
Insignem clari torquis honore facit.
Quid referam Urbini quo te Dux legit honore?
Ut lectum ex cunctis jufferis esse suum?
Non eget indicio nostræ clarissima vocis
Laud tua: & id nostris viribus obstat onus.
Si tamen est aliquid voluisse, hoc inspicere Carmen:
Hinc animum; id magni muneris instar eris.

M. ANTONII FLAMINII
ECLOGA THYRSIS.

Menalcas. Thyrsis.

Forte super tenero projectus gramine Thyrsis
Pascentes vario mulcebat carmine tauros,
Et virides pulchram resonabant Phyllida silva;
Cum tenuis prima indutus lanugine malas
Affuit, & tristi sic cœpit voce Menalcas.
Menal. Ipse quidem molli dum captas frigus in umbra,
Et tenerum fragili deducis arundine carmen,
Nos heu perpetuis objecti flustibus olim

Ja.

*Jaſſamur, vacuaſque errando ducimus horas ?
Ex quo præruptis veniens ex alpiſus imber
Affluſus lætas ſœdavit grandine terras,
Quos inter placido percurrit Meſu'us amne
Cæreoleos denſa prætextus arundine crines.*

*Thyrſ. Nos quoque diluvio ex illo rerum omnium egeni
Fugimus: at dives parvo poſt tempore Mæris
Hoſpitio excepit grato, armentique magiſtrum
Eſſe dedit, paſtaſque etiam numerare capellas.
Et nos Phyllis amat miſere formoſa puella,
Quæ Satyros calamiſ, Phœbumque laceſſere voce
Audeat: hanc multos nequicquam aſſiſſe per annos
Alconem fama eſt, cui quinq; armenta per herbas
Et biſ quinque greges altiſ in montibus errant.*

*Menal. Deſine plura, puer: fuit & ſua cura Menalcæ:
Nunc Veneriſ flammæ, teneroſ nunc odiſ amores.*

*Thyr. Nos equidem terras alio ſub ſole jacentes
Ibimus, & Libyæ ſterileſ muſabimus agroſ:
Ipſa tamen domine proſugum ſectetur imago,
Formoſamque omneſ reſonabunt Phyllida ſilvæ.*

*Menal. At memini cum forte gravis contagia morbi
Invaſere tuas bruma veniente capellas,
Formoſam nullæ reſonabant Phyllida ſilvæ.
Te felix pleno circumſtat Copia cornu:
Ab dolor! ipſe famem dura vix glande repello.*

*Thyr. Ergo ubi funereum in cinerem pallentia membra
Solverit atra dieſ, Stygiamque innatimus undam,
Si quiſ amicitia ſenſuſ tellure ſub ima eſt,
Inter feliceſ animas, & Diva regna,
Tunc etiam noſtrum cantabit fiſtula Mærim.
Ille ſui pecoriſ curam mihi credidiſ, illi
(Quod mirere) etiam multum mea carmina curæ.
Nam cum Caſſategi pratiſ Corydoniſ ad ulmum
Lyſſius alterniſ mecum certaviſ Anyntaſ;
Judicio illiuſ viſſuſ mihi ceſſiſ Anyntaſ,
Depoſituſque etiam mea fiſtula retuliſ agnum.*

*Menal. Fortunatè puer nimium, tu ſi bona noriſ!
Hic inter gelidoſ fonteſ, & paſcua læta,
Et denſaſ coryloſ, ſacraque examina quercuſ
Felicem vacuo traduceſ pectore vitam:
At noſ per varioſ caſuſ miſeranda ſequemur
Exſiliuſ, & toto feſſi jaſſabimur orbe?
Nec dabitis finem, crudelia facta, laborum?*

*Thyr. Non ſemper gelidiſ effundiſ nubibuſ imbres
Juppiter, aut vaſti ſeriuſ cava litora fluctuſ
Semper, & iratiſ ſtridentiſ Aquilonibuſ aura.
Tu quoque veſano finem ſperare dolori
Aude, hoſpeſ, forſan miſerum meliora ſequentur.*

Me-

Menal. *Alta prius certos requiescent flumina cursus ,
Grataque pascentes fugiens virgulta capellæ ,
Quam Fortuna modum nostris imponere danais
Annuat , inceptumque velit mutare tenorem .
Hoc nobis quondam memini prædicere Mopsum ,
Cum mea bis septem nondum ætas viderat annos .
O pecus , o dulce quondam mea cura capellæ ,
E semper teneris vernantia floribus arua ,
Vos ego non aliquo infelix post tempore visam ?
Inque peregrina moriens tellure recondar ?
O potius subito pigra telluris hiatus
Devorer , aut magno pro munere solus in altis
Exponar silvis Numidarum præda leonum .*

Thyr. *Huc ades , o miserande puer : jam vespere Olympo
Surgit , & alma dies primæ decedere nocti
Incipit , errantes herbosa ad flumina tauros
Ducam ego , mox saturos cogemus ovilibus agnos .
Hic poteris nostrum post cœnam visere Moerim ,
Illius & verbis aliquam sperare salutem .*

LIVIVS GREGORIUS GYRALDUS

*Epistola , in qua agit de incommodis , quam
in direptione Urbana passus est ; ad
Antonium Thebaldeum .*

N *Augerius procut Italia per Bœtica regna ,
Cæsaris observans aulam , mandata Senatus
Ipse sui exsequitur : doctrinamque æquat agendo .
Una ibi CASTALION (proh dii , quantum instar in
uno hoc !)
Musarum pius hic cultor Phœbique , sed idem
Ingens ingentis fuerat Mavortis in armis :
At simul ante diem Lachesis fera stamina rupit
Hippolytæ , optavit nivea cum veste sacerdos
Cœlebs vivere , non ullosque pati hymenæos .
Hoc minus infelix , oculis quod fata videre
Non fera CLEMENTIS , nec patrum contigit illi .*

FRANCISCUS ARSILLUS SENOGALLIENSIS

Libello de Poetis Urbanis inter † Coryciana .

C *ASTIONUM annumerem quos inter ? Martis
acerbi ,
Num Phœbi , an Veneris te rear esse decus ?
Miles in armis ferox , & amata in virgine mitis ;
Hinc molles eleges : hinc fera bella cano .*

JOAN.

JOANNES PLAZONIUS

De Balthasare Castilionio.

MAntua dives avis, sed ditior illa poetis,
 Quos inter primos maximus ille Maro.
 Non tamen inferior multo tu, culte poeta
 CASTILIO, clavis regibus orte tuis.
 Sed titulos gentemque tuam tam stultus avitos,
 Qui teneris Musis praeferat, ecquis erit?

BASILII ZANCHI ECLOGA

Cui titulus DAMON, sive BALTHAZAR
 CASTALIO, ex V. Poematum Libro.

Lycidas. Thyrsis.

Quid tantum insano fœdantem pectora luctu,
 Funesta te, Thyrsi, juvat tæbescere in umbra
 Illicis? en pecudes nullo custode per herbam
 Pascuntur, errantque suis cum matribus agni.
 Nec nomen late clarum Nefidos ad auras
 Antra doces jactare, & pictas gramine ripas;
 Sed tantum tristes referunt nemora avia cantus,
 Tristiaque argutæ responsant carmina valles.
 Dic, luctus quæ causa novi, carissime Thyrsi?
 Dic age, qui mœsto tanti sub corde dolores?

Thyr. Ah dolor, ah lacrimæ singultibus interruptæ!
 Ipsa nequit superas vox agra erumpere ad auras.
 Ah miser, ante diem, merita nec morte peremptus
 Occidit, & longo clausit suæ lumina somno
 Infelix Damon, crescat dolor, & lamenta.

O mecum luctus, auræ, ingeminate recentes.

Lycid. Prob facinus! carumne mihi mors abstulit,
 heu heu

Impia mors Damonem, & funere mersit acerbo?

Thyr. Heu periit mea vita, animæ & solatia nostræ?
 Heu periit Damon, crescat dolor, & lamenta.
 Nec mirum, o Lycida, primis data signa diebus
 Hoc ante exitium; liquidos avertitur amnes
 Immemor herbarum quadrupes, & crebra querelis
 Frondiferum nemus, & saltus, & pascua complet.
 Quin etiam patrios præterlabentia fines
 Flexerunt retro mœrentes flumina cursus.
 Ipse autem fractis, imò caput abdidit alveo
 Cornibus, & viridi circum stillantia musco

Ab.

*Abrupit fersa, & glaucos discidis amictus
Mincius, effundens latices, urnamque patentem
Implevit vivo lacrimarum: & candida circum
Pectora foedantes pugnis, atque unguibus ora
Ceruleae comites, scisso per colla capillo
Fleverunt patrias mulcentem cantibus undas.
Et nivei in ripa cecinistis flebile eyeni.*

*O mecum luctus, auræ, ingeminate recentes.
Vosmecum lugete, & amarum intendite fletum,
Pastores, si qua est pietas, si funera tangunt
Damonis; vestri spes & solatia Damon,
Damon pastorum decus ingens, cui juga sæpe
Nimbosi Apennini, cui Saturniæ & arces
Demisere caput cantanti: ad carmina, cautes,
Venistis, rigidaque, altis de montibus, orni.
Dumque ille egregias laudes, & facta LEONTIS
Personat, insonsi referunt ad sidera montes
Egregias laudes: Primus tu pascua nobis
Restituis: tu sidera demissus ab arce,
Præsidium fessis rebus, dum tu, optime patrum,
Terrarum late ingentes moderaris habenas,
Aurea sublati remeabunt sæcula bellis.*

*Hei mihi, jam carmen suspiria interrumpunt!
Hæc igitur mihi spes, hæc & solatia dira
Liquisti, o Damon? longum sine fine dolorem,
Et vanum desiderium, & suspiria de te
Liquisti, o longa jucundior unice vita.
Vellera cum setis aries mutaris, & hircus
Velleribus setas, dolor & suspiria me me,
Ah miserum! me me linquent, curæque sequætes.
Crudeles superi, crudelia sidera, nunc me,
Me quoque nunc Sygias comitem detrudite ad un-
das.*

*Nam quid ego, heu, sine te, Damon, dulcissime Damon,
Heu quid agam miser? aut vitæ quæ gaudia queram?
Te moriente omnis vivendi erepta voluptas.*

*Hei mihi, jam carmen suspiria interrumpunt!
Quis igitur capisi lymphas, heu quis dabit aros
His oculis fontes lacrimarum, ut plurima tristes
Abluat unda genas, tellus vicina madescat?
Vos gelidi fontes, vos mollia prata, valete:
Dulcia rura, valete; vale simul, optima Phylli,
Vos umbræ altorum nemorum: non amplius a me
Delectet vacua carmen luisse sub umbra.
Vivite jam fontes, & pascua, vivite silvæ:
Vos cantus, & plestra juvent, mollesque chora,
Nymphæ noster amor: nos & suspiria, & acis
Singultus, lacrimæque decent, & funera tristes.*

*Hei mihi, jam carmen suspiria interrumpunt !
 Cur sine me Elysia, Damon, spaciare sub umbra
 Concessum ? & sine me sacros ediscere cantus
 Ædonis ? quem Parthenope, quem carula Siren
 Jam dudum obstupuit, summi cum saxa Vesævi,
 Et Gauri socio resonarent antra favore.
 Incultum solis in rupibus exigere ævum
 Amenssem jubet ipse dolor, Damone perempto,
 Donoc sæva meos tandem mors solverit artus,
 Invisam & dederit nobis abrumpere vitam.
 Non tamen ante mihi torpentia lumina morte
 Languescunt, tibi quam, Damon, pia funera solvant
 Constituam & tumulum, & tumulo sollemnis mittam.
 Pastores mecum certis altaria donis
 Et statuent, mecum & cineri fragrantia dona
 Infundens herbas adulescentes, & benivolens thus.
 Hic mecum formosa etiam tua cura Lycoris,
 Naidæ & mœstis percussa pectora palmis,
 Flavescentes solvens crines, & busta profusis
 Conspergent lacrimis, & femineo ululatu :
 Placabuntque pios manes, & carmina dicent :
 Quæ quondam edocuit niveas laniata papillas
 Mœsta Venus, Pharii quum funera fieret Adonis
 Æternum & salve, singultibus intermistis,
 Æternumque vale, dicent, o maxime Damon.*

JULII CAPILUPI

Cento ex Virgilio

IN COMITEM

BALTHASSAREM CASTILIONEM.

PROter aquam, tardis ingens ubi flexibus erras
 Mucius, auratus taurino cornua vultu,
 Per te ducta viros, multos servata per annos
 Stat fortuna domus, & avi numerantur avorum :
 CASTILIAM vocat, & lætam cognomine gentem
 Mantu dives avis deducit origine nomen.
 Ipse OMES, fama multis memoratus in oris,
 Jam rem consiliis habitus non futilis auctor.
 Aulæ in medio quondam dum vita manebat,
 Ipse gubernator populos in pace regebat.
 Jura dabat legesque viris ; moresque sinistros,
 Et qui quemque modo fugiatque feratque morantem ;
 Antiquasque domos, aulas, & limina regum.
 Ingressus : quæcumque viam virtute petivis.

Amo

*Ante omnes multa insignem se reddidit arte
 Præcipue in duri certamina Martis euntem .
 Ipse suas artes , sua munera lætus Apollo
 Donat habere viro , quo non felicior alter ,
 Threicia fretus cithara , fidibusque canoris
 Dum canit , & mœstum Musa solatur amorem .
 Quid memorem , (sunt hic etiam sua præmia laudi)
 Carmine quo captæ dulces ante omnia Musæ
 Attonitis hæere animis ? divine poeta ,
 Quæ tibi , quæ tali reddam pro carmine dona ?
 Namque canebat , ut auleis regina superbis
 Quæ totam late jam tum ditio premebat
 Ægyptum , geminosque premeans eliserit angues
 Illa manu , ut pulchram properet per vulnera mortem
 Coniuge præcepto , pectus signata cruentis
 Stabat acerba fremens , mentem turbata dolore ,
 Inuisam querens quamprimum abruptere lucem ;
 Pectore in aduerso graviter spirantibus hydrys ,
 Procubuit ; sic sortitus non perculit ullos ,
 Non vires alias , Romanorumque triumphos :
 Nec victoris heri terigit captiva Penates .
 Hoc virtutis opus , lævi de marmore totum
 Infelix simulacrum ; oculis mirabile monstrum ,
 Munera , reliquias antiquæ laudis , & artis ,
 Delicias domini Romana palatia servant
 Hinc inter densas corymbos , sedesque beatas .*

A N T O N I U S C E R U T U S

I N C A M I L L I C A S T I L I O N E I

*Balthassaris Filii , & Catharinæ Mandellæ
 Epithalamio .*

H*OS , inter splendet cœu sidera Luna minera ,
 Pater refulsit BALTHASAR ,
 Deliciæ Regum qui diffus , parteque ab omni
 Virtutibus resplenduit .
 Illius haud cessant claros celebrare labores
 Et lætitare Principes .*

J O . M A T T H Œ U S T O S C A N U S

*In sua Carminum Illustrium Poetarum Italor.
 Collectione .*

U*T patriam , sic ingenium , Musamque dederunt
 Fata tibi , sed non otia Virgilii .*

Quod

*Quod nisi castra fores regum sectatus , & aulam .
 Dum simul hos dextra , consilioque juvat ,
 Carmina tunc magni poteras aquare Maronis ,
 Ut nunc ingenii pondere , sic numero .*

IDEM TOSCANUS IN PEPLO ITALIÆ .

BALTHASAR CASTILIO .

UT patriam , sic ingenium , Musamque dederunt
Fata tibi , sed non omnia Virgilii .
Nam regum tu testis modo , modo castra frequentas ;
Ut simul hos dextra consilioque juves .
Cum gemino jactet se Mantua poëte Marone ,
Est tamen huic placeas qua sibi parte magis :
Quippe virum ante alios deceat qui principis aulam
Exprimis & vita , fingis & eloquio .

MARCHUS STICHINUS .

DE BALTHASSARE CASTILIONIO .

CASTILIONEUM , quo Mantua lata superbis ,
CASTALIDUM o Pindo turba canora canat ,
Non satis herois divini maxima facta ,
Nec bene , mortalis dicere lingua potest .

F I N I S .

N O I

RIFORMATORI

Dello Studio di Padova.

COncediamo Licenza a *Giuseppe Remondini* Stampator di *Venezia* di poter ristampare il Libro intitolato : *Hieronymi Fracastorii, & Marci Antonii Flamini Carmina &c. ristampa*, osservando gli ordini soliti in materia di Stampe, e presentando le copie alle Pubbliche Librerie di Venezia, e di Padova.

Dat. li 29. Ottobre 1781.


(

(*Alvise Vallarezzo Rif.*

(*Girolamo Ascanio Giustinian Cav. Rif.*

Registrato in Libro a Carte 24.
al Num. 230.

Davidde Marchesini Segr.



Handwritten text, likely a signature or name, appearing in the lower center of the page. The text is heavily obscured by dark ink smudges and is difficult to decipher.

A Di S Pennaro 18 1/2 in
Napoli

Antonio Jannelli
P.

Antoon



UNIVERSITY OF MICHIGAN
3 9015 05855 8415

HR A

9015 01815846 2D

